



رواية

أحمد إبراهيم
ب

الكتاب: سَرياز
المؤلف: أحمد إبراهيم إسماعيل
الغلاف: كريم آدم
التدقيق اللغوي: إيمان الدواخلي
رقم الإيداع: 2014/7869
ردمك: 3 - 02 - 6471 - 977 - 978

الإشراف العام ومدير قسم النشر	مدير التوزيع
فتحي المزين	منال المزين
01282288056	01270982908

التجهيز الفني: مكتب الأمل
أ / حسين الحماقي
01006674335



جميع الحقوق محفوظة للناشر

وأي اقتباس أو تقليد، أو إعادة طبع، أو نشر دون موافقة كتابية
يعرض صاحبه للمساءلة القانونية، والآراء والمادة الواردة
وحقوق الملكية الفكرية بالكتاب خاصة بالكاتب فقط لا غير.

العنوان: 6 شارع التحرير بالدقي، بجوار محطة مترو البحوث، الدور 19، شقة رقم 2002
البريد الإلكتروني: layanpub@yahoo.com - layanpub@gmail.com

سَرِّباز

عن أحداث حقيقية في حياة ثلاثة... عساكر شطرنج!

حكايتي مع الراوي... غريب الأطوار!

أحمد إبراهيم إسماعيل



• سَرُبَاز •

إهداء

إلى كد طلال عزوز على رقعة الشطرنج !

اعطهم القسوة يعطونك الطاعة الموقته

امنحهم الرحمة، يعطونك الحب الدائم وبه تنال الطاعة الدائمة!

قال غاندي، حين سأله أحدهم لماذا تكره الشطرنج، رغم أن كل

العظماء يحشونك:

لأنها اللعبة الوحيدة التي يموت فيها الضعيف لأجل أن يحيا القوي!

أُمُور لَا بُدَّ مِنْهَا قَبْلَ قِرَاءَةِ الرِّوَايَةِ!

- معظم شخصيات الرواية شخصيات حقيقية، موجودة بالفعل في عالمنا، بعضهم وافق على الظهور بأسمائه الحقيقية، وبعض آخر رفض إدراج اسمه، فتم استبدال الاسم باسم قريب نوعاً ما، مع الحفاظ على قوام شخصيته وما أحاط بها من أحداث. وفقط وحدك عزيزي القارئ، تستطيع التمييز بين البعضين بكل وضوح!
- الكتابات الخاصة بشخصية (إبراهيم) هي كتابات حقيقية، كتبها في نفس الظروف التي تضمنتها الرواية.
- حديثي مع الروائي مدرج في الرواية بخط مخالف لباقي المشاهد، منعا لأي خلط بينه وبين أحداث الرواية الأصلية.

أحمد إبراهيم إسماعيل

هل يمكن لوجه آدمي أن يكون لوحة افترشت على أنحائها
تفاصيل خريطة ما؟

ممم... سؤال غريب، لكنه قد يبدو منطقيا بعض الشيء في حالته
فقط. في الواقع، كانت خريطة زمنية، فوق العاجب أثر جرح قديم،
سجل حادثة ما.. تحت العينين تجاعيد، سطرت في صفحته تفاصيل
سنين مضت بثقل حملها.. عين يسرى انطبق عليها جفناها بصورة
شبه تامة، تراوغيها من حين لآخر بالنظر إلى عالم ربما غادرت صورهِ
قبل زمن بعيد. ممم... لا أعتقد أنني نسيت شيئا آخر، باستثناء بعض
شعيرات بيضاء في مقدمة الرأس وجانبيه، لن تضر كثيرا على كل
حال، لتكمل صورة ذلك الشيخ في... السابعة والثلاثين من عمرهِ!

كان جالسا كما لو صاحب الحياة في أعوام سبعين، انحناءة
ظهرهِ، طأطأة رأسهِ، نحول عودهِ، نظارته السوداء المحتلة نصف وجههِ
و... كرسي متحرك لاستقبال الجسد المشلول!

ربما اللافت للنظر أكثر، كان تلك المهابة النائلة من هيئته
قدرا لا بأس به؛ ربما لم يعد يملك غيرها بعد كل ما كان، إلى
جانب بعض الذكريات، التي أرغمتني على الجلوس بين يديه
لعامين كاملين، ينهل قلبي من بحر لسانهِ العليل.
- اسمك ايه؟

- أحمد ان شاء الله!

- تعرف ان العلامة اللي فوق حاجبي دي بسبب انى مرة اتسألت عن

اسمي قلت أول اسم بس؟

قالها باسماء، تنطق شاشة وجهه بمشهد قديم لمعت آثاره على

عينيه المريضتين، فبدأ كالهارب منه، فابتسمت مجيباً أحاول إنقاذه

من ذكره:

- أحمد إبراهيم إسماعيل

- جاي ليه؟

- جاي اسمع!

- تسمع ايه؟

- كل حاجة!

- يهمك؟

- لو ما يهمنيش ما كنتش جيت من آخر الدنيا عشان اسمعك!

- أشك!

- تشك في ايه؟

- انه يهمك أو يههمهم أو يهم حد!

- أنا ما عرفش تقصد مين بالضبط، بس ليه بتقول كده؟

- لو يهمكم كنتوا اتحركتو ساعتها!

- ساعتها؟...ساعة ايه؟

- ساعة العرّكة!

- مش فاهم حاجة!

- ولا هتفهم!

- طب فهمني!

- عندك استعداد تسمع كثير؟

- طبعا!

- كل حاجة؟

- كل حاجة!

اعتدل في جلسته على نحو بطئ، يناسب شلل حركته، ينظر بعين اليمنى نصف مفتوحة، عبر شبّاك مفتوح، كأنما يشاهد أحداث فيلم تعرضه إحدى الشاشات في سحابة ترقد هناك في أفق لا يراه غيره، في حين أخرجت قلما وبعض الأوراق لأبدأ التدوين، قبل أن يستوقفني بقوله:

- انت بتعمل ايه؟

- هاكتب؟!

- هتكتب ايه؟

- اللي هتقوله، هاحكىه للناس واوصل صوتك انت واللي معاك!

زفرآهتة حارة، انتزعها من اعماقه، محادثا بصوت تجسد فيه الحزن
بكامل سطوته، وقد طأطأ رأسه للأسفل من جديد:

- قصدك اللي كانوا معايا!

- ماتوا وللا اتخلوا عنك؟

- شكلك هتتعبنى معاك

ابتسم متكلفا من جديد، فأجبتة وعلى شفتي ذات ابتسامته
المتكلفة

- احم...عندك مانع لو نشرت الأحداث دي في رواية؟

- رواية واحدة؟! دانتا طيب قوي

ابتسم ساخرا فأجبتة:

- روايتين خمسة عشرة زي ما انت عايز، بس المبدأ نفسه عندك

اعتراض فيه؟

- مابقتش تفرق!

- هي ايه دي اللي مابقتش تفرق؟

- لا ماتخدش في بالك!

- مش شايف انك غريب شوية؟

- مم... يمكن!

قالها ببرود مستفز، قبل أن يكون رده متغاضيا عن السؤال:

- شايف انك هتوصل الكلام صح؟
- مش هاوصل غير اللي هيتقال على لسانك!
- ابتسم من جديد ساخرا يقول:
- سمعتها كتير قبل كده!
- مش شايف انه ظلم انك تحكم علي من تجارب ناس تانيه؟
- يمكن، عموما انا هاحكيلك...على الله بس ماتبقاش زيهم!
- زي مين؟
- الغريان!
- غريان مين؟
- هتعرف لما أحكي!
- طب احكي!
- بتعرف تلعب شطرنج؟
- ايوه، بس ايه دخل ده في موضوعنا؟
- هتعرف برضه لما أحكي!
- طب مستني ايه ماتحكي!
- لاعبني الأول
- ألاعبك ايه؟
- شطرنج!

رغم غرابية أطواره، المتمثلة في هدوءه المستفز وألغازه التي بدت أكثر ملاءمة لينطقها لسان أحد المختلين، إلا أن شيئاً ما مازلت أجهله دفعني للاستمرار.. شيء لم أعلم يوماً حقيقة هويته، رغم كل ما مضى من سنوات على جلستنا الأولى. لم يكن أمامي إلا الانصياع لرغبته الغريبة تلك (هكذا بدت لي حينها)، أشار إليّ بنظره إلى رف خشبي، في مكتبة توشك أن تنهار، يجاورها بيانو قديم رابض ككهف مهجور في حضان جبل تسكنه الأشباح، على جانب الرف تريعت رقعة شطرنج شاخت قطعها بشيبة التراب. التقطتها ببطء حرصاً على عدم الدخول في أي شجار مع ترابها، إلا أنه كان مصمماً على خوض المعركة. كحة استمرت ثوانٍ، أتبعها بإزالة آثار التراب من على ملابسي، قبل أن أضع الرقعة على طاولة بيننا:

- أبيض وللا اسود؟

- أبيض... عمري ما خسرت وأنا بالعب بيه!

ضحك ساخراً، ثم همس لنفسه:

- مسكين!

- بتقول ايه؟

- ولا حاجة... وأنا اسود!

- انت ممكن تتكلم واحنا بنلعب على فكرة!

- مستعجل؟!
- عايز اكسب وقت مش أكثر!
- تحب نبداً منين؟
- ياريت لو من أول الحكاية!
- ياااه، هترجعني لورا كتير قوي!
- مش شايف ان الموضوع يستحق؟!
- عندك حق.. بطله كمان يستحق كتير قوي!
- بطله؟... مين؟
- سرباز!
- مين؟!
- سربازاااااااااا!
-وهكذا... بدأت حكايتي معه!

الحركة الأولى

وخافوا
إن هذا الشعب حمالٌ
وأن النوق إن صُرمت
فلن تجدوا لها لبنا
ولن تجدوا لها ولدا

هشام الجخ

- أحد المجمعات الطبية العسكرية... الأول من نوفمبر ٢٠١٣!
تلك المساحة اللعينة من الذاكرة، المزدحمة بصور لن تختفي..
ولن تعود!

تكتفي فقط بالبقاء أسيرة لذلك البرزخ في ذكريات صاحبها، بين جنة
العودة وجحيم الاختفاء، تستقطب إليها كل ذكرى يتمنى صاحبها انضمامها
لأحد المعسكرين، فينعم بلذة الرجوع أو راحة النسيان، مستمتعة بإضفاء
تلك الغلالة السميكة من العذاب على طبقات المخ الثلاثة!

هكذا حدثت نفسه حاملة الذكريات أسيرة البرزخ، وهكذا بادلت
النفس وذكرياتها الحديث، كأنها المستمتعة بجهاده عديم الفائدة لتحرير
ما قُيد من صور مضت، تاهت بين دروب العودة وصحارى الرحيل!

كانوا هناك، سجناء إحدى الصور، يقاومون سجن حدودها
بصحبتهم داخلها، ويتحدثون أسر قدمها باجتماعهم فيها، لا زال ذاكرة
يوم رحيلهم، وسيظل. رحلوا لعالم الأموات ذات يوم، تاركين ذكراهم
المتجسدة في تلك الصور غريقة البرزخ اللعين، تتفنن في إيلاام ذلك
الوحيد بين السجناء الباقي في دنيا الأحياء.

أما عنها، فكانت في الصورة التالية، تصارع أنقاض حلم قديم
ضائع، بابتسامتها الآخذة في الخفوت، وإن ظلت على حالها من
الاحتفاظ بلمعان ذي مصدر خفي.. تصارع للرحيل، ويصارع للعودة،

فيتهي الصراع بسقوط الصورة إلى جوار أخواتها، بين فكي برزخ آخذ في الاتساع.

بدت الصور وأصحابها في تواليها على تلك الذاكرة المسكينة أشبه بآنية السواقي، تدور حول محور خشبي بائس، تلمع تارة على السطح وتندثر أخرى في القيعان، وإن ظلت مع اللمعان والاندثار باقية بقاء الدهر، المستمر حتى قيامه صاحبها ورحيله إلى أبدية الآخرة!

- إبراهيم... إبراهيم!

قالها ذلك المهرول إلى عنبر (٤) الخاص بالسرية الطبية للمعسكر، تكاد هرولته تقتلع قلبه، أسير نبضاته الآخذة في التلاحق، من عقاله بين ضلوعه، وقد أبهمت أنفاسه المتلاحقة الملفوظ من نداءاته، يأتيه رد ذلك الغارق في حديث نفسه وذكرياتها المفترش إحدى أسرة العنبر في فزع، وقد حررته نداءات صديقه من رقاده، فطوى صفحات ذكرياته، وأخفى ما تحويه من سطور أحباب راحلين، ناظرا من وضع الجلوس إلى مناديه الفزع قائلا:

- عبد العاطي.. مالك يابني في ايه؟

- ما عرفتش باللي حصل؟

- ايه اللي حصل؟... منظر ك بيقول ان فيه كارثة!

- هي فعلا كارثة، الجيش كله مقلوب!

- كارثة...؟ كارثة ايه؟

- الكارثة مش في اللي حصل وبس، الكارثة في اللي عملها!

- اخلص يا عبد العاطي من جو الأفلام ده؟... تقصد مين؟

- صاحبك العسكري الصعيدي!

تلقاها (إبراهيم) من صديقه، فانكملت لها ملامحه، كأنها
المرسومة بفرشاة صغير يعبث ببعض أوراق رسمه وألوانها في غضب،
بعدها منعت أمه حلواه، فنفت غضبه في لوحاته. لمعت في ذهنه صورة
ذلك الصعيدي المذكور باسم في أول لقاء جمعتهما، تردد في أسماعه
أصداء تلك النبرة لمعرّف بنفسه، حين صافحه أولى المرات:

- طلال... اخوك طلال عزوز يا باشا، تجدر تجوللي أبو العز،
بينادوني كده حدانا في البلد، أنا أصلي زي مانتا شايف كده باين عليّ
ابن ذوات جوي!

قبل أن تقفز لسطح ذكرياته تلك الصورة الأخرى، ليوم جمع آخر
اللقاءات:

- أشوفك على خير ان شاء الله يا دكتور، ربنا معاك يا صاحبي،
شد حيلك كده عشان تبجي عسكري زين، بس أمانة عليك يا شيخ ما
تنسى طلال!

قبل أن يختم قوله بعناق لم يشهد مثله ذلك الصيدلاني المودّع!

أفاق إبراهيم من ذكرى مشاهد مضت قبل شهور لم تتم دورة
العام الكامل بعد، لا يسعفه لسانه بنطق شيء، غير أنه جاهده سائلا
في صعوبة:

- ت... تقصد طلال؟

- هو بعينه؟

- ايه اللي حصل بالظبط؟!

قرية العش... أواخر ديسمبر ٢٠٠٨ (قبل ذلك بخمسة سنوات)

تلك الفئة البشرية الساقطة من ذاكرة الزمان، لا يعلمون إن كان سقوط سهو أو أنه تعمد تعنت الحياة مع البؤساء من ساكنيها، لا يهتمون على كل حال بسبب السقوط، ظلوا سنوات مكتفين بانتمائهم لتلك الفئة المهملة من الكائنات كثيرة العدد، التي لا يعني وجودها أو فناءها شيئاً للحياة وصفوة سكانها، من ساتري عورات بواطنهم الفقيرة بأردية لظواهر زائفة، لم تتقن تلك الكائنات كثيرة العدد فنونها بعد!

لم يكن انزعاجهم نابعا من جفاء لوجبة عشاء لم تزرهم منذ سنوات ملؤا تعدادها فأثروا تناسيها على انتظار مجيئها الميئوس منه، أو صلابة لأرض استضافت فُرُشهم المهترئة، وأجسادهم التي قاربت جلودها على الموات، وأحلامهم المهاجرة من وطن عقلهم الباطن لأرض بعيدة لا يعرفونها ولا تمنحهم دنياهم الفرصة للمعرفة، فطالها النسيان كما طال الكثير من حقوقهم، التي باتت في عرف أيامهم أشبه بأمنيات عجوز بالعودة لدروب الشباب!

كان هيكلًا أسريًا فريد التكوين، نحيف ببساطة أحلامه، قوي بالرضا بما تحقق منها ومالم يتحقق، فكان بنحافة البساطة وقوة الرضا ذا تكوين رباني خاص، له أكبر الأثر في بقائه حتى اللحظة بين أحياء الأدميين.

حين يقتصر حلم الكبير على عدة جنيهاً، يضمن بها لأسرته إحدى الوجبات الثلاثة، فتغنيهم عن الآخرين - أو أنه هكذا يظن فيظنون - وتتلخص أحلام الصغير في ساعة راحة يقتنصها من ساعات عمل الحقول، يعود فيها لبعض طفولته المنهوبة في رمي البذور وحصاد محصولها، فأنت بالتأكيد تقصد هذه الأسرة هناك على مشارف القرية، حيث منزل رسمته رحمة الأقدار!

ساكنوه ستة، على رأسهم رجل أشرف على الهلاك عملاً والفناء همًا، ينادونه (عزوز المنشاوي) تولى مهمة هذا المنزل وسكانه الستة منذ سنوات لم يعد يلتفت لتعدادها!

كان فجراً معتاداً لا جديد فيه، قص شريطه ذلك القرص الذهبي المتوج على عرش الإمبراطورية السماوية، الناهض من فراشه متكاسلاً يحض الخلائق على النشاط، في تناقض اعتادت عليه الأرض، وبثته كل متعلق بأهدابها من تكوينات الكون الفسيح.

كعادتها، كانت أول المتحررات من قيود الوسن، محررة طيور أجفانها من أقفاص نوم ما زال مسيطراً بسطوته على الجميع عداها.

خطوات لم تتعد الخمسة، كانت كافية لانتقالها من طرف حجرة ضيقة ضمت نومتها ونومة ابنتيها دون الثانية عشر، إلى باب أدّى بخطواتها إلى صالة المنزل، الحاوية باقي النومات لأب وابنيه، تفننت في تخطيطهم حتى ذلك الباب الخشبي الموروث من ثلاثينيات الريف المصري، والمشوه فوق تشوه قَدَمِه بمزلاج قبيح ضخم، لا يعلم حتى الآن ماذا يحمي داخل هذا الكيان المسكين.

كما ينص روتينها وروتين أسرتها اليومي، وجدت أناملها تتلمس طريقها لذلك المذياع الصغير فقير الترددات، أدارت زره الدائري سجين صدأه، في نصف دائرة، في حساسية اكتسبت دقتها بالتردد عبر الأيام، ليصدح في جنبات البيت صوت عبد الباسط عبد الصمد بحنجرته الكروانية مرتلا:

« وَلَوْلَا إِذْ دَخَلْتَ جَنَّتَكَ قُلْتَ مَا شَاءَ اللَّهُ لَا قُوَّةَ إِلَّا بِاللَّهِ »..!

باتت وأسرتها يحفظونها عن ظهر قلب، وهي المترددة على أسماعهم كل صبيحة ليوم جديد، تلقين يومي لذلك الشريط العجوز، الذي لم يبرح يوما كهف مذياعه، مكتفيا بأداء دوره في رفع معنوياتهم من مخبئه ضيق الجدران، لا تكاد حروف الآيات تنسرب من جانبي المذياع، حتى تنكشف أجفان الجميع تباعا، في توافق فرضته عليهم فطرتهم ذات التكوين السوي.

توقظهم نغزات عقلهم الباطن، المتعلق بذكر الجنان، سواء كانت تخيلات حلم ليلي، أو واقع بعيد لن يأتي، أو ثالث الاختيارات بين الواقع والأحلام، حيث كلمات ربانية تبشر بالحلم على أراضٍ واقعههم الحزين. الطفلتان كانتا السابقتين للاستيقاظ كالعادة، وقد أقلقهما استيقاظ أمهما، فخرجتا تتحسنان وجودها بحثاً عن أمان معنوي يعني لطفولتهما الكثير. تناوب الجميع بعدهما على طرق باب الاستيقاظ، فنهضوا تباعاً يفكون بقبضاتهم الكسالى لو غاريمات أعينهم المتشعبة بساعات كافية من نوم بسيط الأحلام، يُعد الشيء الوحيد الذي يحصلون منه على القدر الذي يريدون.

تباطأ كالمعتاد في مغادرة أسرة التكاسل عن باقي أفراد أسرته.. أخذ يحاول عابثاً التظاهر بلحاقه بقافلة المستيقظين، وهو المتمسك بذبول نعاسه حتى آخر لحظات المعركة. تحفظه أمه عن ظهر قلب بطبيعة الحال، وتحفظ منه هذا التصرف اليومي:

- طلال... الساعة بجت ستة يا ولا، جوم الفجر شجشج من بدري، النهار خلص!

- يووووه يامًا، هو فيه نهار في الدنيا بيخلص الساعة ستة الصبح بدمتك ودينك؟

- جوم يللا بلاش لماضة!

- صاحی یا مّا... صاحی والمصحف... صحی انت صابرة لؤل بس.

- صابرة صحيت من بدري أهى، طلعت أجدع منك يا كسلان.

• • • • • —

- طلالوولل!

- حاضر یا مّا، حاضر، ادینی صحیت اهو، روحی بس انت جهزی

طبخ الفول التمام كده عشان نفطر وأني جاي وراك طوالي.

- ماشی، لما نشوف!

لم تكد الأم الباسمة تولي ظهرها لصبيها الحائر بين يقظة ونوم،

حتى عاد لفراشه من جديد، تلا حقه كلمات أمه العالمه مسبقا بمؤامرتة

لإبعادها، من خلال مخرجه اليومي الوحيد (طبخ الفول)

- طلاااااا... شايفاك يا نصاب!

صفة (نصاب) كانت اللفظة المحببة للسانها لوصف ولدها

المشاغب، ذلك الذي أزاح غطاءه الخشن ناهضا في حركة فجائية،

تحمل في طياتها ذلك النوع من الغضب الذي يسلكه المستيقظون

الراغبون في مزيد من ساعات النوم. تحب أمه رؤية تلك الحالة منه

على كل حال كل صباح، وهي ترقبه باسمه، تود لو تمنحه من ساعات

مراحاتها النادرة ما يستعين به على ساعات شقاء، لم يعرف أقرانه بعد أنه

متواجد في قواميس الحياة.

حاول جاهدا طرد ما تبقى من فلول نعاسه، ببعض من حركات
ذراعيه يدفع بها كتفيه للخلف دفعا، يتشاءب في ثقاقل وهو يرمق أمه
بنظرة عين واحدة، يستكشف بها الوجود حوله، قبل السماح للثانية
بانكشاف جفنيها، قبل أن يتوقف عن حركاته ناظرا لأمه في غيظ قائلا:
- صحينا أهو، حلو كده؟!

قول تلقته أمه بضحكة، كأنها المستوردة من سوق للضحكات في
عالم مثالي رائق، لم يشهد من شوائب البشريين سلعا، بعد كان ردها
من ولدها أسير غضبه الطفولي:

- بتضحكي؟... ماشي... طب والله ماني فاطر معاكم!

- جلبك هيطاوعك تسيب طبع الفول بتاع أمك؟

سمعها (طلال) فصمت هنيهة يفرك مؤخرة رأسه بإصبعيه، مغمضا
إحدى عينيه كأنه النادم على تصريح عنتري لن يستطيع تنفيذه، فترجع
عن عنتريته قائلا بصوت أخف حدة:

- بصراحة يعني... هو أصله... انت يعني بتمسكيني من يدِّي اللي

بتوجعني؟

- اسم الله عليك، هو كيف ماننا جُلت اكده، بامسكك من يدك

اللي بتوجعك!

قالتها تتصنع تلك الهيئة من الجدية الساخرة، تغيظ بها ولدها

الذي ضحك لمغازلتها الصباحية المعتادة، ناهضا باتجاهها وقد خلّفت الضحكات بسمة ارتسمت على ملامحه في عمق، طابعا بشفتيه المكتنزتين قبلة على جبينها وأخرى على يمينها، عائدا بنظرات عينيه الزائفتين وسط وجه أسمر شغل فيه كل ملمح من ملامحه جزءا لا بأس به قائلا:

- صباح العسل يا ست الكل.

- صباح الفل والياسمين على عينيك الحلوين يا حبة عين ست الكل.
قالتها تبادلته ابتسامته البريئة، بقرينة لها ملائكية تتبع قولها ببعض من الأذكار، توارثتها عن أمها الوارثة بدورها جدتها، قبل أن تحتضنه مقبلة إياه بين عينيه، قائمة لإعداد (طبخ الفول) الذي تنتظره أجواف الجميع انتظار التائه لهادي الدروب، قبل أن يلحق (النصاب) بقطار عائلته، ينتظر دوره في دخول الدّورة (بضم الدال، كما يحبون تسمية الحمام في إشارة إلى دورة المياه) متطلعا إلى وقفته مداعبا ذلك الصنبور القديم، الذي يبثه ماءه في عشق متبادل لا يستمر أكثر من نصف الساعة، قبل أن ينقطع ماءه لمعظم فترات النهار، يحنو عليه وعلى وضوئه الصباحي، الذي اعتاد بداية يومه به وبركعتيه المساهمتين الأساسيتين في سير يومه على حال من الراحة، يستعين بمجدافيهما على أمواج شقاء اعتادها واعتادته، عبر سنواته التي لم تتعدّ بعد الخمسة

عشرة (خريفا).

مضت بالبؤساء الستة الراضين دقائق وضوئهم وصلاتهم مريحة،
كعادة مضيتها قبل أن يلتف الجميع حول (طبيج الفول) المنتظر وبعض
من عيدان الجرجير الأخضر، اللامعة فوق وريقاته حبات الماء كأنها
مرايا العذارى. يحف وجبتهم بعض من أرغفة باتت ليلتها تفتersh
(مِسْنَة) بائسة إلى جوارهم، تغطيها تلك القماشة المقتطعة من رداء
قديم لأحدهم.

كُسْنة دقائق إفطارهم، مرت حاملة بعض مشاهدهم السابحة بين
تلك اللقمة تقتطعها الأم من رغيفها تسوقها يمينها إلى فم أحد الأبناء،
هذه (القفشة) يدير بها (طلال) راحة الحديث لجانبه الفكاهي، ذلك
السؤال القرآني من الأب لأحد أبنائه يعيد به الراحة للجانب الجدّي،
وهكذا دواليك حتى يودع (طبيج الفول) آخر سكانه من حباته ولقيماتها،
قبل أن ينهض الجميع إلى أكواب الشاي الدافئة التي أعدتها الأم مسبقا
خلال الإفطار، بمساعدة (وابورها) الصدي ذي الصوت المزعج
المشارك بإزعاجه حديثهم الصباحي، كأنه فردهم السابع، حتى بات
حديثه الدائم جزءا لا يتجزأ من أحاديثهم المتقطعة.

هكذا كانت الصورة الكاملة لصباح "عزوز المنشاوي" وعائلته
ذات الأفراد الستة، قبل أن ينطلق كل منهم إلى شقاء يومه، يحاول

وزوجته وأبناءؤه اقتناص أي لمسة من كهوف السعادة يصفونها على مشاهد حياتهم اليومية، تساعد قاربهم الهش يؤسهم القوي ببأسهم على عبور أمواج الحياة إلى حيث شاطئ يوفر لهم بعض الأمان، ما زالوا باحثين عنه أملين فيه.

كعادة (طلال)، انفرد بكوبه صاعدا إلى سطح المنزل، متجاهلا كل سؤال له عن السبب. خطوات بين الأربعة والخمسة كانت كفيلة ليصل إلى غايته، ذلك الركن البعيد، حيث فتحة صغيرة (بفعل فاعل) في جدار يوشك على الانهيار اليوم قبل الغد، جلس القرفصاء سريعا إلى جوار الجدار وفتحته، قبل أن ينادي على أحدهم بـ(طرقعة) أصابعه وصفير شفتيه متبعا إياهما بقول:

- ولا يا ريشة.. اطلع يلا أني طلال ماتخافش!

ثوانٍ من الصمت مرت دون ظهور هذا الـ(ريشة) الذي انتظر (طلال) إطلالته عبر الفتحة، فاستطرد قائلا:

- اني عارف انك لساك زعلان من ليلة امبارح عشان ماشجرتش عليك جبل مانام زي عوايدي، بس اعمل ايه طيب مانى راجع مالغيط مهدود نمت طوالي، على كل حال حجك عليّ يا سيدي أني محجوجللك.

ثوانٍ أخرى من الانتظار لم تسفر عن شيء، ساهمت في إثارة ملل

(طلال) وغضبه، فما كان منه إلا أن أدخل إصبعيه في فتحة الجدار، ملامسا ذلك الجسد الأملس مكتسي الشعر الأبيض، حتى تمكن أخيرا من ذيله، فجرّهُ للخارج قائلا:

- مادام مش راضي تخرج أخرجك أني بمعرفتي بجى ... آي بتعض؟ ... دي آخرتها يا ريشة؟، ماشي مش هأخذ على خاطري منك بردك واطلع أحسن منك، خد فطارك اهو يا سيدي!

قالها ناظرا لذلك الفأر الأبيض الصغير بحجم نصف الكف، المتقوق داخل حدود ذيله الملتف حول قاعدته، وقد أخرج من جيب جلبابه الأزرق الفضفاض المتواضع خيارة صغيرة وقطعة خبز عمل على تقطيعهما قطعا لا تكاد ترى، تصلح بالكاد لمعدة هذا المسكين، الذي يعتبره (طلال) من خاصة أصدقائه، منذ أهده إياه ذلك الصيدلاني الذي عمل لفترة في الوحدة الصحية للقرية، منذ عام وبعض عام. لم ينتظر ذلك الفأر (عزومة) صديقه، فانقض على ما وُضع أمامه شرها كأسد جائع، ما دفع (طلال) لقوله:

- دِلوك بجيت زين؟ ... طول عمرك بتاع مصلحتك يا ريشة الكلب ... أجولك؟ ... مانتاش شارب شاي، هاشربه لحالي!

قالها وأخذ يتلذذ بكوبه مغیظا صديقه الأليف، قبل أن يقوم سريعا يقول:

- اني هاستأذن بجى يا ريشة لحسن ورايا مشوار مهم، خلّص

وَكُلَّ وطوالي عالبيت (قالها يشير لفتحة الجدار) بدل ماحد يشوفك
ماناجصينيش فضايح... سلام يا صاحبي.

انتهى (طلال) من مشروبه الصباحي الساخن الذي يعشقه سريعاً
على غير ما اعتاد، واعتاد منه الجميع على رشقات بطيئة مسموعة
الصوت، تصاحب إحدى عينيه المغلقتين، يستدعي بكامل حواسه
الظاهرة والباطنة شيطان (المزاج) أو كما يسميه هو (الطاسة)، ناول أمه
الكوب الفارغ إلا من (تَفْلِه) بعدما نزل السلم في خطوات سريعة قبل
أن ينطلق لمصاحبة (مداسه)، ذلك الصديق اليومي المتهالك منطلقاً
إلى باب المنزل، قبل أن تستوقفه كلمات أمه:

- مش عوايدك يا واد يا طلال... على فين مستعجل اكده؟

- يوه يأمّه... لازم تعرفي كل حاجة يعني؟

قالها، وقد استدار لحديثها متأففاً بعض الشيء، تأتيه إجابتها

اللامبالية بتأففه:

- بطلّ لماضة وجول... رايح فين؟

- رايح الكانتو يا ستي... ارتاحتي؟

- تعمل ايه في الكانتو؟

- وهو الكانتو بيتعمل فيه ايه يعني يأمّه؟، هاشوفلي مداس زين

اشتره يكون صاحبه الأولاني اتجى ربنا فيه بدل الهلاهيل اللي أني

لابسها في رجلي ديّ!

- مداس مرة واحدة؟... والله والفلوس جريت في يدك يابن عزوز

المنشاوي!

- أو مال ايه يا عسل... ابنك بجى كسيب... السبوعين اللي فاتوا

دول بس اشتغلت في الغيط ييجي جد سبع تنفار لو حدي!

قالها معتدّا بنفسه، وقد داخله بعض من غرور طفولي، أعمل

ريشته في تقاسيم وجهه الأسمر، ما دفع ذلك الجالس في ركن المكان

الأيسر منفردا بكوب (شايه) يتابع تفاصيل الحديث بعين الساخر من

طرفيه، قبل أن يقرر المشاركة أخيرا بفمه المنفرجة شفتيه عن ابتسامه

مستهزئة من أخيه الأصغر، أتبعها بقوله:

- جال سبع تنفار جال... ناجص تجول إنك جمعت التسع

جراريط بتوع الحاج (مهنى) لحالك!

- خليك في نفسك انت واتلهي في كوباية الشاي اللي في يدك!

قالها (طلال) وقد تدفق الدم إلى خلاياه القتالية، محفزا إياها

لشجار على وشك البدء، أخدمته الأم بقولها:

- ابتدينا؟... نفسي مرة واحدة تجعدوا في مكان واحد من غير

زعيج وإشكال ومناجرة في بعض!

- هو اللي ابتدا!

قالها (طلال) مشيرا لأخيه الأكبر، وقد تجمدت عيناه الضائقتان المستظلتان بحاجبيه المتقاربين، تقابله نظرات باردة من خصمه الجالس محتفظا بهدوء جلسته، مبالغا في استفزازه بارتشاف رشفة مسموعة، أنهتها الأم من جديد قائلة:

- خلاص، حجك عليّ أني، أخوك وبيننا غشك ما يجصدش حاجة، يلا روح مكان ماننا رايح بس ماتتأخرش عالغيط عشان الحاج مهني ما ياخذش على خاطره مئيك.

- حاضر يا أمه... حاضر!

قالها وقد سبقها بزفرة اختناق، وأعقبها بإغلاق الباب خلفه في شيء من العنف المثلث بالتأفف، تلاحقه نظرات أخيه التي لازالت عالقة في شرك الارتياح لتعكير صفو أخيه، وسط نظرات لائمة للأم، حاولت بها انقاذ ولدها من شركه دون جدوى، وهو الذي أثر الاستسلام فعاد من جديد لكوبه الموشك على الفراغ مشيحاً بوجهه ونظراته عن وجه الأم ونظراتها!

ما كاد (طلال) يخطو خطواته الأولى خارج كهفه الشبيه بالمنازل، حتى بدأت تلك القذارات المتعلقة بثوب بهجته الناصع تغادره شيئاً فشيئاً، وقد أزالها عنه تلك النسائم المتلاحقة المقبلة على وجهه وصدره، تحتضنه كعزيز قادم من بعيد الأسفار. عادت إليه من جديد

ابتسامته، بعدما تحررت من قيد غضبه، ذلك الذي تركته على عتبة داره. حملته مشيته الوئيدة الثرية بخيالاتها عبر طرقات القرية وحقولها ذات الأخضر الأزهري، وهو يرافقها الهوينى كأب وصغيرته ذات الضفائر خرجا لتوهما في نزهة المكافأة بنجاح معتاد.

استمرت رفقته وقدماه مقداراً اقتنص من تعداد الزمن ثلث الساعة تقريباً، حتى وصل أخيراً لتلك الساحة الرملية على حدود القرية المشغولة بـ (الحُصُر) على مسافات متقاربة، يترأس كل حصيرة منها بائع حاول سيادة الساحة بجهارة صوته، وآخر رمى للسيادة بمطرب نداءاته، وثالث حاول اقتناصها بغرابة حركاته المصاحبة لجهوري الصوت وطرب النداءات، بدت الساحة من بعيد كخلفية نحل ازدحمت بروادها، المتلخصة آمالهم في الظفر بحذاء قديم لم تصل به قدما صاحبه الأول لحد التهلكة بعد، فيسوقونه هم لهذا الحد، بعد عمر يتحكمون في طوله أو قصره باستهلاكهم إياه.

تجلّى منظر (الحُصُر) من المنظر الرأسي المطل على الساحة، من تلك البقايا الجبلية المطلة على القرية، كما سِماطٍ ثري أقامه لفقراء قريته في ليلة رمضان قمرء، تجمعوا حوله في لهفة ينتظرون بدء المعركة المنتظرة إشارتها، من مئذنة قريبة متلاّلة بأخضر أنوارها المطلقة على صنوف الطعام، تعلن بأذانها الفاصل بين الليل والنهار

إشارة البدء.

تناثرت الأحذية على (الحُصْر) كأشلاء معركة تاهت هويتها في تشوهات وجوهها، ينتظرون من أهليهم الواقفين على جثثهم عصر ذكرياتهم عنهم، علَّهم يلاقون من بينها ذكرى تسعفهم بالتعرف على ذويهم من سائهي الوجوه!

وكان (طلال) كان الوحيد بين الباحثين في هويات الأشلاء، الذي يعرف هوية من يبحث عنه.. اتخذ طريقه بين السواد لتلك (الفرشة) في المنتصف، حتى انتهت خطواته أخيرا لطرفها المحدود بأحذيتها المتراسة بانتظام انصاعت له عشوائية أحجامها وألوانها وأشكالها، في اختبار نجح فيه وبقوة بائعها صاحب الأربعين عاما. أجال نظره بين البضاعة المتراسة، كأنه الباحث عن شيء بعينه، حتى أن عينيه قد أتمتا مسحهما المفصل للفرشة عدة مرات، وفي كل مرة تكتسب نظراتهما خليطا من تركيز رأسه وقلق قلبه، كأم أوشكت على الانهيار بعد ضياع ابن لها في سوق مكتظ، لم تفلح نظرات بحثها في إيجاد أي أثر لابنها المفقود!

- عم حسناaaaaaaaaaaaaاي!

قالها في شبه صرخة تملكها الغضب، انتبه له على إثرها جميع الوقوف، وقد تقارب لها حاجباه المُشكلاتان بالتقائهما الرقم سبعة، وما زالت عيناه تتقلبان يائستين فيما ضمته الفرشة من أشباه الأحذية، مما

دفع ذلك المنادى للالتفات له مبتسما في هدوء، وقد عرف سر ثورته الطفولية، قائلا في ذات الهدوء وما زال محتفظا ببعض من بقايا ابتسامته:

- صباح الخير يا واد يا طلال.. مالك صوتك عالي ليه يا لمض؟

تلقاها (طلال) في شيء من الخجل، فلجأ لإخفائه برد سريع:

- صباح العسل يا عم حسني... فين ال...

- في الحفظ والصون يا سيدي، شلتهاك مخصوص عشان

ماحدش ياخذها غيرك، ايه بجى اللي هيزعلك؟

أكمل بها عم (حسني) سؤال (طلال) المتلهف لإجابته، فما كان من ذلك السائل الصبي إلا أن استحالت لهفته فرحة أنطقت ملامحه الناشئة ضحكات الرضع حين تلاحقهم مداعبات أمهاتهم بعد رضاعة هنيئة لم يتلقوا مثلها منذ ساعات، حتى أشرب لسانه بعضا من بهجات قلبه، انتقلت اليه عبر شرايين الأمل وخلايا الارتياح، قائلا وفي صوته بحة سعادة يعرفها منه ذلك البائع، الذي لا يزال حاضيا بابتسامته:

- طول عمري أجول عم حسني ده زينة رجالة البلد، صاحب

واجب صاحب واجب يعني.

- هاهاها، ماشي يا عم النصاب، هاعمل نفسي مصدجك، خد

يا سيدي عروستك أهي متروجة وجاهزة من سبوع كامل، ولو اني

ماخبرش ايه اللي هيعجبك في مداس ميري ناشف كيف الحديد زي

ديّ، ماالفرشة مليانة حاجات أريح كثير واصحابها ماهروهاش زي
اللي انت هتتجنّ عليها ديّ!

- إن فاتك الميري اتمرغ في ترابه يا عم حسني!
قالها (طلال) غير ناظر لمحادثة، يلتقط من بين يديه ذلك الحذاء
الذي طالما داعب مخيلته وحلم باقتنائه، يأتيه رد ذلك البائع المتابع
فرحته بسيط الاقتناءات بفرحة لا تقل عن فرحة زبونه، قائلا يمزح:
- ماشي يا سيادة اللوا، مبروك عالارض، عجبنا ماتعلج الدباير يا
سيدي، تدوبها في عرج العافية!

- الله يبارك فيك يا عم حسني، اتفضل آدي العشرة جنية الأولانية
أهي والثانية بعد سبوعين ان شاء الله زي مااتفجنا.
- زين يا عم طلال، يلا بجى سيبي لحالي اشوف باجي الزباين
عطلتنا الله يجازيك.

- معلش بجى يا عم حسني، ماني مش أي زبون بردك داني طلال.
قالها (طلال) قبل أن يهم بخلع حذائه القديم، ملقيا إياه على
قارعة الطريق لأول صاحب نصيب، مرتديا حذائه الميري الأقل قدما.
ثم استقام من جديد يطوّح قدميه من وضع الوقوف وهو يرتديه، كعادة
المصريين في تجربة أحذيتهم، وكأنهم الشارون الأحذية للعراك لا
الارتداء.

ثوانٍ فقط، كانت كفيلةً بانتهاء المشهد الضام حركات (طلال)
السريعة حاملةً سعادته، قبل أن ينطلق ملوحاً بيديه باسماء لعم (حسني)
الذي بادله تحيته بمثلها وابتسامته بأعمق منها، وفي داخله شعور خدر
لذيذ لنجاحه في إدخال شيء من بهجة على مثل هذا المسكين غير
المعتاد كثيراً على شعور البهجات.



(عبقريّة أن تكون أنت!)

ذلك النوع البدائي من العبقريات، المتلخص في انتماء المرء لشخصيته... فقط!

وهو ما يدفعه دوما لتطوير ملامح تلك الشخصية، وفق ما يقتضيه واجب ذلك الانتماء!

ذلك المنطق الحياتي الفريد ببساطته، الفذ بعمقه، الجامع بالبساطة والعمق منهجا اجتماعيا، جدير بقيادة المجتمعات الإنسانية لتقدم سنوات.

بعض ذكريات لا يجمعها كتاب واحد مشترك، بعض أحلام لا يذكر آخر مرة آمن أنها تستحق التحقيق، الكثير من خطط لم يكتب لها أبدا أن ترى الجزء الأخير منها على أرض الواقع، و... بعض آلام الكلى!

لم يكن هذا الخليط إلا.. ملخصا سريعا لشخصيته غريبة الأطوار، ربما كانت أكبر معاناته ذلك القصور الملحوظ في تطبيقه هذا المبدأ المتعلق بالبدائي من العبقريات، ليس لعدم اقتناعه بصدقه أو قلة إيمانه باعتناقه، وإنما هو هذا الكائن الخفي الساكن داخله، يدفعه دوما لإضفاء تغييرات (يقتنع بالقليل منها) على شخصيته المستعدة بضعف

تكوينها دوما لاستقبال هذه التغيرات. مازال باحثا عن كوامن القوة في تلك الشخصية المستكنة بين جوانبه، طال بحثه سنوات، متنقلا بين سبل تلك التغيرات التي يتفنن ذلك الكائن بين جدرانه في اقتناصها وحبسها داخله، حتى وإن خالفت تربيته القويمة وفطرته ذات التكوين السليم عدو التشوهات.

لا زال منذ فجر البارحة سجين مرقده الوثير المترامي في أبعاد أركان حجرته، البادية كأنها المولودة من رحم العشوائية المرباة في كنف الإهمال. ببطء شديد، أشبه بالمُعَاد من اللقطات السينمائية، بدأ جفناه في تمزيق سترهما الذي أسدلاه قبيل الفجر على عينيه، اللتين لازالتا تتقلبان في مخادع النعاس. دقائق لم تتعد الخمس مرت على تلك النظرة الجامدة لسقف حجرته الأبيض، يلتقط بها بعضا من لقطات مشردة، ضمها شريط حلمه ليلة البارحة. غير أنه لم يظفر بأكثر من مشاهد ممزقة لا تعني بانفصالها معنى، ولا تحمل باتصالها محملا ذا هدف. تولت قبضته المضمومتان مهمة إنهاء عبث اللقطات بذهنه وعينه، فأخذت تجتهد في فرك مقلتيه، محاولة بعثهما من جديد لسجن الواقع الكبير.

بنظرته العدائية المعتادة، رمق منبهه الذي أسفر عقرباه عن ثلاث ساعات فقط، هب كل ما حصل عليه من حصة النوم. أوشك أن يحطمه

ككل صباح، غير أن قوة داخله أقنعتة أن الاكتفاء ببعض السباب ربما يؤدي الغرض.

(حقيقة عن الشريرين: يكرهون كل ما يدفعهم لتغيير عاداتهم، وإن كانت هذا النوع المهلك من العادات)

مثاقلا قام يستند على مرفقيه، قبل أن ينتهي به الأمر مرسلًا قدميه إلى الأرض، جالسًا على حافة سريره، يتفقد رعيته من حاجيات تناثرت في عشوائية، بعينين آخذتين في العودة من جديد لآخر عهودهما من اليقظة التي أنهتها قبيل الفجر جيوش نعاسه.

- إبراهيم... الساعة بقيت سبعة يا حبيبي يلا هتأخر عالكلية!
جاء الصوت مرفرفًا عبر فتحة صغيرة صنعتها صاحبتة بمواربة باب حجرته. كررت تنبيهها عدة مرات، بصورة حفظها منها ذلك الابن الذي لم يرد بأكثر من رده المعتاد:
- حاضر، صحيت خلاص!

لم يكن بحاجة لأكثر من ربع الساعة، ليكون على استعداد لارتداء البسيط الأنيق من ملابسه. جفف سريعًا شعره المبلل، قبل أن يكتفي بتصفيفه بيديه، أرسلها بين خصلاته التي لم يهتم يوما بتصفيفها بأكثر من ذلك، كأنها عبدٌ ساقه قدره لسيد شحيح. وقف أمام مرآته يختلس النظر لذلك الأثر لجرح قديم في جانب رأسه، قبل أن يهرب منه سريعًا

كعاداته، يتحسس بأصابعه تلك الذقن التي بدأت ترتبها في إنبات ذلك العشب الأسود، الذي أضفى على ملامحه بعض سنوات لم يمتلكها بعد. أهملها كعاداته، ثم تناول قميصه وبنطاله اللذين أظهرنا نحافته البالغة، التقط حذاءه الرياضي الأسود، الذي لم يهتم يوما بعقد رباطه، أنهى مهمة ارتدائه ملابسه، بتلك النظارة الضخمة التي أظهرته أمين مكتبة مهجورة، لا يتصفح محتوياتها من الكتب سواء، وقد تخطى السبعين بعدد لا بأس به من السنوات، قبل أن يلتقط تلك الحقيبة الدراسية المارة عبر كتفه الأيسر وصدره انتهاء بجانبه الأيمن (المريض)، والتي بدا على نحافتها أنها لا تضم أكثر من كتابين، لا يعلم غالبا ما يحويه بين دفتيهما. التقط قرص المسكن من شريط دوائي أفرغ نصفه، مرسلا إياه إلى جوفه سابحا في محتوى نصف كوب من الماء.. سار بعض خطوات إلى باب حجرته، قبل أن تستوقفه نظرة بائسة تحمل الكثير من متناقض المشاعر إلى سجادة الصلاة الصغيرة المهملة، التي استكانت في مكانها هذا لم تبرحه منذ وضعتها أمه على مسند كرسي وُضع في مكانه هذا إلى جوار مكتبه منذ أدرك وعيه تكوينات المكان. طالت نظرتة بعض الشيء، دون قدرة حقيقية منه على إنهاؤها، كأن قوة خفية سكنت تلك الجهة استعبدت نظره المسكين، الذي تحرر أخيرا ناظرا للأرض، هاربا من مواجهة هو على يقين أنه ليس كفتا لها. تمالك

نفسه، واستجمع كل سلبية تملكته في زفير ساكن ساخن عانت شفتاه من حرارته، منصرفا عبر الباب الذي ظل ممسكا بجانبه لحظات نظراته وزفيره، مغلقا إياه خلفه، محاولا تناسي المشهد وما ضمه من نداءات نفس لوامة وندم لتارك صلاة.. لم يحن ميعاد توبته بعد!

على مائدة الإفطار، كانت تلك الحركة اللاهائلة لأبيه، المنشغل بعناوين جريدته المزدحمة بصيحات الكوارث واستغاثات من طالتهم، وقد أخذ سطح القهوة يموج في عنف حتى كاد يهرب من حدود فنجانه، من أثر توتر الأب مما يقرأ.. ثم هذه الحركة الهادئة نسبيا لأخيه المنشغل بتناول إفطاره، دون أن يبدو عليه أي اهتمام بأي شيء، وكأنه ضيف على هذا العالم البغيض، ينتظر ميعاد العودة لعالم تغنى به خياله في ليلة قمرء على أنغام حلم جميل.. وأخيرا ثالث الجلوس، حيث أم تشاغل عن الجميع بالجميع، تضع أمام هذا المزيد من طعام يوشك أن ينفد، تلقم هذا لقمة في فمه ضنت بها على نفسها، ثم - إن فاض الوقت - تطعم نفسها بعض لقيمات، تكفي بالكاد لبقائها على قيد الحياة.

- ولاد الكلب بيضربونا بقنابل فسفورية، أنا مش عارف الحكام العرب دول بيصوا لنفسهم في المراية ازاوي وللا بيجيلهم نوم بالليل ازاوي بعد اللي بيحصل قدام عينيهم ده؟!

قالها الأب متفعلا، ومازال نظره معلقا بجريدته وعناوينها، لا يعلم

محيطوه إن كان يخاطبهم أم يخاطب نفسه، أو أن المقصود بالخطاب
كان شخصا مجهولا اختفى بين سطور الأخبار!

- غزة؟!

سألت الأم في أسى العارف بالإجابة، الخائف من تأكيدها. يأتيها الرد:
- أيوة!

قالها الأب مسبقا إياها بإيماء رقبته أن نعم، وزفير حزين، ومتبعا
اياها بوضع فنجان قهوته على المنضدة أمامه زاهدا فيه مستطردا:

- فالحين بس يعتقلوا ويضربوا الشباب اللي بيطلع يقول كلمتين
حق في مظاهرة مش طالب من وراهم مصلحة، أسدُ عليّ وفي الحروب
نعامة، أقطع دراعى إن ما كانوا بيعملوا كده عشان بيعسوا بالنقص كل
مايشوفوا شاب مبيخافش يعلىّ صوته بالحق اللي هم مش قادرين
يعلنوه وللا شابة مبيهمهاش تقول كفاية اللي هما مش قادرين ينطقوها،
بيقولوا لنفسهم اشمعنى احنا جُبنّا؟، لازم الجُبن يبقى علينا وعليهم،
يبقى الخوف هو السياسة العامة شعوب وحقّام!

- حسبنا الله ونعم الوكيل فيهم قبل الصهانية!

اكتفت بها الأم، التي وقعت عيناها مصادفة على إحدى صور
المجزرة في الجريدة المكبلة بمآسيها، حيث طفلة دون العاشرة
محمولة بين يدي أحدهم، وجهها للسماء وعيناها سابحة في ملكوت

يُبعد عن عالم البشرين ملايين السنوات، وقد غطت الدماء وجهها
وغطت الدموع وجه حاملها، البادي عليه أنه رسول الرحمة لتلك
المفارقة عالم الإنسانية المُقنَّعة، لا تعلم بأي ذنب قُتلت.

- ومصر فين من كل ده؟

- مصر؟، الله يرحمها، مصر ادت لاسرائيل الأسمت اللي بنت بيه
الجدار العازل، المهم ان المنتخب كسب أفريقيا وابو علاء استقبل الأبطال
في المطار بنفسه وفطر معاهم، لأ ولسه بسلامته بيقول هنحاول ننسق مع
الجانب الإسرائيلي موضوع فتح المعابر ونستأذنهم لأنه من حقوقهم،
بيستأذن عدوه عشان ينقذ أخوه من الموت، شفتي الهنا اللي احنا فيه؟

- مش خايف من رد فعل الشعب؟

- الشعب؟، هو فين الشعب؟، الشعب آخره يتفرج عالخبير
عالقهوة في استراحة الماتشات يخطط كف بكف ويقول لا حول ولا
قوة الا بالله، ولو الشوط الثاني بدأ من غير مايكملها هينسى يكملها،
التاريخ عمره ماهيسامح الراحل ده على تسطيح فكر كل الملايين
دي، أكبر جريمة ممكن يعملها حاكم في شعبه. وبعدين ربنا يخليه
مطبلاية إعلامه، مصورين للناس إن رد الفعل ده مايصدرش إلا من
سياسي محنك عبر بالبلاد لشط الأمان ويغنوله اخترناك وافرح يا شعب
بزعيمك العظيم، كلهم صبيان سفاح نجمة داوود، كلهم في مزبلة

التاريخ، والله كلهم في مزبلة التاريخ!
أنهاها الأب بشيء من الانفعال بدا على ملامحه البارزة ببؤسها
من خلف زجاج نظارته وسطور جريدته، يأتيه رد ابنه الذي التفت أخيراً
للأمر، وكأن كلمات أبيه قد انتشلت من غيبوبة لامبالاته للحظات قائلاً:
- واحنا ممكن نعمل إيه؟، البلد خرابانة والناس مش لاقية تاكل،
مش لما نحل مشاكلنا إحنا الأول؟!
- غلط!

قالها الأب بحزم مستطرداً:
- غلط ومليون غلط، هو ده اللي بيحاول إعلام النظام يصدره
لفهم الناس علشان يسلموا بالموضوع وينسوا القضية، لا دين ولا
إنسانية يقولوا كده، الدين قال (طهروا أموالكم بالصدقة) وهم يقولوا
(اللي محتاجه البيت يحرم على الجامع)، الدين قال (المؤمن للمؤمن
كالبنيان) وهم يقولوا (خليك في حالك وامشي جنب الحيط)، الأنصار
لما المهاجرين راحولهم قسموا معاهم كل حاجة أكلهم وشربهم
وبيوتهم وفلوسهم وتجارتهم، هو ده مبدأ المشاركة اللي الإسلام أمرنا
بيه وده اللي كان فيه سر إقامة دولة الإسلام وقوتها قرون، ولما ضيعنا
المبدأ ده ضاعت الدولة وضعنا معاهما، والغرب وأعوانه من الخونة في
الداخل بيحاربوا بكل قوتهم إننا نفضل كده كل واحد مشغول بمشاكله

لوحده اللي هم قدروا يضاعفوها، جيل بيسلم مشاكله لجيل يزودها
ويسلمها لجيل تالت لحد ما في النهاية هنصحا مش هنلاقي الشمس
طالعة من كتر ما جبل المشاكل علي وحجب وراه كل حاجة نضيفة
وهكذا.. نفضل في الساقية بندور مغميين عينينا بشريطة سودا اسمها
حكامنا وإعلامهم!

لم يكد الأب ينتهي من كلماته الآخذة نبرتها في الحدة شيئا فشيئا،
حتى انتبه الجميع لوقع أقدام رابع أفراد الأسرة يقترب، غير مدركين أنه
ألم بأغلب كلمات الحديث، مصطحبا حضوره بسلامه الروتيني البارد:
- صباح الخير!

- صباح النور (رد جماعي)

- إبراهيم... يللا يا حبيبي الفطار!

قالتها أمه الملتفتة إليه، تفسح له مكانا إلى جوارها، قبل أن يأتيها رده:
- لا لا ماليش نفس، هافطر في الكلية!

قالها وانصرف إلى باب الشقة، غير عابئ بنظرات الجميع له، بين
الاستغراب من تلك الحالة من الجمود التي يسبح في ملكوتها منذ
فترة (رغم أنها باتت من أساسيات تكوينه، غير أنها استفحلت فيه هذه
المرة) والفضول في اكتشاف سبب حالته تلك، وأخيرا الإشفاق لحاله
التائهة بين استغراب البعض وفضول البعض الآخر.

- ماله الواد ده؟

قالها الأب ومازال نظره معلقا بابنه المغادر غير عابئ بحديث خلفه وراءه، هو على ثقة أنه متناوله بأي حال من الأحوال، سواء كان تعجبا من أبيه، أو ردا مأساويا من أمه المبالغة في قلقها عليه، أو تعليقا ساخر من أخيه.

- والله مابقيت عارفاله، كل شوية بحال، حاول تبقى تقعد معاه شوية كده تشوف حكايته ايه!

- مانتى عارفاه، من ساعة الحادثة إياها وهو عايش بدماغه بعيد عن الدنيا كلها، لا يشارك حد في حاجة ولا يقول لحد حاجة!

- معلش، مش هتخسر حاجة من المحاولة، أنا غُلبت معاه وزهقت من جملة (مافيش حاجة) اللي بيرد بيها على كل حاجة دي.

- أمري لله، لما نشوف حكايته ايه ده كمان!

كان هذا آخر ردود الأب، الذي طالما كان هذا الابن أكبر تحدياته في الحياة.. لم ينجح بعد النجاح الكامل الذي يرضيه في الوصول به لبر أمان ينظر إليه فيه من وسط الأمواج فخورا بحفظ كنز له من وحوش القيعان وعواصف السطوح. قام إلى عمله ومازال محتفظا بجريدته، التي طواها تحت إبطه، منشغلا عنها بعض الوقت بإعادة ملابسه إلى كامل هندامها، الذي اعتاد عليه متكاملا إلى أقصى درجاته، ثم غادر!

لم يكد ذلك الطالب المكتفي بصداقة نفسه يغادر شقته وأهلها وأحاديثها، حتى تفرغ كعاداته لاستقبال الهجوم اليومي لجيوش القديم من ذكريات مضت، لا تزال مصرة على رفع رايتها فوق كامل أراضيها، وكأنها لم تكتفِ بسنوات مضت من الغزو، خلفت وراءها نفسَه أطلالا إلا من بعض البقايا العامرة لازالت تقاوم للبقاء.

كانهم كانوا هنا بالأمس، الصور جميعها لا تزال على حالها من الصمود في ذلك الرف النائي من رفوف الذكريات، الذي لم تجرؤ قط أتربة النسيان على مجرد الاقتراب منها، فظلت على حالها من السطوع في سماء مخيلته دون غروب.

مازالت هذه الليلة حاضرة في حياته بكامل تفاصيلها، تهاجمه من حين لآخر بومضات مشاهدها السابقة، كأنها لم تكتفِ بعد بما نالته من سنوات شبابه المحال باكرا لشيخوخة العجائز.. لازال ذاكرا كل تفاصيلها وسيظل، تطارده الصور وأبطالها في كل آن ومكان، يجدها رفيقة وحدته بين جدران حجرته، جليسة عزله في مقهى (الخيمة) الذي بات متنفسه الوحيد، وصاحبة ذلك السير العشوائي من حين لآخر، حين يحتمي بنفسه من نفسه في خطوات ضالة هدفها على كوبري عباس، تحت مظلة ليل يقسو ببرده حيناً ويتعطف بنسماته أحيانا.

- إبراهيم!

انتشله النداء من دوامة صوره وذكرياتھا، التي ظلت تعمل فيه
أسلحتها طوال سيره من سكنه بمنيل الروضة وحتى مدخل كلية
الصيدلة. التفت التفاتة المستيقظ للتو من نوم شغلته أحلام لم يستطع
لھا تفسيراً:

- شافعي! إزيك!

- إيه يا عم طب سلّم علينا من بعيد حتى وانت معدّي ده السلام
لربنا، هو احنا مش قد المقام وللا إيه؟!

قالها باسماء في إشراق كعاداته، يحاول اقتناص ضحكة مماثلة من
مخاطبه متكلف الابتسام الرّاد في هدوء:

- ماخدتش بالي واللّه صباح الفل يا رجالة.

قالها وانطلق لهؤلاء الواقفين على مقربة منه، يبادلونه ابتسامته
الخافتة بأخرى، أتبعتها بعض قفشاتهم في محاولة منهم لإخراج ما
وراء الابتسامات من فكاهي الردود وجلجل الضحكات. بادلهم سلام
الأيدى وبعضاً من كلمات المرح، لم يبدُ عليها أنها صادقة ولو بقدر
قليل، تلقوها منه كعاداتهم بشيء من التكلف أجبرهم عليه، قبل أن
يعمد (شافعي) لاستقطابه من جديد لمجرى حديثهم، قائلاً في مرح
معروف عنه:

- بس ماكانش العشم يا عم إبراهيم واللّه، تسيبنا وتمشي كده من

غير سلام؟، هو انت عشان معاك قرشين يعني هتتكبر علينا، ماحنا ولاد ناس برده على فكره.

تعالث الضحكات من أفواه الجميع إثر خروج الكلمات في نمط سريع معروف عن (شافعي)، يضيف على أحاديثه شيئاً من الفكاهة، يحبه منه هؤلاء الجميع، بمن فيهم ذلك المقصود بالكلمات، الذي ظهرت أسنانه من أثر ضحكاته لأول مرة منذ وقت طويل، قبل أن يعود لمضمار الحديث قائلاً:

- أنا أقدر برده يا عم شافعي؟، وبعدين ماهي فلسوي وفلوسك واحد يعني.

(حقيقة مؤكدة: يتخلى إبراهيم عن غرابة أطواره ويعود لطبيعته الإنسانية حين يساعده أحدهم على ذلك)

- وكم ان بتستهزأ بيا؟، هو احنا عشان غلاية وبنكمل عشاننا نوم يعني؟، ماشى يا عم اللي اداك يدينا.

من جديد أطلت الضحكات من أفواه الجميع، متداخلة مع قفشاتهم المساهمة في ارتفاع نبرة هذه الضحكات حتى تشجع أحد الضاحكين في حديثه لـ (إبراهيم) قائلاً:

- بقولك ايه يا هيماء، فاضي النهارده بعد الكلية؟

سؤال أحسن منه (إبراهيم) بعض الريبة لتوقعه القادم بعده، غير أنه

آثر الانتظار للنهائية قائلاً وقد توقف عن ضحكاته، وإن ظلت ابتسامة خفيفة ملازمة وجهه:

- آه... إن شاء الله، المفروض يعني، خير فيه حاجة وللا إيه؟

- طب ماتيجي معانا؟

- فين؟

- خارجين، كده كده بكرة الجمعة أجازة مافيش ورانا حاجة،
يعنى النهارده نسهر براحتنا.

- معلش اعفوني أنا من الموضوع ده.

(حقيقة أخرى مؤكدة: مهما تخلص إبراهيم عن بعض من غرابة أطواره، فهو أبدا لا يسمح لأحد أن ينتزعه منها بشكل كامل!)

- ليه كده؟، أهو حتى تغير جو الكلية والمحاضرات طول الأسبوع!

- معلش خيليني أنا المرة الجاية بقى ان شاء الله.

- خلاص خلاص، سيبوه براحتهم يا رجاله، واضح انه وراه

حاجات أهم!

قالها (شافعي) بشئ من الفكاهة، (يغمز) بعينه لإبراهيم، الذي ابتسم له ابتسامة تحمل امتنانه لإنهاء الموقف بهذه الطريقة التي انقذته، فسارع بدوره لإنهاء الأمر برمته قائلاً:

- طيب أستاذنكو أنا بقى يا شباب، يادوب الحق اشربلي حاجة

تفوّقني قبل المحاضرة.

- ماشى يا هيمما... اتفضل!

من جديد عاونه (شافعي) على الهروب، فانصرف تلاحقه نظرات
التعجب من الجميع، وتظله قولاتهم المتداخلة عنه:

- بني آدم غريب.

- بقاله سنة ونص في الكلية ومالقتلوش صاحب واحد ييمشي معاه!

- الواد ده أكيد وراه حاجة!

- يللا يللا مش مهم، خرينا بس نشوف هنعمل ايه النهارده، مش
هنضيع اليوم في كلام مالوش لازمة.

كلمات تطايرت حول (شافعي)، الذي ظل على حاله من النظر
لـ(إبراهيم) في شرود، غير مدرك لما يقال حوله، وقد انشغل عنهم
بذلك الذي تعلقت به عيناه حتى اختفى عن ناظريه، وفي ذهنه الكثير
من علامات الاستفهام الآخذة في التكاثر!

لم يكن يفصله عنها سوى بعض من بياض القطن المتألق بأزهريته
تحت خيوط شمس، بدا على بريقها الاحتفاء به. تقافزت إليها نظراته،
فوق تلك المرايا اللامعة على أسطح الزهرات القطنية، في لهفة مفضوحة
لم تكسبها بعد سنواته الخمسة عشر حنكة إخفائها وراء بسمة باردة أو
سترها خلف كلمة تتنكر لانتمائها لمواطن الحب ومعسكرات المحبين.
تنبته لنظراته الساذجة، فاحتمت بخجلها من الهجوم بحياء
فطري، زادته براءة الصبا ونقاء الريف تألقا، أنطق قسماتها أشعار
الجمال، واقتبس من ملامحها ألحانا تتغنى بسيمفونيات أبدعتها قيثارة
الأصفياء من بني البشر.

لم يفلح ذلك الجلباب الأحمر ذو التطريز البدائي الأصفر فوق
الصدر والأكمام الواسعة، والمنتهي قبل قدميها بقراءة الشبر، أو ذلك
المنديل الأزرق فوق الرأس، والغني ببقع تحاول يائسة تقمص دور
الورود في النيل من جمال (وردة)، بل استغلت التصاقها بها في نهب
بعض من جمالها الناشئ، فاكسبت الحمرة والصفرة والزرقة مزيدا من
ألوان لم تعرفها بعد لوحات فناني الآدميين، وهي القادمة من لوحات
فنان ملائكي قادم من عالم مثالي بعيد!

من جديد حاصرتها نظرات (طلال)، فلجأت هذه المرة للاحتماء
بأحبالها الصوتية ذات الاثنى عشر ربيعا، والخبرة الغنائية الناهلة من

حنجرة جدتها، الثرية بأغاني تراث مات في كل مكان، وأحيته حناجر
فلاحي المحروسة عبر عقود، يسلمونها جيل لجيل، كأنها إرثهم
الوحيد (إلى جانب الفقر والرضا به)

- الجُطن حدانا لولي سنان حورية

بدأت بها تغريدها الكرواني، الذي أنصت له الجميع من نساء
وصبية ضمتهم حدود الحقل الفسيح، فرددوها وراءها على نفس شاكلة
اللحن البدائي الجميل، مستعينين بتصفيقاتهم المنتظمة المساهمة في
بروز الكلمات على نحو مطرب:

الجُطن حدانا لولي سنان حورية

دفيان بالشمس صاحبة من الفجرية

دفيان بالشمس صاحبة من الفجرية

والخير كُلاته ساكن اليمّادي

والخير كُلاته ساكن اليمّادي

واهي ليلة فرحه وفرحنا الليلاي

واهي ليلة فرحه وفرحنا الليلاي

هنزُفه بِحَنَّة وطلُج البُنْدجية

هنزُفه بِحَنَّة وطلُج البُنْدجية

- جفشتك!

اختطفته الكلمة القادمة من خلفه، المصحوبة بكف قبض على كتفه، من حالة طربه وهيامه كصقر انقض على إحدى فروخ الحمام، فالتفت فزعا قبل أن يحتال فزعه ابتسامة ود صادقة لذلك الممسك به قائلاً:

- شيخ بدر؟، يا صباح العسل على زينة رجالة البلد!

- زينة رجالة البلد يا نصاب؟، أو مال عم حسني بقي يُبجى إيه؟
قالها ذلك الملتحي البشوش، بلهجة قصد بها شيئاً ما فهمه ذلك الصبي الذي أربكه السؤال الضاحك، راداً في ارتباك وقد فطن بذكائه الفطري أن محادثه الشيخ كان شاهداً على حوارهِ قبل قليل في سوق الكانتو من بين الصفوف:

- إيه؟... هو... اصل... هو انت كنت في الكانتو؟، يا راجل، دي بس حاجة اكده من ورا الجلب كده مجاملة، الراجل عمل وِيَّانا واجب برده كان لازم نجبر خاطره بكلمتين.

- هاهاها ما فيش فائدة منك يا واد يا طلال، هتفضل للماضة في دمك.
قول قابله (طلال) بضحكاته الرائقة التي يعرفها عنه الجميع، قبل أن يعود للحديث بقوله:

- أني! داني غلبان والله يا شيخ بدر، العالم دايمًا ظالمانى معاها اكده، الناس مابجتش تسبب حد في حاله.

- إنت هتجوللي؟، دانتا أغلب من الغلب.

قالها الشيخ (بدر) باسماء، وصمت حيناً قبل أن يستعير لهيئته الضاحكة مع صديقه الصغير بعضاً من جديته واعظاً فوق المنابر، مستعيداً يمينه من فوق كتف طلال، لتعود لمهمتها المستمرة عبر اليوم لعناق مسبحته البيضاء قائلاً:

- بس أني واخد على خاطري منك يا طلال!

- أني؟، ليه كده يا شيخ بدر؟، دانتا بالذات لو خدت على خاطرك مني ما أنا مش الليل.

قالها (طلال) بصدق ظهر جلياً في كلماته، ما دفع الشيخ (بدر) للإشفاق عليه بعض الشيء، لائماً إياه بقوله:

- دورت عليك النهارده في الفجر مالجتكش، ده كان اتفاجنا بردك؟
لوم نال بشدة من الصبي الحريص تماماً على رضا ذلك الشيخ في منتصف الثلاثينيات أكثر من أي شخص آخر، قائلاً في شيء من الانكسار،
لازال أمام أقرانه سنوات طوال ليسمعوا عن وجوده بين الأدميين:

- معلهش يا شيخ (بدر)، حجك عليا النوبادي، والله يادوبك خلصت الشغل في الغيط جبل الشمس ماتغيّب على طول وأول ماروحت لجيت أمني هلكانة بفرشة الدرة لسه معاودتش البيت، جمّت رايح واجف مكانها وخليتها تروح عشان اخواتي البنات اللي مرميين

جنبها النوم جاتلهم على حجرها في الشارع، وفضلت على دا الحال
لحد بعد صلاة العشاء، روجت نمت طوالي ماصحتش إلا النهارده
الصبح، حبك عليا النوبادي يا سيدنا، ما هتكرش تاني، عهد مني!
(ملحوظة: عسكري الشطرنج لا يطمع في أغلب الأحيان في أكثر
من بضع حركات آمنة في الظل، من شأنها أن تؤخر إقصاءه من الرقعة
بعض الوقت!)

كلمات ودَّ بعدها ذلك الواعظ لو ينحني مقبلاً يد هذا الغلام
المكافح، وقد بدأت عيناه تلمعان ببريق جاهد في إخفائه بابتسامة
عميقة، أتبعها بيمينه تربت من جديد على كتف (طلال) قائلاً:

- إنت راجل يا طلال، راجل من ضهر راجل.

- كتر خيرك ياسيدنا، يعني خلاص مش زعلان مني؟

- لا يا سيدي مش زعلان، بس تاني مرة...

- تاني مرة هتلاجيني في أول صف باسلم عليك بعد الصلاة.

قالها (طلال) مبتسماً، يأتيه الرد سائراً في ذات الطريق الباسم من

الشيخ (بدر)، الذي استطرد ابتسامته بقوله:

- حيث كده بجى يجى خد أرواحه كل يوم أهى، كنت ناوي

أحرمك منها النهارده، بس يللا المسامح كريم.

قالها وقد صاحبها بإخراج تلك القطعة الصغيرة من الحلوى

من (سَيَّالَة) جلبابه ناصع البياض، كما هي عادته كل يوم مع صديقه الصغير، الذي تلقاها في نهم ضاحكا، يقول وهو يلوكها بشراهة معتادة: - من يد مانعدمهاش يا مولانا، أهو أني دِلوك بس اتأكدت إنك مش زعلان.

قالها دون أن يتبين مخاطبه منها الكثير، وقد أخفت معالم الكلمات تلك القطعة من الحلوى المتجولة في فمه، فلم يملك الشيخ (بدر) إلا ضحكا من سذاجة ذلك الغلام البسيط وتلقائيته، حتى انتبه الاثنان لذلك الصوت القادم من خلف الشيخ (بدر)، مصاحبا قوله بيده ذات المسبحة تربت على كتفه:

- دي الغزالة باينها رايجة صُح وعال العال النهارده أهى ما شاء الله. التفت إليه الشاب الوسيم باسماء، يمسح بنظره سريعا هيئة ذلك القادم، مظهرا إعجابه بعباءته السوداء ذات التطريز الذهبي، وعمامته البيضاء الدالة على صعيديته، التي يعتز بانتمائه إليها أكثر من أي شيء آخر، إضافة لتلك المسبحة التي لا تفارق يمينه العجوز قائلا:

- غزالتنا احنا اللي رايجة بردك؟، عيني عليك باردة يا حاج، ولا ابن العشرين.

- واجدع من ابن العشرين كمان يا سيدنا الشيخ، بُتُج على ابوك؟، دي آخرتها بردك يا شيخ بدر؟

- قالها الرجل مازحاً، يأتيه رد ولده الضاحك:
- أنا أجدد بردك يا حاج؟، داننا الخير والبركة، وبعدين هو أني اللي باجول؟، دي البلد بحالها بتتحاكي بالحاج مهني ليل نهار.
- البلد بحالها كوم وولدي كوم تاني، وللا ايه يا واد يا طلال؟
- هي البلد بحالها فيها زي الشيخ بدر بردك بابا الحاج؟
- طبعا ومين يشهد للعروسة؟
- قالها الأب باسماء، يأتيه رد ولده وطلال في ضحكات متصلة، صحباها بنظرات العينين وسلام اليدين، ما دفع الحاج (مهني) لاستطراد كلماته في غيظ مصطنع:
- طب اتفرج بجي يا طلال هاعمل فيك ايه النهارده، ان ما خيلتك تجمع الأرض كلها لحالك، ماابجاش الحاج مهني.
- أني لاجل عيون الشيخ بدر أجمع أراضي الناحية كلاتها.
- قالها (طلال)، فانفجرت لقوله ينابيع الضحك لدى الرجلين، في صدق وإعجاب بسرعة بديته وصدق حبه للشيخ، فتولى الحاج (مهني) الرد قائلا:
- هتفضل طول عمرك بهلوان كلام يابن عزوز، مع ان أبوك راجل طيب وامك ست زينة ماخبرش انت طالع اكده لمين.
- لخالتي.

- انت ليك احوال يا واد؟

- لأ.

ثم استمر ثلاثتهم من جديد في نوبة ضحك، أنهاها (طلال) بقوله:

- استأذن أني بجى أشوف شغلي، الوجت أزف جامد ولسه

جدامنا شغل ياما طول النهار.

- ماشي ياسي طلال، اتفضل.

قالها الشيخ (بدر)، قبل أن يستطرد قوله لأبيه مداعبا بيسراه

شعيرات لحيته المعطرة بالمسك، ومغازلا بيميناه حبات مسبخته،

متابعا ذلك الصغير المهرول في مهارة وخفة بين نبات القطن، تغازلها

رشاقة قفراته بينها:

- خابر يابا لو كل عيال البلد كيف طلال اكده؟، كان زمان (العش)

أجدع بلد في الدنيا!

وحده بين أغلب الحضور كان منفردا في جلسته، في آخر

الصفوف منعزلا عن ازدحام طلابي في المقدمة يستمع (أو هكذا

يوهم نفسه) لكلمات المحاضر، المنبعثة عبر مكبرات الصوت، ناطقة

تارة بمصطلح طبي يستطرد بعده في شرح معناه، وصامته تارة مكتفية

بإشارات اليد الشارحة لبعض الصور المتتابعة عبر (البروجيكتور)،

وهو بين نطقها وصمتها ظل مكتفيا بجلسته التي لا توحى بامتلاكه أي إشارة من إشارات الحياة، ينتظر كعادته في ملل اعتاد عليه انتهاء المحاضرة وما بعدها من محاضرات، ليعود من جديد لجدران حجراته ذات بروايز الصور حاملة الذكريات.

- على غزة رايعين... شهداء بالملايين!

اخترق الصوت الجماعي حدود المدرج من كل جهاته، حتى ظن من فيه أن جحافل الهاتفين توشك أن تقتحم المكان على سكانه. دقائق مرت، حاول فيها المحاضر استكمال محاضراته دون الالتفات للهاتفين أو هتافاتهم.

الهتاف يحتد... المحاضر يتغاضى... الهتاف تزداد حدته... المحاضر يزداد عناده... حتى انتهى الصراع أخيراً بذلك الصوت من داخل قاعة المحاضرات ينتفض صارخاً:

- على غزة رايعين... شهداء بالملايين!

مساندا قرينه في الخارج.

لحظات من الصمت عمت أركان المكان، وقد تعلقّت أنظار الجميع بذلك القائم الهاتف وسط الجلوس، كما حر انتفض بين عبيد..

- انت اتجننت يا ولد؟، اترزع مكانك!

قالها المحاضر في عنف، فلم تزد الطالب إلّا حماسة، فاستمرّ

هتافه من جديد:

- على غزة رايعين... شهداء بالملايين!

- قلت اترزع مكانك!

- على غزة رايعين... شهداء بالملايين!

(معلومة مؤكدة: لا تسقط الأنظمة القمعية إلا بخلخلة داخلية، تنبع من فئة ظنت تلك الأنظمة أنها تحت سيطرتها، لم تعمل لثورتها حسبانا) - شافعي!

قالها (إبراهيم) هامسا بها لنفسه، وهو يتابع ذلك الهاتف وسط جموع الجالسين، في دهشة انتشلتة من حالة نعاسه لم تدم طويلا، وقد انشغل عنها بتلك الهاتفات الآخذة في التزايد حوله، ينتفض بها المدرج من هؤلاء الذين تركهم بالخارج قبل قليل، كأنهم المتسللين إلى المدرج تسلل الماء من شقوق لم تقو على حفظها داخل حدودها، مؤازرين ذلك البادئ بالهتاف قبل أن تنتقل حمى الحماس لكل الجالسين حول الهاتفين في أنحاء المدرج، فهمّ الجميع بالوقوف، يعينهم تمردهم على هتافهم و يعينهم هتافهم على تمردهم، وتدفعهم إعانة الاثنين على هذه البداية لتظاهرة اتجهت لباب المدرج، ومنه إلى الخارج لمؤازرة جموع المتظاهرين في أروقة الكلية خارج المدرج، ضارين بالمُحاضر وتهديداته عرض الحائط، كأنها لم تكن من

الأساس سوى فقاعة، لم تلبث أن تلاشت وسط موجات ترابية عاصفة اهتزت لها أركان المكان.

(معلومة أخرى مؤكدة: إصرار تلك النظم على أسلوبها القمعي، دون محاولة احتواء مناهضيها، تُعجِّل بسقوطها غير المأسوف عليه!) دقائق فقط كانت كافية لانضمام موجة المدرج لأمواج اليم البشري المتتابة في أنحاء الكلية، حتى التحم الجميع في نهاية المطاف في موجة واحدة، تعالى من أحشائها زئير أخذ في الحدة. قادة الهتاف فوق الأعناق، يلوحون بأيديهم المقبوضة تفاعلا مع نداءات أفواههم فاقدة المجيب، لوحات كرتونية بدا على أناقتها ودقة رموزها أنها إنتاج عمل ليلي عمره ساعات، أسفرت عن الكثير من ضحايا الفُرش وأقلام الرصاص، ثم في نهاية المطاف ذلك العلم البغيض ذا اللونين السماوي والأبيض تتوسطه نجمة داوود، حمله أحدهم، ذلك الملتفح بالشال الفلسطيني المرصع بأبيض الألوان وأسودها، إلى وسط دائرة شكلتها جموع الهاتفين، قبل أن يضع اللمسة الأخيرة بإشعال جحيم في قماشه، اندفع من رحم قداحته، تنبعث شرارته في الأساس من قلوب المتظاهرين وحناجرهم التي لم تتوقف عن الصراخ.

لم يكن لفرحة هؤلاء المتظاهرين بما أنجزوه من تظاهر يرضي بعضا من غرور شبابهم، وإن لم يُضف لحلول القضية جديدا يساهم

فعليا في حلها، أن تستمر بعد مشهد حرق العلم لأكثر من دقائق، انتبه بعدها الجميع لذلك الصارخ بينهم بعينين متسعيتين مشعتين بتحدٍ لا يملك مثله الكثيرون، مشيرا بذراعه المنتصب المنتهي بقبضة لم تبرز منها إلا سبابتها نحو باب الكلية قائلا:

- الأمن المركزي وصل يا رجاله!

- يا أهلا بالحبايب!

جاء الرد من أحدهم، ذلك القابع هناك فوق كتف صديق له، بشيء من التلقائية، كأنها جرت على لسانه بشئ من الطبيعية، وهو المعتاد على مثل تلك المواجهات مع هذا الخصم بالذات. فتبعت نظرات الآخرين نظراته وكلماته نحو هذه العربات السوداء الضخمة عند الباب، ترتدي في تجبر عباات الرهبة، تعلو حوائطها بعض أسلاك متقاطعة - يقولون إنها جُعلت للتهوية - وقد ارتجت العربات إثر نزول منظم لهؤلاء المسلحين بهراواتهم ودروعهم وخوذهم، يغادرونها عبر سلاسل حديدية في نهايتها، قبل أن يصطفوا بأمر ذلك المرتدي نظراته الشمسية السوداء، وبدلته (الميري) الأشد سوادا، والمتوجة أكتافها بنجمتين متعانقتين في أنفة، وقد انشغل عن هؤلاء الواقفين في صفوف أمامه بسيجارة شغلت ما بين شفتيه أشعلها للتو، لم يكد دخانها يتصاعد من مقدمتها المتوهجة حتى حررها من فمه مستمتعا بأول أنفاسها، ثم

التفت مخاطبا جنوده:

- أنا مش متعود اتكلم كثير، هما كلمتين عشان الصداق

صمت ثانيتين يعانق سيجارته بنفس آخر، ثم استطرد:

- قسما بالله... وللا أقولك بلاش دي، مش واقعية، مش لما

نبقى نصلي الأول نبقى نحلف بالله، وحياة أمي... ممم... لأ برده مش

عاجباني دي، هي أمى مالها ومال الزبالة دي؟... وحياة أمك انت وهو

لو العيال دي ما اتلمت قبل ما اخلّص سيجارتي لتشوفوا أيام تخليكم

تكرهوا أهاليكم انهم جابوكم الدنيا!

كلمات اعتادت عليها مسامع هؤلاء الأسرى في ملابس السجّانين،

فسكنوا كتماثيل تنتظر الطير فوق رؤوسها، لتكمل صورة آثار الفراعنة

صديقة الثبات لآلاف السنوات، قبل أن يأتيهم ما يدفعهم للحراك من

جديد عبر هذا اللسان السليط:

- ماتخلص يابن ال***** منك له، هاتحايلى على أهاليكم وللا ايه؟!

قالها قائدهم الخالي كامل الخلو من صفات القيادة، بصوت

أقرب لصراخ الحروب، اندفع بعدها عبيده كعاصفة انتوت الإتيان

على كل أخضر ويابس، لا لشيء إلا لسيطرة رعبهم من ذلك الوعيد

المفعم بالسباب على مخيلاتهم، ممزوجا بتلك الصورة المنقولة

اليهم حول خيانة هؤلاء المتظاهرين للوطن الذي يعيشون فيه، عبر

خلخله أمنها الذي يضحي أمثال هؤلاء الضابط بالكثير مما يملكون لقاء استتبابه. لعبت برؤوسهم صورة ذلك الضابط ينتظرهم بعد الفشل يُعمل فيهم عصاه، فيتحاشون الصورة والفشل بإعمال عصيهم في صفوف المتظاهرين.. يرونه ببواطن عقولهم يذيق كرامتهم الهوان بسبه النائل الآباء والأمهات، فيتقون الصورة والسباب بألستهم تنطلق لآباء الواقفين وأمهاتهم. لم يكن الفريقان بحاجة لأكثر من دقيقة وجزء من دقيقة ثانية، ليلتحما في معركة احتوتها ساحة الكلية، تعانقت فيها عصيّ الجنود وأجساد المتظاهرين. دماء تتناثر استقبلتها ملابس المصابين في إشفاق، ودروع مصيبيهم في إنكار.. عظام تنهشم، استقبلت آذان المُهشمين أصواتها في فزع، وأصوات مهشميهم في ارتياح.. غير أن منظر الدماء وصوت التهشيم لم يساهم في المعركة إلا بزيادة ملحوظة في أعداد المتظاهرين، وزيادة أكثر ملاحظة في صمود قدامى المتظاهرين، الذين لا يملكون أكثر من أيديهم وحناجرهم وبعضاً من حجارة، سرعان ما تفتتت على دروع مصارعِيهم، حتى دخلت المعركة طورا جديدا علتة أدخنة قتابل الغاز، التي ساهمت في تفريق الجموع بعض الشيء، فاندفع عساكر الأمن المركزي بين الصفوف المضطربة، مستغلين ضبابية رؤية خصومهم المنشغلين بنوبات كُحَّتْهم المجتهدة في طرد ما استعمر رئاتهم من جيوش الغاز، وقد عقدوا العزم على إنهاء

الصراع فوراً، قبل انتهاء تلك السيجارة اللعينة بين أصابع أمرهم، خوفاً من وعيدهم على يقين أنه أبداً لن يخيب إن خابوا، وهو الاندفاع الذي لم يسفر إلا عن مزيد من بقع الدماء على الثياب والدروع كليهما! انتهت المعركة، وما زالت السيجارة لم تلفظ آخر أنفاسها بعد!

بعض الأشياء التي تحاول جاهدة الانتساب شكلاً إلى المقاعد، أشياء أخرى سارت محاولاتها على نفس النهج في طريق أشد وعورة للانتماء لعالم الطاولات، رائحة البساطة تعقم أجواء المكان، مقتبسة قوتها من أقماع الشاي والقهوة والسحلب والحلبة الحصى، ذوات الأغذية الحمراء والبنية سوداء الحواف من أثر انتزاع ورقة كانت تغطيها، تحمل اسم منتج غسل أو مربى كان بالداخل منذ سنوات.. أكواب وصوانٍ يجتهد أحدهم في تنظيفها دون جدوى، بماء من صنوبر يحتضر وفوطة صفراء تنتظر حمل نعشها إلى أقرب صندوق قمامة ممكن. الفحم لم يكن ليرضى بدور ضيف شرف الصورة بأي حال، لمعان برتقاليته، فحيح احتكاك لسعته بالهواء، وحربه الضروس لأجل البقاء مع رئات مدمني الشيشة وأنفاسها، كل ذلك جعل من قوة حضوره شيئاً لا مفر منه. تلك الضوضاء المبعثرة في جنبات المكان من أثر ارتطام قطع الطاولة بسطحها الخشبي، ضوضاء أكثر بعثرة أخرجتها

لشاشة المقهى أفواه الجالسين، فبدت ضوضاؤهم كأنها الناتجة من فم واحد كبير لمخلوق خرافي تعددت فيه الألسنة بالطلبات لـ(شلبى) القهوجي. لا بد أخيراً من ذكر تلك السقيفة من البوص وعروش النخل، تقي الرواد حرور الصيف وبرد الشتاء، غضافة لتلفاز صغير مدعوم بـ (وصلة دش) يبدو ذا أهمية قصوى أثناء التمثيل المشرف للمنتخب القومي في أفريقيا، ثم استقباله استقبال الفاتحين ومكافأة ابو علاء، راعي الرياضة والرياضيين للأبطال، بالملايين التي يملك الشعب الكثير منها، مما لا يمكن تعدادة. لا يبدو أننا بحاجة لذكر المزيد عن مقهى قرية العش بأي حال!

- اكده الليلة عليك يا معلم.. يدك عالجرشينات!
- الكلام ده مش هيحصل... الورج ده ملعوب فيه!
- جملة وردّها بين اثنين من الجلوس، تعالى بعدها صوتاهما بصورة لفتت أنظار الجميع!
- ملعوب فيه كيف مانتا شايفه زين وماسكه بيدك جبل مانبتدوا لعب كانه كان اتفاج نسوان ولا ايه!
- لم روحك يا ولد عزوز بدل ماكسر الجهوة باللي فيها على نافوخك!
- طب ايه جولك بجى انها هتتكسر على نافوخك انت ودلوك
- يابن سليمان الجزماتي؟!

قالها علي، وأتبعها بعضا غليظة في يده، شقت طريقها في خفة لا تتناسب مع حجمها، أدت في النهاية لسقوط غريمه أرضا، قبل أن يستأنف عليّ معركته بازاحة الطاولة وما عليها، غير عابئ بهؤلاء المهرولين نحوه يحاولون منعه من الاستمرار. نجحوا في تعطيله بعض الشيء/ معطين الفرصة - عن غير قصد- لخصمه للنهوض ورد الضربة بأقصى منها.. دقائق فقط كانت كافية لاشتعال محيط القهوة، اشتعال جوال كبير من القش بحجم... بيت عم عزوز!

- طلالاااااااااااااااااااا!

جاءه الصوت مرتعشا، به أثر جري كثير، فالتفت إليه ومازال بيده (المنجل) رافعا جلبابه، عاقدا إياه في وسطه قائلا:

- خير يا حسن مالك؟

- إلحج يا طلال!

- ألحج ايه خير ايه اللي حُصِّل؟!

- علي أخوك بيتعارك مع متولي ولد سليمان والدنيا خربانة عوروا

بعض جامد جوي والناس اتلمت حوالِيهم!

- يا خبر اسود ميتي الكلام ده وفين؟

- لسه دلوك جار الجهوة.

سمعها طلال، فانطلق دون إدراك لعدد الزهرات التي دهسها، ولا

عدد النداءات التي أهملها، ولا جلبابه الذي ظل متشبثا بوسطه، ولا حتى يده التي لا تزال محتضنة منجلها. ربع الساعة كان كافيا لوصوله لمكان العراك. أخوه، وإلى جواره رفيقان يحملون عصيهم، وعلى وجوههم شقت بعض الجروح قنوات لها، يتسببها أحمر الألوان، يتأهبون لاستكمال معركتهم مع فريق مقابل بنفس الصفات.

- علي، حُصِّل ايه؟!

قالها طلال الواقف بين الفريقين، وقد اختلط العرق في وجهه بعفرة الطريق الترابي، فعمَّق من بؤس مظهره، يأتيه رد أخيه في غضب:

- مالکش صالح انت باللي هيحُصِّل، هملنا لحالنا وروح شوف

انت رايح فين!

- اهملكم لحالكم كيف، اجصر الشر يا علي، ابوك وامك ماناجصينش بلاوي!

- ابوه وامه؟، طب خده في يدك لا يتوه وهو مروح لحاله!

قالها متولي، فارتفعت لمقالها ضحكات أنصاره، فما كان من علي إلا أن ارتفع رده:

- اللي هيتوه ده هيعرفك هيعمل ايه لحاله يابن أنيسة!

- هي حصلت تجيب سيرة امي يابن الكلب؟!

ارتفعت بعدها العصي في الهواء، تقتبس من حر الظهيرة قدرا

إضافيا من السخونة، لم يكن الشجار بحاجة إليه، ويشتبك الفريقان من جديد في وصلة عراك ثانية، دُهِس فيها طلال بينهم دون أن يدري به أحدٌ إلا بعد حين، وقد عقد رأسه مع عصي المعركة عقدا طويل الأجل، بإقامة مشروعات لها في تلك المساحة التي لا بأس بها من الشعر الـ (أكرت) القصير، انتهى تفعيله بسقوطه بين الأقدام مغشيا عليه، وقد غطت رأسه ووجهه الدماء تماما!



لم أستوعب وقتها ما حدث، ولا لماذا حدث، ولا كيف بهذه السرعة حدث. على ما يبدو أن هؤلاء الأصدقاء ليسوا على هذا القدر من السهولة الذي يبدو عليه.. حياتهم تحمل الكثير من اللامفهوم بشكل ما. صبيحة ذلك اليوم، كان حديثهم عن نزهة أو سهرة ينهون بها أسبوعاً آخر من العناية في كليتنا اللعينة. أنزهة إلى المستشفى للعلاج، أم سهرة في السجن للعقاب يقصدون؟! اللعنة على كل تلك العلامات الاستفهامية الحمقاء، الكون كله يتحدى فهمي للأمور بشكل بغض. لن يضيرني ما يفعلون على كل حال. ملعونة كل تلك الاستفهامات وما تحمله ومن رسمها وما تحمله...

مهلا... لماذا عليّ من الأساس أن أهتم لأمرهم بهذا الشكل؟.. بعض الطلاب الحمقى، يحملون بعض اللافتات الحمقاء، للتنديد

ببعض الحكومات الحمقاء، في بعض المظاهرات الحمقاء، يتعاركون فيها مع بعض قوات الأمن الحمقاء!

اللجنة على كل الحماقات، لتذهب كلها إلى الجحيم!
الحياة بالنسبة لي ليست أكثر من بالون كبير سخيف، يوشك أن
ينفجر في وجوه الجميع، بالنسبة لي؟ ... أظنه انفجر قبل الآن، مع
إطارات سيارة في حادث ما!

إبراهيم!

٢٠٠٩/٢/٤

- وبعدين يا عزوز؟ الواد هيضيع منينا!
قالتها الأم لزوجها، وفخذها يستقبل رأس ولدها الذي لفته الأربطة
تماما، وعلى عينيها آثار دموع لا تنتوي الجفاف لساعات قادمة، وهي
المتناولة قدرا كبيرا من منشطات الأحزان يعينها على الاستمرار بنفس
الكفاءة، ناظرة لذلك الزوج الذي أرهقه تفكيره وأرهقته ديونه بشكل
أكبر، يطأطي رأسه للأسفل مفكرا في حالة ولده الذي يوشك ارتفاع
حرارته على إهلاكه، دون أن يرد. فاستطردت الزوجة حديثها:
- في الوحدة ماعملوش حاجة يادوبك خيطوله راسه وربطوه
والواد من ساعتها مانطجش بجاله ييجي ٣ ساعات، اتصرف يا عزوز،

الواد سخن زي النار، استلف من أي حد أجرة الحكيم، خد...خد
الجلابية الثانية بتاعتي وبعها لأي حد، ولا اجولك المداس اللي جبته
عمنول جوه جنب فرشاة البنات خده بردك بيعه اهو يسند، اعمل أي
حاجة يا عزوز ابوس يدك!

دون أن يرد، قام الأب متكئا على هموم بحجم الجبال، مغادرا الأم
وابنها إلى حيث يضيف المزيد من رصيد الآخرين إلى بنكه البائس.
خرج دون هدف محدد، باحثا في شوارع العش عن دائن يعينه على
بعض ما هو فيه، تلسعه كرامته ولا تلسعه برودة الجو، يضمنه كبريائه
ولا يضمنه طول عمل النهار. لا يلبث أن يقترب من بيت أحدهم رافعا
يده للطرق، إلا وتمنع قوة خفية طرقاته تلك، كأن بها تعانده أو...
تطمح في المحافظة على تلك البقايا من الكرامة والكبرياء... الشيطان
الوحيدان اللذان يملك لهما في بنكه رصيда إلى جوار أكوال الدائنين.

- عم عزوز!

سمعتها تأتيه من خلفه، فالتفت لها قائلا:

- شيخ بدر! ازيك يابني؟

- ازيك يا عم عزوز؟، ايه اللي مخرجك الساعادي في الجوده خير؟

- لا أبدا ما فيش حاجة اني بس آآآ... جلتي اشم شوية هوا!

- شوية هوا وللا شوية برد يا راجل يا طيب؟

ردها الأب البائس بابتسامة متكلفة، عرف بها الشيخ الشاب أن شيئاً ما كان دافع الخروج:

- مالك يا عم عزوز؟ جوللي ايه اللي مضايحك ومخرجك بره الدار الساعادي، هو اني مش زي علي و طلال وللا ايه؟

- زيهم واكثر منهم كمان والله يا بدر يابني!

- هو فين الواد اللي اسمه طلال ده صحيح؟ انا ليا معاه حساب تاني كيف يهملك تخرج لحالك اكده في ساعة زي دي؟

عن الأب... الصمت كان أنسب الحلول!

- مالك يا عم عزوز؟ شكلك هيجول ان فيه حاجة؟

-

- عيالك ومرتك بخير طيب؟!

عندها تولت عينا الأب الرد ببعض قطرات انبثقت تسانده!

(ملحوظة حياتية: إذا لم تستجب دموع عينيك لمأسيك الدنيوية،

فاعلم أن تكوينك الإنساني يعاني مشكلة ما!)

- لا إله إلا الله، انت هتبكي يا عم عزوز!

قالها بدر وسارع لإحاطة رأسه بيديه، مستقبلاً إياه بصدرة رابتا

عليها، قائلاً:

- طيب اهدا بس وصلي عالنبي اكده وجوللي مالك، إيه اللي

حُصِّل لكل ده؟

- اني تعبان يا بدر يابني... تعبان!

قالها عم عزوز بصوت فر هاربا بصعوبة من دموعه، يأتيه رد الشيخ
بدر وما زال محتضنا إياه:

- يا ساتر يارب، ألف سلامة عليك يا عم عزوز طب يلا بينا عالو حدة
وللا حتى انزل معاك المركز نشوف المستشفى العام اللي هناك!
- تعبي مالوش دوا عند الحكما يابني، تعبي تعب جُلوب، الجلوب
ما هتتعالجشي يابني!

- مين جال اكده يا راجل يا طيب امال ربنا فين؟ بجولك ايه...
احنا ما هينفعش نتحدثوا هنا تعالى ويايا الجامع نصلي ركعتين وجوللي
مالك، وان شاء الله كل حاجة وليها حل!

(ملحوظة مجتمعية: ثقة الفئات الدنيا من الشعوب العربية في
رجال الدين نبعت في الأساس من المشاركة الصادقة والفعالة لـ
(رجال) الدين هؤلاء لتلك الفئات كل مظاهر حيواتهم بائسة كانت
أو مبهجة... فإن تخلي المشارِك عن منهجه، فلا حاجة للمشارِك
بالتمسك بثقته!)

لم ينشغل كثيرا بما حدث، لعلها تلك الحالة الغريبة من اللامبالاة لأي شيء، الملازمة له منذ سنوات تلت الحادث الأهم في حياته. لم تشغله كثيرا مشاهد الدماء ومناظر السحل وصور الاعتقال، كأن تلك الدماء المتناثرة من الوجوه والملابس المزاحة عن الأجساد والأقفية، أسيرة كفوف تقودها إلى قبور تركز على عجالات أربع، لم تزد على كونها مشاهد سينمائية لم تلبث أن انتهت بتصفيق جمهور غادر لحياته الطبيعية مجددا، بعدما نفّض عن رأسه غبار لقطات فيلم خمسيني وُضعت كلمة (النهاية) في آخره.

عاد من جديد لحجرته وصور المظاهرة تبث في رأسه شيئا فشيئا، صراخ (شافعي) الآخذ في الاقتصار على الظهور في ذاكرته على مشهد صامت لقم مفتوح، كأن أحدهم قد أغلق الصوت في تلفاز ذاكرته. اختلال الصفوف، والقبض على (كفافي) مُقادا إلى إحدى العربات، تزفه إليه عصي الغربان الآخذة في الاختفاء، كأن الكهرباء قد انقطعت فجأة عن ذات التلفاز العارض مشاهد اليوم الطويل.

كأن باب حجرته حين أوصد خلفه عقب الدخول قد استحال قرص مخدر، ألقمته إياه لامبالاته، خلع عنه حذاءه غير مُبالٍ باختفاء إحدى فرديته تحت سريره، مَضيف الإهمال، إثر تخلص قدمه منه ببركة تنم عن كراهية لكل مقيد لحريته، حتى حرية قدميه. ألقى بنفسه، دون

تبديل ملابسه، على سريريه، بوضع أقرب لجثث القبور، وما زالت عيناه
معلقتين بلا شيء في سقف حجرته ومصباحها المضاء في خفوت.
رغما عنه، اقتحمت فراغ صفحة السقف نصف المظلم صور اليوم
الطويل، صراخ الصارخين فوق الأكتاف، ارتطام العصي برؤوسهم،
اقتياد الناجين منهم إلى عربات سوداء مقية كهيئات أصحابها... قبل أن
تصرع كل الصور تلك الصورة المرعبة لحادث قديم، اتسعت لذكرها
عيناه فجأة، كأنها المتسائلة عن علاقتها بما سبقها من مشاهد وقدرتها
تلك الفائقة على هزيمة ذلك الجمع من صور لازالت في مخيلته شابة
في عنفوانها. غير أن وقوفه لم يطل كثيرا أمام السؤال، وهو المعتاد على
بلطجتها من حين لآخر على تلك المخيلة وجديد صورها.

بدأت عيناه في الخفوت شيئا فشيئا، تستسلمان لطلائع نوم أخذة
في الزحف نحو معسكرها، قبل أن ترضخا أخيرا لنوم عميق ينتظر
غامض الأحلام!

صوت مزعج لاحتكاك عجلات سيارة بأسفلت عصي أوامر
فراملها بالتوقف، صوت أكثر إزعاجا لارتطام عنيف ممزوج بصرخات
تشابكت تحت ستر ليل أحاط صورته أطار ضبابي ممطر، كتم الصراخ
مانعا إياه من الوصول لآذان هؤلاء المختبئين من قسوة برد جمّد كل
صورة ممكنة لتفاعلات الأدميين، ثم في نهاية الأمر طريق خالٍ من كل

مظاهر الحياة إلا من انهمار مخيف لأمطار كأنها الساقطة من دلو عظيم
مثقوب، وسيارة بدت كسلحفاة استوت على ظهرها، وقد انسربت
من زجاجها المهشم قنوات حمراء رفيعة من دماء ساكنيها (المقيدين
بأغلال الصمت) على أنغام بالداخل لمذيع لآزال متشبثا بمفرده
بأهداب الحياة، رغم بعض التشويشات وقد علت ألحانه بموسيقى
جنازية، رقصت على أنغامها قطرات المطر رقصة الوداع الأخير!

- إبراهيم!

انتشله النداء المسبوق بطرق خفيف على باب حجرته من برائن
حلمه، الذي بات أبرز مرافقيه طوال مدة مضت، يود ويود محيطوه لو
أنها سَطَرَتْ في كتاب حياته بحبر سري يخفى مكنوناته عن عيون عانت
من قراءة سطور الحيوانات ما يغنيها عن المزيد!

- إبراهيم!

تكرر الصوت... أهمله عائدا للنوم، وإن كان في داخله ممتنا له
لتخليصه من قيود حلم معتاد، مازالت بقاياه لم تبتعد أكثر من حدود
وسادته...

- إبراهيم!

من جديد علت نبرة الصوت، فقام إليه متأففا يفرك عينيه، طاردا من
أطرافها بقايا نعاسه، حاضنة المشاهد الباكية المبكية العائدة بتفاصيل

ماضيها البعيد، متطفلة على حاضر لم يعتد غير الاستسلام لها!

- بابا!... اتفضل!

قالها مرحبا بأبيه صاحب النداء، الذي خطى عدة خطوات حتى
مقعد قريب، فغاص فيه محادثا ابنه الأكبر، الذي لم يتخلص بعد من
هيئته الناعسة.

- قلقتك؟!

- لأ خالص طبعاً يا بابا!

- يبقى قلقتك... معلىش لقيت نفسي فاضي قلت آجي أدرش
معاك شوية... وللا ما عندكش استعداد تستقبل ضيوف؟
- العفو يا بابا، حضرتك تنور في أي وقت.

- بص بقى يا بطل، أبوك زي مانتا عارف ما بيحبش اللف
والدوران، طول عمره واخذ طريق الوضوح ودائس بنزين ما بيقفش
عشان يريح ويرتاح، مش كده وللا إيه؟

- طبعاً يا بابا... اكيد... حضرتك حتى مربينا على كده.

- جميل... وما دام حضرتي بقى مربيكم على كده يبقى ان
شاء الله مش هاخذ من وقتك كثير.

- خير يا بابا؟... قلقتنى!

- مالك يا إبراهيم؟... فيه ايه في حياتك مخبيه يا بني تا عبك وتاعبنا

معاك بالشكل ده؟

سؤال ألقاه الأب بشئ من الأسى، كأنما كان سؤاله يدا أجرت مشاهد عامين كاملين في ذهن الأب والابن كليهما. شعرا بتلك الرجفة الداخلية، التي لم يظهر من آثارها على هيئتهما أكثر من ارتباك لنظرات الابن، بدت جليلة في مقلتيه لوهلة، ناظرا لأبيه نظرة بعمر الثواني، لم تلبث أن فرت إلى جهة معاكسة لنظرة الأب الجامدة تراقب ردود أفعال ابنه المنحسرة، في صمت ممل أعقب حيرة نظراته، فاستطرد قائلا:

- هافضل سامع سكاتك كده كثير يا دكتور؟

- مافيش حاجة يا بابا والله الحمد لله كله تمام، كل الحكاية ان المذاكرة ثقيلة شوية بس، ضغط دراسة مش أكثر.

- مذاكرة!، وفي الأجازات لما بترفض تخرج معنا أو مع حد من اصحابك برده مذاكرة؟

صمت ثوانٍ قبل أن يستمرئ كلماته:

- ليه يا إبراهيم مش قادر ترجع إبراهيم اللي انا عارفه ومربيه؟ ليه مش قادر تلاقي نفسك في شخصية واحدة محددة؟ شوية مربى دقنك ومواظب على صلاتك في الجامع والمصحف مايفارقش جيبك عشان بتقول ان مافيش غير الدين طريق وحيد للراحة، وشوية ليل نهار قدام الماتشات وفي الاستادات، بحجة ان الأولتراس كاريزما

التمرد وأيقونة الحرية زي مابتقول، وشوية تالته تتفرغ للجيم والرياضة
عشان بتقول ان الدنيا مش هتمشي غير بالقوة والدرع، وشوية رابعة
وشوية خامسة وشوية عاشرة.. انت مين في دول يا إبراهيم؟ مين في
الشخصيات الكثير اللي عشتها وعيشتنا معاك فيها طول الفترة اللي
فاتت دي؟!

- يا بابا أنا... أنا... انا يعني بحاول أجرب كل حاجة عشان اعرف
الصح فين.

قالها يقاوم بها ما نطقه أبوه من حقيقة يعلمها عن نفسه أكثر من
أي آخر، مقاومة الفريسة لصيادها في نزعها الأخير، يأتيه سؤال أبيه من
جديد يجهز على آخر أنفاس المقاومة لديه:

- وعرفت الصح؟!

-

- كل ده بسبب الحادثة اياها مش كده؟!

مجددا قرعت اللفظة طبول اهتمامه المسلوب، حذج أباه بنظرة
لمعت لها عيناه حيناً، ينظر إليه دون نطق كلمة واحدة، قبل أن تنفك
عقدة لسانه قائلاً:

- حضرتك عارف إني نسيت الموضوع ده خلاص.

- مش باين!

-

- انت مش شايف فيا حد جدير بثقتك ممكن تحكيه و تتكلم معاه

يا إبراهيم؟

- يا بابا العفو، دي حاجة تشرفني طبعاً.

- أُمّال ايه بقى؟

-

(ملحوظة: تعدد الخيانات في رحلة عسكري الشطرنج قد تدفعه لفقدان الثقة في باقي القطع، حتى وإن كانت أقربها إليه!)

- واضح ان فيه مشكلة عندك في الكلام حتى مع أبوك.

قالها الأب ضارباً بكفيه على ركبتيه مستعداً للقيام، يغالب زفيراً يائساً غلبه بالخروج هارباً عبر منخاريه، من صدر ضاق بالكثير من محوياته. مقبض الباب كان هدفه التالي، قام إليه في بعض الثاقل، كأنه المنتظر جملة تستبقيه لم تسمح لها شفتا ولده بالخروج. وقف يتابعه بنظراته، من ذلك الفراغ المضيء على مشارف الباب للحظات، قبل أن ينسحب دون كلمات، تاركاً شاباً في العشرين يزيل آثار دمة صمدت في عينيه حتى رحيل الأب، الضيف!

بعض زجاجات الدواء بنية اللون، ذات غطاء مقيت أبيض، وسائل ذهبي لزج، ينتظر إشارة الهجوم على فم أحدهم. بعض الشرائط العلاجية في خريف عمرها، وقد اقتصر ما يربطها بالحياة على قرص أو اثنين على أقصى تقدير. الكثير من أربطة (نظيفة) احتلت مكان (الطاجية البني الصوف).. زيارتان للطبيب، الذي تولى الشيخ بدر حسابه، للاطمئنان.. إضافة للكثير من دعوات الأبوين وحلوى الشيخ الشاب، ربما يكون مزيجا كافيا لعودة هذا الـ (طلال) للحياة من جديد. أسبوعان فقط، كانا كافيين بشكل ما لرحلة العودة تلك. عاد من جديد لوقفته بين شجيرات القطن، منجله الحاد في يساره، نصف رغيف احتضن قطعة جبن صغيرة ونصف ثمرة طماطم في يمينه، ربط جلبابه الأزرق ذا الأكمام الواسعة في وسطه، وقد برز من تحته (كلسون) بني اللون تمتد قدماه إلى ما تحت ركبتيه السوداوين بمقدار نصف شبر، بعدما رفعهما عن قدميه حفاظا على... ما تبقى من حياتهما. غناء وردة، مشاكسات الشيخ بدر، بسمات أخته ابتسام، (تمشية) الحاج مهني والدهما ووالد الجميع بين الحضور... عاد طلال للحياة!

- طلال... طلالاااااااااااا!

سمعتها مدوية تأتيه من خلفه، من هذا المهرول عبر شجيرات القطن، التي أخذت في التقارب تحتمى ببعضها تارة وبجامعي زهراتها

تارة أخرى، من هرولته وصراخه.

- خبر ايه يا حسان؟ وشك بيحول ان فيه مصيبة!

- ماهي مصيبة صُح!

- مصيبة ايه؟، اتكلم!

- أبوك وجع وهو جاي الغيط ونجلوه عالوحدة!

سمعها (طلال)، فرمى ما كان قد جمعه من زهرات القطن، مهرولا

نحو ذلك الذي جاءه بالخبر متسائلا في لهفة:

- حُصِّل مَيِّ الكلام ده؟

- لسه دِلَوْكُ من ييجي عشر دجايح جار الساجية اللي نواحي

أراضي الزغاية

كأنها لم تكن - رغم قسوتها- مجرد كلمات، بدت رُحًا من عالم

الأساطير، هبط لأرض البشريين متربعا عرش الفزع، مختارا ضحيته

من بين الخلائق ذلك الغلام ذا الأربعة عشر عاما، مهاجرا به لأرض

بعيدة لم تطئها أقدام أبناء آدم بعد.

لم يدرِ (طلال) بنفسه إلا مهرولا بين الزروع، ومازال جلاببه عالقا

في سرواله، ويداه تعانيان من آثار طين الأرض فيهما، غير مدرك لذلك

النداء القادم من طرف الحقل مرددا اسمه بصوت سمعه جميع من

بالحقل إلاه:

- طلال، طلالااااا، طلالااااا!

- ماله الواد ده؟

قالها الحاج (مهنى) مخاطبا ابنه الشاب المشغول بمتابعة (طلال)
بنداءاته، التي لم تظفر بإجابة، فعاد لوالده قائلا:

- والله مانى عارف يابا علمي علمك، استنى الواد حسان وراه اهو
شكله خابر اللي حُصِّل ... حسان، واد يا حسااااااا!

- نعمين ياسي بدر!

قالها ذلك الغلام ذو الاثني عشر ربيعا، ملبيا نداء الشيخ مسرعا
ناحيته، متلقيا السؤال بأنفاسه المتلاحقة مستعدا لإجابته:

- خير ماله طلال بيجري كده ليه كأن مصيبة حصلت!

- عم عزوز وِجع من طولہ نواحي الساجية من شوية ونجلوه
عالوحدة!

سمعها الشيخ (بدر)، فتبودلت بينه وبين أبيه نظرات ذات معنى،
أعقبها الأب موجهها كلامه لابنه:

- روح وراه شوفه يا بدر بسرعة، وخليك معاه لحد ما يروح بيته
بالسلامة، وابجى طمني عليه على طول!

- حاضر يابا!

قالها الابن منفذا أمر أبيه، مصطحبا ذلك الغلام (حسان) إلى

حيث يلحقان بطلال وأبيه!

ليست إلا دقائق فقط، كانت كافية لوصوله لتلك الكومة البارزة من القمامة المحيطة بوحدة قرية العش الصحية، البادية بما ضمته جدرانها المتواضعة من تأوهات مصارعي الموت، وما رأته سرائرها الأكثر تواضعا من صرخات النزاع الأخير لتلك الفئة المهملة من الأحياء، كما لو كانت رمقا أخيرا في صدر عملاقٍ يحتضر. لم تعد على كل حال جاذبة لأي نوع من أنواع الانتباه، وقد اعتادها أهل (العش) واعتادتهم، فوُلدت بين الطرفين علاقة صداقة من نوع فريد، دفعت هؤلاء البسطاء لتناسي أنها شاهد على هلاك الكثيرين منهم عبر سنوات، وهم لا يملكون عنها بديلا يتعلقون معه بأهداب أمل شفاء واهن، سرعان ما يذوب.

(حقيقة بشرية: إن تكرار وجود الخلل في حياة الكثيرين دون محاولة إصلاحه يجعل منه شيئا عادي الوجود، بل إن أي محاولة للإصلاح قد تبدو في عُرفهم نوعا من أنواع الغباء)

- آبا... حُصِّل ايه؟

قالها (طلال) وسط أنفاسه المتلاحقة حتى أنها تاهت بينها، وهو يخترق ذلك الجمع المحيط بآخر أسرة الوحدة، وقد استسلم الراقد فوقه لمجموعة من الإبر تجد طريقها في أوردته دون حراك، في معركة صامتة بين الحياة والموت. ميّز بين الوقوف أمه الباكية وأختيه الباكيتين

لبكائها وشقيقه الواجم لبكاء الأم ورقاد الأب، غير أنه لم يظفر بأكثر من استمرار للصمت المفعم ببيكاء أمه، تحاول السيطرة عليه بمنديل من قماش مهترئ، فكرر سؤاله بلهجة أشد:

- حُصِّل إيـــــه؟!

- كان طالع مالييت زي الفل فجأة عند الساجية مسك جنبه وزعج جاي ووجع مرة واحدة، أنا بجالي كذا يوم مش مطمئنه حالته متغيرة وكل ماسأله يجول مافيش حاجة!

قالتها الأم وسط بكائها، فجاء الرد من أحد الوقوف أصدقاء الأب:
- مفيش حاجة ان شاء الله يا طلال يابني، شوية تعب عالجد وهير وحوأ لحالهم ان شاء الله طوالي، مانتا خابر أبوك ودلعه، أهو جصادك كيف البدر أهو ما شاء الله.

- ماني عشان خابره وخابر انه مش بتاع دلع جلبي اتوغوش عليه يا عم عطية، دي اول مرة في حياته تحصله حاجة كيف دي!
- ماتجلجش، ان شاء الله كل حاجة هتُجَي زين وهيجوملكم بالسلامة احسن ما لاول.

- الداكتور جال ايه؟

- عمل شوية تحاليل اكده خد شوية بول وخدوا من دراعه شوية دم... واديننا مستنيين نشوف هيجولوا ايه؟

- سلامو عليكم!
- سمعها الجميع فالتفتوا لصوت يعرفونه ويجلون صاحبه، راڏين
السلام في صوت جماعي، قبل أن يستطرد القادم:
- طلال... خير ايه اللي حُصل؟ ... جلجتنا عليك!
- فجاءت الإجابة من الصبي ذي الأربعة عشر عاما واهنة، على
عكس ما اعتاد منه الجميع:
- شيخ بدر؟، تعبت نفسك يا مولانا!
- ماتجولش كده يا واد يا طلال، ده ابوك زي اخويا الكبير بالظبط
واكثر كمان، ربنا يعلم. المهم الداكتور جال ايه؟
- لساننا منتظرينه اهو!
- صمت حيناً، قبل أن يشير بعينه قبل سبابته لذلك القادم في معطفه
الأبيض من بعيد، حاملاً في يديه بعض الأوراق، وتتدلى من رقبته
سماعة تنتظر المزيد من ضحايا المرض، تزف لأهلهم أنباء المعاناة.
تعلقت به الأنظار حتى توقف إلى جوارهم، وقد سبق إليه الكثيرون
منهم استعجالاً لتشخيصه:
- خير يا داکتور؟، طمّنا ابوس يدک!
- کلکم أهله؟
- ایوة!

- بصراحة يا جماعة دي حاجة ماقدرش اخبيها عنكم!
علت الوجوه علامات الرعب، فتبادلوا نظرات صامتة، سرعان ما
عادت من جديد للطبيب الشاب تنتظر استكمال كلماته:
- المريض بيعاني من التهاب كبدي وبائي في مرحلة متأخرة،
للأسف لازم ينزل القاهرة بأسرع وقت، ماعدناش هنا امكانية اننا
نعالجه بالشكل المطلوب!

وكان بابا من أبواب الجحيم قد وجد متنفسا له في دنيا الأحياء
عبر فم هذا الطبيب الشاب، فأضاف على وجوه هؤلاء الوقوف قدرا
من السواد لا بأس به. مادت الأرض بأغلبهم، بيد أنهم لم يظلوا في
حالة سكونهم طويلا، وقد انتبهوا جميعا لصرخة الأم، العائدة لرشدتها
عبر بوابة الصراخ التي تملك مفاتيحها أغلب نساء الريف، عدة
صرخات متتالية شقت ستار السكون في حدة، حتى انتهى بها الأمر
بعد دقائق نحيبها وصراخها إلى السقوط مغشيا عليها، وإلى جوارها
طفلتان تبكيان سقوط الأم وفزعها أكثر من بكائهما رقاد الأب، الذي لا
يفهمون له سببا حتى الآن!

لا أعلم متى كانت أول المرات التي جمعتني فيها جلسة واحدة
بورقة وقلم ومكتب ومصباح. لا يهم؛ لست بحاجة للاهتمام بأول

الجلسات أو آخرها، لن أكون ذلك التافه مسجل كل شيء يمر به إلى حد يمل منه الملل. يكفي أن أذكر أنني لم أكتب قبل ذلك الحادث البغيض شيئاً قط. ربما بعض الجمل العجفاء العابرة على شبكات التواصل الإلكتروني، لا تعبر بالضرورة عن أي شيء، رحلة إلى الاستاد، جولة داخل مول، جلسة في مقهى، وصور تسجل كل تلك اللحظات الفارغة، هذا كل شيء.. اللعنة!... كيف كنت هذا الكائن الخاوي من أي شيء؟!

مهلاً مهلاً... هل أبدوا الآن أمام الجميع حاوياً لأي شيء؟، لا يبدو أن أي من الإجابات يحمل ذلك الرد ذا الحروف الثلاثة «نعم».. يبدو بسيطاً في تكوينه الحرفي، على نقيض حقيقته المتمردة على كل علامات الاستفهام الخاصة بمشواري السخيف. ما هذا الهراء الذي أكتبه؟... أعتقد الذهاب للنوم سيكون خياراً أفضل بشكل كبير!

إبراهيم

٢٠٠٩/٢/١٧

تلك المقولة الناصة على أن لكل شعور إنساني رائحة من مدلولاته المادية، تحمل أسرار مكنوناته.. رائحة الجوع النفاذة في وجبة يتوقف قطارها قبل محطة الشبع بأميال، رائحة الخوف الظاهرة في ملامح غلام لم يتعلم من أمور الدنيا أكثر من غسيل السيارات، رائحة البرد الراقدة إلى جوار طفلة تبيع المناديل على رصيف المترو في شتاء يناير، رائحة المعاناة المحلقة في رأس أب لا يحلم بأكثر من جنيهاً تسكت إلى حين أفواها جائعة لا تطمع في أكثر من لقيمات، ورائحة الموت المتمثلة في... رجل أربعيني يفتش أحد الأسرّة في مستشفى حكومي يصارع آلام الكبد!

حول ذلك القارب الملفوظ من بحر الحياة لجزيرة الموت، اصطف ذلك الجمع من محبيه محمولون على آخر أمواج البحر اللجي، يتابعون مراسم ابتلاع غابات الجزيرة للقارب، الذي طالما حملهم رغم وهنه بين الأمواج، متحدية غضبها بصبره، ومواجهها عواصفها بثباته.

فوق أحد الأسرّة البيضاء كان رقاذه الأشبه بالرقاد الأبدي للمومياءات، لا يميزه عنها سوى تحرره من تلك الضمادات البيضاء المغلفة للمحنط من جث رحل أصحابها قبل مئات العقود، وقد استبدلتها بتلك الخراطيم المتشبثة بذراعه الأيمن، تتطفل على حياة

البشرىن تحاول اقتناص بعض دقائقها تهديها لصاحبها المريض . إلى جانب سريره الحديدي الصدئ، المغطى بمرتبة تآكلت أطرافها البنية، وهشَّ أوسطها الأصفر الداكن، تفوح برائحة تحمل من أثر مرضى راحلين ودَّعوا الحياة عبر بوابتها، خلال سنوات تلائم في عمرها تلك الشقوق في جدران توشك أن تنهي بانهارها تلك المعاناة المتغلغلة في رفات المراتب وصدئ الأسرَّة وفراغ الشقوق!

وجودهم حوله كان يعني له الكثير رغم كل شيء . ربما مر بهم الكثير من ليالٍ دعوا فيها بعضهم لمائدة عشاء فاخرة، يتحلقون حولها في أحلامهم، بعدما حُجزت كل الموائد في مطعم الواقع لطبقات قادرة على الدفع.. ربما استعاضوا بسرائر حريرية، نسجتها دودة قز ملائكية في جنة أمنياتهم، عن دفء أغطية فرَّت يوم زحفهم مواجهين جيوش برد تطمع في احتلال المزيد من أجساد البسطاء.. ربما، وربما، وربما... تلك الـ (ربما) الرابضة على الدوام أمام كوخهم المسكين، تحارب واقعهم بطلائع الخيال، غير أنهم رغم كل شيء مازالوا على ثقة أن هذه الدعوة لموائد الأحلام، وتلك الاستعانة بسرائر الأمنيات قد تمَّتًا ومثيلاتهما... رغما عنه!

- سلام عليكم!

استقبلها الجمع حوله بردها في نبرة جماعية، ملتفتين إلى صاحبها

القادم وقد بدا عليه أثر الأدوار الخمسة صعودا، تلمع على جبينه بعض كرات العرق يجففها بمنديله، متخطيا الجميع إلى سرير ذلك الراقد في وهن، قائلا وابتسامة باهتة تموج على شفتيه:

- ألف سلامة عليك يا عم عزوز، ما شاء الله وشك منور اهو داحنا اتقدمنا عالاخر!

قابلها ذلك المريض بابتسامة متكلفة، استهلكت من رصيد طاقته الكثير، قبل أن يستمرئ الشيخ بدر كلمات مجاملته قائلا:

- يلا بقى شد حيلك كده الصف الأول في الفجر مستنيك، جامع العش واحشه أذانك!

ثم توجه بحديثه إلى الابنين الواقفين إلى يمين والديهما العليل:
- كده بردك يا علي انت وطلال؟، تنجلوا عم عزوز على مصر من غير ما عرف؟، داني عرفت بالصدفة، دا يادوبك يوم وليلة سبت فيهم العش عاودت ما لجتوش!

- معلش يا شيخ بدر، ماجدرناش نستنى والله بعد كلام الدكتور بتاع الوحدة اكتر من كده.

قالها طلال بنبرة ظهر عليها إجهاد دخيل على نغمتها، المعروفة بصفاء ألحانها المتغلغلة طوال سنواته الأربعة عشر في طرقات آذان الجميع:
- ماشي يا عم طلال، هاعديها لك المرادي بس لجل عم عزوز.

استقبلها الجميع من جديد بابتسامات، ساهمت في تخفيف حدة صرخات الألم المتعالية في الأنحاء، حتى ظهرت كلمات الزوجة الأم هادئة بين ابتسامات الحضور:

- والله يا شيخ بدر ابو علي والولاد ماكان ليهم سيرة غير الشيخ بدر الشيخ بدر، بيحبوك كده لله في الله!

- احبهم الله الذي احبوني من أجله.

قالها باسماء ومازالت أنامله تداعب مسبحته، قبل أن يستطرد قائلاً:

- والله دول زي اخواتي بالظبط ربنا يعلم ويديم المعروف.

- الشيخ بدر ده زينة شباب العش كلاتها، الكل بيحبه ويفتخر بيه كأنه ابن كل بيت عندينا بالظبط.

- الله يكرمك يا عم مجاهد ده بس من أصلك.

- ربنا يحفظك لأهلك يابني وينجيك من كل ردي.

- تسلم يا عم مندور.

حديث ساهمت كلماته في إضفاء جو من الارتياح العام، قاده الشيخ بدر بإطلائته، التي أجمع على حبها الجميع، أنهاها الشاب الوقور بقوله لطلال يستدعيه لحديث جانبي:

- تعالى يا طلال دجيحة عاوزك!

- حاضر يا مولانا.

خطوات بين الأربعة والخمسة خطاها الشيخ بدر وطلال، حتى نافذة قريبة انفردا إلى جوارها بالحديث:

- كده بردك يا طلال؟، مش جلتلك استنى انا هاتصرف في حكاية نجله دي؟

- ماعلش يا شيخ بدر اهو اللي حُصِّل بجى، وبعدين بصراحة يعني... ماحبتش اتجل عليك اكر من كده.

- اخص عليك يا طلال، هو ده بردك اللي متعود عليه معايا؟... فيه حد يجول كده لأخوه الكبير يا عبيط؟

قابلها طلال بابتسامة، استطرد بعدها الشيخ الشاب قائلا:

- على العموم انا خلاص حجزتله في مستشفى خاص هيتنجل لها بعد بكره ان شاء الله يكون سرير فضي هناك.

فاجأت الكلمات طلال، وإن حملت له بعض الاطمئنان النابع أولا وأخيرا من وجود الشيخ بدر إلى جواره، كما هي العادة، والمدعم بكلمة (خاص)، التي شعر معها لوهلة بسداجة الأطفال أن المال قد يحافظ على لحظات عمر مهدرة.

- والله يا سيدنا ما عارف أجولك ايه، كتير جوي اللي بتعمله ده!

- تانى هنجول الكلام ده؟، بص بجى ركز ويايا، انا هاسيبك دلوك عندي مصلحة كده هاخلصها واجيلك ان شاء الله بعد بكره يوم

السبت، ولو اتأخرت انا موصي دكتور حبيبي هيخلص كل إجراءات النجل ان شاء الله، خد الورجة دي فيها رقم تليفونه هيفوت عليكم بكره ان شاء الله بعد صلاة الجمعة على طول، يزور ابوك ويعرف من الدكتور اللي بيتابعه الحالة ايه بالظبط.

قابلها طلال بنظرات الامتنان الصامته، يلتقط الورقة ناظرا للأسفل، قبل أن يرفع رأسه للأعلى بفعل يد الشيخ بدر التي رفعت وجهه لينظر اليه قائلا:

- انت راجل يا طلال، راجل بحج وحجيحي!

قالها، فانتبه لحبات لامعة توشك ان تتساقط من عيني الفتى، فاحتضنه لدقيقة ثم أفلته قائلا:

- يلا روح إف جنب ابوك وامك واخواتك وانا هاعمل اللي جلتلك عليه.

انطلق طلال، قبل أن يعود على إثر نداء محادثه من جديد:

- طلال، استنى صحيح نسيت اديك حاجة.

- خير يا مولانا؟

- خد!

قالها يخرج من جيبه بعض السكاكر قائلا يتسم:

- دي الأرواح بتاعة الكام يوم اللي فاتوا كلاتهم من غير ماينجصوا

ولا يوم، أنا متأكد انك مافوتش فيهم ولا صلاة فجر!
التقطها طلال... ارتمى من جديد في حضنه الضاحك... باتا
كجسد واحد بروحين، تتابعهما من بعيد أعين الحضور الذين لم
يروادهما أي استغراب مما يحدث، وهم العالمون بطبيعة علاقة
الشاب والغلام!

دخوله الكلية لم يكن ليحمل أي جديد... لامبالاته بأي شيء
يحيطه، سيره البطيء نوعا ما، حقيقته المهملة تضم بعض الوريقات
مرسلة من كتفه الأيمن إلى جانبه الأيسر، نظارته الساترة عينيه نصف
المغمضتين، ثم أخيرا تلك الخطوات المحفوظة إلى (كافيتريا) الكلية،
على موعد مع مشروبه المعتاد لإزالة الغطاء عن بقية خلايا مخه النائمة.
لا يدري بالتحديد لماذا توقف فجأة، بعدما وقعت عيناه على
ثلاثتهم يديرون رحى الحديث بينهم كعادتهم كل صباح. ربما تناقص
عددهم إلى ثلاثة بدلا من خمسة، ربما بعض الكدمات الظاهرة بقوة
على وجه أحدهم، ربما تلك الضمادة حول رأس الآخر، ربما تلك
الأربطة حول ذراع الثالث، أو ربما... بعض شعور بالذنب أن جسده لا
يحمل واحدة من تلك العلامات!
- سلامه عليكم!

- وعليكم السلام.
- ردوا سلامه بصوت جماعي، لا تنبئ نبرته عن ترحيب كان يلزم حديثهم إليه منذ أسبوعين، فاستطرد قائلا:
- صباح الخير يا رجاله... أُلّف سلامة!
- الله يسلمك.
- خير ايه اللي حصل؟
- انا عن نفسي اترحلت في قشرة موز.
- وانا كنت باهزر مع أسد بس اتغاشمنا على بعض شوية!
- كلمات قيلت في تهكم قصده الصديقان، اللذان تعالت ضحكاتهما وقد حملا الكثير من الغيظ لذلك السائل الهارب يوم المعركة وسط زحام المتعاركين، إضافة لاختفائه بعدها لأسبوعين. ربما لم يقصد الاختفاء، لكنها فقط غرابة أطواره التي لم تكن في صالحه هذه المرة... أو غيرها بكل حال!.. رؤيتهم له لم تزد عن كونها في عباءة ذلك الجبان مدلل والديه، المقتصرة أحلامه على توافه الأمور، غير مدركين أن تلك الأحلام في الأساس مقتصرة على... لا شيء!
- أبدا يا إبراهيم دي شوية إصابات كده من المظاهرة اللي كانت من أسبوعين دي، بس الحمد لله جت سليمة، عادي متعودين.
- قالها معتر، أكثرهم هدوء وأخفهم منه غيظا، يحاول الحفاظ على

خيط رفيع للتواصل معه. يأتيه الرد:

- طيب وشافعي وكفافي فين مش شايفهم معاكم زي كل يوم؟!

- اتقبض عليهم.

- اتقبض عليهم!

- ايه مالك اتخضيت كده؟

- انت مش شايف ان دي حاجة تخض؟

بابتسامات تبادلها مع رفيقيه عاد معتر يقول:

- ماتخافش عليهم متعودين على كده، شافعي ابوه عميد جيش

بيعرف يخرجه كويس من المصايب، وكفافي بقى بيسترزق على حسه
رزق الهبل عالمجانين.

تعالت ضحكات الثلاثة، كأنهم لم يلم بهم شيء، فلم يجد إبراهيم

بداً من مشاركتهم مجاملة. ينهي ضحكته المتكلفة بقوله:

- طيب انا ممكن اساعد بحاجة؟

- يا سيدي ربنا يخليك دعواتك ليهم بس!

- انا باتكلم جد على فكرة والله مش باعزم!

(معلومة مؤكدة: عسكري الشطرنج قد يعد في الكثير من الأحيان

بما لا يستطيع الوفاء به... فقط بدافع "لست أقل من باقي القطع")

- عارفين والله شكرا يا إبراهيم.

حاول بها معترز إنهاء الحديث بابتسامته المعهودة البادية من خلف كدماته، يأتيه رد إبراهيم الذي بدا عليه أنه فهم الرسالة، فبادر بالانصراف قائلاً:

- طيب استأذنكم انا يا رجاله وألف سلامة عليكم مرة ثانية.
- الله يسلمك، اتفضل.

خطى بعض الخطوات بعيداً، قبل أن تستوقفه نداءات معترز من جديد قائلاً:

- إبراهيم!
- نعم يا معترز؟
- لو فاضي النهارده ابقى تعالى قضى معانا السهرة في العنوان ده.
قالها معترز وسط تأفف واضح من صديقيه، اللذين تبادلوا نظرات الاستغراب فيما بينهما، تابعهم نظرات إبراهيم المترددة، فالتقط الورقة منه قائلاً في تكلف:

- إن شاء الله يا معترز ربنا يسهل.
- هاستناك.
- ربنا ييسر ان شاء الله، يلا استأذنكو بقى عشان المحاضرة.
- اتفضل.

دقيقة كانت كافية لابتعاد أذنيه عن مرمى حديثهم، البادئ طوراً

جديدا بعد انصرافه، ملامحه الشجار، يقول أحدهم:

- ايه اللي عملته ده يا بني آدم؟، انت تعرفه ده مين اصلا.. داحنا كل معرفتنا بيه سنة في الكلية يادوب عرفنا فيها اسمه، ما يمكن شغال مع أمن الدولة ولا مع أي مصيبة، ايه السذاجة دي؟

- اهدا بس، ماعتقدش ليه علاقة بحاجة فيها قلق أصلا احنا عمرنا ماشفناه حتى واقف مع حد بيصور ورقة من محاضرة، كأنه من بلد تانية. الواد ده وراه مشكلة كبيرة ومحتاج حد جنبه.

- يا حنين!... وانت بقى اللي هتبقى جنبه؟، مش لما نحل مشاكلنا احنا الأول، ده كفاية موقفه امبارح لما جري زي الفيران وسابنا في وسط المدعكة.

-

- على فكرة يا جدعان ماعتقدش هيبجي اصلا ده واد خرع، مش فاكرين لما شافعي عرض عليه قبل كده يخرج معانا طلعله ١٠٠ حجة؟، ده بيقلق من خياله.

- هيبجي!

- تراهن؟!

- أراهن قوي!

- وايه ان شاء الله اللي مخليك واثق كده يا حضرة العراف؟

- كونه النهارده كسر جزء من الحاجز اللي بينه وبين الناس، جه هو سلم وسأل علينا من غير احنا ماننادي عليه زي كل مرة، بيقول ان فيه تغيير.

- وايه بقى ان شاء الله اللي يضمنلنا انه تغيير إيجابي في صالحنا؟

- يا أخي طب وليه افتراض سوء الظن ما يمكن كده فعلا؟

- انا مش متطمن عموما!

- ولا أنا!

- انا بقى متطمن، ومتطمن قوي كمان.

صعد منبره في وقار، ربما لا يحظى بمثله الكثيرون ممن تخطوه بعقود.. جلبابه الأبيض، غطاء رأسه بنفس اللون، مسبحته المكللة أنامل كفه الأيمن، ولحيته التي أكسبت وجهه قمحي اللون وسامة كتبت في سطور الجمال تحت عنوان خاص يسمى جمال الإيمان. ثم كانت وقفته ممسكا بأحد عمودي المنبر، موجها كلامه لسامعيه من أهل العش المتطلعين إليه بعيون توجتها البساطة، ورؤوس تعلم أنها ستفتح أبوابها... لرجل يستحق!

- بسم الله، والصلاة والسلام على رسول الله سيدنا محمد صلى الله عليه وسلم، نصح الأمة وكشف الله به الغمة وجاهد في سبيل ربه حتى أتاه اليقين، أما بعد.. أخوة الإيمان والإسلام.

خطبة النهارده يمكن مش هاتكلم فيها كثير، مابجاش لينا نفس للحديث واصل، هتيجي منين النفس واحنا شايفين جثث وأشلاء لأطفال حتى لسه ماتعلموش المشي والكلام؟، هتيجي منين النفس واحنا شايفين ستات عمرهم عدى السبعين سنة مطرودين في الشوارع مش لاجئين متوى، بعد ما الجنابل والصواريخ خرجت بيوتهم وجتلت ولادهم؟، هتيجي منين النفس واحنا شايفين شيوخ بينهم وبين الآخرة خطوة بيتزجوا ويتهانوا ويتشتموا من شوية كلاب ماسكين سلاح؟، هتيجي منين النفس واحنا شايفين المساجد بتدخل بمداسات الصهانية؟، هتيجي منين؟

لأ والأدهى اللي يحزن اننا يادوب بتفرج عالتلفزيون ونجول يا عيني عليهم! فين مبدأ المشاركة اللي الإسلام علمه للعالم من اكر من ١٤٠٠ سنة؟، حكومة وبتجفل عليهم المعابر عشان يتخرجوا هناك، والرئيس ربنا يحميه لشبابه يجولك لما ناخذ إذن الجانب الإسرائيلي، شعب وبيكتفي بجراية عناوين الجرايد في ثواني ويجلب الصفحة عشان يشوف الزمالك عمل ايه والأهلي راح فين؟، هنجول لربنا ايه؟، هتجول لربنا ايه يا مبارك؟!

عارفين اكر حاجة تحزن ايه؟، ان بالمنظر ده في يوم من الأيام هتتعرض الآية، وحتى مجرد التعاطف ده مع اخواتنا في فلسطين مش هيبقى موجود. ماهو اصل زي ماييجولوا حدانا في الأمثال (البعد يعلم الجفا) واديننا بنبعد كل يوم اكر من اليوم اللي جبلة.

فى يوم في المستقبل إن شاء الله هيجف شيخ فلسطيني عنده ستين سبعين سنة يحكي لأحفاده عن حكاية عدى عليها خمسين ستين سنة، هيحكيلهم عن بيت وقع كان فيه أوضة ليه ماليها صور كثير، أجملها صورة الأقصى. هيحكيلهم عن صاحبه اللي كان معاه في مدرسة واحدة وفجأة لقي نفسه ماشي في جنازته وهو لسه سنه مش مخلياه واعى انه مش هيشوفه تاني. هيحكيلهم عن اخوه اللي كان لسه بيرضع وفضل يصرخ يومين ثلاثة لحد ما مات لما مالقاش حد يرضعه بعد أمه

ما ماتت في القذف. بس عارفين اكثر حاجة تحزن هيحكياهم ايه؟،
هيجف يشاور على خريطة فيها بلدين جنب بعض، هيجول اني كنت
جاعد هنا مع ابويا وامي وصاحبي واخويا وبيتنا وصوري، كنا بنبص
للناس اللي في البلد الثانية انهم اخواتنا الكبار، بس لما جت ساعة
الجد، لجيناهم واجفين الناحية الثانية بيتفرجوا على بيتنا وهو بيتخرج
وامي وهي بتموت وصاحبي وهم بيدفنوه واخويا وهو بيصرخ، بدمتكم
مش حاجة تخرج الجلب ان دي تبجي سيرتنا بعد خمسين ستين سنة؟!
آخر حاجة هاجولهاكم اتجوا الله في اخواتكم، واحذروا إعلام
الفساد اللي بييجوي السلطة الظالمة على ظلمها. عايزين يوصلونا ان
اللي بيعمله الرئيس وحكومته هو عين العجل، ييجولك الفلسطينيين
بيهربوا لسينا وعايزين يستولوا عليها وحماس إرهابيين و...و...و، عارفين
خطورة الكلام ده ايه؟، خطورته ان فيه جيل هيتربى عالكلام ده ويقتنع
بيه، والجيل ده مسافة ٢٠ - ٣٠ سنة هيمسك هو البلد، ييجي فيهم الوزير
والمسئول والظابط والدكتور والمدرس وكل حاجة، وشوية شوية
هيجي منهم رئيس الجمهورية ووزير دفاعه، يعني مش بعيد نلاجي نفسنا
مشاركين مع اسرائيل في عملية عسكرية للقضاء على إرهاب حماس
والفلسطينيين!، فيه جضية أمة بتضيع يا اخواننا، فيه جضية أمة بتضيع!
لعلها كانت المرة الأولى التي تشهد فيها العش مثل هذه المظاهرات

ذات الحشد المُرضي بشكل كبير، إذا ما قورن بكونها أولى المرات.
خرجت الجموع من المسجد الكبير وسط القرية، عقب خطبة الجمعة
للشيخ بدر، ينضم إليهم نساء القرية وحتى أطفالها الفرحين بتلك الحركة
غير المعتادة، يرددون الهتافات في سعادة ساذجة دون أدنى فهم لمعناها.
على الأقل عرفوا أن هناك صديقا يسمى فلسطين، وعدوا يسمى إسرائيل!
استمرت وقفتهم ساعة وبعض ساعة، اشتعلت فيها الهتافات
وانتهت بجمع تبرعات من الجميع، تعهد الشيخ بدر بإرسالها إلى غزة مع
قافلة طبية ذاهبة إلى هناك في غضون أيام... غير أن هاجسا مرعبا دار في
ذهن الكثيرين، أن تلك الليلة لن تمر بسلام على... ذلك الشيخ الشاب!

- لحد دلوقتي ماقلتليش مين سَرَباز!

ابتسم ابتسامة أوحى لي بقدر عظيم من الغباء، أيقنت في هذه
اللحظة أنني أملكه، قبل أن يكون رده:

- قتلتي انك بتعرف تلعب شطرنج!

قالها لي باسم في سخرية استفزتني، بشكل ربما لم أعان
مرارته من قبل... الرقعة بدت شبه خاوية من جيشي الأبيض، وقد رفع
رايته تماما عليها بجيشه الذي لم يفقد الكثير من أركانه. الزوايا
كلها تعرض صورة هزيمة ساحقة، ربما لم أعانها قبل الآن... علي
الاعتراف ببراعته في إدارة معارك رقعة الشطرنج على أية حال. بدا لي

كأنه مبتكر اللعبة، صانع الرقعة، مُشكِّل القطع... كل الطرق
تؤدي لكونه أحد عباقرة اللعبة بشكل مبالغ فيه!
اكتفيت بنظرة خاوية حملت بعض ارتباكِي، قبل أن أحاول
مجاراته قائلا:

- ايه علاقة السؤال ده بسؤالي؟
- أهملني من جديد مستطردا:
- لسه شايف ان الأبيض عمره مابייخسر؟
- لم أعد أملك الا استسلاما له، وقد امتلك تماما دفعة الحديث؛ أجبت:
- عادي... خسارة عادية، مش معناها نهاية العالم.
- عادت ابتسامة السخريّة تلمع فوق شفّتيه من جديد، متبعا إياها بقوله:
- عاجبني التفاؤل بتاعك ده قوي على فكرة.
- بتتريق؟!
- ليه سوء الظن؟
- إحساس.
- مانّا حسيت بردوان الأبيض مابייخسرش!
- تغاضيت عن تلميحه مستطردا:
- وجودي معاك مضايقك؟
- بالعكس!
- امال ليه حاسس ان نبرتك بتقول انك مش مقتنع بوجودي أصلا معاك.

- مەم... مەش بەلظبۇ كەدە.
- استەفزانى كەلمەتە مەن جەدەد.. أكذب لو قلت إننى لم أتمن لو
جاملنى ببعض الكلمات، غير أن شيئاً ما ربما أفقده حس المجاملة
ذاك، فيما مضى من السنوات:
- تقصد ايه؟
- مەش ەتفهم قصدى.
- لىه حكمت بكده؟
- إحساس.
- ممكن يكون إحساس غلط.
- زى إحساس ان الابيض مابىخسرش كده؟
- انت ايه حكاية الابيض والاسود معاك؟... معلق معاك لىه قوى
كده انى اخترت الأبيض وقلت عليه مابىخسرش؟
- مەم... صعبان علىا!
- لىه؟!
- قلتها غاضباً!
- ادبت ثقتك لحد ما يستحقش.
- غرابة كلماته أوحى لى فى كثير من الأحيان بوجود ثالث بيننا
يخاطبه. ردوده غالباً ما كانت تشعرنى أنها ليست الملائمة لحديثى
إليه... لم أكن أملك غير الاستمرار على كل حال!

- مش فاهم!

- لسه عايز تسمع؟!!

تغاضى عن تعقيبى بشكل لم أفهمه. مهارته في إدارة رضى الحديث دائما إلى صالحه كانت تدعو إلى الإعجاب بشكل كبير على كل حال.

- ياريت.

- متأكد؟!!

- عندك شك؟

- عندك انت استعداد تسمع كل اللي باقى من الحكايتة؟!!

- لو ما عنديش ماكانش زمانى قاعد قدامك!

- تلعب دور شطرنج تانى؟!!

من جديد هرب بحذاقة من إجابتي:

- وتكمل؟

- وأكمل!

- رص جيشك!

- عفارم عليك يا بدر يابني، خطبة النهارده كانت حاجة تفرح!

- والله إن جيت للحج يابا دي حاجة تحزن، المسلمين بقوا

بالنسبة لبعض مجرد مشتركين في خانة الديانة في البطائق مش أكثر.

- مسيرها تتعدل يا ولدي، ربك جادر يعدلها من عنده.

لم تكن مجرد طرقات ضيف يستقبلها باب مضيفه، لا التوقيت ولا الطريقة ينبئان بطبيعية سير الأمور على نحو يطمئن له سامعو الطرقات خلف الباب الموصد الموشك على الانهيار. بعض نظرات تبودلت بين أفراد الأسرة الصغيرة، في دعر لم يعتادوا عليه، دون قدرة لأحدهم على النهوض لاستطلاع الأمر من أثر المفاجأة، وكأنما ثبتت أقدامهم في الأرض بفعل أيدٍ خفية أبقت عليها في موضعها بالأرض، كأعجاز نخل خاوية، لا يعلمون حرصاً منها عليهم أم... إمعاناً في إثارة المزيد من سخط الطارقين عليهم!

- يا ساتر يارب! ده مين اللي جايلنا الساعادي وهيخلع الباب من مكانه إكده؟!

قالتها تلك السيدة في أوائل الخمسينيات، تتلمس لسؤالها إجابة لدى أي من الجالسين، وإن كانت على ثقة أنهم لا يملكون من الإجابات أكثر مما تملك.

- أني هاجوم اشوف فيه ايه!

قال بدر متجها إلى الباب بخطوات حاول إلباسها أسمال ثقة آخذة في الفرار، بعدما مر برأسه هاجس حاول إبعاد طيفه سريعاً.. لوحظ بعض البطء في خطواته الأخيرة بعد الدرجتين السابقتين للباب

الحديدي الكبير المُغلف ظهره بزجاج مزخرف، أظهر أطراف الطارقين بشكل انقبض له قلب بدر، وقد عاد طيف الهاجس للظهور مجددا بعد تيقنه من هوية الطارقين، إثر رؤيته لأشباح قبعاتهم المقيمة التي يعرفها:

- مين؟

- افتح الباب!

- مين؟!

- افتح الباب باقولك!

- مش فاتح، جول مين بيخبط!

- اكسروا الباب!

كأنهم كانوا بانتظار أمر يعرفون قدومه لا محالة، قاموا من فورهم بتحطيم زجاج الباب بشكل جنوني، تناثرت على إثره شظايا تطايرت إلى وجه بدر وذراعيه، مسفرة عن بعض الجروح الصغيرة، من تلك الفئة من الجروح التي تستعر نارا رغم كونها لا تكاد تُرى بالعين المجردة، وسط صراخ لا إرادي أفرزته حناجر أمه وأخته المنكمشتين تحتميان ببعضهما، رغم يقين كل منهما أن الأخرى لا تملك لها شيئا أكثر مما تملكه هي لنفسها.

- فتشوا البيت!

قالها ذلك المتعجرف في بدلته الميري، التي لا يساوى بدونها في

سوق الأحياء أكثر من قيمة مخلوق بدائي ذار رائحة ننتنة تنبت من تحت
فرائه العفن، يأكل مكان تغوطه ويتغوط مكان أكله. في الواقع، هو
يملك نفس القيمة داخل بدلته ذات النجوم الثلاث على الأكتاف أيضا.
- حُصِّل ايه يابني؟، دي دخلة تدخلوها على الناس في انصاص الليالي؟!
قالها الحاج مهني في شيء من الثبات حاول التشبث به دون
جدوى، فأتاه الرد من ذلك الضابط بلهجة لا تخلو من تهديد واضح،
هو في واقع الأمر لم يكن بحاجة لإخفائه:
- خليك انت بعيد عن القصة دي، انت راجل كبير ومش حمل بهدلة!
- اتكلم بأدب!

أدار الضابط رأسه نصف دورة، تحاول عيناه التقاط صورة المتكلم
الذي يعرفه مسبقا، ومازال كفاه ممسكان بجانبي وسطه في تغطرس
ظاهر. ترقب قلق للفعل ورد فعله المنتظر سيطر على الجميع، وأولهم
ذلك الأب المتناسي إهانتته، المنشغل عنها بقلقه على ولده الوحيد.
- بتقول ايه تاني كده بقى سمعني!

- بجولك اتكلم بأدب، انت بتتكلم مع واحد أكبر من أبوك.
- ممم...

همهم بها الضابط يحك بها أسفل ذقنه ناظرا للأسفل، يلتفت
للشيخ بدر شيئا فشيئا، حتى أصبح في مواجهته تاماما، يستأنف كلماته
اليه في هدوء مريب:

- انت بقى اللي هتعلمني اتكلم ازاى... مممم... حاجة جميلة والله!
قالها في سخرية ممزوجة بغضب، قبل أن يفاجئه بلكمة قوية، وجدت طريقها سالكا لوجه الشاب، الذي ترنح على إثرها متراجعا للخلف يتحسس موضع الضربة بيده، مزيلا عنها بعض الدماء، وسط صرخات أمه وأخته. لم يكد يستعد لرد الضربة، بعدما تملكه تماما شيطان الغضب، حتى فوجئ باثنين يطوقان ذراعيه يمنعان حركته تماما، رغم محاولاته المستميتة للإفلات منهما، يستمع معهما لتعليمات لاكمه:
- خدوه عال بوكس!

- مالقيناش حاجة يا باشا غير الكتب دي!
سمعتها تأتي من خلفه من أحد أتباعه، فتلقاها منه يقلبها بين يديه قائلاً:
- هاتوها معاكم، حرز مش بطل!
(حين تدرج الكتب تحت وصف يضم معها المخدرات والسلاح في خانة واحدة، فاعلم أنك في دولة... بوليسية حمقاء!)
لم يعبأ كثيراً بتوسلات الأم والأب ودموع الأخت الساكنة التي تكاد تزفر بروحها إلى السماء.. ولأهم ظهره، وانصرف مع أتباعه، غير عابئ بزجاج اقترشت شظاياها الأرض، ودماء تساقطت بعضها إلى جوارها، وأسرة يبدو أنها ستفتقد ابنها... بعض الشيء!

ربما وصف حجرة لا يلائمها كثيرا.. كانت أشبه بمعرض فني لفنان إيطالي في القرن السادس عشر، مع بداية انبعاث وميض النهضة الأوروبية الشاملة، عودٌ خشبي معلق في صدر الجدار الأيمن، ينتظر في لهفة أنامل محبوبة، ليبدله مداعباته بألحان تغازل في دلال العذارى آذان الجميع.. مكتبة بنية صغيرة ذات رفوف سبعة، أسندت ظهرها في ثقة إلى الجدار المقابل.. صور على الجدران، مختلفة الأحجام، بين مرسوم ومُصوَّر، ذوات بروايز و بدون، ذوات ألوان ومكتفيات بكلاسيكيَّات الأبيض والأسود، أبطالها منقسمون بين الأشخاص والأماكن، وإن اتفقوا فيما بينهم على.. الإيمان بحب شيء واحد!

كان جلوسهم أشبه بحلقة مفرغة. بعض مقاعد خشبية تكاثفت فيما بينها لاستقبال جلستهم المعتادة، يتبادلون أطراف أحاديثهم كما هي عادة كل الجلسات، مختلفون كصور جدرانهم في كثير من المظاهر، بين ملتج لا يفارقه مصحفه، طويل شعر لا تفارقه حقيبة ظهره الحاوية جيتَّاره، ذي نظارة طيبة كبيرة لا يفارقه قلمه الملحق ببعض الوريقات، صاحب لحية خفيفة لا تفارقه كتب الرفاعي والعقاد، رفيق علبة سجائره لا تفارقه كتب شكسبير وهو جو وجوته، وغيرهم من نماذج ضج بها المجلس يسبحون في أمواج الاختلاف، وإن كانوا في آخر المطاف يلجأون لقارب واحد مجمعين على... الإيمان بحب

نفس الشيء الواحد!

- أنا رأيي نوقف النشاط شوية لحد الدنيا ماتهدا!

قال أحدهم!

- بالعكس، ده اللي هم عايزينا نعمله، وفي الآخر برده مش

هيتهدوا، أنا شايف اننا نكمل بس بأسلوب مختلف شوية.

رد آخر!

- مختلف ازاي؟

سأل ثالث!

- يعني هنوزع نشاطنا، مش هنركز في مكان واحد، كده هنشتت

تركيزهم ونجربهم ورانا.

- قصدك المظاهرات تبقى في أكثر من مكان؟

- بالضبط كده.

- ايوه بس احنا عددنا مايسمحش باللي انت بتقوله ده، احنا قوتنا

في تكتلنا لأن العدد بيبقى ملحوظ، انما كده لو أمين شرطة عدّى على

كل مظاهرة هيفضها لوحده!

- وهو ده اللي هنشتغل عليه الفترة الجاية، الانتشار بصورة أكبر

شوية وخصوصا في الجامعات.

- بس ده هياخد وقت ومش مضمون قوي نجاحه خصوصا ان عيون

أمن الدولة في كل حنة في الاتحادات الطلابية وشؤون الطلبة وغيرها.
- انا بأيد كلام عمرو... كده كده أمن الدولة بيحاربنا مش هتبقى
فارقة خلاص، أهم حاجة التنظيم، نجاحنا مضمون ان شاء الله لسبب
بسيط، احنا بندافع على سبيل المثال حاليا عن قضية غزة ودي حاجة
انت مش محتاج تقنع بيها الناس لأن هم أصلا مؤمنين بيها، لما يشوفوا
الشرطة بتعتقل وتضرب ناس بتحرق علم اسرائيل أكيد هيبقى ده ليه رد
فعل، ورد فعل قوي جدا كمان.

جاء صوت من طرف الحلقة:

- بس احنا كده بنلعب لعبة افتراضات.

رد عليه آخر من الطرف الآخر:

- مافيش قدامنا غير الحل ده فعلا حتى لو فيه شوية مخاطر،
وبعدين ماتنسوش ان فيه أكيد في باقي الكليات حركات زينا هنعاول
نتواصل معاها، اكيد ده هيبقى ليه دور مهم في التكتل اللي عايزين نعمله.
استمر الحديث دقائق اضافية، أنهته تلك الطرقات على باب
الحجرة، التي لم تسفر إلا عن نظرات الترقب والاستغراب بين الجميع،
وهي الطرقات التي تخالف نغمتها تلك المتعارف عليها بينهم. قام معتز
إلى الباب ينظر من عينه السحرية، قبل أن يتسم ناظرا للمروان قائلا:
- ايدك على الرهان.

- جه!
- ايوه هو بشحمه ولحمه.
- مستحيل.
- ايه يا جدعان جو الأفلام الهندي ده ماتفهمونا فيه ايه؟
- فتح معتر الباب مرحبا بالقادم بابتسامته المعهودة قائلا:
- اهلا يا إبراهيم اتفضل.
- دخل متفقدا المكان سريعا بناظريه، وقد داخله بعض التعجب من طبيعة ما يرى، شاعرا أن آلة زمن قد قذفت به إلى زمن آخر، قبل أن يللم بقاياها ملقيا التحية على الحضور:
- سلام عليكم
- وعليكم السلام.
- رد جماعي!
- أقدم لكم إبراهيم يا شباب، زميلنا في الكلية، متهيأ لي معظمنا يعرفه.
- أهلا وسهلا يا إبراهيم.
- قيلت من كثيرين يعرفونه شكلا فقط، من رؤيته أحيانا في طرقات الكلية، ثم تقدم يصافحهم واحدا تلو الآخر، متخذا أحد المقاعد بينهم، وسط ترحيب ممزوج ببعض الحيلة، حتى سطع صوت معتر لأحدهم قائلا، يرغب في ازالة سحابة الغربة المحلقة في جو المكان:

- ماتسمعنا حاجة كده بقى يا كيمو نخرج شوية من جو السياسة والتوتر ده.

- أيوه يا كيمو يلا الله يخليك.

- أيوه يا كيمو.

- خلاص خلاص لا داعي للتصفيق.

قالها ذلك المنادى مازحا، ثم قام يلتقط عوده المعلق على أحد الجدران، يداعب أوتاره أولا للتجربة، محتضنا إياه - كما هي عادته - احتضان أم لوليدها، بادئا بقوله يشير لأصدقائه أن شاركوني:

- مصر يامًا...

- يا بهية!

رد جماعي مع تصفيق جماعي منتظم

- مصر يامًا!

- يا بهية!

- يام طرحة وجلابية

- الزمن شاب وانتي شابة

- هو رايح وانتي جاية

- جاية فوق الصعب ماشية

- فات عليكى ليل ومية

- واحتمالك هو هو
- وابتسامتك هي هي
- تضحكي للصبح يصبغ
- بعد ليلة ومغربية
- تطلع الشمس تلاقيني
- معجبانية وصبيحة
- مصر يامًا
- يا سفينة
- مصر يامًا
- يا سفينة
- مهما كان البحر عاتي... فلاحينك ملاحينك
- يزعموا للريح يوااتي
- اللي عالضفة
- صنايعي
- واللي عالمجداف
- زناتي
- واللي فوق الصاري كاشف كل ماضي وكل آتي
- واللي فوق الصاري كاشف كل ماضي وكل آتي

- عقدتين والثالثة ثابتة

- تركبي الموجة العفوية

- توصلي بر السلامة

- معجباتية وصبية

- يا بهية

- يا بهية

تصفيق جماعي كان الستار الذي أُسدل على تلك الدقائق الفنية القليلة، التي اعتادتتها تلك المجموعة تخفف وطأة توتر كل اجتماع، يقابلهم (كيمو) بابتسامته المعهودة ملتفتا إلى شاهين، الذي قال يمازحه:

- طب والمصحف انت أجدع من ابويا.

ضحكات تبعثها من الجميع لقول شاهين، المعروف بينهم بخفة ظله، قبل أن ينتبه الجميع من جديد لصوت معتر قائلا يخاطب أحد الحضور في جانب آخر من المجلس:

- ايه يا عم الشاعر؟، مش هتسمعنا حاجة الليلا دي وللا ايه؟

- نسمعك يا معتر بيه انت تؤمر.

- الأمر لله يا عم حسام، سكوت يا شباب، يلا اتفضل يا شاعر.

اعتدل ذلك الشاعر الشاب في جلسته، وقد اتخذت ملامحه صبغة الجدية بعض الشيء، مركزا نظره الجاحظ من خلف نظارته في لا شيء

بأرض الغرفة، بعدما مال بجذعه قليلا إلى الأمام كأنه المستعد لركوب
آلة تنقله لعالم قصائده الحالم، بادئا إلقاءه قائلا:

- بلادي بلادي بلادي
أسف اني مع اجتهادي
اكتفيت بكوني عادي
مش أمل ليكي في خلاص

بتأسف يا بلادي إني
كنت كهل في صغر سني
من نشازي يوم ماغني
لحن حب بدون حماس

آسف اني في ياسي سبتك
للي سيفه فوق رقبتك
للي لوث توب براءتك
للشيطان والاسم ناس

آسف ان الحق خايف
والخداع فوق الشفايف
والحقيقة بوجه زايف
والحقوق تحت المدايس

آسف ان ضميري مات
في البرامج والشاشات
آسف ان سذاجتي علت
صرح حلم بدون أساس

آسف اني عشت عالية
عشت باحلم بالعدالة
حلم بان انه استحالة
من زمن رايح خلاص

آسف اني ماصونتكيش
وان طمعي مكفانيش

آسف انك لما قلتي محتاجاكم.... مالقيتيش
واما خفتي ماكانش فينا الليي قالك ماتخافيش

آسف!

- طب والمصحف انت كمان أجدع من أبويا!
- ضحكة جديدة مسبوقة بتصفيق جماعي، أعقت كلمات حسام،
ما دفع معتر لمخاطبة شاهين قائلا يمازحه:
- طب ماتدورلك على حد يتبناك منهم يلا يا شاهين بدل إحساس
الحرمان الليي انت عايشه ده!
- والله يا ميزو فكرت كثير، بس قلت استنى لما الحاج يجوزني
عشان ابقى استفدت منه أقصى استفادة.
- واطي واطي يعني.
- ضحكات تبودلت من جديد بين الجميع، انتبهوا بينها إلى تلك
الطرق التي اعتادتها آذانهم، ينصتون إليها كأنهم الراغبين في التأكد
من ماهية صاحبها، قبل أن يحيطهم القلق من قول شاهين المفاجئ:
- تأكد الأول من الليي بيخبط مش حد غريب!
- همهمات قلقة ممزوجة بنظرات قلقة أعقت كلماته المكسوة رداء
الجدية الكامل، يقابله معتر بسؤاله:

- ليه؟، انت شاكك في حاجة؟
- لا ربنا ما يجيب شك، بس أصل الواد مصطفى كاشف راسه.
- لم يستطع بعدها تمييز كم السباب المنهال عليه بسبب تلك الوسادة البالية المنطلقة إلى وجهه من مصطفى، قبل أن يهرول معتر إلى الباب ضاحكا، يستقبل القادم بالأحضان قائلا:
- حمد لله على السلامة يا بطل، شافعي وصل يا رجالة.
- لم يكد الجميع يسمعونها، حتى هرولوا إليه يستقبلونه بأحضانهم وترحيباتهم وقفشاتهم، حتى انتهت قائمة المستقبلين بإبراهيم، الذي اكتفى بقوله:
- حمد لله عالسلامة يا شافعي!
- إبراهيم!
- اكتفى إبراهيم بابتسامة خفيفة، كرد على سؤال تعجبي، أعقبه سائله بقوله:
- واضح ان قايمة الحبايب زادت واحد وانا غايب، اهلا بيك يا هيمانا.
- ربنا يخليك النور نوركم.
- أمال فين كفافي يا شافعي؟
- قالها معتر سائلا صديقه يطمئن على صديقه الآخر، يأتيه رده:

- قلت لابويا يوصيهم يخرجوه بكره الصبح ان شاء الله مش
النهارده خليه يتربى شوية... هاهاها

- هاهاهاها، طول عمرك أصيل وصاحب صاحبك والله.
جملة أعقبتها ضحكات جميع الحضور، بما فيهم إبراهيم الذي
بدأت قيوده تنفك قيدا وراء آخر، مع كل ثانية تمر عليه في المكان.
(عسكري الشطرنج لا يشعر بطمأنينة حقيقية إلا بين أقرانه
العساكر، رغم يقينه أنهم أضعف قطع الرقعة ذات اللونين!)

لا يدري تحديدا هوية ذلك الشعور الذي غمره بعد تلك الليلة..
كل ما يعرفه فقط أن راحة تملكته إلى حد كبير. فتح باب الشقة في
هدوء اعتاد عليه، وجد أباه يتصفح كتابا على ضوء مصباح خافت، إلى
جوار قهوته، صديقته الأعز. اقترب منه في هدوء، حتى أن وقع أقدامه
لا يكاد يُسمع:

- سلام عليكم يا بابا!

تنبه لها الأب، فأجابها بابتسامة متكلفة متبعا إياها بقوله:

- وعليكم السلام يا إبراهيم.

- كنت عايز احكي لحضرتك حاجة كده لو وقتك يسمح!
وكأن الأب قد تربع فجأة على عرش من السعادة المفاجئة، نحى
كتابه على أقرب كرسي، خلع نظارة قراءته واضعا إياها إلى جواره،

قائلا وعلى وجهه ابتسامة ارتياح عريضة، شجعت ابنه على الحديث:
- طبعا يا بطل يسمح ونص.

- يا باشا أوامر، هو احنا نطول برده نخدم سعادتك؟
قالها عبر هاتفه يحادث أحدهم، واضعا إحدى قدميه فوق
الأخرى، ممسكا سيجارته مكملا:

- اعتبر الموضوع خِلاص يا باشا، ولا يكون عند سعادتك فكر...
ماشى معاليك... إن شاء الله بالكثير يومين... على ايه يا باشا جنابك
تؤمر... فى رعاية الله يا باشا ألف سلامة... ألف سلامة.

وضع سماعة الهاتف، ثم ضغط زرا أمامه يستدعي أحدهم
للدخول، ذلك الذي طرق الباب ثم دخل مؤديا التحية العسكرية،
يستمتع توبيخا معتادا من قائده القائل:

- ماسمعتش الجرس يا روح أمك؟، هتحايل عاللي خلفوك عشان
ترد وللا ايه؟!

- ...أسف يا باشا والله أول ماسمغت جيت طوالي!
- وبتحلف كمان!، ليلة أبوك معايا مش فايئة بس أخلص اللي في
ايدي...هاتلي الواد بتاع الصعيد اللي جه النهارده!
- أوامر يا باشا... أوامر!

لحظات، وكان الشيخ بدر ماثلاً أمامه في قيده الحديدي، ينظر إليه بشيء من البرود، استفز كبرياء النسر الرابض فوق أكتافه، ف تراجع للخلف واضعاً قدميه فوق مكتبه، قاصداً أن يوجه قعر حذائه في وجه الشيخ المتهم (وفقاً لقواعدهم) يشعل سيجارة تصاعدت أدخنتها تخفي معالم وجهه العابس للحظات، قبل أن تنفجر شفتاه أخيراً عن قوله:

- اسمك إيه يلا؟

ابتلع الشيخ - البادية على وجهه آثار كدمات زرقاء - الكلمة الأخيرة على مضض، وهو غير المعتاد على الإهانة قائلاً في اقتضاب:

- بدر مهني سعد الدين.

- شغال في انهبي مصيبة تاخذك؟

- خطيب وإمام مسجد!

- هو انت منهم؟!

لم يتبين الشيخ بدر المقصد تحديداً من تلك الجملة، فاكتفى منها بتقطيب حاجبيه استغراباً، يستمع لاستطراد الرائد (علاء الشريف) كلماته قائلاً:

- انت بقى اللي عامللي خُط الصعيد؟... مش عاجبك سياسة البلد ولا نظامها ولا رئيسها ولا حكومتها ولا حاجة أبداً، هتغير الكون بروح أمك؟، عامللي فيها زعيم شعبي يابن الكلب؟!

- وإذا خاطبهم الجاهلون قالوا سلاما!
من جديد استفزت الكلمات غرور الضابط، فقال في عصبية واضحة:
- دانتوا شوية فلاحين عرر جاين من ورا الجاموسة يلا، آخركم تاكلوا
وتناموا زي البهايم اللي بتربوها، ايه دخلكم في اللي ماتفهموش فيه؟!
- عادى يا باشا ممكن يكون فلاح بس راجل وعنده نخوة أكثر
من البهوات والبشوات اللي قاعدين ورا المكاتب وايديهم نعمت من
جلة الشجا. وبعدين ماتنساش يا باشا ان الفلاحين دول فيهم دكاترة
ومهندسين ومدرسين، مش زي ناس كملت طريقها بالرشوة من فلوس
بابي على ٥٠٪ مجموع ثانوية عامة عشان يعملوا لنفسهم قيمة كدابة
على حساب خلق الله وهم في الأصل ولا حاجة!
(ملحوظة: إظهار المظلوم للضعف أمام ظالمه أملا في نيل عطفه
لن تفيد بأكثر من سهولة يجنّيها ظالمه في افتراسه. أظهر ثباتك وكفى،
فقد انتوى ما انتوى، على الأقل يكفيك ظهورا مشرفا أمام نفسك حين
تخلو إليها!)

قالها الشيخ بدر في هدوء يحسد عليه، ساهم في تنامي استفزاز
ذلك المتغطرس خلف مكتبه، فنهض إليه بعض شفّيته باسماء في خبث
يخفي بابتسامته بركان غيظ انفجر للتو بين جنبيه، يفرك ذقنه بأصابعه
حاضنة سيجارته، ناظرا للأرض كأنه ملاكم يستعيد توازنه، بعد لكمّة

غير متوقعة أفقدته توازنه، قبل أن يعود لخصمه قائلاً في برود مصطنع،
يرد له لكمته:

- بس ان جيت للحق، رغم انك ابن كلب ولسانك طويل، بس
ليك أم وأخت يحلوا من على حبل المشنقة، هاعديها لك المرادي
عشان خاطرهم بس، أنا أصلي حبيت زينب وابتسام قوي يا مولانا،
بس لا مؤاخذه يعني احنا الحب عندنا قدر شويتين، عادي شباب بقي
وكده انت فاهم الدماغ دي، ماهو أصل الشيوخ في البلد دي بي فهموا
كل حاجة ويرجعوا يعملوا الطاهرة الشريفة.

لم يملك بدر وهو المقيد اليدين أكثر من ريقه يرسل به الرد، عبر
بصقة كأنها المرسله من باب جحيم، استقبلها ذلك الرائد على صفحة
وجهه مغمضاً عينيه مشيحاً بوجهه عنه، كأنه المتلقي صفعة من كف
حديدي. يزيل بأطراف أصابعه أثار بلل لعاب غطى وجهه، قبل أن يعود
إليه صافعاً إياه صفعة أحدثت دوياً كاد يسيل الدم من شرايين وجهه، فعاد
إليه يرد ببصقة أخرى، وهو الذي لا يملك رداً غيرها في ظل تقييد يديه.
جُنَّ جنون علاء، فانهال عليه صفعاً ولكماً وركلاً، حتى انهيار بدر
على أريكة خلفه، يحاول تحاشي الضربات بأقصى ما يستطيع، حتى
خلع الضابط حزام سرواله في نهاية الأمر، ينهال بمؤخرته الحديدية
على وجهه ورأسه المختفين خلف ستائر الدماء، قبل أن تشهد المعركة

غير المتكافئة دخول حليف للضابط، ذلك الصول الذي أراد نفاق سيده بمشاركته الفتك بضحيته، مدعماً لكلماته وصفعاته هو الآخر ببعض البذاءات التي اعتادها لسانه في مواقف شبيهة، ختمها بقوله:

- هي حصلت تتجراً عالباشا يا فلاح يابن الكلب!؟

دقائق مضت من السب والضرب، أسفرت في نهاية الأمر عن سقوط بدر مغشيا عليه، بعدما تلاشت أناته وتأوهاتة شيئاً فشيئاً، غارقة في دمائه السائلة، مستترة خلف تلك البقع الأخرى من دماء تجمعت خلف زرقة انتشرت في أجزاء جسده، يودعه علاء بقوله مخاطباً الصول:
- الواد ده من النهارده اسمه أنيسة، يتنقل الليلا دي زنزانه ٥٤ لوحده وتودوله الواد جابر بتاع زنزانه ١٦ يقضي معاه الليلة، وبكره الصبح أمه واخته يكونوا قدامي هنا!

- أوامر يا باشا!

قالها الصول بابتسامة خبيثة، كشفت عن أسنانه الضخمة المتساقط بعضها، وناييه اللامعين ولسانه الذي لا ينقصه إلا... شق في المنتصف!

- يا أهلا يا أهلا... طب والله منورانا يا حاجة، أهلا يا... حلوة!
- نظر لها نظرة ذات معنى، فاحتمت منها بالتشبث بذراع أمها، التي وارتها خلفها مركزة نظرها في حلق على ذلك الرائد ونسره، قائلة في اقتضاب:
- هي دي الرجولة يا حضرة الظابط؟ بتجبضوا على الحریم؟
- نسيتموا حرمة البيوت للدرجادي؟
- ماتكبريش الموضوع قوي كده يا حاجة، احنا بقينا أهل دلوقتي يا... أم أنيسة!
- صمت ثوانٍ، أتبعها بقيامه من كرسيه يشعل سيجارته، غير عابئ بنظرات التعجب المتبادلة بين الأم وابنتها قائلاً:
- عموما هي نص ساعة ونمشيكي على طول، انتي و... الحلوة!
- نفس النظرة ذات المعنى، هربت منها الابنة من جديد تلوذ بذراع أمها، متوارية خلفها.
- بصوا بقى، عشان مانتعشب مع بعض. أكثر حاجة ممكن تزعلني من حد اني ما لاقيش عنده إجابة لما أسأله... ومانصحكوش تجربوا موضوع الزعل ده بالمناسبة... اتفقنا؟!
- تحول للجدية فجأة، تنكمش ملامحه في غضب فجائي، كأنما احتضنه قرين شيطاني:
- تعرفوا ايه عن نشاط المحروس مع الجهاديين؟!

- جهاديين؟!

همست بها الابنة في دعر، ناظرة لأُمها الجامدة نظراتها على محادثها،
مستفهمة عن معنى السؤال، فأتاها رده المصحوب بضحكة استهزاء:

- لا مؤاخذه نسيت انك جاهلة، أشرحك وللا... أخلي الحلوة
تشرحك؟، باين عليها واعية ما شاء الله.

- الله يسامحك يابني، مش عيبي ان اهلي كانوا غلابة ماجدروش
على علامي!

- بس بس بس، مابحش اسطوانات فاتن حمامة دي، سوقها بطل
خلاص من ييجي ٥٠ سنة!

-

- ردي يا مرة، ابنك بدأ نشاطه امتى مع الجهاديين؟، يعني
الإرهابيين، يعني قتالين القتلى، فهمتي كده وللا اجيبلك عسكري غبي
من بلدكم يشرحك في نهاركم اللي مش فايت ده؟...خلصوني انا
مش فاضي للي خلفوكم!

ثوانٍ من الصمت أعقبت كلماته الغاضبة، أسفرت عن زيادة في
تشبث الابنة بذراع أمها في دعر ملحوظ، وسط ثبات لافِت للنظر من
الأم المجيبة في هدوء:

- هي خطبة الجمعة ولم فلوس للغلابة دلوك بجوا إرهاب وجتل

يا حضرة الظابط؟!

- حلو قوي، يبقى افكروا بقى ان انتو اللي اخترتو مش أنا...شوقي!

قالها ينظر للباب، الذي فتحه أحدهم بسرعة قائلا:

- أوامر يا باشا!

- هاتلي أنيسة!

- أوامر سعادتك.

دقائق من عدم الفهم الممزوج بالرعب سيطر على الاثنين، شغلتهما بنظرات لبعضهما البعض، تتلمسان في متاهاتها طرق اطمئنان مفقود، حتى أفاقتا من نظراتهما مجددا على صوت طرقات على الباب، انتهت بفتحه وقد دخل هذا المكبل بأصفاد ضمت يديه خلف ظهره، مندفعاً جراء دفعة أحدهم له في عنف، مسبوقه بلطمة على قفاه وجملة قيلت في غيظ:

- اخلص يا روح أمك انا لسه هاستناك؟!

انتهت الدفعة بسقوطه أرضاً على ركبتيه قرب قدمي علاء، الذي

دفع وجهه بقدمه قائلا:

- العزيمة لسه متلمعة يابن الكلب.

فعاد مستلقياً على ظهره، يئن من فعل القيد الحديدي، الذي

استقبل ظهره أرضاً، تتابعه نظرات أمه وأخته اللتين تعرفتا عليه أخيراً،

رغم اختفاء لحيته وشعره وحتى حاجبيه، فبدا دمية جحظت عيناها
جراء صدمة تعرض لها... ليلة أمس!
- بدر!

قالتها الأم بصوت أشبه بصرخة، تهرول إليه قبل أن يمنعها عن
الوصول إليه ذراع أحدهم، يقابلها قول علاء:
- يا سلام يا جدعان على قلب الأم، بتعرف ولادها حتى لو...
رجالة واتقلبوا حريم!

قالها، ثم أشار لأحدهم بعينه، فقام من فوره بانتزاع بدر من
الأرض، واضعا إياه في وضع الوقوف يستقبل كلمات علاء:
- بص بقى عشان ماعنديش وقت اضيعه مع أمثالك. القعدة دي
من الآخر كده مش هتخلص إلا باعتراك بالبللوي اللي في المحضر.
بمزاجك بقى غصب عنك مش قصتي. المهم عندي ان بعد نص ساعة
من دلوقتي تكون الليلة خلصانة... ماشي يا حبيب أمك؟

من جديد، لم يملك بدر أكثر من لعبه يرسله إلى وجه مخاطبه،
مستقبلا بعده لكمات وصفعات ذلك الصول الواقف خلفه، قبل أن
يقوم علاء إليه مستكملا وصلته الصفع والضرب، متوجها لأخته،
ينتزعها من بين يدي أمها في جنون، ملقيا إياها على الأرض على
مرأى من أخيها الصارخ في قيوده، وأما المنهارة في بكائها خلف

ذراع أحدهم، حتى انتهى المشهد بمعاناتها ذات المعاناة التي... عاناها
أخوها ليلة أمس!

لو أن الحياة دبّت في شقوق جدرانها، البادية كشرابين جسد يستعد
للاستلقاء في ذلك الصندوق الخشبي، مكشوف الرأس محمولا على
أكتاف أربعة، تنقل ما احتواه لما تحت التراب، لتعاركت فيما بينها على
مساحة إضافية، يقتنصها أحدهم من الآخر أملا في استنشاق المزيد
من هواء قلما يغادر طرق المدينة، منحدرًا لضيق حارة (الشوربجي)
البالغ، الذي احتوى البيوت المتعاركة وساكنيها عقودا لا يعلم أحد
حتى الآن تعدادها، حتى كهول الحارة وعجائزها الذين لا يذكرون من
تاريخ حارتهم أكثر من كونها بدأت بيت هَرَم، أهلكه هَرَمه في وسط
الحارة، شيده الشوربجي الكبير عقب تقاعده واعتزاله الناس لفقده
قدمه اليمنى، بعد مشاركته المهزومة المنتهية بالاحتلال في هوجة
عرابي، قبل عشرات السنين!

يُروى، فيما يروي الرواة من عجائز الحارة وشيوخها، أن
الشوربجي هذا لم يتزوج قط. عاش في بيته، ذاك المشيد ببعض
الطوب اللبن والمسقوف بجذوع النخيل، ما يقارب الثلاثين عاما دون
زوجة أو ولد، مكتفيا باستضافة بعض البيوت الصغيرة على جانبي بيته

المتفرد نوعاً ما بضخامته، قياساً بتلك الأعشاش المشيدة في عشوائية
تلائم حياة قاطنيها، من حرافيش المحروسة ومجاذبيها اللاجئين لهذا
المكان النائي على حدود القاهرة - آنذاك - يتلمسون عيشاً هادئاً، وإن
كان أفسى مادياً من وجودهم كرفقاء قططٍ وكلابٍ ضالةٍ في شوارع
العاصمة القديمة، هرباً من أشياء شتى احتفظوا بها حتى دُفنت إلى
جوارهم في مقابر الحارة، الواقعة خارجها بمسافة لا تتعدى مساحة
بيت أو بيتين من الفراغ، حتى تكونت مع الزمن... حارة (الشوربجي)!
المعلم (عبد الجواد)، صاحب قهوة الشوربجي، الرابضة وسط
الحارة، والمميزة بتلك الصورة المرسومة معلقة في صدرها - يقولون
عنها إنها للشوربجي الكبير، رسمها له أحد الفنانين الهاريين من شطف
العيش وبرائن الفشل في الظهور، عقب دخول الإنجليز إلى براح
الصحراء، التي لم يتواجد بها في ذلك الحين إلا الشوربجي - فشيّد
إلى جوار بيته الكبير ثاني بيوت هذه الحارة، والتي يحتل مكانها الآن
المعلم (عبد الجواد) ببيته وقهوته، وهو الوحيد الباقي من نسل الفنان
الراحل... حسبما يزعم!

(عم عرفة الحانوتي)... رغم كثرة عمله المدعوم بجثث توفرها
له يومياً طقوس الحياة العادية، من إهمال أم لطفلها سحقه (توكتوك)
أو (ماكنة صيني)، أو سقوط إحداهن من فوق سطح أحد المنازل،

بعدها انهار بها سور يصارع الموت منذ سنوات منتظرا إياها يرافقتها رحلة الدار الآخرة أثناء نشرها ملابس تخفي قَدَمها البادي في رقعها ببعض الماء والمسحوق، أو حتى رحيل أحد الكهول متأثرا بمرضه الذي يعاركه منذ أعوام دون علاج، حتى استسلم في نهاية الأمر لركب رحلة اللاعودة، أو وفاة أحد الرجال متأثرا بحسرتة بعدما تم الاستغناء عن خدماته إثر فقد أحد ذراعيه بفعل إحدى ماكينات مصنع الملابس، الذي يعمل به الكثير من رجال الحارة، بعد تعويضه بمبلغ (مضحك) من المال لا يلبث أن يتبخر مع رحلة علاج لا يستكملها المريض أو ماله المتخلي عنه في بداية الطريق، أو حتى قبل أن يبدأ الطريق!

إلا أن عم عرفة لم يظفر يوما بأكثر من (مستور) تصف حالته المادية، وهو المستغني عن أجره في أكثر تلك الحالات، التي لا يملك فيها أهل المتوفي أكثر من بعض نقود تكفي بالكاد لمنع لحاقهم بالراحل جوعا!

(حلاوتهم) بياعة النابت والحراطي... لا يعلم أحد، حتى هي، عدد سنوات عمرها على وجه التحديد. الحقيقة الوحيدة المعروفة عنها أنها متخذة ذلك المكان إلى جوار زاوية الحارة، قبل ميلاد سكان الحارة جميعا، والدليل أنهم لا يذكرون يوم كان هذا المكان خاليا منها أو من طست النابت ومثنة الحراطي الرابضين أمامها، حتى ظن الكثيرون أنها

جاءت بهما مع الشوربجي الكبير بنداءيها المميزين (عسل يا نابت) و (صباح يا حراتي)... إلى جانب حكاياتها المنقوشة على شعرها الأشيب وتجاعيدها الأشبه بمسالك الجبال!

(حجاج) أو كما يسميه أبناء الحارة من شباب في محيط سنه (إيجو)، صاحب محل (إيجو فون) لبيع وتصليح الهواتف المحمولة. اكتفى من التعليم بمراحل متواضعة، انتهت عند دبلوم التجارة، قبل أن يلجأ لتلك المساحة التي لا تتعدى عرض مترين وطول ثلاثة أمتار، يوهم بها نفسه أنه صاحب عمل يؤهله للظهور كصاحب مشروع. ساخط أكثر ما يسخط على المعلم عبد الجواد، لفخره بالانتماء - الكاذب حسبما يرى - للفنان صاحب الصورة، متيقنا أن هذا الفنان لم يكن سوى جده هو الأكبر، وأن صورته هذه كانت لتشغل محله هو، لولا ضيق المكان، فلم ينازع في ملكيتها المعلم عبد الجواد معليا بذلك (الصالح العام) لذكرى جده الراحل، مع قناعته التامة أن كونه من نسل الرسام لا يحتاج لمثل هذه الشكليات، يكفيه المنطق أنه الفنان الوحيد في الحارة الآن، وعليه فالفن جين موروث فيه، تلقاه عبر أجيال من ذلك الفنان الأول راسم الشوربجي الكبير!

(مارادونا)، ربما لا يعلم عنه الكثيرون أن بطاقة رقمه القومي تحمل في الأساس اسم (رمضان)، لا يرى في الحارة بغير رداء أبيض

ذي خطين أحمرين، معتزا بانتمائه المبالغ فيه لنادي الزمالك، أو كما يسميه هو والكثيرون من محبي النادي القاهري العريق (الملكى). لا بد لكل جلساته في قهوة الشوريجي أو على ناصية الحارة أن تذكر واقعة تُوج فيها الزمالك على أحد العروش قبل سنوات، أو ربما حتى عقود، وهو الحافظ لتاريخه منذ العام ١٩١١. لا يطلب من الحياة الكثير، اكتفى منها بحب الزمالك، واكتفت منه بدور محلل كروي يعيش على هامشها، يقضى يومه إما في مدرجات الملاعب أو أمام شاشات التلفاز، معتمدا في معاشه على أخيه الاستاذ (عزت) مدرس اللغة العربية بالمدرسة الابتدائية خارج الحارة!

(قدرة بتاع الفول)، يكفيك أن تعلم أنه... مخبر أمن دولة!

(عبد الخالق أفندي) موظف السجل المدني، متزوج من حنان زميلته في العمل منذ ثمانية أعوام، أكبر أبنائه محمد ٦ سنوات ثم علياء ٤ سنوات!

كعاداته التي اكتسبها منذ عامين فقط، دخل الحارة مترجلا، بعدما ترك (التوكتوك) أمام محل الأسطى سعد العجلاتي في مدخل الحارة. ربما كان ذلك الخوف من تكرار ما حدث قبل عامين، حين دهس أحد الأطفال تحت العجلات. ألفا جنيه كانت ثمنا مناسبة ارتضاه الأبوان، اللذان لا يملكان بديلا، لم يبذل في جلبهما وقتا أو مجهودا جديرين

بالذكر، ثمن معتاد لأدائه في مشاجرة غير متكافئة تم استئجاره فيها (لتأديب) أحد طويلي اللسان تجرأ على (عصمت باشا محروس) عضو مجلس الشعب، حين اتهمه بالتقصير في أحد المؤتمرات الانتخابية، بخصوص مشكلة المجاري الزاحفة تحت البيوت، التي تراودها أفكار الانهيار منذ سنوات.. كسر ذراع و(بشلة) فوق أحد الحاجبين، تذكره دائما (بذنبه) قد تفي بغرض التأديب، كخطوة أولى، على كل حال.

هو لا يخجل من تلك المهنة التي يتهامس بها الناس بشأنه، دون اجترأ من المتهامسين على الجهر بها. لا تشكل له المسميات الكثير من الأهمية... وعليه، فصفة (بلطجي) لم تعد تحمل ما يدعوه للتوصل منها. طفل دون الرابعة يقضي حاجته إلى جوار أحد الجدران، رجل خمسيني يفرغ منخاريه من مخاطهما على قارعة الطريق مكملا سيره بعدما جفف البقية المتمردة على النزول بكم جلبابه، كأن شيئا لم يكن، غلام في محيط الخامسة عشر يريح مثانته على أحد الأسوار مشكلا بمحتواها لوحة، يظنها فنية، امرأتان تتبادلان بعض الثوم عبر شرفتين خشبيتين متقابلتين، يفصل بينهما ذراع بالكاد، يتناسب مع عرض الشارع الذي لا يتسع لأكثر من رفيقين متجاورين، صراخ أم تدعو على وليدها بالهلاك، بعدما غافلها بانتزاع قطعة لحم كان ليشارك فيها أربعة أخوة آخرين ينتظرونها منذ أسبوع، بعض قطرات مائية تميل بلونها

عينيه في تكاسل، وقد بدا عاري النصف الأعلى من جسده، باستثناء سلسلة حديدية لامعة تظهر على الجزء البادي منه خارج شباكه.. آثار جروح قديمة متفرقة ظهر القليل منها على وجهه ذي اللون الأسمر، واللحية الخفيفة الأشبه بخطوط رسام مبتدئ قائلاً:

- عرفة!، عايز ايه يا بني آدم صحتني من أحلى نومة!

- ايه يا زميل، انزل عايزك في مصلحة!

- مصلحة ايه الساعادي عايز انا مانا لسه سايبك من ساعتين يلا!

- انزل بس دي لسه جاية في طريقي من شوية هتبرد لو استنينا

عليها ومش هيقالها طعم!

- مصلحة ايه دي؟، انتخابات وللا تخليص حق؟!

- لا ده ولا ده، انزل بس وانت تعرف اخلص بقى مش هنقضيهها

عالهوا كده!

- طب اصبر هالبس وانزلك لما نشوف آخرتها!

(ملحوظة: عسكري الشطرنج قد يصبح في بعض الأحيان....

أشرس القطع!)

الحركة الثانية

وَجِّي يا بلد الحرايق واصرخي بجنون
واحرقها مدن وكروم وناس وسجون
ملعون أبوها الحمامة أم غصن زيتون
معمولة لجل الضحية يصدقوا الجلاد
يا إيد يا مكتتفة
يا ضهر يا منجلد
يا طفل مين ورَّثك الاحتمال والجلد
يا طفل بهموم رجال يا بنت قبل الولد
يا قلوب بتطرح عند
مين اللي قال الكلاب تسكن عرين الأسد

عبد الرحمن الأبنودي

الأوفياء يتألمون أكثر!

لعله المنطق الملخص للكثير من جوانب حياته ذات السبعة عشر عاماً، يستوي سدا منيعاً يحجب عن عينيه أرض النسيان، بكل ما تحويه من راحة بال و... فقدان إنسانيات!

لم يكن يعلم أيحزن لفقدانه الأولى، أم يفرح لنجاته من الثانية. ربما لم تتح له محدودية تفكيره فهم مثل تلك الأمور. هي فقط فطرته الساذجة التي أبت محو آثار أقدام هؤلاء الراحلين من رمال ذكرياته شابة العمر عجوز التفصيلات.

لا يزال ذاكرة كل شيء.. تلك السيارة السوداء الأشبه بأفواه مصاصي الدماء في أفلام الرعب الغربية (أو ربما هكذا صورها له خياله الخائف من مجهول رآه يختبئ خلف زجاجها!)، تلك السيول المتساقطة على زجاجها، تحاول ممسحتها حماية زجاجها الأمامي من بعضه دون جدوى، صوت باب السيارة الخلفي يلفظ تلك المبتلعة داخلها منذ حين، آثار خطواتها البطيئة في الطين الذي خلفه اتحاد المطر بتراب تراكم أمام مدخل البيت الكبير، بفعل رياح سبقت هطول الأمطار، رداؤها الأسود الممزق من الأمام، تحاول إخفاء تمزقاته

بأقصى ما تستطيع، دموعها التي فضحتها شهقاتها السابقة لها تتردد أصداؤها في بئر عميقة، مستقرها في أحشائها، موتها الداخلي الذي تمكن من رؤية شبحه يسبح داخلها من مخبئه خلف جدار بعيد يراقب الأمر برمته، ارتماؤها في أحضان إحداهن تدفن آلامها فيها، وقد ارتفعت حدة البكاء وما صاحبه من شهقات نوعا ما.. ذلك الجثمان الملفوف في كفنه الأبيض، يخرج رجلا من نفس السيارة القبر يضم إحدى الجثث الراحلة بتأثير سكتة قلبية، انتظاره خروج شاب ملتج عهده نائلا من اسمه نصيبا وافرًا من نفس السيارة دون جدوى، نحيب صامت يشبه في صمته أنين ذوي السكرات في أرجاء البيت، الذي أظلمت أضواءه أخيرا بعد سنوات من السطوع، ابتلاع الجميع من قبل باب حديدي ضخّم تعرّى من ردائه الزجاجي بفعل فاعل قبل أيام، وقوفه غير عابئ بامتلاء جيوبه بماء المطر وتقييد أذنيه بأغلال رياح آخذة في الهياج كأنها رسول غضب الطبيعة للأرض، تنقل اعتراض سيدتها على ما حدث، شعور مفاجئ بالضيق تملكه، لسبب لا يعلم عنه أكثر من كونه إشارة قدرية تنبئ عن قادم مجهول، ثم انصرافه يائسا من رؤية مزيدا قد يحمل له بعضا من اطمئنان ناجته مخيلته البسيطة ذات الخمسة عشر عاما!

كل شيء لازال حاضرا كما تركه في حافظة ذكرياته منذ عامين!

لا زال يذكر، رغم تعاقب الشهور، رعبه من ذلك الهاجس الدائر في خياله الصغير من كونه لن يرى شيخه من جديد. ذلك الهاجس الذي ظل يبحث عن إجابة شافية له طوال أيام تلت تلك الليلة دون جواب يريحه..

«مالكش صالح بالموضوع ده انت لساك صغير ومش حمل بهدلة»
 «امشي جنب الحيط احسنلك يا ولدي الطريق ده واعر لا انت ولا أهلك الغلابة تجدروا عليه»
 «الشيخ بدر؟، مخابرش!»

«واني اعرف منين؟، الله يسهله بجى مطرح مراح!»
 «هو اللي اختار يمشي في السكة ديّ، واهي جت على دماغه في الآخر!»
 (مش حمل بهدلة)...(طريق واعر)...(جت على دماغه)...
 (مالكش صالح) بالإضافة لبعض الإجابات الغامضة، التي تنم عن هروب صاحبها من الجواب من عينة (ماخابرش) و (اعرف منين؟!)..
 لعله لم يفهم المراد من كل تلك الكلمات.. كل ما نما لعلمه أن هناك شيئاً ما غير مطمئن في مستقبل رؤيته لشيخه الشاب؛ حتى كانت آخر الإجابات التي لاقاها من أحد الطلبة الأزهرين في العش، حين أجابه عن سؤاله قائلاً:

- الشيخ بدر راح سكة اللي يروح مايرجعش يا طلال، خدوه

اللي مابيسيوش حد، حاول تنسى انك تشوفه تاني، الشيخ بدر...
ماهيعاودشي!

لم يفهم وقتها أي سكة هذه، أي آخذين هؤلاء، ولماذا عليه
النسيان؛ لكنه رغم كل شيء لم يستطع تنفيذ الشق الأخير من نصيحة
الأزهري الشاب!

عامان... كأن يدا خفية اختزلتهما في دقائق تهرأ بها عقارب
ساعة بالية على حائط قديم، قد لا يكونان على قدر من الكفاية يسمح
له بالنسيان.. أهو الوفاء لأصحاب ذكرى ما قبل العامين؟... مممم...
ربما! تلك المسحة من الانكسار التي غلفته عقب تلك الليلة في
منتصف الشتاء قبل الماضي؟... يجوز! أم أنها تلك الطبيعة البشرية غير
المفسرة بعدم نسيان المرء أيا من سطور التعاسة في كتاب أيامه، مهما
مضى على مرورها الدهر؟.. لا بأس على كل حال بهوية الفارس الذي
طرد دولة النسيان من أراضيه. حدث ما حدث، وعاد يسيطر على تلك
الأرض بدولة جديدة، رفرفت رايتها بلحن التذكارات المميت!
- ريشة!

قالها بصوت خافت يخطو آخر خطوة له بعد السلم الطيني الفاصل
بين قاع البيت العامر المشغول بأجساد النائمين بعد يوم طويل، وسطحه
العامر بأجساد طيور جاهزة لتقديم نفسها قربانا لسعادة هؤلاء النائمين

بالأسفل كل حين بعيد. وجد طريقه بسهولة بين (الكراكيب) فوق
السطح، حتى ذلك المخبأ الذي يقبع فيه صديقه الوحيد، حاملا في
يمينه بعض فتات الخبز المبلول، وقطعة جبن بحجم إصبعين، استطاع
اقتطاعها من عشائه المتواضع.

- واد يا ريشة، اطلع يلا أني طلال!

اتبع قوله ببعض طقطقات أصابعه، التي يعرفه بها صديقه الصغير،
فخرج اليه مهرولا لكفه الممدودة بالطعام
- مستعجل زي عوايدك عالصلحة، بس باين عليك جعان جامد
الليلا دي. كل يا صاحبي بالهنا!

قالها مرسلا كفه إلى فم صديقه الدقيق، منشغلا عنه بذلك الأفق
المديد المرسومة على صفحته سحب تترقب فرصتها في إظهار موهبة
الإمطار على مسرح الطبيعة الساكنة في حذر. شيء ما بداخله دفعه
خلف جدران السحب المتحركة بحثا عن شيء ما، هو على يقين أنه
لن يجده. ربما كان يبحث عن قمر مكتمل يختبئ بين الغيوم، ربما كان
باحثا عن... بدر!

أفاق من غيبوبته المؤقتة فجأة، على صوت ريشة المحتمي من
برد متصاعدة حدته باحتكاك فروته الملساء بلون الثلج بقدم صديقه
الصعيدي ثرية الشقوق.

- بالهنا والشفاء يا ابو الريش.

صمت حيناً يستمع لصمته، قبل أن يستطرد مخاطباً تلك الروح الخفية التي يعشقها داخل صديقه الفأر:

- مالي؟، لحجت حسيت بيا؟، أصيل يا واد يا ريشة والله. أبدا يا صاحبي مخنوج شوية كده، هافف عليا جوي ابويا الله يرحمه والشيخ بدر الله يرد غيبته. كتير جوي ستين من غيرهم يا ريشة. حاسس اني كبرت ييجي خمسين سنة في الستين دولن، لا أرض الحج مهني بجي ليها طعم من غيره، بعد ماجعد في بيته على الكرسي ابو عجل ومابجاش جادر عالنطح، ولا طبح الفول الصبحية بجي ليه طعم بعد ما ريحة أبويا سابته، ولا حتى أغاني البت وردة بجي ليها طعم بعد ما الست ابتسام أخت الشيخ بدر بطلت هي كمان تيجي الغيط تجعد جنيها وتغني وراها واحنا بنجمع الجطن زي زمان، من ساعة الليلة اياها.. نفسي اعرف ايه اللي حُصل في الليلة دي خلا العيلة دي ضاعت كده. أبويا كمان وحشني جوي، وحشتني جعدته وسطينا آخر الليل واحنا كلاتنا مهدودين مش جادرين نجف على حيلنا من كتر الشغل طول اليوم. كانت كلمة حلوة منه وللا بصة لحد فينا وهو بيضحك بتنسينا هموم الدنيا ننام كيف الملك في جصره. عارف يا ريشة أنا حاسس بإيه دلوك؟، حاسس إنني... بردان... بردان جوي يا صاحبي!

قالها وقد تقوقع داخل نفسه، يحك ذراعيه بكفيه أملا في دفع مفقود، وقد ساهمت الكلمة حين نطقها لسانه بإضافة المزيد إلى رصيد إحساسه بالبرد. غير أنه اكتشف في نهاية الأمر أن إحساس البرد نابع فقط من... داخله!

قام يتحسس طريقه إلى الأسفل، باحثا عن دفع هو يعلم تماما أنه بات مفقودا، لزمن لا يعلمه الا الله، وقد عملت يدها على إزالة بعض من قطرات لمعت في جانبي عينيه المبتلتين، وإن كان في قرارة نفسه يود سماع صوت تماسك كاذب يوهمه أنها فقط بعض قطرات المطر، صادف وقوعها هذه البقعة من وجهه الكهل ذي الأعوام السبعة عشر!



ألا تزالين مثلي تذكرين.. تلك الليلة القمرء، حين تعاهدنا أن
نشيب معا، نلتقط عكازينا معا، نزداد بدانة معا، نروي أزهار شرفتنا
الذابلة معا... وفي الجوار أحفاد يلعبون؟!

حديث مقتضب لصورتها الرابضة هناك في ركن مهجور من أركان
ذاكرته، كأنه به يلومها على مصير تلك الـ (معا) المنتهية إلى... لا شيء!
لم ينتظر ردها بطبيعة الحال. لو أرادت ردا، لكان نطقها به قبل الآن
بأن. لازال يذكر ذلك الصمت المخيف، الذي كان حينها الرد الوحيد
الذي ظفر به، كأن كلماته إليها لم يحالفها الحظ لتكمل رحلتها إلى
أذنيها الباديتين ساعتئذ كأنهما المستعارتين من تمثال حجري. باتت الآن
على كل حال مجرد صفحة في كتابه، انضمت للأخريات من صفحات
لم يسمح لأحد قط بالاطلاع على محتوياتها... أيا كانت هويته.

لعله لا يدري الدافع الرئيسي لجلب صورتها من جديد لمسرح
ذكرياته. الحقيقة أنها لم تكن الصورة الوحيدة المستدعاة.. سبقتها
للظهور صور آخرين شاركوه في بعض المظاهرات ووقوفات الاحتجاج
وجلسات السمر في حجرة غريبة الأطوار، قبل أن تغطي على الجميع
صوراً أقدمُ تاريخاً، لآخرين شاركوه ذات يوم... حادثاً ما!

هي إذن تلك الحقيقة التي اعتاد عليها في كل معركة مع حزن
جديد. ذلك الحزن الذي لا يلبث أن يستعين بسابقات أحزان لم

يعرف لئسيانها طريقا يسلكه، جالبا مددها لأرض معركة معروفة النتائج، تتكرر في حياته بشكل شبه دوري. لهذا السبب يتضاعف لديه الإحساس بكل عقبة جديدة في حياته، إذ أن تلك العقبة لا تواجهه وحيدة، وإنما انضمت لجيش رابض من عقبات الماضي في رأسه. ها هنا تكمن معاناته فاقدة الحلول، ربما لأن... الأوفياء يتألمون أكثر!

لم تكن أكثر من مرحلة حياتية التحقت بركب المؤقتات في حياته، انضمت لغيرها من صور كان آخر ما رأته من أضواء الحياة (فلاش) آلة تصوير مقيمة في عينيه، تلتقط ما تيسر لها من مشاهد تجسد مراحل عمره سريع المرور، باعثة إياها لذلك المعرض المهجور في قصر ذاكرته، الأشبه بقصر دراكولا ملك الظلام.. وحده دراكولا، صاحب القصر ولوحاته، يستطيع الحياة بين مثل تلك الجدران على كل حال! أيها الماضي المقيم خيام جيشه أمام عيني على الدوام، أما آن الألوان لهدنة سلام مؤقت، نلتقط فيها بعض الأنفاس؟!

هكذا ختم حديثه المقتضب لذلك القائد المجهول المقيم بجيشه هناك، في مواجهة معسكر ذكرياته، الذي بات أطلالا خلفتها تلك الحروب بين المعسكرين عبر سنوات. في حقيقة الأمر، لم يعد يدرى أيهما بات أطلالا، المعسكر... أم قائده؟!

كعادته، قام إلى خزانة ملابسه، يلتقط منها ما تيسر، استعدادا

لحضور درس خاص بمواده الصيدلانية في مكان قريب. قميص أسود اعتاد رفع أكمامه إلى ما تحت كوعه بقليل، سروال بنفس اللون، يطوقه حزام بني لا بد من وجوده داعما لوسطه النحيل، حذاء لا يهتم (كالعادة) بعقد رباطيه، ثم بعض الشعيرات المتراكمة فوق ذقنه ومكان شاربته، لم يهتم يوما بظهورها على شكل يليق. نظر إلى المرأة قليلا، كأن به يطمئن أن منظره ليس على مايرام، كأنه به المنتقم بذلك المظهر من... أحد الجناة يسكن داخله!

خطوات بسيطة بين باب حجرته وقرينه باب الشقة، خطاها في تأنٍ أضاف على مشيته بعض الوقار الملصق بحزاني البشر!
- الأكل يا إبراهيم!

من جديد عاد صوت أمه يستوقفه للمشاركة، ومن جديد عاد قوله المألوف لدى الجميع:
- ماليش نفس!

لعل الجانب الأكبر من خوفهم كان مقترنا بأساسات بيوتهم الموشكة على الانهيار، جراء تلك السيول المنهمرة إلى أرض الحارة دون رحمة، بتلك الأساسات عجوز العمر. احتموا كالعادة داخل جدرانها الهشة، أملين في توقف الهجوم المائي عند هذا الحد، مكتفيا بالتهديد دون التنفيذ. لا مشكلة لديهم إذا ما حملت لهم أمطار تلك الليلة بعض البقع السوداء اللا منتظمة الحدود أسفل الجدران، من آثار تقافز الأطفال في برك المياه المحفورة أثناء الليل، (مممم... ربما "بعض" تلك لا تلائم العدد بشكل دقيق)، لا بأس كذلك ببعض المياه المتسربة عبر الدرجات الترابية الصغيرة إلى بيوت يعلوها سطح الشارع الغارق.. بعض الجهد صباحا من ربات تلك البيوت قد يفي بالغرض في علاج المشكلة على كل حال (وإن كانت تلك الـ "بعض" لا تصلح أيضا للتعبير هنا!)

ربما هو الفيلم الأطول في حياتهم؛ بخلاف ذلك الفيلم الطويل الشامل مشاهد حياتهم منذ الميلاد وحتى الموت في نفس المكان ونفس الظروف وربما... نفس العمر!.. بعض المؤثرات الصوتية التي لا مفر منها، من أصوات ارتطام قطرات المطر بتراب الشارع، الذي استحال أوحالا، وقد حُفرت فيه بعض البرك مازالت على استعداد لاستقبال المزيد. تلك الموجات الباردة من هواء يقتحم النوافذ والأبواب، التي

احسن حاجة انك بعدت الواد عمار الليلا دي... انت وديته في أنهي
داهية صحيح؟

- عرفــــة... اظبط!

- خلاص يا عم خلاص هتبوظلنا الليلة والحجرين على ايه، عمار
ده سيد الناس، حلو كده؟

- أخو عمار هو اللي سيد الناس وللا لحقت نسيت مكرم بالسهولة دي؟

-

- مكرم كان أكثر من أخويا وانت عارف، سابلي عمار أخوه أمانة
في رقبتى قبل مايدخل السجن، الواد مالوش غيري ومخه على قده زي
مانتا عارف... ايه؟... ارميه؟!

- خلاص يا عم قلبك ابيض صلي عالنبى وروق كده وعيش اللحظة.
- أدينا عايشينها اهو لما نشوف آخرتها، هما العيال اتأخروا كده ليه
صحيح؟ هو مش الواد عزت والواد مندور كلموك المغربية قالوك جاين؟
- زمانهم جاين، لازم ييجوا انت نسيت الأمانة وللا ايه؟

- أمانة ايه؟

- مش بقولك سكرت، الشغل الجديد بتاع المعلم خضر بتاع
النزلة اللي اتفقنا معاه نوزعهوله يا عم ركز معايا شوية.
- خضر آه وماله؟، مش عيب.

قالها يسحب نفسا عميقا من شيشته، انكمش لها فراغا فكيه مع ضيق في العينين على ألحان كركرة مياه الشيشة وفقاعاتها المتصاعدة في الأسفل، يأتيه رد صديقه الناظر إلى الباب:

- أنا سامع حد طالع أهو شكلهم شَرَفُوا.

تعلق نظر أحدهم بالباب المنتظر طرقات أحدهم عليه، في حين انشغل الآخر بأنفاس شيشته ومداعبة أحجارها بذلك الماسك الحديدي، مستمتعا بطقطقة نيرانها، قبل أن يفاجأ وصديقه بتسارع الطرقات على نحو مزعج، فنظر إليه قائلا:

- العيال دي اتجننت وللا ايه؟ إيه دخلة الحكومة دي؟

- وديني لاشوي اللي جابوهم عالفحم اللي قدامك ده يا كبير ولا تزرعل نفسك!

- أصيل وصاحب واجب يابو الأشارف، قوم افتحلهم وهاتهوملي في شوال.

قالها عمدة في شيء من السخرية، يتابع حركة صديقه نصف المغيب بفعل مخدراته، يفتح الباب الذي ما إن أسفر عن فتحة صغيرة حتى اقتحمها أحدهم وعلى وجهه علامات الفزع تختلط بمياه المطر، التي بدأت في التساقط على أرض الغرفة قائلا:

- الحق يا عمدة!

- في ايه يا ض البرق كهرب أمك وللا ايه؟
- الحكومة كبست علينا واحنا جايين وخذوا الواد مندور والبضاعة اللي معاه!
- يخرب بيت أهلك، طب عرفوا ان الحاجة دي جايالنا؟
- يا عم ما اعرفش أنا جريت وجيت ابلغكم!
- قام عمدة من مقعده، وقد ساهمت الكلمات في هدم كل ما بناه وصديقه من حالة الراحة التخديرية خلال ساعات. يلتقط ذلك القادم من تلايب ملابسه، رافعا مطواة واضعا إياها على رقبته قائلا:
- انت عارف لو رجلي جات في الليلة دي هاعمل في أمك ايه؟
- اهدا بس يا عمدة لما نشوف الدنيا هترسي على ايه!
- قالها له اشرف في شيء من التعقل، الغريب عليه، مستطردا:
- انا شامم ريحة قدرة في الموضوع مش عارف ليه!
- قدرة المخبر؟
- هو فيه غيره؟!
- أيوه صح، أنا كنت لامح قدرة قبلها بعشر دقائق قابلنا سلم علينا من بعيد كده بس كان قرب القرافة حتى انا استغربت انه موجود في الحة دي بالليل كده في الثلج ده!
- سمعها عمدة فأرخی قبضتيه من على رقبة عزت وملابسه، مفكرا

في الكلمات ثوانٍ قبل أن ينظر للاشئ بعينين فارغتين قائلاً:

- بقى كده، يبقى الفطار بكره على حساب قدرة يا جدعان!

- قصدك ايه؟

- هتعرف لما يطلع النهار!

- أنا رأيي نستنى شوية لما الدنيا تهدا. انت كده بتلبس نفسك

الحوار، وبعدين مش خايف مالحكومة وللا ايه؟

نظر اليه عمدة من جديد نظرة ذات معنى يفهمها منه صديقه قائلاً:

- العمدة مايخافش من الغفر يا صاحبي!

(بعض الحركات المتهورة لعسكري الشطرنج فوق الرقعة، قد

تدفع به أحياناً إلى... المتاعب!)

سأدهن حائط حياتي بالرمادي، وأكتب على بابه (مغلق... لعدم

تواجد صاحبه!)

هكذا كانت أول محاولات مداده الأسود على سطور ورقته

الفارغة، محاولة ربما لكسر الملل، أو رغبة في تسطير سيرته بنفس لون

دهانه المفضل، أو... ربما تكون محاولة أخيرة للحديث مع أحد يفهمه،

فكانت رسائله لنفسه (الوحيدة التي تفهمه) عبر خواطره المكتوبة!

حتى الآن، لا أحد يعلم السر في تفضيله اللون الرمادي. يجعله

الخيار الأول في كل شيء يتعلق باختياره أحد الألوان، ربما حتى قبل الأسود، رغم كون الثاني يملك دلالة أقوى على الحزن من الأول، غير أنه كان دائما ما يجد نفسه في محراب الرمادية، تلك الحالة التائهة بين الأبيض والأسود، المعلقة بين الكمال والنقصان، لون المرض لا الحياة ولا الموت، لون التيه لا الهدى ولا الضلال، لون السجن لا الإعدام ولا الإفراج، لون... البين بين، لا ينحاز أبدا لأحد الجانبين!

لون سيطر على عدد لا بأس به من قمصانه، حذائه المفضل، حتى سرواله الجديد الذي أفتى له البائع أن اسمه في السوق (بنطلون تلج) نظرا لونه الأقرب لثلوج القطبين، ربما لم يهتم بكلام البائع وتمجيده لتلك (الموضة) قدر إعجابه بهذا اللون الباعث على الاكتئاب، وهو ما يفضله! (ملحوظة خارج المضمار: إضافة لفظ الموضة في مجتمعاتنا كفيل بإضافة ستر زائف لعورات الاستباحة الغربية العفنة لجسد ثقافتنا المُغتصب) مضت الدقائق على جلسته تتبعها الدقائق، حتى أتم أصغر العقربين دورة وبعض دورة في ميدان ساعته، أسفرت عن بعض مما فاض به مداد ذهنه على وريقاته. ما زالت طرقات الكلية لم تضح بساكنيها بعد، رغم تعاقب الدقائق ونفاد الأوراق وملل الأيدي والأخبار. طوى الأوراق ونحاهما جانبا، قبل أن يضع إحدى قدميه فوق الأخرى، واضعا يسراه في جيبه ومتناولا مشروبه الدافئ بيمنه، وقد علا بخاره مداعبا

أنفه البارد وشفتيه الياستين من قلة الحديث، متفقدا لا شيء بعينه الضائقتين عن محيطهما الطبيعي خلف زجاج نظارته، علّه يجد حوله جديدا يستهلك به ملله الذي أسره بقيود قلة الحديث خلف قضبان طول الساعات.

طال انتظاره، وأخذ عدد الوافدين للكلية في التزايد، وعينه بين الجميع حائرة تقتل بحيرتها ملل صاحبها، حتى ثبتت أخيرا بعد طول انتظار، رغم ابتعاده عن جلساتهم واجتماعاتهم شيئا فشيئا، كعادته مع كل حياة جديدة لا يلبث أن يملّها، إلا أنه مازال يحتفظ بذلك الخيط الرفيع من المعرفة، الذي يسمح له ولهم بتبادل السلام لا أكثر. كانوا صحبة في قدومهم، كما اعتادوا على مدار ثلاثة أعوام ونصف، قضوها بين أسوار كليتهم.. ضحكات تبودلت بين الجميع، ترأسها شاهين بقفشاته يستقبل اعتداءات كيمو بعوده وحسام بأوراقه ومعتز وكفا في وشافعي بأيديهم، حتى فرّ من هجومهم في النهاية وسط ضحكاتهم. ظل متابعا إياهم بنظره، وعلى وجهه ارتسمت بسمة باهتة لا تعبر عن حياة، زاد من اتساعها إشارة شافعي له بالسلام من بعيد، في شيء من التكلف. ردها بمثلها في نفس التكلف، قبل أن ينصرف خلفهم إلى المدرج استعدادا لبدء محاضرة، لا يعرف محاضرها أو منهجها، غير أنه فقط أداء لواجب روتيني لا بد من أدائه.

- هي مش المحاضرة المفروض بتبدأ ٨ يا جدعان؟
قالها شاهين ناظر للجميع من أصدقائه المنتظرين قدوم المحاضر،
فجاء رد (كيمو):

- هتفرق معاك يعني؟، انت عارف أصلاً دي محاضرة ايه؟
- مش متابع الحقيقة حركة المحاضرات في الجامعة، بس شكلها مهم!
- طب اصطحب وبص قدامك بقى.
- بقولك ايه يا عم حسام ماتيحي نستغل الوقت وتسمعنا حاجة
عالصبح كده نبتدي بيها اليوم.

قالها شافعي يخاطب حسام، الذي انتبه لأقوال مشابهة من
الآخرين تساند قول شافعي، فقام بينهم قائلاً:
- خلاص خلاص أمري لله... اسمعوا دي
- هاااا..

فى وش مرايته كان واقف فى عينه الدمع
ينادي حزين على الماضي اللي فقد السمع
يناجي بأهة مكبوتة سنين وايام
وأوهامه اللي سماها فى يوم أحلام
لقى الماضي كأغنية بدون أنغام

كتمثال ضخم من بره وأصله الشمع

وقف ناظر لكف أسير تجاعيده

يدفي برد شيخوخته بماضي بذهنه بيعيده

سرح كفه في شيب شعره عجوز العمر

ما بين الخصلة والخصلة حكاوي تمر

في واحدة كان بطل فيلمه

وواحدة عذبه حلمه

هرب كفه من الخصلات بيعكي شكوته لإيده

سنين الثانوي والجامعه

وذكرى من بعيد جايه تسكنله أنين دمعته

سنين فيها لبس للشمس نضارة

سلاسل صدره لماعة بيعضن صدره بسجارة

وباهتة نظرتة لنفسه كلمبة جاز في ضيق حارة

ومر العمر بالنظرة ولا شايقة ولا سامعة

وقف باصص على الماضي

لقاء فاضي

شوية ضحك عالقهوة ما بين لصحاب
ودخان ضيف على صدره كما الأغراب
لا جامع ضم سجدياته ولا محراب
بجري العمر بات الخصم والقاضي

هرب دوغري من الماضي اللي في مراية
سأل نفسه إيه البارز في أيامي إيه المعروف في دنيايا
بنغزه في صدره من نفسه جاله الرد
كتمها بإيده وبدمعه ولا تترد
ما بين النفس والدامع بيعلا السد
وفي الآخر كتاب مقفول بتحكي سطوراه في حكاية

يا كل الباكي عالماضي وأيامه
يا كل ضعيف قصاد نفسه يا كل سجين لأوهامه
حياتك لسه قدامها كتير جايات
مسيرك يوم تقف تايه أسير مرايات
تبص بعيد على العمر اللي ضاع في شتات
سجين للعمر والماضي قعد مستني إعدامه

- اللــــه، اكسلانص القصيدة العربية يا بني والله!
 قالها شاهين بشيء من الانفعال، يأتيه رد حسام الذي نظر اليه في شيء من عدم الاهتمام قائلاً في ازدراء ساخر..
 - اكسلانص؟، انت قاعد بتبيع ولاعات يا بني آدم؟
 - يا عم دي كناية عن الجمودية يعني.
 - كناية وجمودية مع بعض!، قوم من هنا يلا!
 بعض المناوشات الضاحكة بين الصديقين، تظلهما ضحكات بقية أصدقائهما، ومن بعيد على استحياء تتطفل عليهما بسمات إبراهيم، الذي مازالت كلمات حسام عالقة بذهنه، وقد تصاعدت داخله بقوة أصداء تلك الكلمات الملخصة جانبا كبيرا من حياته رمادية اللون!
 (ملحوظة: قرار الابتعاد عن هؤلاء، مثل أغلب قرارات إبراهيم، تبدو عقابا لنفسه على... لا شيء)

قرآن الفجر المشهود، تبقى كلماته المنظومة في ترتيل رباني، من أهم لقطات حياته يومية التكرار. السر في مواظبته ربما لا يكون معلوم الهوية بقدر كافٍ.. العادة؟، الراحة النفسية؟، أم أنه... وفاء لعهد قطعه على نفسه أمام أحدهم ذات صباح بين شجيرات القطن، فأعطاه بعض الحلوى؟!
 يبدو ثالث الأسباب أقربهم للواقع رغم كل شيء... لا بأس بالسبب

على أية حال. عاد لتوه من صلاة الفجر، يفتح باب الكوخ الذي يضمه وباقي أسرته فاقدة الأب، مرددا بعض الأذكار التي علمها له ذلك الـ (أحدهم) قبل سنوات في توقيت مشابه. لا زال يذكر أنه استدار له بعد الصلاة مبتسما في وجهه وهو لا يزال في موقع الإمام قائلا:

- تقبل الله يا طلال!

- منا ومنكم ان شاء الله يا سيدنا!

- طلعت راجل وجمت للفجر، لا وفي الصف الأول كمان، ماخبيتش ظني فيك.

- الله يكرمك يا سيدنا أنا أجدر أكسر كلمتي معاك بردك؟

قابلها الشاب الشيخ يومها بابتسامة اتبعها بقوله:

- جول ورايا يا طلال.

انتبه الفتى للكلمات كتلميذ في مقاعد الدرس، يهز رأسه بالإيجاب مستمعا لقول شيخه:

- لا إله إلا الله وحده لا شريك له، له الملك وله الحمد يحيي ويميت وهو على كل شيء قدير.

- لا إله إلا الله وحده لا شريك له، له الملك وله الحمد يحيي ويميت وهو على كل شيء قدير.

- اللهم إني أعوذ بك من الهم والحزن، وأعوذ بك من العجز

والكسل، وأعوذ بك من الجبن والبخل، وأعوذ بك من غلبة الدين وقهر الرجال.

- اللهم إني أعوذ بك من الهم والحزن، وأعوذ بك من العجز والكسل، وأعوذ بك من الجبن والبخل، وأعوذ بك من غلبة الدين وقهر الرجال.

- رضيت بالله ربا، وبالإسلام ديناً، وبمحمد صلى الله عليه وسلم نبياً ورسولاً

- رضيت بالله ربا، وبالإسلام ديناً، وبمحمد صلى الله عليه وسلم نبياً ورسولاً

- سبحان الله وبحمده، عدد خلقه، ورضا نفسه، وزنة عرشه، ومداد كلماته، بسم الله الذي لا يضر مع اسمه شيء في الأرض ولا في السماء وهو السميع العليم

- سبحان الله وبحمده، عدد خلقه، ورضا نفسه، وزنة عرشه، ومداد كلماته، بسم الله الذي لا يضر مع اسمه شيء في الأرض ولا في السماء وهو السميع العليم

ظل يومها يردد على أذنيه تلك الأذكار محفظاً له إياها حتى سطوع الخيط الشمسي الفضي الأول. جلسة ربانية، ربما لم يحظَ بمثلها هذا الفتى الصعيدي بعد اختفاء قرينه الذي يكبره بسنوات..

- اللي حفظتهولك ده يا طلال اتعود تجوله بعد كل صلاة فجر، اتفجنا؟

- اتفجنا يا سيدنا

- عفارم عليك، يلا جوم بجى عشان تلحج طبج الفول بتاع الحاجة. عارف انك مابتجدرش تبدأ اليوم من غيره، بس كرر الأذكار دي لحد ماتوصل البيت بجى عشان تثبت في دماغك

قابلها الغلام يومها بابتسامة رائقة دون شوائب، مجيبا برأسه أن حاضر، يقوم مسرعا للحاق بهذه الوجبة الملوكي (ربما لأنه لم يَرَ قط طعام الملوك، فظل «طبج الفول» أقصى ما يمكنه الحلم به) قبل أن يستوقفه الشيخ الشاب من جديد:

- طلال، نسيت دول!

قالها مادا يده ببعض الحلوى التي يعشقها الصغير المقبل عليها ممثنا، قبل أن يغادر وقد ودَّع صديقه الكبير بابتسامة لم تظهر على شفتيه بعدها لعامين!

تذكر كل ذلك وهو يفتح بابه الصديء، مرددا تلك الكلمات التي تعلمها قبل أكثر من عامين، يتحسس جيب جلبابه بأنامل صعيدية تشققت، باحثا عن بعض الحلوى التي... لم تعد هنا!

خطوتان فقط كانتا كافيتين ليلتله ظلام البيت، المتشبت بأهداب نور الفجر الآخذة في الزحف إليه عبر نوافذه شيئا فشيئا، كما أنفاس

تزحف لمريض على جهاز التنفس الصناعي، تحاول انتشاله من موج الموت لشاطئ الحياة. أمام إحدى النوافذ، جلست تنظر عبر فراغ ضلفتها المفتوحتين إلى أفق بعيد يرقد طفلا في حضن سماء صافية، تنفض كسل ليل منقضى عن نشاط نهار شارع في البدء. يعرف عنها تلك النظرة الفارغة التي صاحبها منذ عامين فقط، ربما كانت تناجي ذلك الراحل إلى سكن آخر تحت التراب، تستعيد بأذنيها تلك الألحان الجنائزية التي عزفتها آلام الكبد يوم الرحيل. اقترب منها في هدوء، وهو على يقين أنها لم تشعر به، بعد رغم قرب المسافة بينهما. تغاضى رغما عنه عن هاتين البلورتين المائيتين المنحدرتين من عينيها، على صفحة خدين نهبت السنون من رصيد نضارتها الكثير.

- صباح الخير يا غسل، ايه العينين الحلوة دي؟ تجولش بصة غزال يا ولاد؟

قالها باسماء، يتناول كفها الأيمن تاركا قبلته المعتادة على ظهره، مستمتعا باستقبال الأيسر يمسح شعره، وفي صوتها حنان لم يعد يملك غيره..

- نصاب زي عوايدك

قالتها ضاحكة في صدق، لا تعرفه ضحكاتها إلا في حضوره. تستطرد وقد احتالت الضحكة ابتسامة يكسوها الهدوء:

- صباح النور والفل والياسمين على عينيك الحلوين يا ضنايا،

تصلي في الحرم ان شاء الله.

- وانتي معايا بعون الله يا أم علي.

صمت بعض ثوانٍ، ثم استمرأ حديثه الضاحك:

- جرى ايه بجى هنفضل نتحدثوا كده للظهر من غير مانفطروا

وللا ايه؟، بجيتي كسلانة كيف بتتك هنية، طبج الفول فين يا ام النصاب؟

- الله يجازيك يا واد يا طلال، طب ايش جولك بجى ان مافيش

فول النهارده؟

- اكده؟، طب اني ماجايمش من اهنة الا واني واكل طبج الفول

ولو حدي كمان.

قالها واسترخى فوق الكنبه الجالسة على طرفها أمه، واضعا رأسه

على فخذه ينظر إليها في تحدٍ ساخر

- طب خليك بجى لبكره شوف مين هايجوم يجيبهولك.

- اني مش مستعجل على حاجة، خلينا جاعدين.

- خلينا جاعدين!

- طب بجولك ايه بجى ما واحنا جاعدين مستنين فرج ربنا اكده

ماتحكي لي حدوة زي زمان!

- حدوة!

- إيوة حدوة!

- طب والله ماني كاسفاك، ايه رأيك تسمع حكاية العش؟
- بلدنا؟
- إيوة يا سيدي بلدنا.
- أسمع ونص ده محسوبك ابو الوطنية احكي احكي.
- طيب يا لمض... اسمع يا سيدي
- قالتها وأرسلت نظرها عبر نافذتها من جديد، كأنها تقرأ سطور حكايتها في سطور بعيدة على صفحة السماء، قبل أن تستطرد قائلة:
- كان يا ما كان يا سعد يا إكرام ولا يحلا الكلام الا بذكر النبي عليه الصلاة والسلام!
- عليه الصلاة والسلام
- سنين كتير جوي فاتوا على أصل الحكاية.. سنين ماحدش واصل جدر يعدها، أو يمكن ماحدش كان فاضي يعدها. يومها كانت الارض دي كلاتها فاضية، أرض كلها ملك لله زي ساعتها ما كانت كل حاجة ملك لله، مافيش بشر بيحطوا اسمهم على ورجة يجولوا عليها عجد ويملكوا بيها ارزاج الغلابة، يومها جيه جدع اسمر شایل بؤجته على كتفه وماشي سارح في ملكوت الله طالب رزجُه، وجف في الارض دي لياالي وايام، حاجة غريبة شدته ليها وحبها. كان بيلاجي رزجه بيجيله لحاله، كأن ربنا بيجوله خليك اهنة وعمر مكانك. جعد

تحت خيوط الشروق، تمسح رأسه قائلة:

- كان اسمه طلال عزوز المنشاوي!

تلقاها طلال من أمه، فابتسم راضيا عن مجاملة أمه، متناولا كفها

من جديد يُقَبِّلُه، قبل أن يرفع رأسه معتدلا في جلسته قائلاً:

- أمّا، كنت عاوز اتحدث وياكي في حاجة كده.

- خير يا طلال.

- أني هاسافر!

- تسافر!، تسافر فين يا ولدي هو احنا لينا بعد ربنا غيرك؟

- وعشان اكده باجولك هاسافر يأمّا، لجمة الغيط مابجتش جاية

همها، شوية شوية مش هنلاجوا اللجمة يأمّا، الايام بتعدي واخواتي

بيكبروا ومحتاجين مصاريف.

صمتت الأم تطأطئ رأسها للأسفل، وقد احتبست في مقلتيها

بعض الدموع، قبل أن تلمسك بعض الشيء قائلة:

- هتسافر فين؟

- السودان!

- السودان!

- إيوه، واحد كلمني مباح عايزين عمال لمشروع كبير جوي

هناك، مصاريف الوكل والشرب والنوم عليهم وهيجبضوني ألف جنيه

في الشهر.

- هيهون عليك تسبب أمك لحالها يا طلال؟
- ربنا وحده يعلم اني هاعمل كده واني من جوايا عامل كيف يامًا!
- صمتت قليلا دون رد، تنظر إلى لا شيء في أرض المنزل الترابية المعتمة، قبل أن تقول بصوت خففته بعض العبرات:
- ربنا يفتحلك ببان الرزج يا ضنايا ويصبرك ويصبرنا. بس أمانة عليك ماتتطول في الغربة، أمك ما عادتش حمل حاجة يا طلال.
- من جديد قَبَل يديها مطيلا عمر قبلته، قبل أن يتبه وأمه لذلك الصوت القادم من أمام باب إحدى الحجرات قائلا:
- اني باجول نجضيها حكاوي وغناوي واجييلكم اتنين حاجة ساقعة وشجرة تجعدوا تحتيها!
- اصطبحنا وصبح الملك لله، الناس بتجول كلمة حلوة عالصبح يا علي، وبعدين ايه اللي ها يصحيك بدري اكده؟، دانتا مابتصحاش جبل اذان الضهر.
- قالتها الأم معاتبة ابنها في شيء من الهدوء؛ يأتيه ردها:
- عندي مصلحة اكده لازم اخلصها بدري
- مصلحة؟، مصلحة ايه دي؟ هو انت بتاع مصالح؟
- جدر ربنا بجي يامًا نجول لا؟

- مع مين المصلحة دي ومصلحة ايه؟
- ماحدش له صالح، مصلحة وخلاص.
- كده يا علي؟، بتجول كده لامك!
- يووووه يامًا!
- جومي يامًا طيب حضريلنا الفطار، خلاص يا علي خلي النهار يعدي على خير.
- قالها طلال، يأتيه رد أخيه المتحفز لكلمة منه، وقد بدا عليه أن رده عليه جاهز:
- انت مالك انت؟، ايش دخلك في الحديث؟
- استغفر الله العظيم!
- تمتم بها طلال مشيحا بوجهه عن أخيه، راغبا في إنهاء الشجار باكرا لأجل أمه:
- استغفر يا عم المؤمن ماهو كل واحد صلى ركعتين بجى شيخ الإسلام!
- لايملها يا علي، اصطبح وجول يا صبح!
- كفاية، كفاية حرام عليكم، هو انتو محاسينيش باللي اني فيه؟،
- ارحموا امكم شوية، ارحموها!
- كانت تلك آخر الجمل التي نطقها الأم، وأعقبتها ببعض دموعها،

فما كان من الأخوين إلا أن توقفا حيناً ينظران لبعضهما بتحضر، انصرف بعدها علي يتمم ببعض السباب غير المسموع لأخيه، في حين انشغل طلال بأمه الجالسة على كنبها يطوقها بذراعه حاضناً رأسها بصدره قائلاً:
- ماتر عليش يامًا

تلقتها منه صامته تستقبل ذراعه وكلماته دون رد، حتى انتبه فجأة لتلك الكلمات النابتة في تربة دموعها، قائلة بشيء من التوسل لم يعرفه قبل الآن في صوتها:

- طلال، اوعى لو مت وسيبتكم تتعاركوا ويًا بعض مهما كان، اوعى يا طلال!

لعلها ضمن كلمات قليلة تمنى معها لو كان مصاباً بالصمم.. تمنّاها قبل الآن حين سارت إلى أذنيه بعض الجمل من عينة (البقاء لله) التي خاطبه وأهله بها أحدهم في إحدى مستشفيات القاهرة الحكومية يخبرهم برحيل أحد مرضى الكبد.. أو عينة (ماهي عاودشي) التي تلقاها من طالب أزهرى حول مصير أحد الغائبين!

- بعد الشر عليك يامًا، ماتجوليش اكده تاني!

- اوعدني يا طلال انكم مها تتعاركوش!

صمت حيناً يغالب بعض الدموع، حتى ألحت عليه من جديد بإنجاز وعده هو على يقين أنه غير قابل للتنفيذ من جانب أخيه:

- اوعدني يا طلال!

- أوعدك يأمًا، أوعدك!

بعض الدقائق بالخارج ربما تساهم ببعض الفائدة في مثل هذه الأثناء، هدنة مؤقتة من ساحة المعركة الدنيوية، هروب إلى حين من طلاس المعجم الحياتي، أو ربما كان ذلك التنحي المرهون بعودة عن... الرقعة ذات اللونين.

لا يزال ذلك الهدوء الفجري مسيطرا بلونه الشفقي على لوحة العش. ما مضى من الوقت على طلال وأمه وأخيه لم يكن كافيا لتغير ألوان اللوحة بكل حال. ربما هي عادة طرق العش الترايبية في صبيحة كل يوم جمعة، حيث تتأخر صحتها إلى وقت تتضح فيه سطوة الشمس عليها بصورة أكبر. خطى بخطوات الحكماء دون هدف محدد، يداه تستدفئان بجيب جلبابه البني ذي الأكمام الصعيدية الواسعة، في حين تكفلت (تلفيحته) بمهمة الدفء لرقبته ورأسه. دون إدراك محسوس لخطواته، وجدها رغما عنه تقتاده إلى براح الحقول. ابتسم رغما عنه حين وقعت عيناه على ذلك الجالس تحت (الجميزة)، يجالس بعض أكواب الشاي ويسامر بعض (كيزان) الذرة، وبينهما نُصبت بعض ألسنة اللهب ترعى سفر الاثنين إلى فم ذلك الجالس.

- كانك بايت اهنة يا عم علام!

- طلال، اجعد اجعد، مكتوبالك كوباية الشاي وكوز الدرة يابن الإيه.
قالها الرجل ضاحكا، يقابله ضيفه بنفس ضحكته قائلا:

- اهل كرم طول عمرك يا راجل يا طيب

قالها طلال وقد خلع حذاءه (الميري) واضعا إياه إلى جوار
الفرشة، التي افترشها عم علام يستعد لتلك الوجبة من الشاي والذرة،
قبل أن ينتبه لتلك النظرة الباسمة الطويلة من مضيفه، كأنه به يرسمه
بريشة بسماته، فخطبه ولازالت على شفثيه ابتسامة تعبت عبث
الأطفال في حديقة غناء:

- مالك يا عم علام؟، هتبصلي كده ليه؟ كانك لسه هتعرفني يا راجل.
- سبحان الله اللي خلف ماماتش، جعدة أبوك الله يرحمه الخالج الناطج.
- الله يرحمه.

قالها طلال وقد بهتت الابتسامة على شفثيه بعض الشيء، يطأطئ
رأسه للأسفل، يأتيه عن يمينه من جديد قول عم علام:

- اني... اني آسف يا طلال يابني حجك عليا ماجصدتش اجلب
عليك مواجع

- ولا يهملك يا عم علام، المواجع كده كده بتتجلب لوحدها
زي شريط السيما، احنا بس اللي بتلكك وندور على غطا لمواجعنا،
كاننا بنخاف نعترف اننا ضعفا جوي من جوا وأي ذكرى ممكن تشد

من عينينا الدموع. بنهرب من صور فاتت جوانا نلاجيها مستنيانا على لسان غيرنا، بنهرب منها ليها، وفي الآخر بنرمي التهمة على أول حد بيجابلنا شيلها على لسانه كانه هو السبب مالاول، بنعادي بعض حتى في الذكرى يا عم علام.

كلمات نالت من دهشة الشيخ وإعجابه منالالا بأس به.. هل ما قيل كان على لسان طلال، ذلك الذي ملأ السوق صراخا قبل عامين لأجل حذاء أرادته؟، أيمن لعامين أن يحيل طفلا يعبث إلى شيخ حكيم بهذا الشكل؟.. ربما لم يكن السر في عقربي الساعة المارة بالعامين، بقدر ما كان فيما حملاه من أحداث خلال رحلتهم بين أرقامها. صمت ثوانٍ دون جواب، يحاول تغيير الموضوع بعثه في ألسنة النار، يقلب كيزان الذرة، حتى انتشل إحداها ملقيا بها إلى طلال قائلا:

- امسك بجى من عمك علام كوباية الشاي ديّ وادعيه
- الله يرحم لما دعيته عالمداس الميري اللي اتجطع بعدها بيومين.
- يا ساتر دانتا جلبك طلع اسود جوي يا واد يا طلال، مش جبته وصلحته بعدها على طول؟
- لا ماني باتكلم عالمرة الثانية بعد انت ماصلحته، من كتر ماصلحته مابجتش عارف اعدّ.
- خلاص بجى المسامح كريم، وبعدين ماهوزي الجن في رجلك

اهو كانه ابن امبارح.

- خلاص تنزل المرادي يا راجل يا طيب.

قالها ورشف من الكوب رشفة، ثم لم يلبث أن بصقها قائلاً في نفسه:

- الله يحرّجك يا عم علام ايه اللي هتعمله فيا عالصبح ده هو

اني ناجصك؟

- خير ايه يا واد يا طلال؟

قالها الرجل الذي لم يسمع تعليق مضيفه الشاب

- لا ولا حاجة يا عم علام بس فين الشاي؟

- واه ماهو في يدك اهو!

- إيوه إيوه، لا مؤاخذه ماخدتش بالي مانمتش زين بس!

ظلاً يتضحكان حيناً ليس بالقصير، حتى انتبه طلال من بين قضاياه

لحبات الذرة لذلك الصوت الذي يعرفه، قادمًا من مسافة كافية لينساب

واضحًا عبر أذنيه:

يا حبايب هاجروا من غيظنا وجالوا مسافرين

راجعين للزرعة ولمتنا ولا مفارجين

طال شوجنا وطال عمر بعدادكم

وكلامنا مخنوج بسكاتكم

راح ازغرد وارحص برجوعكم

- إيوة، إيوة يا عم علام حُصِّل ايه كان الدنيا اتهدت وللا ايه؟!
- والله لو اتهدت ماhtدرى بيها داني بنادي عليك ييجي من تلت اسابيع!
- تلت اسابيع؟، ربنا يرد غيبتك يا عم علام.
- طب يلا يا خفيف عشان نلحجوا نجهزوا للصلاة الجمعة.
- صلاة الجمعة؟، دي الشمس لسه بتطلع يا عم علام سلامة الشوف، انت مهاجر بجالك كتير وللا ايه؟
- جوم بينا و خلاص
- لا اله الا الله ليه طيب حُصِّل ايه؟
- ماحصلش حاجة بس عايز اروح
- طب ماتروح يا عم علام اني دخلي ايه؟
- هي كبرت في دماغى اكده هنمشي احنا الاتنين دلوك
- لا حول ولا جوة إلا بالله طب المداس حلو وزى الفل
- بردك هنجوم
- لا إله الا الله دي العش كلها شكلها ركبها عفريت عالصبح (قالها في نفسه)، طب يا عم علام اشوفك في الجامع بعد ٦ - ٧ ساعات بجى على خير ان شاء الله يادوب اتوضا واحصلك على هناك، سلام عليكم!
- (للمكان قلب يفتقد عند الفراق، نفس تهرم بالوحدة، ونضارة

تخفت بطول الانتظار)

كان هذا حال الكثير من أماكن افتقدت وهرمت وخفت نضارتها، في ممرات تلك القرية الصعيدية السمراء. ربما أحد البيوت الذي افتقد جلسة كبيره وسط زوجة وأبناء أحدهم يسمى طلال، أو يكون أحد الحقول الذي هرم لوداع جلسة لإحداهن بين زرعاته، بوجهها الباسم المقتبس بسماته من اسمها، أو أنه مسجد خفت نضارة منبره منذ... رحيل قائده قبل عامين!

كعادة صلوات الجمعة تراص الناس متطلعين إلى المنبر ومعتليه، شيخ خمسيني ذي لحية بيضاء كثة، عمة تنطق بأنه من رواد أهل الدين، مسبحة سكنت يمينه تداعب حباتها أنامله، وحنجرة ألفت السلام في خشونة أكملت صورة (رجل الدين) في نظر هؤلاء المساكين، الذي استعدوا لفتح خزائن رؤوسهم المجهزة دوما لاستقبال أي شيء يصدر عن لسان (رجل الدين) الذي يتصورونه!

- بسم الله، والصلاة والسلام على رسول الله، محمد صلى الله عليه وسلم، أما بعد، سنتحدث اليوم يا اخواني عن علاقة الحاكم والمحكوم. يعني ايه الاول حاكم؟، كلنا فاكرين ان الحاكم ده هو عفريت الفانوس اللي أول ما الشعب يعوز حاجة يلاجيها عنده من غير ما ينتظر حتى دجيجتين، سبحان الله، طب لو اتكلمنا عن بلد زي بلدنا

إكده عدد سكانها ييجي ٩٠ مليون، طب بالعجل كده الرئيس والحكومة هيجيبولنا منين؟، ناس شغالين ليل ونهار عشان خاطر الشعب ويردك مش عاجب، الراجل كل يومين ثلاثة نلاجيه بيفتح المشروع الفلاني، ويأسس المشروع العلاني، طب يعمل ايه يعني يشيل البلد على كتفه؟، الرحمة بأولي الأمر واجبة يا إخواني، جدروا ظروف البلد واللي هي فيه، لا وبعد ده كله ييجي يجولك معارضة وشيلوا الحكومة وغيروا مش عارف مين، هو انتو البعدا مش مصريين؟، البلد دي مش بلدكم ولا أهلها أهلكم عشان تدوروا تخربوها بالطريقة دي، حسبنا الله ونعم الوكيل، حسبنا الله ونعم الوكيل، ليكم يوم ربنا ماينساش حد

- اللهم وفق رئيس جمهوريتنا وسدد خطاه

- آمين

- اللهم وفق حكومتنا وسدد خطاها

- آمين

- *****

- آمين

لا يدري لماذا لم يبد مثلهم كالمنوم مغناطيسيا بهذا الشكل.. لا يدري لماذا لم ترُقْ له بعض الجمل مثلما راقا للآخرين، (هيجيبولنا منين؟) (شغالين ليل نهار) (خاطر الشعب) (المشروع الفلاني

والمشروع العلاني)، شيء ما أوقفها على عتبة رأسه، ربما كانت... صورة شيخ كان يقف في هذا المكان قبل عامين أشار لها بعدم الدخول! (مقطع خارج المضممار: في بلادنا، يكفي أحدهم ارتداء الزي الأزهري ليكون أهلاً للإمامة، يكفي آخر أن يطلق لحيته ويقصر جلبابه ليصبح رمزا للفتوى. نستطيع القول إن كثيرين منهم قد انطبق عليهم المبدأ القائل إن أعتى جنود الباطل هؤلاء المحسوبين على الحق وليسوا منه في شيء!)

الضجة كانت المعلم الرئيسي لحارة الشوربجي.. عشوائية معتادة، جسدها تداخل أصوات الباعة من جانب، ومشاجرات الشارين معهم من جانب آخر، ثم الضوضاء النابعة من محل إيجو ومقهى المعلم عبد الجواد من ثالث الجوانب، لا مانع كذلك من بعض الإضافات القادمة من نداءات بين الشرف الخشبية لتبادل شيء ما بين أصحاب الشرفتين. لعل الأبرز بين كل الضجيج، كان المعركة الصباحية المتكررة عند محل قدرة حول أسبقية الحصول على الإفطار. بناء زجاجي بطول ثلثي إنسان، حوى داخله بعض صواني الطعام من فول وطعمية وباذنجان (مقلي ومخلل) وبطاطس (مهروسة وشيبسي) إضافة لبعض فواتح الشهية، التي تعتبر مهمتها سهلة إلى حد كبير في التعامل مع

أمثال هؤلاء. أيادٍ تمتد خلف الزجاج، متلاصقة كأنها أخطبوط بشري، إحداها ممسك ببعض الجنيهات التي اعتصرتها يده خوفاً من سقوطها تحت الأقدام المتعاركة.. أخرى ممسكة بيد وعاء صغير تطمع في ملئه بـ (اتنين جنيه فول)، وجود بعض الأطفال الذين اعتصرتهم أجساد الكبار كان وجوداً مميزاً على كل حال، وهم يسعون للانتقام بهرس أقدام معتصريهم بنعالهم الدقيقة؛ إن وجدت.

(حتى الأطفال في حارة الشوربجي ذوو حضور مميز في المعارك!)

- يلا يا ص منك ليه من هنا ما عندناش فطار النهارده!

سمعها الجميع قادمة من خلفهم، على لسان أحدهم المشهر مطواة، يتبعه شريك جرائره. يعرفون عنهما وعن تاريخهما الأسود الكثير. عم الصمت دقائق، تعلقت خلالها عيون الواقفين بهذين القادمين وقد تطاير من عينيهما الشرر، إذانا بمعركة لم يعرفوا بعد ضحيتها القادمة علي أيديهما:

- يعني ايه ما فيش فطار يا عمدة؟... أمال ناكل ايه على صباحية

ربنا كده؟!

تجرأ أحدهم ونطق بها، فما كان من ذلك الـ(عمدة) إلا أن التفت إليه ممسكاً بإياه من تلايبه، ممزقاً بمطواته قميصه، الذي لا يحتاج في الأصل إلى تمزيق، حتى بدا من تحته جسده الذي لا مسته المطواة في

أكثر من موضع، خلال رحلتها الاستكشافية عبر القميص، قائلاً:
- مافيش فطار يعني مافيش فطار يا روح أمك، هتقضيها النهارده
زبادي وبقصمات!

لم يكد الجمع يرى دماء الضحية على قميصه الممزق، حتى
تعالّت صرخات النساء المصاحبة لهرولتهن بعيداً عن مكان الشجار،
في حين آثر الرجال السلامة مبتعدين عن المكان، تاركين المسرح
لأعضاء يتقنون فن أدائه.

- عايز ايه عالصبح يا عماد، اصطحب و قول يا صبح
قالها قدرة في شيء من العنف، وقد تشكلت ملامحه في هيئة
المتحفز لشجار هو على ثقة أنه ليس كفئاً له، فحاول التثبت ببعض
الشجاعة الغريبة عليه، محاولاً ستر خوفه بها، فأتاه رد عمدة في برود
المستهزئ بخصمه:

- عايز اتنين فول وواحد طعمية، اصلي لا مؤاخذه هفتان، وزود
عالنوته، تجارة المخدرات اصلها مابقتش تجيب همها اليومين دول!
تعالّت بعدها ضحكاته وضحكات صديقه الممسك بهراوة
ضخمة في يمينه، قبل أن يتحول في لا زمن إلى هيئة الجد، قائلاً يهرول
باتجاه قدرة شاهرا سلاحه والى جواره رفيقه:

- بتبلغ عني يابن الكلب يا مرة؟، انت فاكرني لقمة سهلة؟، و حياة

الغالية لتفضل طول عمرك فاكِر العمدة وتحلف بيه!
انتفض قدرة مهرولا إلى داخل دكانه يحاول إغلاقه من الداخل،
إلا أن عمدة كان أسرع، فانطلق خلفه مانعا إياه من محاولته بلكمة قوية
حطمت فكّه، أعقبها بوعاء الزيت ملقيا به في اتجاهه، فنال من قدرة
بعض أجزاء جسده، بعد محاولة هرب فاشلة أعقبها بتأوهات المعلنّة
عن تشوّهاته جراء الزيت المغلي. بعض فنون استخدام المطواة لم
تفته على كل حال، بعضها في وجهه، أخرى في ذراعيه، وثالثة ختم بها
اللوحة كانت من نصيب صدره!

- الحكومة يا عمدة!

قالها صديقه الذي انشغل طوال تلك الأثناء بتحطيم المحل حيناً
ومراقبة الطريق حيناً آخر.

- اهلا وسهلا. قبل مانمشي بقى اتركني اديله كُبله الحياة!
قالها بنفصحي كرية، ساخرا من خصمه المنهار، قبل أن يتناول
الهراوة من صاحبه منهالا بها على قدمي قدرة الصارخ من أثر الضربة،
التي حملت له بلا شك... الكثير من الكسور!

انطلق الصديقان جريا من باب الدكان، في الوقت الذي وصل
فيه بوكس الشرطة حاملا في كايينته الأمامية ضابطا ذا نجوم ثلاثة
على كتفه، والكثير من (غريبي الأطوار) في صندوقه الخلفي. بسرعة

اعتادوا عليها هبطوا جميعا من البوكس، مطاردين هذين الهاربين، في حين تجمع الكثير من أهل الحارة على باب الدكان يتابعون أثار المعركة، وقد تطوع أربعة منهم بحمل قدرة الغائب عن الوعي إلى أقرب مستشفى!

ذلك النوع من المطاردات رغم خطورته على عمدة وصديقه، إلا أنه كان من ضمن فقرات محببة إليهما، تساعد كثيرا في كسر حواجز الملل المنتشرة في طرق حياتهما الرتيبة ذات الإيقاع الواحد القائم على المطواة والعصي. بمهارة يحسدان عليها، تسلقا حائط الدكان إلى سطحه، متنقلين عبر الأسطح المجاورة، إلى حيث يكملان فرارهما خارج حدود الحارة، كما اعتادا في سابق المرات.

- ثلاثة ييجوا معايا وتلاثة على أول الحارة من ناحية العيلين ما جريوا واتنين يستنوا هنا!

قالها النقيب شاهرا سلاحه مطاردا الصديقين، عبر طريق مواز في طرقات الحارة، التي حفظها عن ظهر قلب من طول اقتحامها ليلا ونهارا (الفضل في ذلك يعود لقدرة على كل حال)

دقائق المطاردة لم تكن لتمر بسهولة على الفريقين. اعتادا مناورات بعضهما البعض، فباتت مطاردتهما جزءا من فيلم سينمائي من أفلام الغرب التي ينجح فيها البطل الهارب في كل شيء خارق للعادة، غير

أن النسخة المصرية كانت ذات تعديل بعض الشيء.. يتعثر البطل مرة في أحد أفاص الدجاج على أحد الأسطح، فلا يبخل عليه برحلة جوية تنتهي بإلقاء القفص ومحتوياته إلى الشارع انتقاماً من تأخير لحظات، تعيقه بعض أحبال الغسيل الحاملة أشباه الملابس، وهي لا تدري أنها قد حكمت على نفسها بالإعدام ذبحاً بمطواة من أعاقته.. مطاردة بطابع مصري خالص، برعت في إخراجها للجمهور بشدة ممرات وسطوح حارة الشوربجي!

- مش لاقيينهم أثر يا باشا، كأنهم فص ملح وداب!
قالها أحدهم متقطعة، وصدره يعلو ويهبط من أثر الجري، فتلقاها منه صاحب النجمات الثلاث مستقبلها ببرود لا يناسب ما قيل، خالعا عنه نظارته معيدا سلاحه إلى مكانه في جانبه، وقد علت وجهه ابتسامة لم يفهمها منه أحد من الوقوف!
(ملحوظة: بعض أفعال عسكري الشطرنج التي لا يعمل لها حسابا، قد تدفع به في نهاية الأمر... إلى الهاوية، بأسرع مما يتوقع!)

اللعة على آلام الكلبي!

ما زالت مصرة على تكبير الصفو من حين لآخر، كلما سنحت لها
إحدى الفرص اللعينة للهجوم.

الصفو!... لا يبدو قلبي صادقا بهذا الشأن. ربما كانت تلك
الرغبة في الخروج بعض الشيء من ذلك الكهف، الذي لم أنجح بعد
في وضع لافتة عليه من الخارج تحمل له اسما يفسر بعض ما يحتويه.
لا أظنني أهتم كثيرا بذلك التيار من الألم الممتد بين أحشائي.. لن
يضيف كثيرا لمحتويات الكهف على كل حال.

آآه، ليذهب الألم للجحيم!.. لم لا يقع في محرابه اللعين دون
إزعاج؟.. ما جدواه في تكبير صفو بني الإنسان؟ ما جدواك أيها الألم؟
لم لا تبعث بجنودك فقط إلى مستحقيهم من ملاعين البشر؟.. لماذا
تقصر هجومك على الضعفاء من جنس البشر، ترى قوتك ذات قيمة
حينئذ؟! أجبني إن استطعت للإجابة سيلا!

جانبي العزيز... رفقا بي وبنفسك... رفقا أرجوك!

كان هذا آخر ما كتبه، قبل أن يسقط مغشيا عليه، بعد صرخة مدوية
سقط بعدها أرضا، وقلمه لازال على ورقته مانعا إيها من الطيران!

- اشوف وشك بخير يا ريشة، الود ودي ما فوتكش يا صاحبي،
نفسى اخذك معايا بس ياريتة كان ينفع.. وكل العيش مر انت خابر،
الحمل زاد عليا جوي مابجتش جادر عليه، وعلي زي مانتا شايف
عايش في ملكوت لحاله مش داري بينا كانه عايش في بيت غير البيت.
ماتخافش انى وصيت عليك البت صابرة، البت دي جدعة وبت
حلال، هتاخذ بالها منك لغاية ماعاود، بعون الله هاعاود على طول،
مش هاطول الغيبة زي الشيخ بدر ما عمل زمان، مين عارف يمكن
ارجع الاجيه وسطينا تاني، ادعيلي وادعيله يا ريشة، انت طيب وابن
حلال ودعوتك بعون الله مستجابة.

- طلال، يللا يا ولدي هتتاخر!

جاء الصوت من قاع البيت، فقام مجيبا بصوت سمعته مناديته بوضوح:

- حاضر، حاضر يا ماما جاي أها

قبل أن يعود لهمسه مخاطبا فأره الصغير، مارا بيمينه على فرائه

الأبيض، واضعا إياه من جديد في جحره السري:

- فُتْك بعافية يا صاحبي!

بدا أكثر صلابة بعض الشيء من ذي قبل. ربما كان ذلك المنطق

الحياتي القائل بأن الاعتياد على شيء ما يفقده جانبا كبيرا من كاريزماه

المهيبه، التي ينعم بها فقط في أول مرات حدوثه!

وقفوا جميعا ينظرون إليه وهو مستند على ركبتيه وأطراف قدميه بعيد مراجعة ما وضعته له أمه في ملاءة سرير قديمة، تم استخدامها كـ (بقجة).. جلبابان من الصوف المعتبر حسب وصف البائع الذي باعهما لأبيه قبل خمسة أعوام (الجلابان تعود ملكيتهما الأصلية لذلك الشاري الراحل بالمناسبة)، صديري أبيض اللون، لباسان من البفتة البيضاء، يصلان إلى تحت الركبة بمسافة لا بأس بها، كلسون صوف بني اللون، (زنوبة) خضراء الواجهة بيضاء القاعدة، وأخيرا برطمان صغير من المش، ذو غطاء دائري أحمر (أو هكذا كان) مع بعض أرغفة (عيش الذرة) الذي تم خبزه خصيصا في المساء السابق.

- غسيلك وخبيزك حاجة تفرح يا بت يا فايجة!

قالها باسمها يداعب أمه الباسمة في تكلف، ترد مجاملته بقولها:

- تدوبهم في عرج العافية يا ضنايا.

ربما لم تكن كلمة (جميعا) تلك لتلائم حال المودعين على وجه الدقة المطلوب. أحدهم غاب عن تلك اللحظة (بإرادته أو بدونها... الأغلب أصلا أنه لا يعلم عن حدوثها شيئا!) تاركا خشبة المسرح لأم تضم إلى جانبيها فتاتين في عمر الزهور، وقد تعلقت أنظار الجميع بذلك الذي أحكم إغلاق بقجته، رافعا إياها على كتفه متدلية على ظهره، متوجها إلى أمه الدامعة طابعا على يديها قبلة طويلة... جدا!

- أشوف وشك بخير يأمّا.

سمعتها منه، فعلا صوت بكائها، فجذبتة إليها ضامّة إياه إلى صدرها، قائلة بصوت جاهد كثيرا ليخرج من بين دموعها:

- ماتسافرش يا طلال... خليك معانا يا ولدي احنا مالناش بعد ربنا غيرك، هنجضيها بأجل الجليل ربك ماينساش حد!

- وبعدين يأمّا؟... احنا مش سبيع واتحدثنا في الموضوع دي؟
لم ترد، مكتفية بنظرتها للأسفل تحجب نظرتها غشاوة من الدموع، فاستطرد:

- وبعدين يا غسل، دول همّ كام شهر واعاود على طول بعون الله.
النصاب ماهي جدرش يبعد عن طبع الفول كثير!

ابتسم، فابتسمت في تكلف المستسلم للأمر الواقع:

- ادعيلي يأمّا... ادعيلي كثير!

- دعيالك من كل جلبي، ربنا يفتحها عليك ويرجعك سالم غانم جادر يا كريم.

ربت على كتفيها باسمها يعبر عن امتنانه، قبل أن ينحني إلى كبرى أختيه على يمين أمه قائلا وما زالت الابتسامة تعلو وجهه:

- أشوف وشك بخير يا ست صابرة يا لمضة!

- اشوف وشك بخير ياخوي... خلي بالك من نفسك.

- مش هاو صيكي على امك واخواتك، وخلي بالك بجى (يغمز بعينه خافضا صوته) من الأمانة!

- خلاص يابوي هتفضحننا!

- هاهاها مش بجولك لمضة

قالها ثم قَبَلها بين عينيها، فاستسلمت له رابطة على يديه الممسكتين برأسها في حنو، قبل أن يتركها متنقلا إلى أصغر أفراد العائلة يتسم قائلا:

- اشوف وشك بخير يا هنية هانم، خلي بالك بجى من أمك واخواتك أني سايبهم أمانة في رجبتك.

- ماتجلجش يا ولد ابوي، هترجع تلاجي كل حاجة زينة وزى الفل.

- أموت واعرف بناتك اتعلموا اللماضة دي كلها فين؟، شكلك كنتي مُشكِلْ وانتِي صغيرة يا بت يا فايحة.

رفع رأسه مخاطبا أمه، التي ابتسمت من جديد دون رد، فعاد لأخته سائلا:

- جوليلي بجى، أجيلك إيه معايا واني راجع ان شاء الله؟

- ممم، تجيب ايه يا طلال، تجيب ايه يا طلال، إيوه، أرواح!

سمع الكلمة فهاجت لها مشاعره، التي رسمت على الفور في مخيلته صورة أحد الغائبين، فتحسس دون إرادة منه جيب جلبابه، عله يعثر على إحداها مختبئة هناك منذ... عامين!

ربت على كتفها مقبلا إياها مثلما فعل مع أختها، مكتفيا بقول

(حاضر) وقد صاحبها ببسمة... باهتة!

- آني هاتكل على الله بجى يادوب ألحج اطلع اجابل العربية
عالطريج بره البلد، مش هاوصيكي بالدعا يا ام علي!
تغيرت ملامحه لانكماش المستغرب فجأة، وقد بدا أنه تذكر شيئاً
ما، فهمَّ بالسؤال عنه:

- إلا هو فين على صحيح؟

لم ترد الأم... اكتفت بنظرة بائسة للأسفل، فأتاها رد طلال النادم
على هروب السؤال من بين شفثيه رغما عنه، طواعية لحنين أخوي
مازال ينعم ببعض البقية في سفح إبريقه قائلاً:

- أمانة تسلميلي عليه يأمًا، جوليله يخلي باله من نفسه ومنيكم.

قالها وانطلق نحو الباب حاملاً حاجياته، فاتحا إياه قبل أن يعود
من جديد اليهم بوجهه قائلاً:

- لا إله إلا الله!

- محمد رسول الله!

جاءه الرد الجماعي، فأغلق الباب خلفه آذناً أخيراً لتلك الدمعة
المتحجرة في عينيه بالانحدار، بعد حبسها طوال لقاء طغت عليه كثيرا
متكلف الابتسامات، كأنما يستعطف بدمعاته تلك العجوز الراضة هناك
على عرشها العفن، تراقب معاناة الخلائق في تلذذ، يقال لها... الدنيا!

(ملحوظة: روح التضحية لدى عسكري الشطرنج لأجل الفريق، قد تؤدي في نهاية الأمر إلى... الإطاحة به تماما خارج الرقعة ذات اللونين!)

ببساطة اعتاد واعتدت عليها معه، أزاح إحدى القطع الخاصة بجيشي الأبيض. كانت أصغر القطع، برتبة عسكري.. لم ينطحه في رأسه بإصبعه احتقارا ملقيا به خارج الرقعة، كما هي عادته مع باقي القطع. حمله من قاعدته، بتقدير لا أعتقد أنه اعتاده مع أي موجود بخلاف تلك القطعة الشطرنجية المتناهية الصغر، كأنه الحامل نعش أحد الأبطال.. وضعه على طرف الطاولة، في مكان بعيد عن باقي ضحاياه من جيشي الخشبي، كأنه الخائف عليه من تركه بينهم!

- مش حاسس انك اتأثرت قوي بالحركة اللي فاتت.

قالها مركزا نظره في عيني، كأنه المنتظر ردة فعلي على قوله ذاك بالذات. أجبتة بتلقائية، رغم تعجبي من كل ما كان من أمره منذ أطاح بالعسكري، قائلا:

- عادي يعني ده عسكري، المهم باقي الجيش عندي سليم اقدر أكمل، أحسن ما كان يبقى وزير وللا فيل وللا حصان!

تلقتها مني مسامعه، فارتسمت على وجهه ابتسامة عريضة المساحة بشكل مخيف، جسده روحا لأحد المهرجين تسبح في

فضاء سيرك مهجور، لم تطئه أقدام المتفرجين منذ مائة عام. الهدوء المبالغ فيه كان مساهما قويا في جعل الرعب ضيفا ثقيلا على صورته، الظلام المحيط بأركان الحجرة - باستثناء الضوء الخافت المسلط على الطاولة وما عليها من أثار معركتنا - ، إضافة لبقايا الأمطار العالقة على صفحة النافذة الخارجية، ربما كانوا أكثر ما ميز المشهد الراحل منذ سنوات ولازال في ذاكرتي قابعا، يحظى بمكانة لن يفهمها الكثيرون. لم يكتف بابتسامته ونظراته التي جاهدت كثيرا للهرب منهما دون جدوى، كأني المنوم مغناطيسيا..
تمتم بكلمات، لم أتبين من بينها سوى:

- كان عندي حق لما قلت انك زيهم!

انك مشيت ملامحي استغرابا، أخرجني - إلى حين- من ثواني

الخوف قائلا:

- زي مين؟!

- مش مهم.

اعتدت على مثل هذه الأجوبة على كل حال.. لم تعد تمثل أكثر من مؤثرات صوتية لمبارياتنا معا. سألته من جديد، يائسا من الحصول على إجابة مريحة بشكل ما:

- لحد امتي هتفضل محسسنني ان وجودي معاك بيضيعلك وقتك؟

- عمرى ماضيت وقت!
- معنى كده انك بتستفيد من وجودي معاك؟
- ممم...شوبّة!
- بتستفيد ايه؟
- باكسبك في الشطرنج!
- مستفز!
- عارف!
- قالها بعد صمت فترة، استغلها في إشعال سيجارة، أضافت مقدمتها بعض الضوء الناري للمكان، مستطردا بعد استنشاق أول أنفاسها:
- كمل لعب!
- مش هالعب!
- براحتك!
- قالها وتراجع بظهره للخلف، لاصقا إياه بظهر كرسيه، واضعا إحدى قدميه فوق الأخرى، في تجسيد صريح للامبالاة. الصمت كان السيد لفترة لا بأس بها.. أصابني الملل بشكل ربما لم أعانه قبل هذه اللحظة، بهذا الشكل.. تراجعت عن غروري المتجسد في صمتي أخيرا قائلا:
- انت عايز ايه؟
- انت اللي عايز!

- قلتلك عايز اسمعك واساعدك، ليه مش مقتنع بكده؟!

- ممم... تقدر تقول مش قادر تقنعني.

- واعمل ايه بقى عشان أقنعك!

- تكمل لعب!

- ده مصدر الاقتناع بالنسبة لك؟

- ايوه!

انعقد لساني غيظا، مدة لم تزد عن دقيقة، قبل أن أسلم أخيرا
بالأمر الواقع، قائلا وزفير حاز يسبق استسلامي:

- ماشي!

ابتسم من جديد ابتسامة الظافر العالم مسبقا بظفره، عائدا من
ظهر مقعده مطلا على الرقعة وجيشيها من جديد قائلا:

- اللعب!

شيء ما كان يدفعني دائما للاستمرار، رغم كل شيء!

- عاهة مستديمة، قصدي عاهات مستديمة.. شوهته بزيت مغلي،
وكسرتله الجمجمة وختمتها بكسر مضاعف في رجليه، طب ماكنت
تشويهه عالفحم بالمرة!

- مالحقش والله يا باشا سعادتك وصلت بدري شوية كانت

هتبقى طبخة نص سوا ايه تستاهل بؤ سعادتك!

- انت هتهرج معايا يا روح أمك!

قالها ذلك النقيب قائما من على كرسيه يضرب مكتبه بقبضتيه،

يأتيه رد (عمدة) الذي وصل بمستوى استفزازه للذروة قائلا:

- تؤتؤتؤ... ايه دخل الأم دلوقتي طيب يا باشا؟ ما حنا كنا حلوين،

هي أي نعم ما عرفهاش مين، بس بردك تعز عليا كفاية انها جابتني الدنيا اشوف طلة جنابك.

أشار الضابط لأحد المخبرين الواقفين خلف عماد، فصفعه على

قفاه صفقة مفاجئة كادت تطيح برقبته:

- طب وحية أمي اللي الباشا لسه جايب سيرتها وأمك اللي

هاخلي مصر كلها تجيب سيرتها، لتكون واخذ قصاده عشرة، بتمد

ايدك على عمدة ياض؟، دانتا هيتعملك صوان عزا بعد ساعتين!

همّ الصول بعقابه بالمزيد، غير أن صوت النقيب المبتسم منعه قائلا:

- سيبنا واطلع بره يا عبد الموجود.

- بس يا محمود باشا....

- انت اتجننت؟... نفذ الأمر!

- أوامرك يا باشا!

انصرف الصول جاراً أذيال الخيبة، وقد ارتفعت درجة كراهيته

لعماد إلى حد قد يرتكب معه جريمة قتل بمنتهى السهولة، تصاحبه عينا
خصمه الذي أخذ يعدل من هندامه، محولا نظره إلى الضابط القائل:
- اقعد!

نظر عماد خلفه باحثا عن مخاطب غيره فلم يجد، قبل أن ينتشله
من بحثه صوت مخاطبه:

- بقولك انت... اقعد!

- انا يا باشا؟

- هو فيه غيرنا في المكان يا بني آدم؟

- بس يا باشا يعني....

- ولا.. أنا مش فاضيلك، اعمل اللي باقولك عليه وخلصني انا
ماعنديش وقت اضيعة معاك.

- ماشي يا باشا اللي تشوفه.

قالها عمدة واتجه إلى المقعد المقابل للمكتب منتظرا القادم من
قول الضابط الآخذ في إشعال سيجارته مناولا واحدة لمضيفه قائلا:

- سيجارة؟

- من يد مانعدها يا باشا!

تفحصها بين يديه مستغريا بعض الشيء، يفرك مؤخرة رأسه بأصابعه:
- فيه حاجة؟

- أصل بصراحة يا باشا يعني السوجارة دي نضيفه قوي حرام
تشرب، بافكر احتفظ بيها ذكرى.

ابتسم محمود في شيء من السخرية سائلاً:

- ليه انت متعود تشرب ايه؟

- عدم اللامؤاخذه يعني اسم الله على مقامك السوجارة
الكليوباترا المطولة دي، تحس يا باشا ان هي اللي بتشربك، أنا ذات
مرة اتغديت بواحدة!

ابتسم محمود ابتسامة طويلة هذه المرة متسائلاً:

- ذات مرة؟، جبتها منين ذات دي؟

- لغتنا الحلوة سعادتك.

- ايه رأيك في الشعب المصري يا عماد؟

- مااترباش جنابك.

- ليه بتقول كده؟، مش عيب بردو تقول كده على الشعب اللي

انت منه؟

- منا عشان منه يبقى مااترباش يا باشا.

ضحكة خفيفة أثارته كلمة عمدة، أعقبها محمود بسؤاله:

- ايه اللي بيخليك تقول عليه كده طيب؟

- يا باشا الواحد من دول تيجي تثبته ولا تأخذ منه حاجة يخرب

الدنيا كأن الدنيا اتهدت، يعني هنعمل ايه يا باشا؟... ناكل تراب؟...
نموت مالجوع؟... همّ مش عايزين يدونا حقوقنا معاهم بالذوق،
خلاص ناخذها احنا بمعرفتنا بقى!

- ممم... تصدق فعلا عالم مش متريبة.
- مش بقولك يا باشا
- طب واللي يريهم؟!
- يبقى سيد الناس.
- يعني انت شايف الداخلية سيد الناس.
- وهي دي عايزة كلام يا باشا؟
- ممم... تحب تبقى سيد الناس معانا؟!
- تلقاها عمدة، فانكمشت ملامح وجهه استغرابا قبل أن يكون سؤاله:
- عدم اللامؤاخذة يا باشا مش فاهم.
- انت هتشتغل معانا!
- مع مين يا باشا؟
- مع الداخلية... مع الحكومة!
- انا يا باشا!... واللى زى هيتشغل ايه مع الحكومة؟... بوكس؟
- هاتشتغل مخلصاتي!
- علامات غباء عميق تظهر على وجه عماد ألجمته الرد، فاستطرد محمود:

- هتربې معانا الشعب!
- بص يا باشا.. هو انا مش فاهم أي حاجة، بس اللي سعادتك شايفه يعني.. هو انا اطول اشتغل مع الحكومة؟!
- مش مهم تفهم... احنا عايزينك كده بغاوتك هتبقى أفيد كثير...
- انت يادوب هتفد أوامر!
- طب عدم اللامؤاخذه يعني يا باشا... الموضوع ده...
- من غير ماتكمل... مافيش فلوس. هو فيه حكومة بتدي فلوس يا مغفل؟
- يا باشا ماهو سعادتك عارف اللي فيها، لما عدم اللامؤاخذه مش هاقبض من الشغل ده ولا سايييننا نتعامل احنا ونقلب رزقنا بالطريقة...
- اللي زبي هاشتغل ايه؟ مفتي الديار وللا شيخ الازهر؟!
- ومين قالك ان دول أساسا مش شغالين معانا زيك بالظبط؟!
- شغالين معاكم! ازاي يا باشا دول ناس بتوع ربنا وقال الله وقال الرسول ايه اللي يشغلهم مع عالم زيكم؟
- ولا..... اظبط لاقطعلك لسانك!
- لامؤاخذه يا باشا مااقصدش حاجة والمصحف. أنا قصدي يعنى الناس دي ايه اللي هيشغلها مع الحكومة؟... مخلصاتية بردو؟
- بس مخلصاتية من النوع الحنين... النوع اللي يبجبه الشعب.

- ازاي؟

- دول اللي بيروزوا لنا الصورة اللي احنا بنرسمها عشان تتعلق على الحيطه الكبيره اللي في وش الشعب!

- طب يا باشا لما الشيوخ شغالين معاكم، ليه كل مابقى راكب اسم الله على مقامك ميكروباص ونقف في لجنة وللا حاجة ألاقية الأمين أول حد نزله وخده معاه اللي مربى دقنه؟

- مش كلهم شغالين معانا، الباقيين دول مكانهم معروف، سجون الداخلية مليانة دقون.

- أساسى... أساسى يا باشا... بس عليا الطلاق مانا فاهم أي حاجة!
- بص يا عمدة، أي حد ماشى في شوارع مصر من شرقها لغربها ومش مرمي في السجون بتاعتنا يبقى شغال معانا، يا إما زي حالاتك كده، يا إما زي مولانا.. يا إما بقى الفئة الثالثة اللي ماشية جنب الحيط لا بتهش ولا بتنش همها تاكل وتشرب وتنام بس ودول بقى... اللي بنروزلهم الصورة!

صمت عماد حيناً، وعلى وجهه نظرة بلاهة مبالغ فيها أعقبها بقوله:

- والله يا باشا انت كلامك يشرح القلب الحزين.

- شكلك مش فاهم ولا كلمة.

- ان جيت للحق يا باشا ولا أيتها حرف، الكذب خيبة.

- وهو ده المطلوب، ماحدش هنا مطلوب منه يفهم حاجة، احنا جهاز تنفيذ أوامر وبس!
- طب يا باشا ماتكلمناش بردو في حوار الأتعاب لامؤاخذه.
- ولا.. انا مابعيدش كلامي كثير، قلت مافيش فلوس يعني مافيش فلوس، خلاص خلصنا!
-
- بس فيه مقابل تاني!
- ايه يا باشا؟
- هنسيك تعمل اللي بتعمله براحتك... بس بشروطنا!
- اشرط جنابك كلي ودان عدم اللامؤاخذه صاغية!
- مافيش شوشرة... يعني لا قتل ولا سرقة حد كبير ولا بلاوي في الشارع... اشتغل في العتمة من تحت لتحت عالعالم اللي ماحدش هيسأل عليهم اتسرقوا وللا اتحرقوا!
- عُلم ويتنفذ سعادتك!
- طبعاً مش محتاج أقولك ان لو جنس مخلوق عرف بالكلام ده الدبان الأزرق مش هيعرفلك طريق.
- عيب يا باشا انت بتتكلم مع العمدة.
- قوم دلوقتي، واعمل حسابك اني هابعثلك كمان كام يوم كده

عشان نبدأ شغل.

- تمام يا باشا بس معلش ليا طلب أخير.

- خلصني!

- لامؤاخذه فيه مانع لو جبت معايا مساعد مخرج؟

- نعم يا روح أمك؟

- روق بس يا باشا.. انا قصدي الواد أشرف معايا على طول الخط

ويمكن تحتاجوه، ايده يا باشا تتلف في حرير عليه ضربة مطواة مايعدمهاش!

- مش ده الواد اللي اتقبض عليه معاك؟

- هو سعادتك!

- سيبه يترى يومين كده وبعدين ابقى اشوف قصته ايه.

- ربّيه يا باشا ربنا يديك الصحة.

قالها وقام من مقعده، رافعا يده إلى جانب رأسه مؤديا التحية

العسكرية قائلا وهو يتقهقر بظهره إلى الباب:

- بالإذن يا باشا!

(إذا سُخِّرَت حماية الشرطة في دولة ما للمفسدين فيها، فَمَنْ

لأهلها البؤساء غير الله... ثورة يثورونها؟!)

في فزع يحاول استكشاف ذلك القيد اللا مرئي، الذي ثبت ذراعيه على الحائط على امتدادهما. جال بنظره أسفله، عله يظفر بموضع ثاني القيود المتولي تثبيت قدميه بنفس الحائط، دون جدوى. بدا كما لو قام أحدهم برسمه على هذا الحائط بهذا الشكل الغريب، ثم نسي إضافة القيود التي تلائم تلك الوضعية إلى لوحته. استسلم للأمر الواقع في نهاية الأمر على كل حال، نظر أمامه، فإذا بالكثير من الغيوم السابحة في بحر من السواد، في عشوائية تبعث على الرعب أكثر من أي شيء آخر. بعض المشاهد بدأت في الظهور وسط الضباب، كأنها أجزاء متفرقة من أحد أفلام الرعب الغريبة، نسي مخرجها أو تناسى ترتيبها في وضع يروق لجمهوره المنتظر خلف الشاشات.

رجل صعيدي أشيب الشعر، يعتصر جانبه الأيمن الماء، وقد وضع من انتفاخ بطنه واصفرار عينيه أنه يعاني بشكل ما. شاب في منتصف عشريناته، يُعذَّب على يد أحدهم، وقد بدا من انغلاق عينيه وانفتاح فمه على اتساعه أنه يتألم على نحو مخيف. بعض قطع الحلوى التي باتت مرتعا للذباب.. فأر أبيض صغير تملكه الذعر وهو يفر مسرعا من قط مخيف أعور العين يوشك على افتراسه.. أم وابنتيهما تضمهما إليها في ذعر سبَّه أحدهم، الذي بدا كأنه واحد منهم.. وأخيرا... شاب ازدحم عنقه بالسلاسل، وكفه بالخواتم، عاري النصف الأعلى من جسده،

يقف في ركن بعيد من الشاشة الضبابية، عابثا بمطواة في يده، وعلى وجهه بدت ابتسامة لم يفهمها، غير أن شيئا غريبا ظهر واضحا في نظرتها القائلة (أنا بانتظارك!)

- بلدينا!!!!

- إيوه... إيوه... إيوه...؟ حُصِّل ايه؟!

- بسم الله الرحمن الرحيم، مالك يا عم اتخضيت كده ليه
ماحصلش حاجة.

نصف دقيقة وبعض الثواني إلى جوارها، كان وقتا كافيا لرحلة
طلال من النوم إلى اليقظة. نظر بعين نصف مفتوحة إلى محادثه بعض
الوقت قبل أن يستوعب أنه الآن خارج حدود الحلم في أرض جديدة
انتشله لها هذا المحادث المستطرد كلامه:

- لामؤاخذة يا بلدينا انا بس حبيت اقولك انا قربنا على استراحة
وهننزل من العربية جهز نفسك بقى.

- تشكر يا زوج!

- الأخ منين صحيح؟

- طلال من سوهاج!

- يا مرحب برجالة الصعيد، أخوك عبده من بورسعيد.

- مرحبا بك.

- انت لا مؤاخذه جاي تشتغل ايه بقى؟

- أي حاجة!

- أي حاجة ازاي؟... انت شغلتك اصلا ايه؟... انت مش صنايعي؟

- لا يا عمنا انى فلاح جاي اشتغل أي حاجة... اشيل حاجة...

انا اول حاجة... كده يعني!

- آآه... وماله؟... اهو كله طلوع على باب الله برده.

ينظر عبر حاجز صندوق السيارة الذي يحويهم كبضائع منتهية
الصلاحية تساق لمستهلكين لا يهتمون للجودة قدر اهتمامهم بشيء
يسد فراغ احتياجاتهم ولو وقف الموت خلف هذا الشيء ينتظر
مرورهم إليه من خلاله.

- وصلنا أهو!

قالها عبده مشيرا بكفه المزدحم بالخواتم إلى تلك (الاستراحة)
المزعومة.. بعض المقاعد والطاولات الموضوعة بشكل يخفي بعض
الشيء كل قصور في هيئتها العامة، احتواها بناء هش تراوده فكرة
الانتحار بشكل كبير، غير أنه بحاجة لانتظار أي ظاهرة كونية في عباءة
زلزال أو رياح تعينه على فكرته.. رجل في أواسط الثلاثين يستقبل
النازلين من (هيكل) السيارة، بجلبابه البني وعمامته البيضاء وضحكة
صادقة بين الاثنين تلمع فيها أسنانه البيضاء قائلا:

- يا مرحب يا مرحب بالرجالة، اتفضلوا، اتفضلوا يا رجالة!
قالها وانشغل في إبراز المقاعد للجلوس، مستمعا طلباتهم مبلغا
إياها لآخر واقف في ركن المكان. دقائق لم تتعدَّ الخمس، كانت كافية
ليجد كل منهم مكانا له وسط (أشلاء) المقاعد:
- الرجالة تشرب ايه؟
خاطب بها طلال وعبد...
- اني هاخذ كوباية شاي تجيل حبر متشوفش المعلجة جواه،
عايزه شاي يتحش بالمنجل!
- يا ساتر يارب، ايه يا عم طلال مالك يا جدع الطيب أحسن،
ماكانتش كوباية شاي اللي هتعمل فينا كده عالصبح!
- أني اصلي دماغي تجيلة جوي عايزة ظبطة زين.
- هو انت كده بتظبطها داننا بتنتحر... هاتله يا عم الوجبة اللي قالها
دي وهاتلي انا شاي بحليب وحجر أص!
قالها عبده مداعبا، قبل أن يعود لطلال من جديد قائلا:
- بس انت باين عليك لسه صغير يا طلال على موضوع السفر
والغربة ده.
- نعملوا ايه بجى في الظروف يا عمنا!، جدرنا وراضيين بيه
الحمد لله.

- ليك اخوات؟!
- أته الكلمة، فمر بذهنه شبح أحدهم يقبع هناك على مقهى العش،
منشغلا بلعب القمار، إلا أنه تدارك نفسه سريعا بقوله المقتضب:
- إيوة!
- أكبر منك وللا اصغر؟
- الاتنين!
- المشاريب وصلت يا رجالة!
- قطع بها رجل الاستراحة الحديث بشكل ارتاح له طلال نوعا، قبل
أن ينشغل وعبدته في ضبط أنفاس الشيشة، تاركين إياه يعبث بكوب
الشاي (التجيل) متأملا بنظرة خاوية دخانه المتصاعد، خافيا وراءه
شريط سينمائي يلمع ويختفي بعمر الثواني، حاملة في إطاراتها صور
أشخاص وأماكن مضت و... قادمة!

- سمعتوا آخر خبر؟
- خير؟
- يقولك وزير الصحة سَفَر المدام مراته تعمل عملية في عينيها بره
على نفقة الدولة، قامت الهانم عملت ايه بقى... صرفت ٣ مليون جنيه!
- ليـــــــــــــــــه؟، بتستصلح أرض في عينيها!

قالها شاهين مصدوماً قبل أن يستطرد:

- هي الناس دي ايه؟... مافيش بني آدمين جواها؟

- بني آدمين جواها؟... بس يابني ماتكلمش عشان كل مابتكلم

باحس اني لازم اقطع علاقتي بيك!

قالها ناصر ساخرا، قبل أن يشتبك مع شاهين في مشاجرة كلامية،

في حين انتبه الآخرون لحسام القائل:

- هو مش وزير الصحة ده عنده مستشفى خاص من أكبر

مستشفيات البلد.

- الناس دي ماشية بمبدأ ليه ماتسرقش مادام قدامك فرصة تسرق!

- على رأيك!

- سيبكم من كل ده سمعتو بقى آخر خبر بجد؟

- خير... ايه كمان؟!

- مدووا العمل بقانون الطوارئ ستين!

شافعي كان القائل، والجميع من رواد الحجرة غريبة الأطوار كانوا

المستمعين.

- شيء متوقع قبل انتخابات البرلمان الجاية.

قالها شاهين، يأتيه رد كيمو على مسافة قريبة:

- ليه يا خبير؟

- لسه بتسأل ليه بعد كل اللي بيحصل؟... عشان يخوفونا ويخوفوا الناس من أي مشاركة، تسويد زي كل مرة، بس المرادي خصوصاً عايزينها باكتساح لنواب الحزب الوطني، يا راجل داحنا مش ناقص غير اننا نلاقي ميتين ليهم أصوات في الصناديق.

- واشمعنى المرادي خصوصاً؟!

- عشان المرادي هي اللي هتفتح الباب لجمال يمस्क مكان ابوه في الانتخابات الرئاسية العجاية، نسيخوا المادة ٧٦ وللايه؟
- أقسم بالله انا ما فاهم أي حاجة.

قالها ناصر بنبرة أثارت ضحك الجميع حيناً، قبل ان يستمر شاهين في حديثه قائلاً:

- المادة ٧٦ بتقول ان عشان حد ينزل انتخابات رئاسة لازم يحصل على ٢٥٠ صوت من نواب مجلس الشعب ومجلس الشورى والمجالس المحلية، وطبعاً ده مش هيبقى متاح لأي حد غير مرشح الحزب الوطني صاحب الأغلبية الكاسحة في المجلسين والمجالس المحلية، اللي هو ولي العهد اللذيذ جيمى بيه!

- سمعتهم فين يلا يا شاهين الكلمتين دول؟

- في هذه ليلتي يا خفيف.

عمت بعض الضحكات أرجاء المكان إثر المناوشات الكوميديّة بين

الأصدقاء، قبل أن يعود شافعي بدفة الحديث إلى الجدية من جديد قائلاً:
- كلام مقنع بصراحة ولو اني حاسس ان أصلاً الحزب الوطني
مش محتاج يعمل كل الليلة دي بعد خطة ابليس اللي عملوها في
انتخابات ٢٠٠٥!

- خطة ايه؟

- الحزب الوطني سمح ببعض الحرية في انتخابات ٢٠٠٥ بمزاجه
طبعاً، حرية مصطنعة هو حاسب نسبتها بالظبط في الخلطة قدايه، وطبعاً
ده كان نتيجته ظهور كبير للإخوان في البرلمان بصفتهم أقوى معارضة
منظمة موجودة في الشارع، بالإضافة طبعاً لمعارضين من أحزاب
تانية ومستقلين، لكن بص كده بقى على اللي حصل من ٢٠٠٥ لحد
دلوقتي.. الحكومة ماو فرتش إمكانية لأي نائب من المعارضة سواء
إخوان أو غيره انه يقدم أي خدمات أو مصالح المواطن يقدر يلمسها،
مع العلم انها وفرت ده بشدة لنواب الحزب الوطني، وطبعاً المواطن
الغلبان مع الوقت حس ان اللي بيخدمه صح وقلبه على مصلحته صح
نواب الوطني مش حد تاني، وسنة سنة المواطن فقد الثقة في الكل
ماعدا ابن الدائرة رمز الهلال والجمال!

- عايز تقول ان الحزب الوطني مرتب كل القصة دي لجمال من ٢٠٠٥؟
- ومن قبل كده بكتير... وبكتير قوي كمان. مبارك؛ أو بمعنى

أصبح الست هانم مراته اللي افتكرت نفسها شجرة الدر، سخروا كل إمكانيات الدولة من قضاء وإعلام وشرطة للهدف ده، و كل الظروف مساعداهم.. غياب ضمير الإعلام، فساد القضاء والشرطة، وغباء وضعف المعارضة، والأهم من كل ده التغييب الكامل للشعب اللي بيتوهوه في دوامة أكل العيش اللي خلت كل واحد يشتغل شغلانيتين عشان يكفي بيته وبالتالي مايلاقيش وقت يفكر في أي حاجة تانية من ناحية، ودوامة التسطيح الفكري والثقافي اللي خلت قمة المتعة والفرحة عندهم ان عمرو زكي يجيب جول في الجزائر من ناحية تانية!

- طيب مادام بقى النظام وَّصل الشعب للدرجة دي من التفاهة والتسطيح ايه يخليه يلف كل اللفة دي ويخطط كل التخطيط ده عشان يوصل جمال للرئاسة؟ ماهو ممكن يعملها بمنتهى البساطة زي ماعملها قبل كده في كل انتخاباته وكانت هتعتدي زي غيرها بدون أي مقاومة يادوب شوية معارضة هيعلا صوتهم هيتروا في المعتقلات وانتهينا.

- الموضوع مش بالبساطة دي، موضوع الرئاسة ده بالذات له أبعاد تانية، لاحظ انك بتعامل مع مجتمع دولي فيه قوى عظمى كتير يهمها تبقى متطمنة على مصالحها مع الرئيس الجاي، عايزة تشوفه جاي من غير مايكون فيه اعتراضات كبيرة عليه من جوه البلد تعمل قلق يهدد مصالحها وفلوسها اللي المفروض هو بيعميها، على الأقل في بداية

فترة توليه لغاية ما يبدأ يفرض سيطرته ويمسك أدوات البلد كلها في ايده ويحققلهم هم الاستقرار... على حسابنا!

- ده احنا سعرنا رخيص قوي... رأينا سد خاة... دُول وحكومات تانية هي اللي بتحدد مصيرنا واحنا قاعدين نتفرج عالمرحبة مستنيينهم يعطفوا علينا بقرارهم!

- ياريتنا حتى بنتفرج، دول كتر خيرهم بيفرجوننا على آخر مشهد بس بالعافية!

- بقولك ايه يا كيمو سمعنا حاجة كده الله يكرمك نغير جو الاكتئاب ده شوية!

قالها شاهين، منتشلا الجميع من حالة الإحباط التي حوتهم عقب كلمات شافعي، فما كان من الجميع الا أن تداخلت أصواتهم بكلمات عدة تدور كلها في فلك تأييد الفكرة، يلودون بأوتار العود وأحبال صديقهم الصوتية من تلك الدائرة السياسية المغلقة، التي يتوهون فيها كباقي شعبهم، منذ وعت عيونهم الحياة وما فيها ومن فيها.

التقط عوده في هدوء معتاد، أجلسه على قدميه كطفل صغير لا يستكين إلا في حضن أمه، مال برأسه المثلث بشعر أضاف إلى رأسه ضعف حجمها على الأقل، أغمض عينيه المختبئتين خلف نظارته السوداء الضخمة، عازلا نفسه عن كل ما يصله بإزعاج العالم على الجانب الآخر

من زجاج النظارة، بادئاً في مداعبة طفله الخشبي بعصاه الصغيرة:

— شمس

بدأ بها، فتجاوب معه الحضور بتصفيقهم المنتظم مرددين خلفه:

— ثم اياه؟! !

- ثم عااااش

- ثم ضايقوه فى المعال الش

- ثم تاه يومها ومجاااااش

- ثم لقيوه في القرى ألفة

- آه يا عينى فى القرااااااافه

- تن تررن ترارارارالان

— ۴۴ —

- ثم إياه؟!!

— ثم تالاه

- ثم كارهااه الحيااااة

- ثم موصلش بطريقه لمنتهاااااه

- ثم حكمنا الهياااااا

- آآه وحكمتنا الهيااااااافه

- تن تررن ترارارارالان

- ثم كالأان
- ثم ذات مرة زماالأان
- انه لما جالنا ضيف
- ماديناش حق الضياالأافة
- آاه وكرهتنا الضياالأافة
- تن تررن ترارارارالأان
- ثم شاف غربة في بلاالأاه
- ثم حرموه من ولاالأاه
- ثم شككنا في جهالأاه
- ثم زودنا المساالأافة
- آاه وطالت المساالأافة
- تن تررن ترارارارالأان
- ثم ماالأات
- ثم دفنوه من سكاالأات
- ثم طلعوا عالشاشاالأات
- يعجنوا بدماه الصرالأافة
- آاه يا خسارة الصرالأافة
- تن تررن ترارارارالأان

- ثم لما كان معنا حبنناااااه

- ثم لما جينا نرحل عدينا اااا

- ثم كان البخل حتى بكلمة حلوة مالشفااااااه

- ثم عن دمه حكينا زبي تجار الثقااااااااااااااا

- آه يا حسرة عالثقاااافه!

- تن تررن ترارارارارار

- مكانك!

سمعها وسط الظلام آتية من فم التهمته العتمة تماما.. أوقفه الخوف السارية قوافله من أذنيه عبر عينيه المفتوحتين عن آخرهما، إلى كل كيانه الذي أحكمت الرعشة قبضتها على أطرافه، ثبتت أقدامه مكانها كأنها المشدودة إلى جذع يضرب في الأرض لأميال، في حين تولت عيناه مسئولية الحركة إلى اليمين، حيث لمع من حفنة الظلام شبح تسبقه لمعة نارية، هي في الغالب لسيجارة تستعد للفظ الرمق الأخير.

- فلوسك وساعتك وموبايلك وحالك ومحتالك وحاجتك ومحتاجتك واللي معاك واللي مش معاك يبقوا قدامي في نص دقيقة بدل ما اقدم روحك على طبق فضة لدود الأرض اللي انت واقف عليها. قالها وأتبعها بمطواة يلمع بريقها أمام عيني الشاب الذي خاطبه،

مما أضاف على المشهد الكثير من دراما لم يكن الشاب في حاجة لها ليقنع أن في الأمر مشكلة ما. قال في تلثم سمح للقليل جدا من كلماته بالخروج متعثرة في حروفها:

- والله...والله ما معايا غير فلوس أروح بيها...و...و مفيش موبایل معايا!

- تَوْتَوْتُ، كده احتمال كبير أزعل منك وده مش حلو عشان مستقبلك الدراسي والوظيفي.

قالها (عمدة) في لهجة عربية ركيكة كعاداته، زادت من توتر ضحيته الذي قال:

- والله...والله ما بكذب عليك... حتى بص!

قالها وأخرج من جيبه بعض النقود التي لا تتعدى خمسة جنيهات في تعدادها، مما دفع (عمدة) لإمساكه من (ياقة) قميصه بقوة كادت تمزقه، مقربا إياه من وجهه رافعا مطوأة إلى طرف القميص يمزقه قائلا:

- طب كده بقى انا مضطر آخذ إجراءتي، تصحبك السلامة!

جملة أعقبها بعدد لا بأس به من اللكمات، التي صاحبها مطوأة تستدعي تأوهات الشاب إلى الخروج، حتى تملك الملل عمدة، فتركه غارقا في جروحه وتأوهات، منصرفا إلى ضحية أخرى تكمل فصلا آخر من مسرحيته الليلية الهزلية تلك... لم ينس بطبيعة الحال مصادرة

الجنیهات الخمس!

رغم أن العزلة باتت البرواز الأضخم في حائط حياته، إلا أن عزلته بين تلك الجدران كانت ذات طابع مختلف بعض الشيء، عزلة مقيّنة بلونه الرمادي المفضل، ربما لأنه مجبر عليها. بنو آدم لا يسخطون على الأمور التي من صنعهم مهما كانت نتائجها، على كل حال. حجرة ذات سرير حديدي أبيض، استقبل عبر سنوات الكثير من أجساد أسرها المرض خلف قضبانها، يجاوره عمود رفيع يحمل في نهايته محلولا طبيا يصل شرايينه بالحياة، شرفة ضيقة ذات ستار بنفس الدرجة من اللون الأبيض المسيطر على أركان المكان بشكل يبعث على الاكتئاب أكثر منه على الأمل، تلفاز صغير ذو إطار أسود يجعل حضوره مميزا بعض الشيء وقد ارتكز على قاعدة هوائية من المفترض أن يربطه بذلك المفترش سريره ريموت صغير لا يذكر أنه التقطه أو حتى أحس بوجوده حتى الآن، رغم مرور أكثر من أسبوعين عليه خلف هذا الباب الذي يحمل في الخارج لافتة يسكنها الرقم (٤)!

الجلسيس الوحيد الذي ارتاح لوجوده كان قلما وبعض الأوراق، رغم الكثير من الكشط الذي استعمر أغلب مساحات أوراقه، إلا أن لمسة من الارتياح احتضنته لوجود مستمع يتلقى إزعاج أفكاره، حتى

من جديد علت الضحكات، التي قطعها قول شافعي لإبراهيم:
 - ألف سلامة عليك يا إبراهيم، كده برده نعرف انك تعبان بالصدفة؟
 - الله يسلمك يا شافعي، معلش بقى الحمد لله، تعبتو نفسكو بس!
 - ماتقولش كده يا عم إبراهيم هو احنا عندنا اعز منك، وبعدين أهى
 فرصة ناصر يخس شوية بدل ماهو خلاص داخل على النص طن كده!
 من جديد عاد شاهين لمداعباته التي بادلها ناصر بمثلها وسط
 قهقهات الجميع:

- أخباركم وأخبار الكلية ايه يا شباب واحشني والله!
 - كله تمام والله زي الفل مش ناقصها غيرك بس، يلا شد حيلك
 انت كده بس وارجعلنا بالسلامة.
 - الله يسلمك يا معتز ربنا يخليك.
 - الدكتور قالك ايه؟
 - قال ان فيه خُراج على الكلى اليمين وهاعمل عملية ان شاء الله
 يوم الأربعاء الجاي!
 - ان شاء الله تقوملنا بألف سلامة، وماتقلقش من ناحية المذاكرة
 والامتحانات والكلام ده احنا ان شاء الله هنجمعلك كل اللي فايترك
 ونذاكره ولك كمان لو حبيت!
 - ربنا يكرمكو يا رجاله والله مش عارف اقولكم ايه!

- ولا تقول حاجة... تقول يلا اتفضلوا بقى من غير مطرود عشان اعرف أرتاح.

- يا خبر أنا اقدر بردو؟ دانتوا منوريني والله!

- يا عم إبراهيم منورين ايه بس بالمنظر اللي انت شايفه على يمينك ده؟، ده لو شافوه وهو داخل معانا من باب المستشفى كان زماننا كلنا في القسم بتهمة إتلاف ممتلكات عامة... اتكل على الله واطرده يا راجل بلاش كلام فارغ

قالها شاهين مشيرا إلى ناصر من جديد، متبعا إياها بضحكة تاهت وسط ضحكات الحضور بما فيهم ناصر، الذي بادلته قفشاته بمثلها، لحين أنهى شافعي الأمر برمته قائلا:

- يلا يا رجاله عشان نسيب إبراهيم يرتاح بقى.

- والله انتو منوريني رايعين فين؟

- يادوب كده بقى وان شاء الله كل يوم حد منا هيعدي عليك يشوفك لو محتاج أي حاجة ويحيلك كل الورق اللي فایتك.

- أنا فعلا مش عارف اشكركم ازاى!

- ادعيننا بس دعوة المريض ربنا بيبحبها.

- ربنا يوفقكم يارب ان شاء الله لكل خير!

انصرف بعدها الجميع مودعين صديقهم المريض، الذي ظل

متابعا إياهم بنظره حتى خروج آخرهم من الباب الخشبي الأبيض،
وفى ذهنه تتصارع الكثير من الأسئلة حول هؤلاء المغادرين للتو!

حتى الشمس لم تكن في حالة مزاجية تسمح بسير الأمور
الجوية على ما يرام في ظهيرة ذلك اليوم. بصقت حرارتها على تلك
القطع البشرية المتكومة في أنحاء الصندوق الخلفي الصديء للسيارة
(التويوتا) الزرقاء المتسكعة على الطريق الأسفلتي، المعاقب لها على
تسكعها ذاك بإلهاب إطاراتها بقدر من الحرارة لا بأس به. افترشوا
سطح الصندوق كجثث بلا قبور تنتظر عطف أحد (الحنوتية) بتكفينها
ومواراتها التراب. لم يظهر الحانوتي العطوف، ولم تظهر أكفانه، في
حين اكتفى التراب بالانتشار على جانبي الطريق الذي بدا لمسافريه بلا
نهاية. استمر رقادهم ما يقارب الساعتين، حتى بدأت لسعات الشمس
تومض بشدة فوق وجوههم السمراء كلسعات طير أبابيل. بدأت
أجفانهم تكشف سترها عن عيونهم الناعسة شيئا فشيئا، نظروا إليها
بنصف عين، لاثمين إياها على إفساد حفل أحلامهم، الذي لم يتعدَّ
كونه بعض ومضات تبثها بواطن عقولهم من حين لآخر على مسارح
نومهم المهجورة منذ حين.

(ورشة خراطة)... كان هذا حلم الاسطى محمود، الذي برر به

لزوجته سفره هذا عبر الحدود، لتتوقف ولو لحين عن بكائها يوم شد رحاله إلى ذلك الصندوق، عقب طرده من مصنعه بعد خصخصته، حيث لم تشفع له مدة خدمة تزيد عن العشرين عاما، (جرشين أجهز بيهم البت سمية بنت ابني، يتيمة ومالهاش حد غيري وفلوس الدكانة مابجتش جاية همها)...

أما هذا فكان حلم عم عوض البقال الصعيدي الذي تخطى الستين عاما، خاض الرحلة لأجل حفيدته يتيمة الأبوين، ربما لا يعلم هذا العجوز أن أمثاله بل ومن يصغرونه بأعوام في (دويلات) أخرى يجلسون على عروش الراحة منذ سنوات، ولو علم... ماذا عساه يفعل؟! (بجرة بدل اللي غرجت في الترعة عام نُول)... حلم عبد الباقي وأسرته، ذات الزوجة والطفلين، بعد رحيل بقرتهم التي سخرها الله لتكون مصدر رزقهم الوحيد. أما عن ماجد خريج الهندسة، الذي رُفض تعيينه في الجامعة دون أسباب (فى الواقع كان هناك سبب ما احتفظت به إدارة الجامعة لنفسها، بعد استبداله بأحد أبناء الأساتذة) فكان حديثه الدائم لنفسه وهو المنعزل عن حديث الآخرين (مصر قالتلي لأ، كان لازم أشوف حد تاني يقوللي أيوه).

اللعة على هذا الصندوق وحدوده!

أي قسوة تلك التي يملكها ليسجن كل تلك الأحلام في مساحة

كتلك؟ أي قسوة يملكها لئُنْكَل بالحالمين وأحلامهم بهذه الصورة؟
أي قسوة يملكها ليجعل من بدائيات الحياة... أحلاما تزور أصحابها
كل ليلة في مسارح المنام؟!

بكثير من التكاسل أخذوا في الاستفاقة شيئاً فشيئاً. البعض يفرك
عينيه أملاً في عودتها من رحلة الأحلام لموطن الواقع من جديد...
بعضٌ آخر يشد ذراعيه على اتساع محيطيهما، طاردا القليل الباقي من
فلول النعاس في جسده. معركة طرد النوم من صندوق السيارة دقت
طبولها بشدة، أرغمت الجميع على النهوض استعدادا للنزول للراحة
بعض الشيء، في منطقة ظليلة نوعا ما على جانب الطريق، ترعاها
بعض الأشجار التي يبدو عليها أنها تعثرت في هذا المكان يوما ما
خلال رحلة تشبه رحلتهم، فتوقفت هاهنا مكتفية ببكاء أطلال أحلامها.
- عم عبد الباجي... جوم نريحو شوية في الضل بدل الشمس دي!
قالها طلال منبها جاره في سكن الصندوق، غير أنه لم يتلقَ ردا
على كلماته، فكررها مُزيّدا من قوة دفعته له. الصمت المطبق ظل الرد
الوحيد رغم كل المحاولات!

- عبده... عبده... الحج يا عبده، عم عبد الباجي شكله اغمى عليه.
سمعتها ذلك البورسعيدي الذي كان يستعد لمغادرة السيارة إلى
الظل مثل الجميع، فعاد من جديد متوجها إلى طلال، ممسكا بذلك

الفاقد للوعي متحسسا جبهته:

- يا خبر اسود ده سخن زي النار.

قبل أن يستقر بسمعه على صدره مستمعا لدقات ولو ضعيفة
مازالت تستغيث بأسباب الحياة، لم يفلح في سماع شيء، فنهض
مستغيثا بالجميع خارج الصندوق ممن غادروه للتو صارخا:

- شوية مية يا جدعان، شوية مية بسرعة الجدد يموت.

سمعها الجميع، فهرولوا من جديد صاعدين إلى حيث يرقد عبد
الباقى على صدر طلال، الذي التقط الماء من أقربهم إليه واضعا بعضه
في جوف ذلك الغائب عن الوعي، وماسحا ببعض آخر وجهه وجبهته،
الذين زادت حرارتهما بشكل ملحوظ. دقائق اضافية لم تحمل سوى
المزيد من الانتظار للا شيء، أنهاها ذلك الطالب الهندسي باقترابه من
عبد الباقي متلمسا جبهته لثوان ثم مستمعا لدقات قلبه، وأخيرا واضعا
إصبعه تحت منخاره يتحسس أنفاسه، قبل أن يقوم متثاقلا على قدميه،
تعلق به أنظار الجميع مطأطأ الرأس قائلا:

- البقاء لله!

كان هذا في واقع الأمر... أول شيء ينطقه منذ بداية الرحلة!
من جديد عاد الصمت يفرض سيطرته بقوة على المكان وساكنيه،
وكانها الجملة المنطوقة بموجة صوتية لم تُخلق لأذان الآدميين. اكتفوا

بالنظر إليه وإلى الجثة بجواره دون تعليق خارج قاموس النظرات..
الموت بكامل حلتة الحربية جلس على عرش المكان، متحديا الجميع
وعلى فكيه ترسم ابتسامة نصر، لم يفهم أي من الحضور مغزاها
والخصم كان بهذا القدر من الضعف، الذي لا تلائمه تماما ابتسامات
المنتصرين عليه!

- هنفضل واقفين نتفرج عالجذع كده يا جدعان؟!

- هنعمل ايه يعني؟!

- ندفنه طبعا... إكرام الميت دفته!

كأنها الجملة التي نهتهم لشيء غاب عن أذهانهم، بعدما أوقفت
تلك اللحظات الجنائزية تفكيرهم حيناً من الدهر. سارعوا إليه ينزلون
جثمانه من السيارة إلى ظل قريب..

- عايز واحد معايا نغسله والباقيين يحفروا حفرة تحت الشجرة

الثانية اللي هناك دي عشان ندفنه فيها، بس عايزين حاجة نكفنه فيها!

- آني... اني معايا ملاية بيضا نظيفة!

قالها طلال سريعا، يأتيه الرد من عبده، المتولي تغسيله:

- حلو روح هاتها بسرعة.

ساعة فقط كانت كافية لإنهاء كل شيء. مهابة الموت فرضت

السكون لغة رسمية للمكان.. رؤوس الجميع في معركة شرسة مع

أفكار الرحيل.. باتوا ينتظرون المزيد من الحفر تحت ظل شجرة ما، والمزيد من الملاءات في حاجيات أحدهم تلف الجسد الراحل إلى الدار الآخرة. انتهى كل شيء سريعا، غسَّلوه، كفَّنوه، صلوا عليه صلاة الجنازة، دفنوه... ثم انصرفوا من جديد إلى ضيق الصندوق الحديدي الصدئ، يصارعون المزيد من الأحلام!

كان آخر ما توقعه أن تقترض هذه الرحلة من سنوات شيخوخته بعض سنوات، تضيفها لسنوات شبابه الذي لم يبدأ بعد!

أحلام تدهسها عجلات السيارة (التويوتا) الزرقاء على طريق أسفلتي، يبدو من قسوة حرارته أنه معتاد على استقبال الكثير من نعوش تلك الأحلام فيما مضى من السنوات. كهل يجاهد لتجهيز حفيدته اليتيمة للزواج، وقد أجهده مما طلة حلمه له عبر سنوات، حتى بدا في نهاية الأمر أن هذا الحلم القاسي لن يرضى بسعرٍ للصفقة أقل من حياته (حتى هذا الثمن ربما لا يرضيه!).. شاب عشريني تاه منه حلمه في سراديب الجامعة وأنفاق الجهات الحكومية، فقطع آلاف الأميال بحثا عن أرض جديدة، لينتهي به الأمر جالسا في ركن صندوق صدئ شارد على الدوام، يحدث شخصا ما مجهول الهوية بعينه اللتين لا تغمضان إلا قليلا.. جثة رجل أربعيني لازالت محتفظة بملاءته - وستظل إلى الأبد- دُفن إلى جوار حلمه على قارعة الطريق، لاحقا ببقرة هزيلة ابتلعتهما إحدى ترع الصعيد

ذات يوم، وقد ترك خلفه زوجة وابنين ينتظرون.
وكان مآسي الحياة كلها قد تجمعت في حدود هذا الصندوق
اللعين؛ لم يعد ينقصه إلا بعض القبور تجتمع في جانب منه، تعطي
سكانه البؤساء هؤلاء ولو أمل بسيط في... راحة الموت!
لم يكن بالتأكيد على قدر من الاستعداد يسمح له بهذا القرض
الثقيل. لم يعد مستطيعا للسداد ولن يكون، يبدو أن دين شيخوخته
سيظل ضيفا ثقيلا على شبابه لزمن لا بأس به. بات لسنوات سبعيناته
الكلمة العليا الآن، رغم غياب مظاهرها من شيب الشعر وانحناء الظهر
والاستعانة بقدم ثالثة من خشب يسمونها عكاز، غير أن حضورها
القوي بلون الضباب قد فرض نفسه، رغم أنف كل الآمال!

- غلبان قوي طلال!

قلتها عقب أول رشفة من كوب الشاي الذي أعدته لي - وله مثله
في فترة راحة قصيرة من مباريات الشطرنج، معروفة النتائج بطبيعة
الحال. جلسة بعيدة بعض الشيء عن ضغوط حرب الرقعة، التي رفع
فيها أسود الجيشين رايته عن جدارة، معلنا استمرار فترة حكمه التي
يبدو أنها ستطول. بهدوء، دون أن ينظر إلي كما هي عادته منذ أول
دقائق لقائنا، تناول الرشفة الأولى ثم أتبعها بقوله:

- قصدك كان!

- كان! ... تقصد ايه؟ ... ماتقولش انه مات!

تلقى لهفتي ببرود مصحوب بابتسامة تلذذ بمتاعبي - كما هي

عادته سائلا:

- هي النهاية في مفهومك بتبقى موت بس؟!

- مااااااات؟!!

- هتفرق معاك؟

- ممكن تبطل ترد السؤال بسؤال؟

- لأ!

- طيب!

بغيط قلتها، أحاول يائسا استفزازه بعض الشيء... لا جديد على كل حال في رد فعله، كأن شيئا لم يكن. بات الأمر أشبه بذبابة تحاول جذب الانتباه إلى جواره، فقتلها برشاش لامبالاته، عائدا لحالة جموده. من جديد عاد لكوب الشاي، تتابعه عيناى الأملتان في عودته لقص شريط الحديث من جديد. هممت بدوري بالعودة مجددا للحديث، غير أن شيئا ما يسمونه الغرور منع الكلمات من عبور آخر محطاتها بين الشفتين للخروج.

- اتكلم!

قالها يشعل إحدى سجائره، دون أن ينعم علي بنظره.. كالعادة
فأجبتة فرحا بتطوعه لاستئناف الحوار:

- اتكلم اقول ايه؟... ماهو طول ما انت بتكلمني بالألغاز كده
مش هنعرف نوصل لحاجة.

- وكل لبيب بالإشارة يفهم!

- وهي فين أصلا الإشارة دي؟... انت كل ردودك غامضة ماتديش

مدلول لأي حاجة!

- ده اللي عندي... هتسمع؟!

- مستفز!

- شكرا!

- برده ماوصلناش لحل... تقصد ايه بـ“كان“ دي؟

- ماتسبقش الأحداث... انا مش باحكيك حدودة!

قالها بنبرة زادت حداثتها بطريقة مفاجئة بعض الشيء، فلذت
بالصمت مهابة، قبل أن يستطرد قائلا:

- رعونتكم وتفكيركم الطفولي ده هم اللي ضيعونا!

- ضيع مين وامتي؟

- يوم العرصة... اليوم اللي ضيع اللي عمركم محاسيتو ولا

هتحسوا بيهم!

لأول مرة أشعر في صوته بتلك النبرة من الانكسار!.. أكاد أجزم أن دمعة كبيرة بحجم سنوات من العذاب قد تحجرت في عينيه الناظرتين للأسفل، حجبتهما عن ناظري عدستا نظارته السوداء. لوهلة شعرت برجفة تملكنتني بشكل مخيف، رجفة الرائي لقوي في وضع ضعف.. لشديد في هيئة انكسار.. شعور غريب جمع المفاجأة والشفقة والفضول. اقتربت منه خطوتين فقط، لم تسعفني شجاعتي للاقتراب أكثر على كل حال. قلت وما زال على لساني أثر صدمتي واضحا كقيظ ظهيرة:

- أنا... أنا آسف لو كلامي ضايقتك... أنا... أنا كان قصدي... أوقفت كلماتي يده المشيرة إلي بالصمت، دون أن يرتفع رأسه بمقدار أنملة. دون إرادة حقيقية، توقفت عن فعل أي شيء.. انتابني الشك للحظة أن انتظام تنفسي وتتابع نبضاتي كادا يخضعان لإشارته بالصمت خضوع لساني وقدمي، تمثال يمثّل لأمر تمثال... هكذا كانت حالتنا لدقائق، قبل أن تقرر بعض الشجاعة مؤازرتي من جديد، فقلت بصوت أجهد تراجعته وأجهد:

- أنا... ممكن استأذن لو حابب تبقى لوحديك أو شايف ان وجودي عبء عليك... أنا آسف مرة ثانية لو ضايقتك... فعلا ما قصدش أكيد! لم يرد... بدا كصورة أبدعتها ريشة فنان، تركها مكتفيا

بلوني السواد والبياض، مقررا عدم كسوتها ألوانها، لسبب ما احتفظ به لنفسه... أظن السبب على الأرجح راجع لسادية ظهرت أنيابها جلية في بطل لوحته المسكين.

مجددا عدت للحديث، أملا في إجابة لن تظهر للنور في غالب الأمر:
- احنا ممكن نلغي الموضوع كله من الأساس، كل اللي كتبته وراك لسه ماخرجش من هنا.. كل الورق قدامك أهو اتصرف فيه زي مانتا عايز!

مرة أخرى غاب الرد!
- واضح اني ضايقتك أكثر من اللازم.. على العموم أنا كنت سعيد جدا بالفترة اللي قضيتها معاك، أتمنى تكون أحسن في حياتك الجاية ان شاء الله.. سلام!

قلتها، وهممت بالمغادرة خاطيا نحو الباب آخر خطواتي بصحبته.. فتحت الباب، ثم عدت اليه بنظري، ملقيا النظرة الأخيرة على أركان المكان... طاولة خشبية تعلوها معركة انتهت للتو فوق رقعة ذات لونين، وإلى جوارها كوبان من الشاي مازال بهما أثر المشروب الساخن، إضافة لبعض الأوراق الشاهدة على سابق الجلوسات. لن أنكر تلك الرغبة العارمة في البكاء التي تملكنتني ساعتها.. شعورٌ مخزٍ بالفشل، إحساسٌ مذلٌ بخيبة الأمل.. كم تمنيت لو ساعدت هذا الرجل بحق.

كنت دائما أرى ضعفا يلمع في جوفه، رغم محاولاته الجاهدة لإظهار قوة لم يعد يملك الكثير منها، ألمح على الدوام اهتماما منه بكل كلمة أخطأها، رغم إتقانه إظهار لامبالاته بأي شيء. أعلم أنه مر بالكثير... لهذا كنت هنا طوال هذا الوقت، هكذا في لحظة تبخر كل شيء، وتجمع في دمة ما زال متسترا عليها في مخبأها خلف نظارته. علي أن أتحدى بشجاعة الاعتراف بعدم تقدير الأمور على نحو جيد على كل حال. ربما لم أنجح تماما في احتوائه واحتواء قصته وقصة من رافقوه رحلته على نحو يروق له. هي النهاية إذن على الرغم من كل شيء؛ لم تعد تربطنا بعد اللحظة أكثر من ذكريات لبعض مباريات الشطرنج، مصحوبة ببعض الأوراق التي سأغادر دون أن أعلم حتى مصيرها!

- استنى!

سمعتها تأتيني قبل أن أغلق الباب عقب خروجي بجزء من الثانية. لم أكن املك أكثر من ثباتي منتظرا القادم من كلماته. شيء ما في كلمته بث من نوافذ صدري شعاعا لأمل ضعيف باستئناف الرحلة..

- قُرب!

من جديد عاد للحديث، فعدت للامثال لأوامره... اقتربت!

- قُرب!

اقتربت أكثر!

- قرب!

امتثالي لثالث الأوامر لم يعد يعني إلا التصاقى بكُرسيه
المتحرك... وقد فعلتها!

- ماتمشيش!

قالها، وفي حروفها يومض بريق الانكسار المخيف... ببطء
شديد - أو هكذا رأيته حينها - أمسك بمعطفي، جاذبا إياي ناحيته،
مستندا برأسه على جذعي... قبل أن يتغير ساعتها كل شيء!

- سنين طويلة وأنا باتسئل بس من غير ما اجاوب، عمري ما كان
ليا حق الكلام غير معاك... ماتمشيش!

يا الله!.. أي مسكين هو هذا القعيد ذو السبعة وثلاثين عاما؟!
كيف سمحت لنفسى ولو للحظة أن أغضب لكلمة قالها أو نظرة
نظرها أو فعل فعله؟!.. اقترب أنا ملي من رأسه تربت عليه للتهديته
أصابني برعشة مازلت أذكر أثرها رغم كل ما مر من سنوات. رأس
تحمل الكثير من ذكريات، لا يعلم أحد ما حوته داخلها من أعوام،
غير الله وصاحبها الباكي ليلتها بين يدي.

الكلمات كلها رفضت خوض المواجهة، تخلت عني جميعها، تاركة
لساني يخوض معركة تهدئته وحيدا دون أدنى مساعدات قد تعين!
- ماتخافش... مش هاسيبك غير لو انت اللي قلتلي امشي!

لم يرد... استمر في البكاء كطفل دون الرابعة.. انهارت قواه
تماما بشكل أفزعني. كنت على ثقة أنه الآن - خلف نظارته
يستعيد بعض المشاهد من شريط سنوات مضت. هكذا هي رأس
الإنسان، تنتهز أي فرصة ترغب فيها العينان بالبكاء، لاستعادة
المزيد من عبرات الماضي، تدعوها لحفل تراقصها فيه على قبور
العينين وصاحبهما المسكين.

لم أشأ أن أقطع عليه خلوته بذكرياته، اكتفيت باحتضان
رأسه في صدري ما يقارب الساعة، دون أن أنطق بحرف واحد. مضت
بنا الليلة بكويين إضافيين من الشاي، أعددتها لتهدئته، بعض
الممازحات ألقياها، محاولا إخراجه من حالته، يلاقيها بابتسامات
متكلفة لا تعبر عن أي تفاعل، وما زالت عيناه خلف سواد النظارة
تستعيد الكثير، ثم في النهاية... مباراة شطرنج كنت - على غير
العادة الداعي لها!

مازلت أذكر تلك الليلة بجميع تفاصيلها... أبدا لن تلاقي النسيان
في أي من طرقات ذاكرتي... تلك الليلة التي... أصبحنا فيها صديقين!

ثلاث سنوات... قد تبدو للكثيرين مدة كافية لاكتساب صديق، إلا
أنني مازلت غير قادر على استيعابهم بشكل كامل حتى الآن. حاجز ما

لا زال يقف حائلا بيني وبينهم، لم أنجح بعد في الكشف عن هويته. صورهم دائما ما تسرح في ممرات ذاكرتي، ثم لا تلبث أن تختفي دون سبب مقنع، كأنها الأشباح. غرباء هم إلى حد كبير، إلى حد يشعرني أن قطارهم لم يمر بالكثير من محطات، كان من شأنها أن تعطل مسيرته. محطات كتلك التي ضيع فيها الكثير من شباب مصر سنوات شبابهم، في أشياء لم أفهمها حتى الآن، كانوا بحق جديرين بقيادة القطار... قطارهم الخاص البعيد عن قضبان واقعنا الأليم... الأليم جدا بشكل مخيف!

الرابع من يناير للعام ٢٠١١... حجرة ما!

- تونس ولعت!

قالها أحدهم الممسك بعوده، ينظر إلى الجميع بادئا مناقشة اعتادوها بينهم، واعتادتها منهم أركان الحجرة لسنوات. يأتيه الرد من أحدهم:

- زين العابدين عامل ناصح وعزل الحكومة ورخصلهم شوية
أسعار... فآكرهم شوية أطفال هيليههم بلعبة يفرحوا بيها!

- لأ وفتحلهم اليوتيوب بعد ما كان قافله خمس سنين، صاحب
واجب صاحب واجب يعني هاهاها.

- ما كان يعزمهم على نص بلاي ستیشن أحسن هاهاها
قالها ناصر ضاحكا، يأتيه الرد من قرينه متصيدا أخطائه قائلا في

مرح معروف عنه:

- ايه ياض الإفيه اللي شبهك ده؟ ... جالك قلب تقوله ازاي؟

- خليك في حالك!

رد بها ناصر قول شاهين، وسط ضحكات الحضور، مستقبلاً رده:

- يابني أنا خايف عليك، منظر ك العام بالإفیهات اللي بترزعها دي

مش حلو!

- يابني انت ليه مش مقتنع اني لو رديت عليك وجهها لوجه كده

هاعتبرك بني آدم؟!

- ده على أساس انك دلوقتي باعتلي حمام زاجل؟!

- باكرهك يلا!

من جديد عادت الضحكات للظهور، حتى أنهاها معتر سائلاً:

- طب وبعدين يا رجالة؟... هنفصل نتفرج على تونس كده كتير

وللا ايه؟!

- قصدك ايه؟

- اللعبة من غير مصر ماتبقاش لعبة حلوة يا صاحبي!

- ثورة؟!

- ليه لأ؟!

- الكلام في القصة دي بدأ يتشر قوي على الفيسبوك وتويتر على فكرة!

- أديك قلتها... كلام، شوية تعليقات حماسية عشان حوار تونس ده وخلاص، مافيش تخطيط لأي حاجة!

- عندك حق، يادوب حددوا اليوم والمكان بس!

- ٢٥ يناير؟

- آه قالك عشان عيد الشرطة!

- حلوو وقوي، فرصة ننكد فيها بالغربان!

- الموضوع مش بالبساطة دي يا جدعان، احنا بتتكلم في ثورة،

يعني لازم أهداف ومطالب محددة نقدمها للنظام ونضغط بيها.

- يا جدعان شافعي لما بيتكلم باحسن ان مصطفى النحاس بيقول

خطبة في مقر الوفد!

- يابني هو انت مافيش كائن حي في المكان عاجبك؟ ... اهدم

بقي شوية!

- آسفين يا عم الشاعر، قطعنا الوحي شويتين معلش!

- أنا رأيي يا جدعان نستغل الفرصة صح. المنطقة كلها دلوقتي

والعة وأنظار العالم كلها علينا، الكل مستني مصر، فرصتنا نوصل

صوتنا للعالم!

- كل ده جميل، بس هنعمل ايه أكثر من اللي بنعمله كل مرة؟

- المرادي انتشارنا هيقى في مصر كلها مش بس القاهرة، الشعب مستني بس الشرارة، الشباب هم اللي هيدءوها وباقي الشعب وراهم.
- بس لاحظ ان أجهزة الأمن والإعلام مش بالسذاجة اللي تخيلنا نعمل كل ده بالسهولة اللي انت متخيلها.
- بالعكس، النظام دلوقتي بيمر بأعتى مراحل إجرامه وغروره خصوصاً بعد مسخرة انتخابات ٢٠١٠ .
- عمر تفكيرهم ماهيتعدى كونها مظاهرة طلابية أو شبابية عادية، حلاوة روح كده قال يعني بنقلد تونس، وهنا هنضرب ضربتنا!
- الحل في الاعتصام مش بس التظاهر، وجود عدد كبير في الميادين مقيمين مايبروحوش بيتظاهروا ليل ونهار هيجهد أجهزة الأمن بشكل كبير، مش هيقدرُوا يسيطروا على الموضوع زي كل مرة كنا بنروح فيها، المرادي مقاومة لحد الموت!
- خلوا بالكم ان الموضوع ده لو فشل احنا مش هنشوف نور ثاني!
- واحنا امتى شوفناه أولاني؟
- تعجبني دماغك يلا يا شافعي!
- طب ها هانعمل ايه بقى دلوقتي أول خطوة؟!
- هنتواصل مع كل اتحادات الطلاب في جامعات مصر

والحركات الثورية والشبابية في مصر، واتفق على النزول في كل حنة، وأولها التحرير، في نفس الوقت، عامل المفاجأة العددية هيكون له دور كبير. هتواصل مع الكل أيا كانت انتماءاتهم.. ٦ ابريل، كفاية، اشتراكيين ثوريين، إخوان، وحتى شباب مستقل، أي حد بيتتمي للمعارضة، الحشد لازم يكون غير مسبوق!

- يبقى على بركة الله نقرا الفاتحة!

حجرتان خشبيتان... لا علاقة لهما بمسمى المبيت من قريب أو بعيد، غير أنهما تفيان بالغرض نوعا ما. مازال الشتاء يجد طريقه بسهولة للزحف إلى ضلوع الساكنين بهما، مستمتعا برؤية بعض مظاهر المعاناة على وجوه الجميع. بالغ حينها في إظهار كامل قدرته مستغلا ضعف الخصوم. يبدو أن طول معاشرته لبني البشر قد أكسبه الكثير من صفاتهم، ليجلس على كرسي المخرج خلف كاميرا البرودة، مراقبا أدوار أبطاله. أمطار لا يضم معجمها لفظ التوقف، تتسلل عبر شقوق السقف الخشبي بمهارة تتقنها.. برق يعجل بيزوغ فجر زائف، لا يلبث أن يختفي كغالبية أحلام سكان الحجرتين.. رعد له القدرة على العبث بساعات نوم سامعيه مهما علت بهم درجات النعاس.. رياح احتفظت في قلبها ببعض الرحمة، فاكتفت بإفساد نومهم دون اقتلاع الحجرتين،

من بين الرقود قام متكاسلا، بعدما فشل في مقاومة رغبة ملحة في التبول. بقدر الإمكان حاول تلاشى الخوض في الأجساد المتكومة في أركان الحجرة، غير أن محاولاته لم تسلم من بعض الفشل، تجسد في تأوه أحدهم من أثر اصطدام قدم السائر بقدمه، أو تألم آخر من أثر وقوع كفه تحت خطوته. بصعوبة وصل لمبتغاه، كما هي عادته في كل شيء أراد الوصول إليه - إن وصل - ، فتح باب الحجرة، ملاقيا زوبعة كانت كافية لعودته من جديد إلى بيوت العش، قاومها بقدر استطاعته، خاطيا إلى فراغ يقع خلف الحجرتين لقضاء حاجته. بهدوء الكسالى المشتاقين للنوم خطى بعض خطوات إلى هدفه، وذراعه يحتضنانه انقاء لبرد يهزأ بالذراعين وصاحبهما، بمزيد من ضحكاته مسقطه الأمطار وبين نابيه تلمع ومضات البرق.

- إسرائيل!

اختطفته الكلمة من كسله بطريقة أفزعته، سمعها عند مروره بباب الحجرة الثانية، مييت المعلمين فخري ويونس، اللذين انفردا بها لنفسيهما تاركين البقية جميعا في أولى الحجرتين. اقترب قليلا من الباب، الذي لا تسمح إمكانياته بحجب أي شيء. الكلمات كلها الآن تنتظر أذن طلال الملصقة بالباب:

- هي اللي بتمول المشروع ده ومحتاجين عمالة كثير، أبو خالد

كلمني النهارده وطالب ٣٠ واحد.

- بس دي مافيهاش خطورة يا معلم؟

- خطورة من ايه لا سمح الله؟...وبعدين الفلوس تهون أي حاجة

يا عمنا، على كل حال ماتقلقش ابو خالد هيسهلنا العبور من الشمال
للجنوب بطريقته.

- مش عارف!

قالها ذلك المتردد فاركا ذقنه، يأتيه رد محادثه:

- احنا بقالنا هنا دلوقتي شهرين في الهوّ شغالين ليل نهار لما

العمال اللي معانا خلاص بيموتوا وفي الآخر ملاليم بناخدها...غربة
بغربة يبقى على الجنوب بقى.

- بس حكاية إسرائيل دي بصراحة تقلق حبتين!

ابتسم الآخر ساخرا يقول:

- تقلق!... جرى ايه يا معلم يونس ماتقوم تغنيلنا الحلم العربي

أحسن؟ احنا من امتي بنقلق؟، احنا مالنا اسرائيل وللا المريخ حتى؟...

ده شغل... بيزنس، بنشغل ونقبض فلوس على شغلنا ان شا الله حتى

نقبضها من الجن الأزرق!

(ملحوظة:: غياب التواصل بين المبادئ والقيم، التي أهلكتها

سطور الكتب ذكرا من جانب وحياة العمل والتطبيق في ساحات

الواقع من جانب آخر، هو أولى خطوات سقوط أي أمة... ولنا في ضياع الأندلس ودولة العباسيين عبرة... إذا كان لنا أن نعتبر!)

استمر صمت يونس دون رد، فما كان من فخري إلا أن استغل ترده بحنكة يتقنها قائلاً:

- الموضوع مش محتاج تفكير يا معلم، الشغل موجود والعمال موجودين والفلوس موجودة، يبقى ناقص ايه؟... داحنا حتى نبقي بنرفض النعمة.

- طب وهنعمل ايه مع العمال هنقولهم ايه؟

- يا عمنا دول ماتشيلش همهم دول ولا فاهمين أي حاجة، دي عالم جاية تجري ورا أكل عيشها مالهومش دعوة بأي حاجة تانية. وبعدين هم هيعرفوا منين؟... يا رجاله احنا خلصنا شغل هنا وبعد بكره ان شاء الله هنسافر نشتغل في مشروع تاني... بس كده!

- بس ده فيهم متعلمين!

- متعلمين؟... هاآو، سلملي عالمتعلمين، يا عم دول زي مابقولك ناس جاية تاكل عيش، وبعدين احنا قلقانين من ايه؟، اللي مش عاجبه مع السلامة يوريني هيرجع ازاى خلي الصحرا تاكله.

- شايف كده؟

- مافيش حاجة اصلاً تتشاف غير كده، صلي عالنبي كده وقول

آمين. العملية أسهل بكثير من اللي في دماغك، بكره لما تشوف منظر
الفلوس هتهوي دماغك من كل ده.

لا يذكر أن قدماء مرتا بمرحلة من الثبات مثل مرورهما تلك الليلة،
إذ ظلنا تحملانه رغم كل ما سمعه.. بعسر بالغ نجح في السيطرة على
نفسه، عائدا إلى الحجرة التي جاء منها باحثا في الظلام عن أحدهم
يناديه بصوت لا يكاد يظهر:

- عبده... عبده!

لم تأت الإجابة بطبيعة الحال، حتى وصل اليه في الفراش المجاور
له (إن صح أن نطلق عليه فراش)، نكزه بيده في كتفه قائلا:

- عبده، فوج يا عبده!

-

- عبدوووو

- اييه؟... ايه يا طلال؟، حرام عليك دانا ما صدقت نمت!

- نوم ايه دلوك جوم فيه مصيبة!

سمعها عبده، فارتكز على مرفقيه قائما يغالب نعاسه، قائلا لطلال:

- مصيبة ايه لا سمح الله خير؟

- لا تعالى معايا بره ماهينفعش احكيلك هنا!

- بره فين في الجو ده اتقي الله في عضمي!

- جوم يا عبده الله لا يسيئك الموضوع ماهيستحملش!
- رغما عنه قام عبده متكاسلا يتكئ على طلال، في حين انشغل طلال بجمع حاجياته جميعها في حقيبة صغيرة، ينظر إليه عبده مستغربا:
- انت بتعمل ايه؟
- هالم خلجاتي!
- ليه لا سمح الله ضايقناك في حاجة وقلت تخاصمنا؟... مالك يا عم الحج انت اتجننت يا ض يا طلال ولا ركبك عفريت ولا ايه؟
- هتعرف كل حاجة لما اجولك اللي حُصِّل... تعالى ورايا!
- قالها ثم قام يجر رفيقه من ذراعه إلى الخارج، يختبئان خلف جدار الحجرة الجانبي البعيد عن الأعين. دقائق فقط كانت كافية لينقل طلال لعبده ما سمعه، يستمع رد صديقه:
- طب وانت ناوي على ايه؟
- كيف ماننا شايف، هامشي!
- تمشي!... تمشي تروح فين يا بني آدم هو انت في المولد؟، احنا في صحرا!
- ماتخافش اني عارف السكة اللي هتوصل لحد الطريق بره!
- لا إله إلا الله، يا بني هو انت رايح تركب دايري منيب؟!... انت في بلد تاني لو تهت ماحدث هيسأل فيك!

- احسن ما اروح لولاد الكلب دول برجلي، ربك هيسهلها مادام
سبتهم عشانه، اني مش هاجولك تعالى معايا ولا اجبرك تسيهم
وتسافر، بس خلي بالك من نفسك معاهم يا عبده!

الجملة الأخيرة نالت من خجل ذلك البورسعيدي الكثير، فنظر
للأرض حيناً قبل أن يقول:

- أكل العيش مر يا صاحبي، لو عندك كوم عيال مش لاقين اللقمة
كنت فكرت ألف مرة قبل ماتمشي.

(ملحوظة: لعل أكبر جرائم الحكام عبر التاريخ كانت وستظل
حرمان شعوبهم من أساسيات الحياة، بشكل يجبرهم على البحث
عنها في أراضٍ أخرى، بما يجيز التضحية بأي شيء مهما بلغت قيمته)
دقائق من النقاش الحاد بين الصديقين، لم تزد طلال إلا إصراراً
على الرحيل، انتهت بقول عبده:

- يعني خلاص مافيش فائدة؟

- سيبها لله يا صاحبي... اشوف وشك بخير!

- لا انا هاجي او صلك لحد الطريق بره.

- لا لا ما عايز ينش حد يحس بحاجة انا عارفه زين!

- والله ما يحصل هاجي معاك يعني هاجي معاك!

- بالله عليك يا عبده ماتتعبنى معاك، اعتبره يا اخي آخر طلب

هاطلبه منك قبل ماامشي.

بصعوبة لى عبده رجاء صديقه، قبل أن تجمعهما نظرة طويلة، استرجعا فيها الكثير من ذكريات شهرين.. طلال يدندن بلهجة صعيدية، وخلفه عبده يردد بلكنة بورسعيدية، والجميع من ورائهما يصفقون.. طلال يشق الأرض بفأسه لأمتار تحت الأرض، وعبده يحمل قصعة المونة، قبل اجتماعهما للغداء برغيف وقطعة جبن يتبعهما كوب شاي، للأجواف الملتهبة من جراء العمل بالساعات.. طلال يرقد ليلا وعبده إلى جواره، في حجرة خشبية تتسع رغم ضيقها لأحلام الكثيرين، يتهاوسان بأحلامهما التي هجرتهما قديما في وطنهما وجاءا ينقبان عنها في هذه الأرض. الكثير والكثير من صور مرت بالראسين، الشاهدة عيونهما اللامعة بالدموع الآن كلمة النهاية، تختم مشاهد الفيلم المبكي الجميل. بتلقائية نقية جمعهما حضن واحد طويل، لم تُنطق معه الكثير من الكلمات.. دقائق إضافية أنهاها طلال بالتقاط حقييته، ناظرا لعبده النظرة الأخيرة منطلقا إلى... حيث لا يعلم!

ظل عبده متابعا إياه بنظره حتى اختفى عن ناظريه، فعاد من جديد إلى الحجرة لا يستطيع السيطرة على دموعه، مفضلا الانفراد بها في فراشه، غير مدرك لذلك الشاب خريج الهندسة المستمع للحديث من بدايته، خلف النافذة القريبة من الصديقين. ظل على حالة من الجمود متابعا طلال ومغادرته بعينين تلمعان ببريق عبرات توخر مقلتيه، وفي

ذهنه أصوات بدأت تخفت شيئاً فشيئاً لنشيد وطني وقف له مرات محيياً
في مدرسته، باحثاً في الأفق الشمالي عن أي إشارة تدفعه للعودة، غير
أن شيئاً لم يظهر، تاركاً إياه لبرائن الحجرة التي سيغادرها في غضون
يومين لأحد مشروعات الجنوب!

رُدُّوا إلى أُمِّي القميصَ فقد رأت	ما لا أرى من غربتي ومرادي
وطنٌ بخيلٌ باعني في غفلة	حين اشترته عصابة الإفسادِ
شاهدت من خلفِ الحدودِ مواكبا	للجوعِ تصرخُ في حمى الأسيادِ
ما بين عمرٍ فرّ مني هاربا	وحكايةٍ يزهبها أولادي
كلُّ الحكايةِ أنها ضاقت بنا	واستسلمت للصَّ والقوَادِ
في لحظةٍ سكنَ الوجودُ تناثرت	حولي مـرايا الموت والميلادِ
قد كان آخر ما لمحت على المدى	والنبضُ يخبو.. صورة الجلالِ
قد كان يضحك والعصابة حوله	وعلى امتدادِ النهرِ يبكي الوادي
وصرختُ والكلماتُ تهربُ من فمي	هذي بلادٌ.. لم تعد كبلادي!

(فاروق جويده)



دعهم يحلمون، لا يعلمون أنهم بحلمهم لا يضيفون لحياتهم إلا مزيداً من التعاسات، فليس هناك أتعس من مصري ذي حلم!

كنت أعلم أنهم هناك.. لم يداخلني في هذا شك قط، لن تكتمل حلقة هذا الميدان الكبير بدونهم بأي حال، بل إنني أكاد أجزم أن تلك الحجرة هناك كان لها دور بارز فيما كتبه الآن يد التاريخ، في الفصل الخاص بتلك الدولة المسكينة في وسط خريطة العالم. أستشعرهم بحضورهم الكامل من مرقدى هذا فوق سرير أحد المستشفيات اللعينة، أسمع ضحكات شاهين وناصر، أرى مناظرات شافعي ومعتز، أطرب لعود كيمو، وأهز رأسي متأثراً بأبيات حسام.. أقوياء رغم كل شيء، كما عرفتهم طوال ثلاثة أعوام. أخبار القنوات تتابع من حين لآخر رصد أسماء الضحايا، دون أن تضم القائمة أحد أسمائهم... حتى الآن.

لا يبدو أنني سأغلق هذا التلفاز اللعين، الذي لا يتوانى عن بث الرعب في قلبي من آن لآخر، حين تظهر شاشته الحمقاء أحد مشاهد الصراع في اليومين الأخيرين. مهلاً، لماذا يبدو عليَّ الاهتمام بشيء ما الآن؟! أي شعور جديد هذا يطرق أبواب صمتي المغلقة منذ سنوات؟! هل كان الميدان أم ساكنيه؟... أم كلاهما؟!

لا أعلم ولن أهتم، يوووووه.. لتذهب هذه الممرضة السمينة التي أسمع وقع أقدامها الآن تقترب إلى الجحيم، إحدى الإبر في طريقها

الآن لشك ذراعي المريض، سأغيب قليلا يا رفاق ثم... أعود!

- الداخلية خدت علقه انما ايه لووووووز.

قالها عرفة لصديقه المنشغل بإحدى سجائره ضاحكا يستطرد:

- العيال بتوع التحرير علموا عليهم جامد قوي. ده يقولك فيه ظباط

اتنكروا في لبس حريم عشان يهربوا من الاقسام قبل ماتولع هاهاهاهاه.

- يستاهلوا ماهم ياما عملوا فينا.

قالها عمدة يتحسس قفاه، وبين شففيه لازالت سيجارته تخوض

معركتها مع رثيته مستطردا:

- عارف يلا يا عرفة، أنا لولا اني مش فاضي كنت نزلت علمتلي

على كام أمين شرطة وكام ظباط مع العيال دي وأولهم محمود بتاعنا

اللي فاكّر نفسه وزير الداخلية ده.

لم يكّد يكملها عماد، حتى انتبه لصوت أغنية هابطة تنير هاتفه.

تناوله، فإذا باسم يظهر على شاشته انتفض له قاعدا من رقاده قائلا:

- محمود باشا، والله لسه في سيرة جنابك بالخير يا باشا، ايه؟...

أوامر يا باشا حالا، مسافة السكة هاكون عند سعادتك، عارفه عارفه

اللي عند المزلقان القديم، ماشي يا باشا ألف سلامة.

قالها وأغلق هاتفه قائما يرتدي معطفه:

- في ايه على فين دا حنا لسه بنبدأ الليلة.

- خليك زي مانتا جايلك على طول، فيه مصلحة هاخلصها مسافة السكة وجاي.

الظلام كان اللغة الرسمية للمكان.. تلك البقعة المنسية إلى جوار مزلقان سكة حديد مهجور منذ سنوات. بين الظلام وأكوام الأخشاب والحجارة، كان شبحة هناك تلفه هالة عمود الإنارة الباهت المنعكسة على معطفه الأسود الطويل. سيجارته اللامعة، وحذاؤه الكلاسيكي الأسود أكملًا صورة نجم أفلام الحركة الأميركية، غير أن ضيفا جديدا حلَّ على تكوينه لم يعرفه قبل الآن... الخوف!

اقترب منه عماد وعلى وجهه ابتسامته الزائفة المعروفة للجميع:

- باشا!!!!!!

- وطّي صوتك يخرب بيت أمك!

- احم عدم اللامؤاخذة يا باشا أنا اصلي مشتاق وعندي لوعة سيادتك.

- سيبك من الهطل اللي بتقوله ده واسمعني.

- أوامر يا باشا.

- طبعا انت عارف اللي بيحصل في البلد دلوقتي!

- معلش يا باشا شدة وتعدي.

قابلها محمود بزفرة تعكس مقدار غضبه مستطردا:

- العيال اللي في التحرير دول كلهم قابضين من بره عشان يخربوا

البلد، منظمات بره مصر عايزة تضيع البلد وتخربها وتهد كل مؤسساتها

مؤسسة مؤسسة!

- عدم اللامؤاخذة يعني يا باشا عشان ابقى فاهم معاليك ومتابع معاك، مش مؤسسة دي اللي بيركبولها من تحت الكوبري في المنيب بجنيه ونص؟!

لم يملك وقتها ذلك النقيب ردا أكثر من سلاحه يشهره في وجه محادثه، قائلا وعلى وجهه غضب يجاهد في السيطرة عليه:
- لو سمعت صوتك تاني قبل ما قولك اتكلم هافرتك أنا مش ناقص.

-

- العيال دي زودوها جامد ولازم يقفوا عند حدهم.. كده حلو قوي عليهم طلعلهم شوية في التليفزيون والناس صقفلهم والمسرحية خلاص لازم تنتهي على كده.

-

- لأ ماهو أنا مش واقف مع واحد أخرس، مش عايز غباوة.
- يا باشا مانت اللي قلتلي ما اتكلمش، سبحان الله.
من جديد ظهرت زفرة ذلك الضابط، مستطردا حديثه متغاضيا عن أي استفزاز من شأنه أن يعيقه:

- من الآخر كده العيال دي لازم يروحوا بيوتهم، واحنا اللي هنروحهم، وعشان كده قلتك تعالى، مفهوم؟

- ازاي يا باشا؟...هنجيب ميكرو باصات منين لكل البشرية دي هي الحكومة ناقصة مصاريف؟
لم يملك محمود رداً إلا رفع مسدسه من جديد إلى رأس عمدة الذي قال:

- الله الله الله، استهدى بالله يا باشا اخزي الشيطان السلاح يطول، ماهو أنا مش فاهم سعادتك يعني هنروحهم ازاي؟
- بطريقتنا، احنا هنعرف نروحهم، من الآخر كده هنروحهم بالعافية.
- ممم، مش عارف ليه يا باشا مش مستطعم الحوار ده.
- طب لما يجيلك نفس وتستطعمه بقى يا روح امك ابقى كلمني.
قالها محمود في غيظ وهمَّ بالانصراف، قبل أن يستوقفه عمدة من جديد:
- استنى بس يا باشا ماتبقاش خُلقي كده الكلام أخذ وعطا.
- أنا ماعنديش وقت اضيعة معاك، ايوة ولا لأ؟
- طب انا مطلوب مني ايه بالضبط؟
- هتعرف كل حاجة في معادها، أهم حاجة دلوقتي جهّز نفسك وتعالالي بكره الساعة تسعة في المكان ده.

قالها وناولته ورقة صغيرة بها عنوان ما، تفحصه عماد قليلاً قبل أن يقول:
- طب عدم اللامؤاخذه يعني يا باشا المصلحة دي خميرتها عاملة ازاي؟
- هتاخذ اللي انت عايزه بس لما تخلص، ولو خلصت زي ما حنا

عايزين هتشوف العز اللي عمرك ماشفته.

- يبقى على بركة الله نقرا الفاتحة سعادتك.

- اقراها لوحذك أنا مش فاضي!

على ضفاف سطور الصفحة البيضاء، كانت هناك قوارب الأقلام
تنتظر أمر الإبحار. صفحة عذراء من صفحات التاريخ، وقفت بكامل
حلتها تنتظر فارسها ذا الحصان الأبيض، يجول بفرسه بين سطورها
مدونا أحد أهم الفصول.

اللون الأحمر... لون الدم...

كان لون السيادة دون منازعين. افترش سطور الصفحة بقلع
كلماته وأبراج أسمائه، كما قائد حربي مخضرم، اعتاد فرض
سيطرته على مثل تلك الميادين الورقية منذ فجر التاريخ، بطريقة ما لم
تتغير بتغير الأزمان واختلاف مواقع الميادين وهوية سكانها بين بقاع
الأرض. بدا الميدان أضعاف مساحته في تلك الأيام، ربما مددته هتافات
ساكنيه، ربما غيرت آمالهم رسم حدوده بالاتساع، أو... تكون (ربما)
الثالثة بتضخم شرايينه، بعدما بثته هذا الجموع الكثير من دماؤها.

أيام أربعة مضت بلياليها على الجمعة الغاضبة، الثامن والعشرين
من يناير للعام ٢٠١١، وما حملته لسطور الصفحة من أحبار فرضت

سلطوتها بقوة على محتوى قادم الصفحات. كل شيء لا زال قائما
بكامل حضوره في أذهان الجميع، الهتافات القادمة من أعماق الحناجر
تنادي بسقوط النظام.. اللافتات المعلقة في جنبات الميدان وبين
كفوف المعتصمين، تشارك أصحابها ثورتهم.. صفوف المصلين
بعرض الميدان يؤدون الصلاة، وجباههم تنهل من تراب الميدان
عشقا كأنها تودعه قبل الرحيل.. تلك العربات السوداء الضخمة ذات
الصناديق الأشبه بالقبور تجوب الميدان كلبؤات جريئة، تستقبل
حجارة المتظاهرين وهتافاتهم ردا على رصاصها وخراطيم مياهها.
معركة تفتقد للتكافؤ بشكل كبير، غير أن شيئا ما بحوزة
الغزل يسمونه «إيمان» عجل بسقوط الطواغيت على نحو ما. ثم في
نهاية الأمر، حلول المساء بهدوئه على الميدان، راسما على ورقته صورة
مدينة إغريقية محطمة، فتكت بها قبل ساعات لعنة ما!

كانوا كعادة باقي الأيام متحلقين حول حسام وأشعاره وكيـمو
وعوده وشاهين وقفشاته - ذلك الذي أضيفت لرأسه بعض الأربطة وفي
وسطها بقعة حمراء

- بس عاش يلا يا كفافى العيال اصحابك الإخوان عملوا الصبح
يوم الجمعة دى.

-الى نجح اليوم كان عشان الكل إيد واحدة يا صاحـبى.

- مش متطمّن!

قالها معتز للجميع، فكان رد كيمو:

- ولا أنا، حاسس ان الدنيا لسه فيها كتير، نزول الجيش وانسحاب

الداخلية مش معناه اننا وصلنا.

- احنا على العموم لسه في الشارع وهنفضل موجودين لحد

ماالنظام يمشي، الخوف بس من عملية بيع تحصل تضيعنا.

- بيع؟... بيع من مين؟

- بصراحة مش واثق في رؤساء الأحزاب المعارضة، اشمعنى دلوقتى

سمعناهم صوت ماهم طول عمرهم ماشيين جنب الحيط مايقولوش

نص كلمة، مااستبعدش انهم يبيعونا بأي مقابل كراسي في

الحكومة أو البرلمان أو ايا كان.

- متهيألى صعب شوية!

- صعب؟...دانتا غلبان قوي...فاكر انت الواد الواطي اللي كان

يبقى معاك زمان في الفصل ده تتفقوا مع بعض ماتعملوش الواجب

وييجي تاني يوم تلاقيه عمله؟... ومش كده بس ده لو المدرس نسي

يفكره يقوله يا استاذ شوف الواجب بتاع امبارح؟... اهو ده لما كبر

بقى رئيس حزب مصري معارض!

- هاهah

- متشائم قوي يا فنان، احنا في الوقت ده محتاجين التفاؤل.

- والحرص!

- يا جدعان أنا شايف ان كلام كيمو صح، الناس دي عمرها ما وقفت جنبنا. كان آخرهم كلمة في جورنال ولا حاجة ده؛ إذا قالوها، ماحدش خلا النظام بفجره ده غير أحزاب المعارضة اللي انشغلت بحرب بعضها عشان كرسي في الحكومة ولا البرلمان وكله في صالح النظام... اللهم إلا من رحم ربي يعني!

- عارفين كلام كيمو فكرني بياه؟

قالها شاهين يأتية رد ناصر؟

- بياه يا ناصح؟

- بقصة البلياتشو!

- لا والله؟!

- يا عم استنى بس، بيقولك كان فيه مرة بلياتشو عرف بخبر موت ابنه قبل ما يطلع عالمرح على طول. المهم اول ما طلع على المسرح وقبل ما يبدأ العرض بتاعه، نزلت دمعته من عينيه، الجمهور ضحك وصقفه.. دموعه بدأت تزيد، الجمهور تصقيفه وضحكه زادوا، الدموع بقت نحيب وصوته بقى عالي، الجمهور تصقيفه وضحكه زادوا اكتر واكثر، البلياتشو وقع على ركبته، الجمهور قام من كراسيه وتصقيفه بقى خلاص هيهده المسرح، البلياتشو في الآخر من القهرة

وقع مات، عارفين الجمهور عمل ايه؟...فضل يصقف ويضحك لغاية
مالستارة نزلت!، الخلاصة ان ماحدش هيهتم بمشاكلك وقضيتك
غيرك انت، احنا المفروض مانحطش أمل على أي حد تاريخه فيه شائبة
تواطؤ أو اتفاق مع نظام مبارك، لأن ماحدش منهم هيهتم بقضيتنا زي
ماحنا متخيلين، مصيرنا في الآخر هيبقى مصير البلياتشو!

- تصدق طلعت بتفهم يلا يا شاهين!

- المشكلة ان رد فعل الناس على خطاب مبارك امبارح يقلق،

ده كأنه عملهم عمل!

شافعي كان القائل، فتولى معتز الرد:

- انا مش قادر اصدق ازاي قدر يضحك على كل الملايين دي في

١١ دقيقة، ده الناس ولا كأنه دمرهم ٣٠ سنة بأمراض وزرع مسرطن

وعشوائيات وحوادث وغرق شباب وسجون ومعتقلات مليانة ناس من

سنين ماحدش يعرف عنهم حاجة...للدرجادي الشعب عاطفي؟...ده

امبارح الناس بتتصل في القنوات الفضائية تعيط عليه!

- انا عن نفسي مخلص امبارح علبتين مناديل!

قالها شاهين متصنعا الجدية، يتلقى نظرة الجميع مستفهمين:

- ايه يا جدعان بلاش أنف!

- نهايتك هاتبقى على ايدي يلا يا شاهين!

- صعب يا عم ناصر!

- اشمعنى؟!

- مش هاهون عليك برده داحنا عشرة ما يعلم بيها الارينا.

- ايه يلا الوداعة دي كلها؟ انت سخن وللا ايه؟

- رجعنا تاني للإفشيات الرخيصة مافيش منك رجا كل ماقول يا

واد عامله كبني آدم تخيب ظني...

قالها والتفت لأحد باعة الشاي القريبين منهم على رصيف الدائرة

الغضراء في وسط التحرير قائلا:

- عم صبرالاي كوابية شاي كشري اتنين سكر الله

يكرمك وجهز نفسك عشان تغيرلي عالجرح بس الله لا يسيئك

خف ايدك بالبن شوية، امبارح كنت بتنتقم من الجرح كأن زيون

مادفعلكش الحساب راقد جواه.

- من عنيا يا شاهين بيه!

قام إليه شاهين قائلا لحسام:

- بقولك ايه يا شاعر ماتقولنا حاجة كده انشغل بيها عن

المعركة بتاع عم صبري في وشي دي.

- ايوه يا حس الله يباركلك قل لنا حاجة كده نغير بيها الجو.

- طب اسمع يا سيدي انت وهو.

فى نومي فى صحوي مكتوبلي أعيش بيكي
أكون ليكي وأموت فيكي
وحافظ كل أساميكي
من مينا لأيامنا بميادينك وحواريكي
وحكاوينا فى قهاويكي
وجاي بعودي اغنيكي
بأغنية لبنت بنوت وطالة من شبايكي
يطول ضحكي قصاد نيلك
ويوم ما بكي يصون دمعاتي مندليك
والملم جرحي واشكيلك
وأغنيلك
وافضفض سري واحكيلك
وادندن لحن مواويلك
وأغانيكي
أنا اللي بيأسي من حضنك بقيت درويش
ألف شوارعك المبلولة بدموعي من التلطيش
ويوم ما سألت عن عنواني فى بيوتك قالولي ما فيش
أنا الواخد على التطفيش

أنا الدرويش
أنا المتربي عالتهميش
وفاكرين ارتباط دمي بطاقة وفيش
قوليلهم لأ
أنا الموشوم بوشم الحق
أنا الفجر اللي ليله اتشق
أنا اللي قالوله غور منها وقف ثابت وقال ماامشيش
قوليلهم لأ بصوت عالي
أنا المتربي عالغالي
على إسمك
وألواني فدا رسمك
وعودك حضن مؤالي
قوليلهم إني جواكي
وعمري هاعيشه وياكي
وروحى اللي هجرتها
وسبتها وخونتها
وبالنسيان قابلتها
هتفضل برده فاكر اكي

أنا المرسوم بتلوينك
أنا المبني بتكوينك
أنا المتغطي بسنينك
وبحماكي!
_

صرخ بها شاهين يتشبث بيد عم صبري المسيطرة على ضمادات
رأسه، يكبس رأسه بكمية من البن تكفي لدعوة الميدان كله
لحفلة قهوة.

- الله يجحملك بوظلت المزاج اللي حسام عمله!

ناصر كان القائل

- مزاج ايه دلوقتي ده عم صبري بينقب عن كنز في دماغه!

- ايه ده سامعين اللي أنا سامعه؟

قالها شافعي قائما من مكانه ينظر باتجاه الصوت، فتبعه
الجميع وقوا ينظرون باتجاه الصوت، وقد هالهم ما شاهدوه!..

جمال وخيول تقتحم الميدان، وعلى ظهورها انتصب راكبوها
بهيات قميئة ذوات شعر خشن طويل في غير تهذيب، ولحى على
نفس الشاكلة، وبين الشعر واللحى كثرت آثار المطاوي.. أياديهم
لم تكن لتتخلى عن أسلحتها البيضاء وعصيها الخشبية، تجتاح

رؤوس المتظاهرين ووجوههم في غل سقط على أثره كثيرون!
دون تفكير، أسرع الجميع لموقع المعركة وسط الميدان..
بين المهاجمين كان عمدة فوق فرسه يضرب هنا وهناك.. الأمر
بالنسبة له أصبح معركة بقاء أو فناء، بعدما أحيط بالمتظاهرين
المريدين الفتك به. بخفة يتقنها من أيام الهروب من كمائن الشرطة
أفلت منهم، ليجد نفسه مرة أخرى... في مواجهة أحدهم جريح الرأس.
انطلق شاهين فور رؤية المشهد، وسط صرخات عم صبري بالبقاء
لتضميد جرحه، دون استجابة. سارع إلى الموضع الأشد شراسة،
بعدما تخطى المساحة الخضراء وسط الميدان.. التقط إحدى العصي
الملقاة على جانب من جوانب الطريق، من مخلفات الجمعة الغاضبة..
زحام المتظاهرين أمام أحدهم كان المشهد المواجه له تماما، قبل أن
يفاجأ بهذا الـ (أحدهم) ممتطيا فرسه تماما في مواجهته!
المواجهة لم تنعم بقدر من العدالة يسمح بالتكافؤ بين طرفيها..
عمدة على فرسه وبيمينه سيف يلمع نصله تحت ضوء الشمس،
وشاهين بجرحه الذي لم يلتئم بعد على الأرض وبيمينه بقايا
عصا.. حاول عمدة تخطيه بفرسه إلى حدود الميدان للهروب، غير
أن شاهين اعتبرها معركة ثار لكل من طالهم سيف خصمه. وقف
أمامه مباشرة، قبل أن يباغته بضربة من عصاه حاول عمدة تحاشيها،

وكان له ما أراد، قبل أن يردها بضربة من سيفه استقرت تماما في رقبة شاهين، الساقط على إثرها دون حراك، تحيطه بركة من دمانه!

تسعة أيام على هذا النحو الذي عايشه قد لا تساعد كثيرا على البقاء حيا. التنقل بين صناديق السيارات الأجرة، التي أنفق بها كل ما ادخره خلال الشهرين.. المبيت على مقاعد الاستراحات المنتشرة على جانب الطريق، والتي يطرد منها في أحيان كثيرة، ليقضي ليلته بالخارج تنهشه أنياب البرد.. جلبابه وعمامته ونعله، الذين لم يعد يفضلهم عن الفناء أكثر من ساعات.. أشباه الأطعمة التي يحاول من آن لآخر سد فوهة جوعه بها.. والأهم من ذلك كله، تيهه في أرض غريبة، لا يعلم عنها شيئا أكثر من كونه فريسة لسائقي السيارات وأصحاب الاستراحات، يحاولون قدر الإمكان اعتصامه لإخراج كل ما لديه من نقود.

على أحد المقاعد كانت جلسته، كما هي عادة كل ليلة لا يسافر فيها. يقاتل النعاس قتال المستميت، حتى رفع الراية البيضاء في نهاية الأمر. رقبته مالت تماما على صدره، حتى بدت للرائي بلا فقرات تقيمها. عيناه أسبلتا ستائر جفونهما منذ مدة إذعانا لأوامر سلطان النوم. ذقنه طالت لدرجة بدا فيها شخصا آخر غير صبي العش الضحوك، بقايا أغراضه تجلس على مقعد مجاور، وأخيرا كوب فارغ ترقد محتوياته

الآن في جوف ذلك النائم منذ ساعة أو يزيد.

- أخينا... يا أخينا!!!!

قالها ذلك العامل المصري بالاستراحة يوقظه

- إيه...؟ فى إيه؟!

- بسم الله الرحمن الرحيم، مافيش حاجة يا عم انت كنت بتحلم

ولا إيه؟

تلقاها طلال ناظرا إليه بعينين ضيقتين تستكشfan المكان، عائدة

من مطاردة بعضهم لصاحبها، في كابوس أنقذه منه ذلك النادل. صمت

حيناً قبل أن يقول:

- لا مؤاخذه يا بابا.

- ولا يهملك يا عمنا أجيالك كوباية مية ولا حاجة؟

- لا لا تُشكر يا زوج، أنى بس عايز اطلب منك طلب.

- أو مرني انا المصريين بالذات باشمشم عليهم هنا عشان أخدمهم

دانتو أهلي يا جدع.

- تسلّم، أنى بس عايز حتة اناام فيها للصبح وهامشي طوالي، أي

حتة عندك في الاستراحة هنائي

- بس كده...؟ عنيا يا عم دانا انيمك في الفرشة بتاعتي انت بتتكلم

في إيه؟

- تسلم عينيك يا راجل يا طيب، طب سؤال تاني بجى مدام طلعت راجل زين كده.

- عشر اسئلة يا بلدينا اوامر!

- أرجع مصر ازاي؟

- بس كده؟

- لو دلتنى صُح بُجى عملت فيا خدمة العمر، أني تايه بجالي ٩ ايام بلياليهم لا عاد معايا فلوس ولا ايتها حاجة، يادوب اللي باجي يرجعني مصر.

- لا حول ولا قوة الا بالله، داننا شكلك متمرط جامد قوي، طب بص أنا هاجهزلك نومة دلوقتي والصباح رياح هاشوفلك حد من حبايبي السواقين اللي راجعين مصر ياخذك معاه قول يارب بس يبقى فيه حد نازل بكره.

- أني معارفش اجولك ايه والله يا....، اسم الكريم ايه صحيح؟

- أخوك تَمَام، ماتقولش حاجة يا عم داخنا ولاد بلد واحدة

- أخوك طلال، الله يكرمك يا تَمَام.

- هاسيبك خمس دقائق بس اظبطلك فرشتك وآجي.

- اتفضل يا زوج!

لأول المرات منذ حين يشعر ببعض الراحة. قد يكون السبب الأكبر في ذلك وجود مصري في طريقه منذ أيام تسعة، أشعره بقرب

لقيا من تركهم هناك في بيوت العش. بشكل ما لا يعلمه سمع صوت السيارة تقطع ذلك الطريق الأسفلتي من جديد، عائدة عبر الحدود لقرى الصعيد. طعم (طبخ الفول) المتطفل على لسانه يستشعره بكل تفاصيله، رائحة (الصابون أبو ريحة) في شعر اختيه الصغيرتين حين يحتضنهما بعد كل عودة من أرض الحاج مهني، ملمس ريشة الأملس حين يرتمي في حجره مداعبا إياه ببعض كسرات الخبز، آذان الفجر في مسجد العش، ضوضاء أخيه ومشاجراته على مقهى العش، شبح منزل الحج مهني الكسير منذ أكثر من عامين.. كل شيء ساهم بريشته في رسم جزء لا بأس به من لوحة العودة الآخذة في احتلال أكبر جدران مخيلته... صدق من قال إن ماضيها يملك لأحلامنا أسباب الحياة والموت كليهما!

- طلال، يلا الفرشة جاهزة!

- ماشي يا كبير.

قالها وقَامَ إلى حيث أشار، يسبقه تَمَام الذي أثره على نفسه معدا له فراشه الخاص. ارتمى طلال على الفراش دون تفكير بمجرد رؤيته.. تسعة أيام بلا نوم مريح ربما تكون سببا مقنعا لتصرفه ذاك. ابتسم تَمَام لرؤيته على هذا الوضع، قبل أن يغلق عليه الباب والأضواء، تاركا إياه وجوانب لوحته في لقاء سيطول حتى الصباح!

(المسألة باتت واضحة، الرئيس مبارك فضّل مصلحة الوطن على أي اسم وعلى أية مصالح أخرى)... إحدى المحسوبات على الإعلام، عقب الخطاب الأول لمبارك، قبل موقعة الجمل بساعات.

(كلمات الرئيس مبارك دي قيمة هتوصل لأي إنسان مصري وهترشق في قلبه، دخلت قلبي أنا شخصيا، والذي يطمئنني أنا حاليا هو وجود شخصيتين مثل اللواء عمر سليمان والفريق أحمد شفيق في الصورة، الاثنين وطنيين ومديرين ناجحين مهنيين)... أحد المحسوبين على الإعلام عقب نفس الخطاب.

(صوتي محجوز لجمال مبارك لانه ابن جيلي وهيعمل انجازات لمصر)... أحد المحسوبين على الإعلام قبل ثورة يناير.

(الرئيس مبارك هو الذي توعد بملاحقة الفاسدين، الرئيس مبارك هو الذي قال الوطن هو الباقي أما الأشخاص فزائلون، انا عايزة كل اللي في الاستديو يصقفوا للرئيس)... إحدى المحسوبات على الإعلام ما بعد نفس الخطاب.

(انا بحب محمد حسني مبارك، هاقولها دلوقتي وهاقولها دايمًا ولا أخجل من ذلك)... أحد المحسوبين على الإعلام بعد الخطاب (إياه)

(لو تنحى مبارك هنضيع)... إحدى المحسوبات على الإعلام!

(أنا باحبي الرئيس مبارك انه أثبت للمرة الثانية بعد دوره الكبير في حرب أكتوبر انه قادر على تقدير اللحظة الحرجة اللي البلد بتمر بيها، أنا مش قادر اصدق الكلام ده انا باشكره)... أحد المحسوبين على الإعلام تعقيا على خطاب الرئيس المخلوع.

(واقف جنب قوات الشرطة لقيت واحدة ست عجوزة معاها شنطة بتقول انها رايحة تزور قبر جوزها بيفتشوا الشنطة لقيوا فيها ١٥ الف جنيه داخله بيهم المظاهرة، شوية ولقينا نفس الموقف اتكرر مع واحد فلسطيني داخل المظاهرات ومعا ١٠ الاف جنيه)... أحد المحسوبين على الإعلام

(عمل ايه حسني مبارك عشان تمشوه؟)... ممثل بعد خلع مبارك (فى يوم هنبوس جزمة الراحل ده، مبارك ما يستاهلش مننا كده)... أحد المحسوبين على الإعلام ما باكيا يعلق على الخطاب المعروف. (أنا نفسي بكره يروحو ميدان التحرير يمسكوا عشرين واحد ويشوفوا بطايقهم، هيلقوهم دخلاء وقابضين)... ممثل ما بعد موقعة الجمل.

(يا بتوع ميدان التحرير من بكره هاطلع مظاهرة لأن مش حسني مبارك اللي يحصل فيه كده)... أحد المطربين (مبارك خدم ٣٠ سنة للبلد، ٣٠ سنة وطنية، ما يصحش تبقى انت

رب الأسرة ويجي ابنك يقلك مش هدخل البيت الا لما تخرج منه، بأي منطق؟... مبارك كان أب لكل المصريين والراجل ماشفناش منه غير كل خير يا جماعة ماشفناش منه حاجه وحشة)... إحدى الممثلات.
(كلنا بنقول نعم لمبارك، مش متخيل حد غيره يكون مصيرنا في ايده.. هو اللي محافظ على أمننا ربنا يخليه لينا، - يضيف ببكاء- الأب ده كان طالع يموت عشاننا في ٧٣ كان كل همه المصريين، هتفضل ابويا يا ريس هتفضل ابونا كلنا وهنفضل نحبك وانت حبنا وانت في دمنا)... أحد المطربين.

(غدر برمز كبير خدم البلاد ٣٠ سنة)... ممثلة ما.
(مبارك شخصية وطنية وجزمته فوق راسي)... ممثل ما.
(ميدان التحرير هو سبب الخراب الذي تمر به مصر الآن)... أحد الملحنيين واصفا ميدان التحرير أنه ميدان نجس.
هكذا كان دعم إعلامي مصر ونخبته لثورة الخامس والعشرين من يناير للعام ٢٠١١.

عن أبي هريرة رضي الله عنه عن النبي صلى الله عليه وسلم أنه قال (سيأتي على الناس زمان سنوات خداعات: يصدق فيها الكاذب ويكذب فيها الصادق، ويؤتمن فيها الخائن ويخون فيها الأمين، وينطق فيها الرويضة. قيل يا رسول الله وما الرويضة؟ قال: الرجل التافه

ينطق في أمر العامة)

حقا إنه يؤلم الأحياء لا الموتى.. كم هي عميقة تلك المقولة لأحد العارفين بالحياة المتحدثين عن الموت. سمعها قبل الآن بزمان، فمرت على بصره بين السطور مرور الكرام متجاوزا إياها لجملة أخرى في سطر آخر.. هل عادت لتعاقبه على إهماله إياها قبل سنوات؟، هل كان ساعتها آثما لتلك الدرجة، ليكون العقاب فقدان صديق؟، هل كانت الكلمات بتلك القدرة التي تستطيع معها الانتقام منه على إهماله محتواها ذات يوم؟.. كم كانت قاسية كلمات السطور، وكم كان مسكينا هو ذلك الجالس وحيدا، في أركان حجرة طالما ضجت بضحكات الراحل وقفشاته. (مش هاهون عليك).. دوت الكلمة في أذنيه دوي الرصاص.. بدت كأنها الكلمة الوحيدة التي خاطبه بها صديقه الراحل طوال سنوات، وقد محت ما سواها من كلمات. كم كان صادقا حين قالها، هل كان يعلم أنها آخر مرات اللقاء، فأثر جعلها جملة الوداع؟.. يعلم أن شاهين كان ماكرا بدرجة تجعله يمازحه حتى في آخر لحظات بقائه في ممرات الحياة.. كم كنت قاسيا يا صديقي المرح، قاسيا على غير عهدي بك، حتى في أقسى لحظات مزاحك. هل هان عليك ناصر لتتركه هكذا وحيدا دون أحد يتولى بعدك مهمة جعله ينفجر غيظا وسط ضحكات الحضور؟.. هل هان عليك جعله

يظهر في الصور الفوتوغرافية دون أحد يتولى مهمة إضافة قرنين بسبابته ووسطاه وسط قهقهة ملتقط الصورة؟، هل هان عليك تركه دون أحد يتولى مهمة ضربه بإحدى وسادات الحجرة حين يقول شيئاً غيبياً وسط ضحكات البقية من سكان حجرتنا تلك؟ هل هان عليك، وهان عليك، وهان عليك؟.... أيها المهرج الحكيم قتيل المسرح وسط ضحكات المتفرجين، هل حقاً اختطفك شاهين إلى جوارك عقاباً له على ذكر قصتك بين رواد الميدان؟.. هل ألهمته بها لتكون آخر قصصه المروية بين سكان الأرض، قصة مهرج لم يهتم بأحزانه أحد.. هل ذكرك بنفسك حين مات على مسرح أكبر وسط متفرجين أكثر؟.. هل حقاً سيُنسَى مثلما نسيت، منتظراً أحد المهرجين القادمين بعد عقود يعيد ذكر القصة وأبطالها؟... دعك من صحبته يا صديقي القديم، مازال في الحياة من يهتم لأمرك رغم كل شيء، مازال هنا مجموعة يلجأون لبراح الحجرة التي أسستها إلى جوارهم قديماً ذات يوم... عد يا شاهين... عد يا صديقي القديم!

لم يملك بعدها ناصر إلا دموعه يكمل بها رسالة الرثاء المبعوثة إلى صديقه الراحل في براح الميدان الكبير. أوشت الصور بين يديه على التمزق من فرط تبديلها بين أصابعه، حتى حجبها عن عينيه في نهاية الأمر دموعه، مطرزة غشاوة أحكمتها على عينيه المستحيل لونها

للون الدماء.. ما زال كل شيء بذهنه حاضرا دون نقصان، ذلك البلطجي صاحب الحصان، صديقه الواقف أمامه، السيف يستقر في رقبة شاهين، الدماء تملؤ بقعة لا بأس بها من بقع الميدان، هرولته خلف القاتل تارك حصانه في الشوارع المحيطة بالميدان، الرعب في عيني القاتل الناظر خلفه، ليرى مطارده المصر على الفتك به، نجاح الهارب في النهاية من الفرار بطريقة بدا أنه يتقنها، تلك الملامح الحاضرة في ذهنه بكامل تفاصيلها تأبى النسيان، منتظرة يوم الانتقام، عودة ناصر للمستشفى الميداني للاطمئنان على حال صديقه، تلك البقع من الدماء الملطخة لأكواب عم صبري المهشم معظمها، البكاء الهستيري للجميع عند المستشفى وثمة جثث ثلاث ترقد تحت ملاءات بيضاء، كلها إشارات تنبؤ بأحداث أربعه مجرد تصورها، أسماء الجثث الثلاث تدوي في أسماعه على لسان أحدهم (طالب من السويس وعم صبري وشاهين)... ممتاز، فقدت مصر أمل طالب، ودعوة عجوز، و... مرح أحد الظرفاء!

في سكون الليل الشاتي المعتاد دوما على التسلية بأجساد أهل حارة الشوريجي المتجمدة من فرط برودته، دخل متخفيا على غير عادته، يلف وجهه تماما بـ (شال) يخفي معالمه باستثناء عينيه المتألفتين ببريق الخوف. تسلل عبر ضيق الحارة كصرصار هارب

من ضوء الشوارع، وهو القاضي كل حياته في ظلام البالوعات، في سرعة لم تعهدها منه سلالم البيت الطينية المعتادة دوماً على أثر كبير لقدمه، تتركه مع كل خطوة يخطوها مستنداً إلى سور درابزين السلم وفي يده سيجارة تنتظر شفتيه تنهيان المقطع الأخير لأغنية هابطة قبل أن تستأنف رحلتها معه من جديد. الليلة لم تكن كسابقاتها على كل حال.. بانفعال شديد ضرب باب حجرته، ليجد ذلك الشاب البادية عليه علامات الخلل العقلي يتأمله مفزوعاً، وبعض اللعاب يلعب على شفتيه. اقترب منه، ضمه إلى صدره، تسلل غريب لبعض الطمأنينة إلى قلبه من إثر الاحتضان، كأن البراءة المتكومة في قلب شريك حجرته باتت ملجأه الوحيد للعودة للإنسانية من جديد. المشهد لا يكف عن التكرار في رأسه.. بقعة الدم الكبيرة على سيفه، الذي ألقاه في النيل، ضحيته الساقط في دمائه ممسكاً رقبته متأوها آهة انخلع لها قلبه قبل أن يسقط قتيلاً، قفزته من فوق الحصان واندفاعه لشارع طلعت حرب هارباً، أحدهم يطارده وفي عينيه رغبة أكيدة في إلحاقه بضحيته، نجاحه في الهروب بحذاقة يتقنها.. وأخيراً احتضانه ذلك المريض البرئ.

- عمدة!

قالها ذلك الداخل عليه مسرعاً، يستقبله صديقه قائماً يقول:

- عرفة! اتأخرت ليه يا بني آدم؟

- اتأخرت ايه يابا دانا يادوب قفلت معاك وجيت، خير ايه اللي
حصل مالك وشك مخطوف كده ليه؟

- أنا قتلت!

- إيه؟، يخرب بيتك!

- لا ماهو أنا مش جايبك تقطمني هتعمللي فيلم يبقى تخرس
وتغور من هنا.

- يا عم اهدا بس انا اصلي استغربت الكلمة احنا كنا متفقين نعمل
مع بعض كل حاجة في الدنيا الا القتل ده!

- يوووووووووووووه

- خلاص يا عم ما قصدش، امتى وازاي حصل الكلام ده ومين
اللي انت قتلته ده؟

- النهارده الضهر في التحرير، عيل من بتوع الثورة، حاول
يمسكني قتلته.

- قتلتك بلاش منها الطلعة دي ده العيال ضربوا الداخلية بجبروتها
بالجزمة، طب بس اهدا كده وصلي عالنبى ما حصلش حاجة فداك
يعني يا صاحبي الداخلية دلوقتى مش فاضية أساسا تدور على حد دول
نفسهم العيال دي اصلا يولعوا بجاز داننا عملت معاهم خدمة العمر.

- مش الداخلية اللي قلقاني!

- أمال مين؟
- واحد من اصحاب الواد كان بييجري ورايا.. أول مرة اخاف من حد بالطريقة دي!
- هاهاهاها حتى وانت في عز البلاوي بتهزر الله يحرقك.
- أنا مابهزرش!
- لا والله!، ومن امتي عمدة بيخاف ان شاء الله؟، ويوم ما يخاف يخاف من عيل زي ده؟
- ماعرفش، ماعرفش أي حاجة، كنت حاسس ان أسد اللي بييجري ورايا مش بني آدم!
- طب بس هدي نفسك ده بس من الخضة بتاع الواد اللي اتقتل، انا رأيي تستكين شوية كده وتتدارى احتياطي برده لحد الدنيا ماتهدا!
- لاء!
- لاء ازاى؟... او مال هتعمل ايه؟
- أنا هادخل الجيش!
- نعم يا روح أمك؟
- اللي سمعته!
- طب سيبك ان انت ماعندكش أخ ومش هينفع، هتدخله ليه؟
- الجيش دلوقتي هو اللي ماسك الدنيا ومظبطها عسكري الجيش

بيترفعه ألف تعظيم سلام في الشارع، واهو فرصة ابعدي ستين ثلاثة
عن سكة الواد ده، أنا حاسس انه هيطب عليا في أي لحظة هنا.

- للدرجادي!!.. لدرجة انك تتحامي في الجيش؟، يا عم اوصفلي
الواد ده ونا اروح التحرير اصفيه ونخلص.

- مش عايز كلام كتير مالوش لازمة، أنا خدت القرار خلاص.

- طب خليني معاك للآخر هتدخل ازاي؟

تلقاها عمدة باسماء قبل أن ينظر لذلك الجالس المريض إلى جواره
لتتسع ابتسامته قائلا:

- عمدة عمره مايغلب يا ض!

الحركة الأخيرة

يا عم الظابط انت كداب
واللي بعثك كداب
مش بالذل هاشوفكم غير
أو استرجا منكم خير
انتوا كلاب الحاكم
واحنا الطير
انتوا التوقيف
واحنا السير
انتوا المصوص القوت
واحنا بنبنى بيوت
احنا الصوت ساعة ماتحبوا الدنيا سكوت

عبد الرحمن الأبنودي

عام آخر جرت به عقارب ساعة الحياة في غفلة من سكانها.. أي
ماكرة هي وأي لعوب أرقامها، بطيئة حين تريد وتمتطي صهوة العجلة
حين تريد.. تحفز أسباب الحياة، ثم تباغت بالموت وتدفع أسباب
الموت لحظة بزوغ دوافع الحياة.. كم من مصائر تعلق برحمها تنتظر
الخروج لنور التحقيق بين تحفيزها ومباغتتها ودفعها لمعادلات البقاء
والفناء.. لا زال التغيير ستنها القائمة، وسيظل مادام في جسد العقربين
روح تدفع دفعتها لشاطئ النهاية، مهما استغاثت بها صرخات الغرقى
في لجج الحياة.

المزيد من الصور أضافت إطارات لها قسرا في معرض ذكرياته
الكبير. طريق ابتلع إحدى الجثث المودعة للحياة من بوابة ضربة
شمس، ملاءة شاركت الجثة رحلة الابتلاع لباطن الأرض، خريج
عنونه الصمت، وذيل رحلته البكاء لأصدقاء نشيد وطني لم يلبث أن
تلاشى في خضم ضوضاء ثروات الجنوب، ضحكة بورسعيدية مازالت
رغم الغربة تنعم بطيف أمواج القناة بين دفتيها على وجه عبده الأسمر،
غناوي الصعايدة الصادحة بألحانها المغروسة في طين الصعيد في
أوقات الراحة والعمل، أحلام الليلة الأخيرة في فراش تمام، بطء
الساعات في طريق العودة للشمال، الخطوة الأولى في ممرات العش،
زهرات القطن اللامعة في أرض الحاج مهني من مدخل القرية، شجار

عم حسني مع زبائنه في فرشة الكانتو، أذان الظهر في مسجد العش، صوت وردة المتألق بين شجيرات القطن، رائحة خبز أمه الخارج لتوه من الفرن القابع في ركن الصالة عارية الأثاث، الذي استقبله قبل خطوات من المنزل، صرخة أمه لمرآه وارتمائها وأختيه في أحضانه، غمزة صابرة مشيرة إلى سطوح المنزل، سعادة هنية بحلوى أخيها الموفي بوعد، نومة ريشة فوق فخذه وهو يداعب جلده الأملس بيديه حاكيا له ما كان من أمر رحلته، برودة استقبال أخيه له بسلام من طرف أصابعه من فوق كنبه في جانب الدار، رحلته الأولى بعد العودة للمنزل الكبير الذي شهد غياب والده قبل أعوام ثلاثة يسترق النظر إليه منتظرا شيئا لا يعرفه، هروبه من الانتظار إلى براح الحقول، جلسته إلى جوار كيزان الذرة وبراد الشاي تحت الجميزة.. كل الصور مازالت عالقة بجدران المعرض ترفض الانسحاب.

- أمّا اني عملاّلك بجى حتة كوباية شاي انما ايه، ماعملتهاش بجالي ييجى عشرين سنة.

قالتها الأم قادمة تحمل كوبا زجاجيا بعمر ابنها على أقل تقدير، وعلى وجهها ابتسامة أعادت ولدها من ترحال ذكرياته الطويل. انتبه لها فبادلها ابتسامتها بمثلها، مقبلا يدها حاملة الكوب ملتقطا الكوب قائلا:
- تسلم يدك يا ست الكل.

- تسلم من كل ردي يا ضنايا.
ثم استطردت:
- جوللي بجى، النصاب كان سرحان في ايه؟
قابلها مداعتها بابتسامه تعرف أنها مزيفه، أعقبها صاحبها بقوله:
- ولا حاجة هاسرح في ايه غير الغيط والشغل؟
- على فايجه بردك يا ولد عزوز؟
من جديد قابلها بابتسامته، قبل أن يستطرد قائلاً:
- هاكون سرحان في ايه بس يا أم علي؟ ماني زي الفل أها!
- شكلك خايف من موضوع التجنيد ديّ.
- ولا خايف ولا حاجة اني بس شاييل همكم هاسيكم لمين دول
٣ سنين.
- ربك ماهينساش حد يا ولدي، وبعدين هما ٣ سنين سفر يعني؟،
مانتا هتروح وهتاجي، الواد سيد ابن عزيزة كان بياجي كل سبوعين
يعني ماهيو طولش.
- ربنا يجدم اللي فيه الخير يأمّا، اللي مصبرني بس على كل ديّ
الجرشين اللي هاجبضهم هناك، ٢٣٠ جنيه بردك هيسندونا شويّ.
- ربك بيسهلها يا طلال، اتكل انت عليه بس وهتلاجيها مشيت
لحالها.

اجولهلوك.

- خير يا حاجة؟

- البلد كلاتها عند بيت الحاج مهني بيحولوا الشيخ بدر رجع!
سمعها، فانتفض ساكبا في طريقه كوب الشاي، مر سلا إياه للأرض
شظايا ممسكا بأخته من كتفيها قائلا:

- بتجولي ايه؟

- بجولك الشيخ بدر رجع، الشيخ بدر رجع!

مازلت حتى اللحظة جاهلا سبب ما حدث، أبدا لم أتوقع وجودي
هناك، كما لم يتوقعه أحدهم، لكنها حياتي غريبة الأطوار، التي لم
تكف يوما عن إحداث المفاجآت، فاجأتني - كما فاجأتهم - بوجودي
هناك أنتظر مثلهم الموت. هكذا أخبرني ناصر يومها، وهو ينظر لصورة
شاهين على هاتفه، يحبه هذا المسكين ويفتقده حد الجنون.

الصورة بكامل تفاصيلها لازالت هنا، اجتماعنا وسط الميدان
في حلقة دائرية أشعلها حسام بقصائده وكيمو بأغانيه... لكنها على
ما يبدو افتقدت شيئا ما، تمثل في قفشات أحدهم رحل قبل شهور
عشرة، وأكواب الشاي في فرشة آخر رافق الأول مشوار الرحيل.
اجتماع الشباب عند الحائط الأول لشارع محمد محمود، وقد أعملوا

فُرُشهم وألوانهم في الحائط وما تلاه من حوائط، يسطرون التاريخ باللوحات. أصوات طلقات الرصاص تنجرف بصحبة الغاز المسيل للدموع من فوهة بعيدة في نهاية الشارع الكبير العامر بقدر عظيم من الجلال لم أعرفه في مثله قبل الآن.. لافتة قماشية كبيرة في مدخل الشارع (المتحف) قائمة (ممنوع دخول الإخوان)، عمليات الكر والفر بين المتظاهرين وقوات الأمن، الرجال فوق الدراجات النارية يتولون إيصال المصابين للمستشفى الميداني القابع في مسجد عمر مكرم، أو حتى داخل الشارع المتأجج بالنيران، هتافات (يسقط يسقط حكم العسكر) و (مدنية مدنية) تهز أركان الميدان، إصابة شافعي بطلقة خرطوش في قدمه إثر الاشتباكات، الذعر الذي خيم على الجميع من تكرار مأساة شاهين، ركعتا الشكر لهؤلاء الجميع بعد إسعاف صديقهم (وصديقي) في المستشفى الميداني، رفض ذلك المصاب ترك الميدان رغم إصابته، انعزال حسام في لحظات هدوء المعارك منفردا بورقه وأقلامه، وأخيرا عودتي في نهاية كل يوم وسط تساؤل من أمي التي أخفيت عنها أمر تواجدي هناك، وابتسامة مصحوبة بغمزة من والذي العالم بكل شيء. أبدا لن أنسى تلك الأيام هناك، في ساحة الميدان الكبير.. أبدا لن أنسى هؤلاء الذين كنت بصحبتهم هناك.. أبدا لن أنسى، وكيف لي وبعض الأماكن في ذاكرة البشر محظور على النسيان

مجرد العبور أمام أسوارها.

- التاسع من يناير ٢٠١٣... معسكر (س) الحدودي... الساعة الثانية صباحا!

رقعة شطرنج خشبية، تراحمت فوق خلاياها قطع فريقين يتعاركان، بدا على أسودهما أنه صاحب الكلمة العليا في ساحة القتال، وكأن ما يدور فوق الرقعة السوداء البيضاء ليس إلا تجسيدا لما حوته أسوار ذلك المعسكر الحدودي من أحداث سنوات تعاقبت فوق رماله وبين أحجاره وتحت شهادة أجياله، طغى فيها السواد تماما على البياض.

جلسا متقابلين، تفصل بينهما تلك الطاولة الصغيرة المُنَوَّجة برقعة الشطرنج، وكوبين تراقصت بداخلهما أمواج مشروب دافئ أعدّه ذلك الواقف على باب الحجرة من الخارج، ينتظر أوامر أخرى يقوم بتنفيذها، وقد قارب النعاس على إصابته بالانهيار.

- كش ملك!

- طول عمري أقولك يا مؤمن ان استعجالك الحكم عالاًمور ده بيخليك تخسر معركتك في آخر لحظة رغم انك في أوقات كثير بتبقى أقرب للمكسب من خصمك!

قالها باسمها في خبث معروف عنه، يهتز لمقاتلتها شاربه الكثيف

وشفتاه الغليظتان، وما زالت نظرتة الباسمة في حدة، والتي يعرف عنها الجميع أنها سابقة للدغة من لدغاته مركزة على جليسه، قبل أن تتحول مع حركة يديه الواثقة بين قطع الشطرنج كقدمي راقصة باليه تغازل مسرحها بإيقاعات الإبداع قائلاً:

- كش انت بقى يا حضرة النقيب!

ثم عاد بظهره إلى ظهر كرسيه في ثقة، يشعل إحدى سجائره إمعانا في تحطيم معنويات خصمه، الذي انشغل عن كل ذلك بفرك ذقنه واتساع عينيه الحائرتين بين جيشي الرقعة في تركيز تام، قبل أن يعلن ظهره العائد لظهر مقعده استسلامه، رافعا باطن كفيه في وجه صاحبه باسمًا يقول:

- راية بيضا يا سيادة الرائد!

- هاهاها... على الله بس المرة الجاية تتعلم ان الاستعجال بيودي

صاحبه في داهية بقى.

- بقولك ايه يا باشا.

- قوللي يا سيدي.

- ماتسبب العسكري اللي واقف بره ده يروح ينامله ساعتين قبل

طابور الصبح، ده مانامش من امبارح ولسه هيكمل شغل بكره مع زمايله يعني يومين تقريبا من غير نوم، الواد كان هيقع من طول له وانا داخله.

- يا حراااااااا، اهي طبيتك دي مع العساكر هتنتهي مشوارك في الجيش قبل أوانه بعشرين سنة!

- مش طيبة ولا حاجة، بس أصل وجوده مالوش لازمة مش هيفيدنا في حاجة.

- مالوش لازمة!... مالوش لازمة ازاي؟... افرض طلبت معايا اشرب شاي، أجيب أمي تعمله؟

- وتوقف الواد بالساعات وهو في الحالة دي عشان كوباية شاي ممكن تحتاجها وممكن لأ؟

- مؤمن!

قالها مغضبا بعض الشيء، حين لاحظ في نبرة صديقه الذي يليه في رتبته بعض الامتعاض، قبل أن يستطرد بلهجة أقل حدة:

- يا مؤمن يا حبيبي العسكري في الجيش زي السوستة، طول مانتا دايس عليه ومكتفه هيفضل تحت طوعك، تسببه يتنظر في وشك انت أول واحد!

- يعني يفضل هو من بين كل زمايله اللي واصل يومين ببعض؟!

- يا سيدي ولا تزعل نفسك... نصحيله كل زمايله يونسوه، انت جيت في جمل يعني!

قالها بنبرة حملت استهزاء المعتاد من كل شيء، قبل أن تتحول

نبرته للهجة الأمر في غضب، وقد علت حتى اخترقت الباب لأذان
الواقف خلفه قائلاً:

- انت يلا ياللي عالباب... ولا!!!

- أوامر يا فندم... أوامر!

قالها المسكين مرتاعاً وقد فتح الباب في لمح البصر مليياً النداء،
طارداً كل فلول للنعاس بقيت بين أجفانه. يأتيه الأمر:

- روح صحي الصول حُسَيني وخلية يجمعلي كل العساكر...
بسرعة يا روح أمك أنت لسه هتستغرب؟!

انطلق العسكري كأنما تلقى الأمر من عزرائيل يتوعده باقتناص
روحه في حالة عدم التنفيذ... أسرع إلى حجرة الصول حُسَيني الملاصقة
لعبير الجنود قائلاً من بين أنفاسه المتلاحقة:

- صول حُسَيني، صول حُسَيني اصحى، صول حُسَينا!!!!!!اي!

- ايه؟... في ايه؟

قالها حُسَيني في فزع العائد من كابوس، قبل أن ينتبه لموقفه إلى
جواره، فانفجر فيه قائلاً:

- ايه يابن المجنونة ده؟ انت اتجننت يا ض؟ ازاي تدخل عليا كده

هي عزة أبوك؟ فيه ايه؟ الحرب قامت ولا ايه؟

- اصحى يا عم حُسَيني الرائد وائل بيقولك صحى العساكر كلها

واجمعهم قدام المكتب عنده بعد ٤ ثواني!

- قالك بعد ٤ ثواني؟

- يوووووه يا عم حسيني انجز بدل مايولّع فينا بجاز انت عارفه ده
دماغه يادوب على مقاسه.

- الله يحرقك انت وهو في يوم واحد يا بعيد.

قالها حسيني وهمّ لارتداء زيه الميري في زمن لا يتعدى الدقائق
الثلاث، قبل أن يتوجه لعنبر الجنود يتبعه ذلك العسكري الممتلئ
ببعض السعادة من جراء إفزع الحسيني وإغضابه، وهو الذي طالما
أذاقه وزملاءه كأس العذاب بكل نكهاته. طرق باب العنبر مضيئاً نوره
بشكل أفزع الجميع، كما كانت حالته قبل قليل، فتعلقت أنظارهم بذلك
المقتحم مقر مبيتهم، قبل أن يتبته الجميع لذلك الصوت القادم من آخر
فراش في العنبر:

- مين ابن الكلب اللي فتح النور ده؟، الساعة ٢ بالليل يا بغل فيه
ناس نايمة مش بهائم!

- هسسسس يخرب بيتك ده الصول حسين!

نهبه بها أحد القرييين منه في السرير المجاور، قبل أن يرد من
جديد قائلاً:

- مش تقول من بدري يا بني آدم سايبني لحد مافوّرت أمه كده

وبعدين بتقوللي هس، دانا كنت قربت اضربه سكينه في كليته.
قالها بصوت خفيض، قبل أن تعلقو نبرته من جديد يرغب في
إسماع ضيفه الثقيل:

- عم حسيني منورنا والله، أوامرنا يا غالي!
- العنبر كله جامع قدام مكتب الرائد وائل بعد ٥ دقائق بالضبط
وعماد جامع عند السجن ويجهز بالعفريته الزرقا لحد ما جيله.
- زرقا زي وشك الله يجحملك، انا كنت نايم وحاسس انها ليلة
مش هتعدني على خير
من جديد قالها بصوت لم يسمعه غيره، قبل أن يمثل لكلام أمره
يزفه سؤال زميله:

- خير يا عم حسيني ليه الجمع ده الساعة ٢ الصبح.
- انت بتناقش الأوامر العسكرية يا جندي بيادة! طب يلا اجمع مع
البيه اللي سبقك عالسجن، ها أي حد تاني عايز يونسهم ولا حاجة؟،
جرى ايه يا عساكر رمم انا هاتحايل عليكم ولا ايه؟، قوم فز منك له.
علت بها نبرته بشكل ملحوظ، أرغم الجميع على الانصياع
لأوامره، ترمقه نظراتهم بشيء من الاستكانة وكثير من الكراهية، غير
أن نظرة واحدة كانت ذات معنى مختلف، أته من خلفه لذلك المغادر
للتو لسجنه، قائلًا يصاحب نظره بحديثه لنفسه:

- بقى أنا العمدة اللي كانت الشوريجي كلها بتقفلي انتباه يبجي ده ويعلم عليا؟، ماشي يا دنيا، انا وانتي وهو والزمن طويل.
(ملحوظة: عسكري الشطرنج قد ينخدع بالكثير من مظاهر توقعه في متاعب لا طاقة له بها، لكنه أبدا لا يفقد الأمل في تخطيها، مهما فاقت قدراته!)



ها قد عادت الضوضاء من جديد للبيت الكبير، عاد البدر للظهور مجددا في سماء العرش، بعد غياب استمر ثلاث سنوات، طغت فيها عتمات الليل على جنبات القرية الساقطة من ذاكرة الوطن الكبير. ساحة المنزل باتت مرتعا للبيّساء من مواطني البلدة، يتطلعون لرؤية ولدهم العائد بعد هجرة لمكان لا عودة منه لأحياء.. الزغاريد تملأ المكان، رقص الخيل على أنغام المزممار الصعيدي العتيق، صواني الفتة القادمة من كل البيوت لساحة الدار، في وليمة أعدها أهل القرية لأهل القرية.. رقص الرجال بالنباييت وتناطحهم بها، صوت وردة يصدح بالشدو وسط القاعة الكبيرة مجتمع النساء... ثمة امرأة جلست في ركن الحجرة تجاهد دموع عينيها، شارد ذهنها في ذكرى مرت قبل أعوام ثلاثة، في أحد مقرات أمن الدولة، عادت بعدها بصحبة جثة أمها، ونظرة أخيرة لأخيها العائد من جديد!

- جرى ايه يا حاج ماهنشوفش سيدنا الشيخ ولا ايه؟
 قالها أحدهم لذلك العجوز الجالس على كرسيه المتحرك يراقب
 الجميع بقلب مازالت فرحته تعاني بعض الشوائب، فاكثفى بابتسامة
 أظهرته أكبر من سنه بأربعين عاما إضافية، فتولى آخر الرد:
 - يا راجل سيبه يرتاح شويّ ده تلاجيه راجع هلكان. بعد كده
 ماهنسيوشي ولا حتى خمس دجايج.

- عنديك حج والله يا صبري بس نعملو ايه بجى الواحد من كتر
 مالشيخ بدر متوحّشه هاین عليه يطلع يجيبه من فوج يجعد معاه سنة بحالها.
 - ومين سمعك يا ولد أبوي، بس الصبر طيب بجى.. كُلُّ كُلِّ جَبَلٍ
 مانظلعوا من المولد بلا حمص.

- هاهاهاهاها، طول عمر لسانك متبري منيك.
 تعثره في طريقه عدة مرات، قلبه الموشك على الهروب من صدره
 نجاة بالباقي من دقائقه بعدما أوشك على الهلاك من فرط اللهاث،
 جيبه اللامع بحبات العرق كأنما عاد لتوه من رحلة لباطن الشمس،
 (مداسه) المحال للون التراب من كثرة ما التقطه من غبار الطريق،
 جلبابه المربوط في طرف لباسه (البفتة) الممتد حتى أسفل ركبتيه
 بقليل ليعطي نفسه المزيد من حرية حركة تؤهله لاقطاع بعض الدقائق
 من زمن الذهاب يستغلها لرؤية شيخه العائد للحياة.. الزحام في ساحة

الدار الخارجية لم يكن ليعنيه في شيء، ربما لم يدركه وعيه المشغول برسم لوحة لحظات اللقاء الأول مع صديقه الشيخ الشاب، انسل من بينهم إلى الداخل دون أن يراه أحدهم، كان يعلم أنه سيُمنع من رؤيته الآن إن حاول، نظرة سريعة ألقاها على الأب القعيد الجريحة فرحته، بهدوء تسلل إلى السلم الخشبي الصاعد إلى حجرة شيخه التي طالما جالسه فيها مازًا بحجرة النساء. لأول مرة يلفت انتباهه شيء غير صوت وردة، أوقفته عيناه عند تلك الجالسة في طرف الحجرة صامتة، تتعلق عيناها بشيء آخر غير موجودات الحياة المرئية أمام الجميع من سكان البيت الكبير، كأنما سافرت روحا إلى عالم آخر، وبقيت جسدا في عالمهم ذاك.. عيانا سترتا خلفهما الكثير من مشاهد أعادت نفسها للظهور من جديد، في عالم انفرد بتلك المسكينة وانفردت بها. من مكانه رأى دموعها المخبوءة خلف ستار العينين.. حقا، إن المستتر من العبرات لا يلحظه إلا المعتادون على ستر مثله!

تجاوزها كعادته مع الحياة وعادة الحياة معه محطاتٍ ترك في عربات قطاره الكثير من العلامات، بتأنٍ شديد تخطى الدرج ثم الممر الصغير إلى غرفة الصديق العائد من جديد، قبل أن يفتح الباب في هدوء! أكثر ما كان يذكره عنه أنه عاشق للضوء، يمقت الظلام أكثر من أي شيء (النور ده من أسماء ربنا يا طلال، نور جلبك بذكر ربنا ينور لك

كل حاجة)... قفزت الجملة إلى رأسه فجأة، كأنها رسول عقله الباطن يعينه على لقائه به. قالها له ذات يوم بعد صلاة الفجر في مسجد العش، وهما يتأملان معا بزوغ النور الرباني من مملكة المشرق من إحدى نوافذ المسجد الحديدية الخضراء. لا يبدو الآن أنه مازال على عهد العشق والمقت، على ما يبدو أن سنوات اختفائه قد غيرت فيه الكثير. الظلام لا يكاد يسمح لأحد برؤية شيء... رغم ذلك لمحّه متكوماً في ركن الحجرة الظلماء، ككوم لحم انتزعت الروح منه، ظهره مستند للحائط، وقد ضم ركبتيه إلى صدره مطوقاً إياهما بذراعيه، لامعة عيناه كأنه المحتمي بجلسته تلك من وحش يوشك على افتراسه بعد لحظات يقترب ولا يراه سواه.

اقترب منه طلال بحذر ممزوج برهبة لم يعهدها قط في علاقته به. غير أن شيئاً ما يطفو على السطح الآن غيّر الكثير من الأمور بشأن الصديق العائد بعد غياب.. شيء ما منعه من الارتقاء في حضنه، كما كان ينتوي. تأمل وجهه أكثر، اختفت اللحية شأنها شأن شعر الرأس والحاجبين، تحت عينيه الجاحظتين برزت بعض الدوائر الزرقاء، أثر خطين باهتين يمتدان من عينيه لحافة ذقنه، من أثر دموع كُثِرَ لازمته ليالي الوحدة المقيتة في مكان ما، رعشة خفيفة في كفيه اللذين برزت عظامهما وعروقهما بشكل ملحوظ. بدا أنحف كثيراً من ذي قبل، جسد

بالكاد يكفي لحيازة أعضاء تلهث خلف نبض الحياة محاولة اللحاق
بركبه على غير إرادة صاحبها الزاهد في كل شيء. لم يكن هذا بكل
تأكيد شيخه الباسم الذي فارقه قبل أعوام ثلاث. كان شبحا سخيفا، لا
يحمل أكثر من أساسيات ملامحه.. ثمة مسخٍ مرعبٍ أشبه بالأشجار من
سكان الفضاء احتل مكان الغائب الذي لم يعد.

لم يعد بدرٌ هنا من جديد، استحال محاقا اختفى في عتمته كل ما
سبق من ذكريات الماضي الجميل!

- شيب... شيب... شيخ بدر.

قالها بصوت مبحوح صارعته الدموع حتى صرعته، استمرت
نظراته المليئة بالكثير من كلم يريد أن يصل لمسامع المستمع المنطوي
دون أن ينعم برد، فاستمر بحديثه إليه:

- حمدلله عالسلامة يا سيدنا، اتوحشناك كلاتنا جوي.

من جديد غاب الرد!

- صحيح ماجولتلكش، مش آني خدونني في التجنيد؟ بجيت
جندي خلاص زي اللي هياجو في الطريق إلى إيلات، ماهتفرحش
لاخوك لصغيرٍ وتجوله مبروك ولا ايه؟

-

- بص... بص آني جايلك معايا ايه!

قالها ودسَّ يده في جيب جلبابه يخرج بعض الحلوى، مقتربا بها من ذلك الجالس في ركن حجرته، وقد بدأت عيناه تزدادان تعلقا بذلك المقترب نحوه في رعب، يحاول تحاشيه بقدر ما يستطيع، قبل أن يرفع ذراعه فوق وجهه ورأسه محتما منه. منظره هال ذلك المقترب، فثبت كشجرة أصلها ضارب في الأرض من سنوات ألف.. لم يعد يجد من مناسب الكلمات ما ينطقه، عجز لسانه عن إيجاد المزيد في جعبته، فتوقف وتولت عيناه الكلام. وقف حيناً يتأمله بدموعه دون صوت يدوي في أرجاء الحجرة غير صوت شهقاته مصاحبة دموعه، وصوت تلاحق أنفاس بدر المرتعدة من اقتراب ذلك الـ... الغريب!

الكثير من ذكريات الماضي البعيد افترست رأس طلال بأشبع ما يكون.. اللعنة على ذكريات ماضينا، دائما تتطفل علينا بزياراتها في الأوقات الخطأ. رغما عنه بدأ في التفهقر شيئا فشيئا، وعيناه لا تزالان معلقتان بشيخه الأثير. فتح الباب بهدوء، بعدما أيقن أن صديقه القديم لم يعد بعد. ألقى عليه نظرتة الأخيرة المشبعة بدموع الفراق، ثم أغلق خلفه... وغادر!

بخيبة أمل نزل الدرج المضاء بأنوار الاحتفال التي جهزها محبو الشيخ من بيوت العش. مظاهر الحياة تقترب منه أكثر فأكثر كلما ابتعد عن تلك الحجرة مجسدة الموت.. أصوات الأهازيج تعبت بأذنيه من

جديد كلما نزل درجة، كأنها إشارة القدر لابتعاد البهجة للأبد عن تلك الغرفة التي تركها قبل لحظات. بعينه الدامعتين لمح تلك الجالسة في ركن الحجرة، مازالت شاردة مع مشاهد فيلمها القديم. الآن فقط عرف السبب، من جديد غادر... بانتظار عودة الشيخ الغائب منذ سنوات ثلاث. شيء ما داخله مازال مصرا أنه عائد للديار يوما!



مجددا عادت الحجرة لضوضائها. كانت تفتقد شيئا ما رغم تلك الضوضاء العائدة لصخبها من جديد. شيء مازال عالقا بأذهان الجميع يأبى النسيان.. شيء شارك كل اللوحات إطاراتها، وقاسم كل الأهazيج ألحانها.. شيء لازال محتفظا بمكانه في جميع الأركان. ذلك الشيء القابع هناك إلى جوار أحدهم تحت الثرى، رحل وصاحبه قبل شهور. لا زال شاهين هنا، لازالت ضحكاته تؤنس وحشة المكان المرتدي ثياب الحداد حتى الآن.. لازال يعبث مع الجميع في أركان وطنهم الصغير، الذين يجتمعون فيه منذ أعوام، حاضرا بصورة في هاتف ناصر الفاشل في النسيان، دأبه دأب الجميع.. لازال حاضرا في تلك الصورة المضافة بعد رحيله إلى أحد الجدران، تحفها شريطة سوداء.. لازال شاهين ينعم بينهم ببعض لحظات الحياة. بعض بقايانا تظل متشبثة بأهداب الحياة، لا تصاحبنا لترات القبور،

تكتفي باستدعائنا كل حين لدنيا الأحياء بجملة (الله يرحمه) تجري على لسان أحدهم، حين تمر في رأسه صورة مشهد قديم اشتركنا وإياه في بطولته. عن شاهين، لم تكن مجرد جملة تجري على لسان ذلك الـ(أحدهم). تخطى الأمر تلك الجملة بمراتب عدة، كانت محصلتها النهائية أن شاهين... لازال ينتظر الموت، بعد أعوام لا تقبل التعداد. عن الجميع انعزل منفردا بهاتفه. كان منظره آخذاً في التغير، لحيته النابتة بشكل غير مهذب، شاربه على نفس المنوال، هندامه الذي لم يعد ذا أهمية ملحوظة له كما كان، انعزاله عن الجميع بهاتفه العامر بصور الراحل، لحظات شروده وثأر عقله الباطن من عدو مازال يطارده حتى الآن منذ عام كامل، يستحضر صورته بكامل تفاصيلها استعداداً ليوم الانتقام. الحقيقة الوحيدة التي بات يدركها الجميع... أن ناصر لم يعد هنا مجدداً!

- هتترحلوا امتى ان شاء الله عالجيش يا رجاله؟

حسام كان السائل.

- يوم ٢٢ ان شاء الله يا شاعر، اسبوعين في المدني بعدين سنة

ميري بقى ان شاء الله.

تولى إبراهيم الرد، فاستمرأ حسام قوله:

- ربنا معاكم يا شباب ان شاء الله، الحمد لله ربنا تايب عليا وواحد

الاعفا بقالي ييجى خمس سنين.

- أرزاق بابا.

- بس يا ض يا شافعي ... جهزتو حاجاتكم؟

- حاجات ايه؟

هنا تولى شافعي الرد ساخرا:

- قصده الصن بلوك وكريم تفتيح البشرة والحاجات الحلوة دي.

- بتهزر؟ ... مانتا معايا في نفس الطلعة ولا انت يعني هتتجند في

مول العرب؟

- مجند عن مجند يفرق يا بني انت مش شايف الفرق في الفورمة

بيننا عامل ازاي؟

- آه نسيت انا موضوع الفورمة ده معلش.

فصل باسم بين الصديقين، تظله ضحكات الآخرين، حتى انتبه

حسام وشافعي وإبراهيم لمعتز القائل:

- لحد امتى هنسيب ناصر في الحالة دي؟

قالها آسفا، وعيون الثلاثة مازالت معلقة بهذا الجالس وحيدا

هناك، بصحبة هاتفه وصوره وذكرياته مع ساكن الهاتف والصور.

- أنا مقدر إحساسه يا جماعة انا عشت المعاناة يدى قبل كده

وعارف يعني ايه تفقد حد عزيز عليك.

- يا جدعان شعور ناصر مش مجرد حزن على شاهين، ناصر
بيفكر ليل نهار في الانتقام
من الواد اللي قتله ده.
- انتقام!... انتقام ازاي؟
قالها شافعي، يظل قوله بحاجبيه المتقاربين يعكسان دهشته. يأتية
رد صديقه:
- من يومين كده اتكلمت معاه لوحدا قاللي كلام كتير كده انه
مش هيسيب حق شاهين وانه فاكر شكل الواد وهيجيبه يعني هيجيبه
وكلام كده.
- مش هينفع نسيبه كتير على الحالة دي على فكرة.
- هنعمل ايه طيب أكثر من اللي عملناه وبنعمله؟
- مش عارف، بس أكيد فيه حل ده قَرَب يتجنن.
قالها شافعي وسكت بعدها، لينتبه الجميع لصوت طرقات الباب.
نظرات بعضهم لبعض كانت مؤشر الاستغراب الأبرز، تبودلت بينهم
النظرات ومازالت الطرقات تشاكس بابهم في هدوء. قام حسام إلى
عين الباب السحرية يرى من خلفها، قبل أن يعود مجددا للجميع
بنظراته الموحية بشيء ما
- فيه ايه يا حسام مين عالبا؟

-

- فيه ايه يا ابني ماتفتح!

تلقى حسام الأمر، ففتح الباب على استحياء ناظرا لهذا الطارق الذي لم ينتظر دعوة الدخول كثيرا.. مدَّ يده إلى حسام مصافحا، قبل أن يخطو للدخل ملقيا السلام على الجميع، ويجيئه الرد منهم في شيء من البرود، أعقبته دقيقة صمت أشبه بدقائق الحداد، فقام معتز إليه مرحبا يرغب في رفع الحرج قائلا:

- اتفضل يا كفافي ايه أخبارك واه كل الغيبة الطويلة دي هانت عليك العشرة قوي يا جدع!

قابلها ذلك الداخل للتو بابتسامة خفيفة طفت على سطح شفثيه في تكاسل يقول:

- ربنا يخليك يا معتز كلكم ليكم وحشة والله بس شوية مشاغل كده أخرتني الفترة اللي فاتت دي

- إيه اللي جابك؟

فوجئ بها الجميع من ناصر القائم يقف في مواجهة كفافي، المقابل لها بزفير طويل ناظرا للأرض في إشارة لعدم رغبته في المواجهة، فاستطرد ناصر:

- حنيت لقعدة البلطجية ولا ايه؟

- ناصر مالوش لازمة الكلام ده.
- قالها كفايي، فرد ناصر بانفعال:
- أو مال ايه اللي ليه لازمة؟
- قبل أن يعود لهدوء مصطنع قائلاً في سخرية:
- آه صحيح نسيت، كراسي البرلمان.. يا جدعان مش حد يفكرني، بس يلا معلش بلطجي بقى ومخي على قدي.
- ناصر انت عايز ايه؟
- انت اللي عايز ايه؟... جاي ليه؟... مش احنا البلطجية اللي قلتو علينا عايزين يخربوا البلد؟... جاي تقعد معنا ليه؟
- وبعدين؟
- فاكرد؟
- قالها ورفع هاتفه في وجه مخاطبه مستطرداً:
- فاكرد شاهين؟، شاهين اللي انت بإيدك شيلته لحد المستشفى الميداني ومات بين ايديك؟، فاكرد اصحابك الإخوان اللي شالوا يوم الجمل على اكتافهم واتدبحوا في الميدان و لولاهم بعد ربنا كان زماننا كلنا أموات؟، تعرف ان شافعي كان هيبقى ده نفس مصيره في محمد محمود؟، وقياداتك في الإعلام بتقول الجيش والشعب ايد واحدة، فاكرد ولا نسيت؟

- واضح ان انت اللي نسيت، محمد محمود انا كنت معاكم ليل
نهار ماسبتش الميدان، مش معنى ان قياداتي عارضوا النزول اني كنت
معاهم. كان مطلوب مني ايه تاني أكثر من اني أنزل زي زيكم واعصى
الأوامر انا وشباب غيري كثير؟

- تسبهم!

قالها بصوت علت نبرته، ثم استطرد قائلاً:

- ناس قالت على اخواتك اللي كلوا معاك عيش وملح وعاشوا
معاك حلم التغيير بقالهم سنين بلطجية، وقالوا عليك انت كمان، تفضل
مكمل معاهم ليه؟، اديني سبب، سبب واحد اقدر اقبلك تاني بعده؟

- عشان مش خطأ عملوه هيقطع علاقتي بالكيان اللي اتربيت فيه.

- يا سلاااام، برافو عليك والله أقنعتني هات حضن بقى!

قالها ناصر ساخرا، ثم استمرأ حديثه بلهجة الجدية قائلاً:

- الخطأ ده كان فيه دم اخواتك، ولو الكيان ده اتربيت فيه
فاصحابك دول كلت معاهم عيش وملح، نزلت معانا ومازلت مقتنع
باللي قالوا علينا بلطجية، طب اصدقك ازاى؟ اصدقك في أي حاجة
بعد كده ازاى؟، انت كده شايف نفسك صاحب مبدأ؟

- واضح ان كلامي معاك مش هيجيب نتيجة يا ناصر.

- دي حقيقة وعشان كده انا عندى حل جميل جدا... مش عايز

اعرفك تاني... اطلع بره!

- ناصر!

قالها شافعى المتدخل أخيرا في الحوار، فأتاه رد ناصر:

- لو ماطلعش بره دلوقتي انا هاخرج ومش هتشوفوا وشي تاني!

- ماشي يا ناصر، انا هاخرج وتأكد انك مش هتشوف وشي تاني،

بس في يوم من الأيام هتعرف انك ظالمني.

قالها كفافي وهَمَّ بالخروج، وسط نظرات الجميع المكتفين

بمراقبة ما يحدث، عاجزين عن أي تدخل. فتح كفافي الباب وخطا

خطوته الأولى للخارج، فتبعه حسام للخارج قائلا:

- كفافي... ماتزعلش من ناصر انت عارف حالته عاملة ازاي من

ساعة موضوع شاهين ده.

- حصل خير يا حسام مافيش مشكلة، أنا هاستنى لما يهدا ان شاء

الله ويبقى لينا قعدة تانية.

- انت فين أراضيك دلوقتي؟

- موجود أهو والله مشغول شوية في أنشطة الحزب والدعاية

للانتخابات وكده.

- ربنا يوفقك.

- ربنا يخليك... يلا سلام عليكم.

- وعليكم السلام!

(ملحوظة : منطق (فرق تسد) يبقى أنجح وسائل الأنظمة القمعية
للاحتفاظ بالسلطة بتغير الأزمنة وتباين الأنظمة واختلاف الشعوب...
من يفرقهم هم أول معاونوه على تفرقتهم، تلك للأسف على كل حال!)

حياة لم تعد كالحياء، ما أشبه أيامه الآن بعد كل ما كان بأسرة
المستشفيات الحكومية، لم تعد تتقن إلا وداع زائريها لعالم الأحياء!
مجددا عاد لسطوح منزله وجلسه يسامر ريشة.. على غير عادته
مُنِعَ الكلام، اكتفى بوضع الفأر الأبيض الصغير على فخذه، ممررا كفه
فوق شعره الأملس، ناظرا القمر بعيد في سماء العشب يعاني عدم اكتماله.
لأولى المرات يلحظه على هذا النحو من الخنوع، راغبا في الاكتمال
وتمنعه الطبيعة، آملا في اللعان وتأبى الطبيعة الإنعام عليه به، لم يعد
ذلك القوي الذي طالما عشق بسمته في ليالي حلمه، واستعان بأمله في
ليالي يأسه، وأفضى له بشكواه في ليالي كبته المقيت.. البدر في حياته
الآن بات مدفونا في حروف ثلاث...ك...ا..ن!

- ماخبرش هافضل أودعك كل شوية اكده لحد ميتى يا صاحبي،
ليلتين واسيبك تاني لجل الجيش، بس ماتخافش، البت صابرة خابرة
زين هي هتعمل ايه في غيابة.

بصوت ضعيف يفهمه طلال فقط، وحركة دؤوبة يعلم عنها أنها تنبئ بالغضب والحب كليهما، بادله ريشة وداعه بوداع أحر منه. الحيوان ربما يعلم عن مشاعر الفطرة مالا يعلمه البشر أنفسهم. أودعه جحره من جديد، ألقى على سماء العش نظرة لم تمتعه كسابقاتها.. لم يشعر أنه رغب في إطالة النظر إليها كما هي عادة كل ليلة.. ثمة شيء سلبه راحة النظر إليها، يرقد هناك خلف جدران البيت الكبير!

أخيرا حان وقت المغادرة.. مغادرة أخرى تضاف لرصيد قديم، أتخيمته مغادراته للآخرين ومغادرات الآخرين له. لحظات الفراق لم تعد سطرا غريبا على صفحاته بأي حال، جلبابه البني ذو الأكمام الواسعة وفتحة الصدر الممتدة لمنتصف بطنه مظهرة صديره الأبيض - أو هكذا كان لونه قبل أن يستحيل للصفار حزنا على رحيل صاحبه مريض الكبد قبل سنوات - حذاؤه الميري المتقمص دور الخل الوفي، وهو الملازم صاحبه سنوات المعاناة الثلاث، بقعته رفيقة رحلة الجنوب، و... بعض الحلوى في جيب جلبابه العتيق!

- أشوف وشك بخير يأمّا

قالها وأعقبها بالتقاط كفيها يقبلهما

- توصل بالسلامة يا ضنايا، خلي بالك من نفسك.

- ادعيلي يأمّا... ادعيلي كثير

- دعيالك من كل جلبي يا طلال يابن بطني.
- من جديد عاد لتقبيل كفيها، وأطال التقبيل، قبل أن تضمه لصدرها
ضمة أودعت فيها كل ما تملكه من حنو.. وجزع!
- ان شاء الله ما أطولش عليكم النوبادي، عيجولو معسكر التدريب
اللي اني رايحه ده زين كل العساكر اللي فيه دكاترة ووسايطهم تجيلة
بيرحوا المعسكر كله على حسهم.
- فاكّر نفسك دكتور اياك، طب تعالى... تعالى اكتبلي حاجة
للسخونية يا بشحكيم حكم حرارتي عالية من صباحية ربنا.
- انتبه لها قادمة من خلفه، ممتطية مطية الاستهزاء. نظر لقائلها
الواقف مستندا بظهره إلى الباب ويداه في جيب جلبابه الأزرق.. اقتصر
رده على زفير حار ينبئ بضيقه، أعقبه بقوله المقتضب:
- الله يسامحك.
- بدل ماتجوم تسلّم على اخوك وتاخذه بالحضن وتشيل حاجته
توصله بيها لحد محطة الجطر؟
- تولت بها الأم دفعة الحديث، فكان رد ابنها:
- اشيل حاجته؟... كانه صغير في اللفة، هاشتغله شيال على آخر
الزمن أني ولا ايه؟
- ربي وجلبي غضبانين عليك يا علي يابن بطني... ربي وجلبي

- غضبانين عليك طول ما انت بالجساوة دي!
- لا... لا يامًا اوعي ابوس يدك كله الا غضبانة عليه دي!
- قالها طلال بشيء من الانفعال الفطري، فكان رد أخيه:
- يا واد انت يا حنين يابو جلب بفتة بيضا.
- روح يا علي شوف مصالحك... روح ياخوي الله لا يسيئك.
- وانت بجى اللي هتجوللي روح وماتروحش ولا تعرفني مصلحتي فين؟، الجوالب نامت والانصاص جامت يا جدعان.
- استغفر الله العظيم، اللهم طولك ياروح، إنت عايز مني ايه دلوك يا علي؟ داني سايلك البلد كلها وماشي حرام عليك!
- أني أعوز منك انت؟... انت؟... تيجي ازاى دي؟
- هو انت ايه؟، ما هتتحسش؟ اللي في ضلوعك ده جلب ولا حجر؟ مش مكفيك اللي احنا فيه؟ مش كفاية عايش في دنيا لوحذك وسايينا نحارب الدنيا لحالنا اني واخواتك؟ اتجى ربنا فينا بجى، اتجى ربنا حرام عليك!
- قالتها الأم وأتبعته ببعض دموع لم تستطع لها حبسا، فضمها طلال إلى صدره ناظرا نظرة ذات معنى لأخيه، الذي أسكتته الكلمات حيناً ليس بالقصير. قبل أن يحاول فاشلا تدارك الأمر بقوله:
- خليكى اكده في صفه على طول الخط، كانه هو بس اللي ولدك

وَأني لجتوني على باب جامع... والله مانى جاعدلكم فيها.
قالها وانصرف مغلقا الباب خلفه في عنف، تلاحظه عيون الجميع
في حنق ارتبط بحبهم للآم الباكية على صدر ابنها
- معلهش يأمًا حجك عليا اني، مسيره ربنا يهديه.
- يسمع من بجك ربنا يا ولدي... يسمع من بجك ربنا.
- ان شاء الله هيسمع، ادعيه وادعيلي ويّاه.
- دعيالكم من كل جلبي يا ضنايا.
- يلا أني هاتوكل على الله بجى يدوب كده الوجت أّزف، اشوف
وشكم بخير.

قالها وقبّل جبين أمه وكفيها، ثم احتضن أختيه وأودع جبينيهما قبل
مماثلة، قبل أن يتبّه الجميع فزعين لذلك الصوت المنخلعة لسماعه
قلوبهم، تنبّهم بكارثة ما لم يعلموا عن حقيقتها شيئًا بعد... ثمة صراخ
قادم من البيت الكبير!

بات أكثر ألفة من ذي قبل. بدا ذلك جليا في كل شيء، أجوبته
المتخلية بعض الشيء عن غموضها، تخلّ لا يفي كثيرا بالغرض،
لكنه مريض بشكل ما على كل حال.. استطارده في الحكي
بشكل عجزت عن مقاطعته فيه. كان شاعرا بكل شيء،

متقمصا كل شخصية، مستحضرا كل موقف، لم يعد مجرد راوٍ يستعيد أحداث سنوات مضت.. كان أشبه برحالة متمرس الترحال، يتنقل بين مواطن ذكرياته كأبرع ما يكون.

كما هي عادتنا، فصلتنا طاولته القديمة المتوجة برفيقتنا الثالثة، رقعة الشطرنج. أنهينا للتو مباراتنا الـ.....، مللت التعداد في حقيقة الأمر، النتيجة معروفة على كل حال، وإن كان مستوأي يشهد تقدما ملحوظا، كما قال لي، على مقعده المتحرك استوى سائدا ظهره، يلهب صدره بأنفاس سيجارته، ناظرا إلى ضحايانا الباقيات على الرقعة ذات اللونين بزهو اعتدته منه وأصبحت ابتلعه ممتعضا:

- انت مين علمك شطرنج؟

- اتعلمته لوحدي.

- لوحذك؟!

- آه لوحدي ايه المشكلة؟

- مش القصد بس غريبة شوية، اتعلمته في وقت قد ايه؟

سمع السؤال، فضاقت عيناه ناظرة إلى فضاء بعيد عبر نافذته المتهالكة يستعيد من ماضيه مشهدا ما.. أعرف منه هذه النظرة اللعينة، وأعلم أن وراءها غموضا ما، لن يفصح عنه.

- اتعلمته يوم العركة!

- يادي يوم العرکة!
- ايه؟ زهقت منه للدرجادي؟
- هو انا كنت عرفت هو ايه عشان ازهق منه؟
- هتعرف... مسيرك تعرف.
- وامتى هتحن عليا بالمعرفة دي؟
- مش لما نخلص حكايتنا مع سرباز الأول؟
- لا والله... قال يعني انا عرفت الأولى لما هاعرف الثانية!
- ماتستعجلش.
- لأ مستعجل.
- هابدأ أشك في ذكاءك على فكرة.
- بزفير يأس معتاد أجبتة، قبل أن أتبع زفيري بقولي:
- ممكن اعرف ليه؟... ولا دي برضه هاعرفها لما نخلص سرباز
والعرکة؟!
- لا دي مش هاقولها خالص!
- شكرا!
- بغیظ أجبتة!
- العفو!
- بيرود أجابني:

- مستفز!

بحق حاولت أخذ حقي..

- عارف!

بلامبالاة سلبني متعة أخذه

-

- أكمل، ولا تهطلنا كثير؟!

- كمل!

- لاعبني دور شطرنج الأول!

- ده تاسع دور نلعبه النهارده، انا صوابعي نملت!

- خلاص روح شوف حد يكملك بقى.

- أوففففف

قلتها وهممت برص القطع في مواقعها مستسلما، أنظر بغيظ

لعينيه الباسمتين في سخريّة، قبل أن يستطرد قائلا:

- كنا بنقول ايه؟!

هل حقاً أصبحت ذلك الطبيعي الذي يظنون؟.. هل غدا كل ما
مضى عبثاً لذاكرة شاخت، فكفّت بشيخوختها عن العبث؟.. لماذا لم
تعد صورتها مُلحّة تزعجني بضجيجها المريح بإيلامه، المؤلم براحته

كسابق الأيام؟ لماذا لم تعد ذكراهم رافعة راية سيطرتها على رأسي
المستعمر لسنوات بحكمها كما طال عهداها بي؟ هل قرر النسيان أخيرا
إنهاء قطيعتنا بعمر السنوات؟ هل أهلكته أعوام معاركنا معا - كما
أهلكتنني - فقرر أخيرا الانسحاب؟.. اللعنة على كل تلك الـ (هل)، أما
أن لها أن تُسجن واستفهاماتها في سجن من سجون الجحيم؟
لا أعلم إن كنت حقا نسيت، أو أنها من جديد تلك الرحلات
المؤقتة خارج وطن الوفاء لذكريات الراحلة والراجلين. لا بأس...
ما زالوا هنا رغم كل شيء، أشعر بوخزات ذكرياتهم من حين لآخر،
تعاقبني على التشاغل عنهم بأي جديد. حتى متى سأظل هذا الكائن
غريب الأطوار، طبيعي فقط حين يكون بين الناس، ثم لا يلبث أن
يرتدى عباءات الغرابة حين تضمه وذكرياته جدران حجرة قميئة، تقبع
هناك في آخر شقته فسيحة الأركان؟ لا بأس، سأنتظر وأنتظر ولن أمل
الانتظار.. من يدري، ربما شملتني إحدى الإجابات بعطفها يوما ما!

- دي بقيت عيشة تطهّق!

- ايه يابني مالك فيه ايه؟

- عماد بيه... عماد باشا... سيادة اللوا عمادا!

- عمدة؟... ماله؟

- عمل أورنيك عيادة تاني، وجدد الراحة بتاعته من الخدمات والطواير!
- تاني!... ده بقاله شهر عالحال ده مقضيها أرنيك مضروبة.
- وطبعاً احنا العبيد اللي هنشيل خدماته... مش كفاية اشيل خدمة يوم ويوم هنشيلها كل يوم لحد ما يجيلنا تسليخات وهو قاعد نايم في العنبر كأنه جاي يصيف.
- يعني هو جديد علينا؟ ماهي ماشية كده، مادام مالکش ضهر هنا هتتداس بالجزم.
- وآخرتها ايه؟... أضرب نفسي بالسونكي بقى عشان ارتاح ولا ايه؟
- إن كان عاجبك وعاجبنا... هتعمل ايه يعني؟
- هاروح للوصول حسيني اقول له، ولا هو بس فالح يعمل علينا أسد في التمامات والطواير؟
- حسيني! هاهاهاهاهاها
- بتضحك ليه؟
- انت لسه جديد بقالك يدوب شهرين هنا، لما تقدم شوية هتعرف ليه.
- الله لا يسيئك يا صبري مش ناقص شغل أفلام، قول وخلصني بدال ما تسييني على عمايا كده البس في الحيط.
- يابني عماد هنا مسيطر أكثر من أي حد، حاطط الحسيني تحت ضرسه من ساعة ما وصل هنا من سنة بالضبط، هو العصفورة بتاع

الحسينى هنا، أخبار المعسكر كلها عند الحسينى من عماد، ولو فيه
عسكرى عمل حاجة من ظهر الحسينى ولا غلط فى حاجة يخللى
عماد هو اللى يتعامل معاه خناقة صغيرة يرميه بيها فى السجن ١٠ - ١٥
يوم غير الدعك اللى فى وشه من عماد بيه، تقدر تقول كده هو دراعه
اليمن النجس هنا فى المعسكر.. عماد بيقتضى جيشه على حس الليلة
دي، انت مش واخذ بالك ان هو الوحيد اللى دفعة أجازاته كل مرة
بتبقى زائدة عن باقى اللي نازلين يومين ثلاثة، وكل مرة حجة شكل...
أصل أبويا تعبان... اصل أمي عيانة... أصل أختي بتتجوز؟... ده من
ساعة ماوصل هنا واخته متجوزة بتاع سبع مرات!

- طيب... بس ليه الحسينى سجنه الاسبوع اللى فات لما الرائد
وائل جمعنا بالليل؟

- هاهاها مش باقولك جديد وعضمك طري، يابني دي حركة
أفلام كده قدامنا بس، والدليل أنه طلعه الصبح بعدها بكام ساعة، ده
بالعكس رحمته من تكديرة الوقفة فى الثلج فى نص الليل، خلّاه راح
نام فى الدفا فى السجن وطلع الصبح فايق بعد احنا ما استويننا تكدير
طول الليل.

- أنا هابلق الطباط، هاروح للتنقيب مؤمن وهو يتصرف.
- ده كان الحسينى طيّن عيشتك، سيبك من دور الثورة اللى انت

عائشه ده، احنا هنا مش في التحرير، ماحدث هيجيبلك حقل. وبعدين النقيب مؤمن محترم وطيب وكل حاجة، بس لسه جديد في المكان مחדش قوي على الجو ولا يعرف خباياه، الحسيني هيعرف يضحك عليه ويوصل له الصورة على مزاجه هو، وساعتها بقى يا حلو هيتفق هو وعماد عليك، وهتشوف أيام أسود من أسير في اسرائيل.

- خلاص هاروح للرائد وائل.

- يا ابني هو انت مصر على خراب عشك ليه؟ ... مين اصلا يا حلو يا رايق قالك ان الرائد وائل مش معاهم في الليلة دي؟

- ليلة ايه؟!

- ليلة العصفير... انت فاكركه مُغفَل مش عارف ايه اللي بيحصل في المعسكر؟

- يعني عماد بيعمل كده مع وائل بردو؟!

- مش بالظبط كده.

- مش فاهم حاجة.

- عماد كل التعامل بتاعه مع الحسيني، اتنين رمم زي بعض، انما وائل ماينفعلش ينزل لمستواهم ويبقى شريك مع عسكري وصول في كلام فارغ زي ده. الحسيني فاهم كده وعارف ان وائل سايبه بمزاجه، فيروح هو بنفسه ينقله الأخبار دى أو ييمثل انه ينقله الأخبار وانه

صاحي والتاني يمثل انه بيصدق عشان شكله قدام الصول والعسكري
اللي بيمثل انه مايعرفش ان الظابط بتاعه مايعرفش حاجة عن اللي
بيعمله.. تمثيلية كبيرة، كل واحد فيهم عارف دوره فيها ومايخرجش
عنه، وفي الآخر مافيش حد بيدفع تمنها غير الغلاية اللي مايملكوش
ضهر يتحاموا فيه زي وزيك... فهمت؟!

-

- يلا زي الشاطر كده بقى روح البس وجهّ نفسك عشان تشيل
خدمة أخوك عماد!

فوق السجادة الكبيرة في منتصف الصالة، كان اجتماع العائلة
الأخير، يودعونه قبل المغادرة. حقبة كبيرة أعدتها الأم مسبقاً،
وجلست إلى جوارها تحصي محتوياتها للمرة المائة وثلاثة عشر بعد
الألف، وسط ابتسامات باقي أفراد الأسرة الصغيرة ذات الأعضاء
الأربعة، يتبادلونها بعيداً عن عينيها المنشغلتين بإعادة ترتيب احتياجات
ولدها المستعد للرحيل..

- الشامبو، الغيارات، مَكْنُ الحلاقة، جِل الحلاقة، بودرة الرجل،
فوطه، سبراي مزيل للعرق، صابون وصبّانة، قَصّافة، شَبشب، قفل
كومبيوتر، كشكول، قلم، دي كده كل الحاجات اللي انت طلبتها، فيه

حاجة تانية كده ناقصاك؟

- لا شكرا يا ماما تسلم إيدك.

- تروح وترجع بالسلامة ان شاء الله يا حبيبي.

قالتها الأم وأوشكت دموعها على الانحدار تحتضن ابنها المغادر،
فعاجلها الأب مازحاً:

- إيه يا أم إبراهيم هو مهاجر؟

- مش متعودۃ یبعد عنی کثیر، وبعدين ده رايح جیش مش رايح یصیّف.

- یا حیہی! —

هنا تدخل الأخ ساخرا من أخيه الباسم في تكلف، قبل أن يعود الأب للجد من جديد قائلا:

- حاول بقى تستغل السنة دي في حاجة مفيدة ادرس حاجة أو ذاكر حاجة مثلا.

- ان شاء الله ربنا يسهل.

- انت ناوي على إيه أصلاً صحيح بعد الجيش؟

- ممم... مش عارف بالتحديد بس فى الغالب يعنى هسافر.

- تسافر!

- آہ ان شاء اللہ، حضرتک لیہ استغربت کدہ؟

- لا أبداً بس، ليه السفر؟

- وليه افضل هنا؟، ببساطة مصر مش عايزانا، مش عايزين نبقى ضيوف تُقال عليها.

- ضيوف!

- وتُقال!

- بس ده مكانش كلامك انت وزمايلك من كام شهر.

- ده مش كلامنا ده كلامها هي.

- كلام مين؟

- مصر!

- ممكن أسألك سؤال؟

- طبعا يا بابا اتفضل.

- بتحب مصر أكثر ولا أمريكا؟

- إيه السؤال ده؟... اكيد مصر يعني!

- اسمحلي أقولك ان دي مش الحقيقة، انت بتكره أمريكا عالورق

وفى التلفزيونات زي ما بتحب مصر عالورق وفي التلفزيونات، لو

جاتلك فرصة تسافر وتعيش هناك طول عمرك هتسافر، ولو جاتلك

فرصة تسبب هنا وتمشي ماترجعش تاني هتمشي، حب البلد عمره ما

كان عالورق وفي التلفزيونات يا صديقي العزيز، معادلة حب الوطن

أعمق من كده بكثير، انت كده بمقاييس الانتماء أمريكي مش مصري!

- هي اللي أجبرتني على كده، ده اختيارها مش اختياري.
- قصدك اختيارهم!
-
- اللي مش عايزينكم فيها، اللي مش عايزين يسمعوها فيها صوت حق، اللي اخترعوا تهمة حيازة ضمير...عرفتهم؟
-
- هروبك وهروب زمايلك واصحابك جريمة في حق البلد دي عمرها ماها تسامحكم عليه لا هي ولا الأجيال اللي جاية بعد كده!
- ده مش هروب!
- عندك ليه اسم ثاني؟
- ممكن نقول...تصحيح أوضاع!
- تصحيح أوضاع ليكم مش ليها.
- لينا احنا الاثنين.
- بتسمي وجودك براها تصحيح أوضاع
- طبعا!
- إزاي؟!
- مصر اتعودت على اللي هي فيه ده خلاص، لو شافت النور بعد كل العتمة دي هتموت من الصدمة، زي المدمن بالظبط، عارف علاجه

فين ومع ذلك مش عايزه، خايف من العلاج أكثر من خوفه من الموت، لا هو عايز يتعالج، ولا الديلر اللي بيعله عايزه يتعالج، ولا التجار اللي بيوزعوا للديلر عايزينه يتعالج، ولا المهرين اللي يهربوا للتجار عايزينه يتعالج، وهكذا لغاية أكبر راس بتستفيد من إدمانه، كلهم بيتآمروا عليه هو عشان مصلحتهم، وهو يوم ما يحب يعمل فتك ويستقوى على حد، يستقوى على أهله الغلابة عشان فلوس السم اللي يطفحه.. شبه مصر الخالق الناطق، مش قادرة تستقوى إلا على أهلها اللي طافحين الكوتة، الناس اللي عايشين يوم بيوم مستنيين الموت يرحمهم من اللي هم فيه! لم يجد الأب من مناسب الردود على قول ابنه المفعم باليأس أكثر من تنهيدة طويلة، أعقبها بقوله:

- منهم لله يابني اللي خلوكم تشوفوا الصورة بالسواد ده، حسبي الله ونعم الوكيل.

- مش هم اللي خلونا يا بابا، الصورة مرسومة من زمان، احنا بس اللي حاولنا نوهم نفسنا ونشوف صورة غيرها، اتضح ان الحيلة عليها صورة واحدة بس بلون واحد بس... حضرتك عارفه طبعاً!

-

- أنا حاسس ان احنا هنرفع علم مصر على ترابيزة السفرة كمان شوية ونغني بلادي بلادي، يلا يا عم اتكل على الله هتأخر خلي موجز

التاسعة ده لما ترجع ان شاء الله.

تدخل بها الأخ من جديد مازحا، فابتسم لها الجميع. اقترب من أخيه محتضنا إياه حاملا له حقيبتة، مترجلا أمامه إلى باب الشقة، منتظرا إياه حتى ينهى طقوس المغادرة من احتضان أبويه وتقبيل أيديهما:

- حد من اصحابك هيعدي عليك؟
- آه ان شاء الله شافعي لابس معايا في نفس معسكر التدريب هيعدي عليا ان شاء الله نروح مع بعض.
- خلي بالك من نفسك يا ابراهيم.
- حاضر يا ماما.
- وكلمنا أول ما توصل من أي تليفون.
- حاضر.
- وحاسب على نفسك وفلوسك وحاجتك ولاد الحرام كثير.
- حاضر والمصحف.
- أنهى بها الابن الأكبر الحديث باسماء، فابتسم له الجميع... ثم غادر!
- (كل حركة لعسكري الشطرنج بين مربعات الرقعة تؤدي في كل الأحوال لتغيير ما في مصيره و... مصير الآخرين!)

هل حقا مات بدر؟، هل حقا انتهت فصول القصة عند هذا الحد؟، كم كانت سريعة للحد الذي بدت معه كل ردود الأفعال سخفا

لا تفسير له. قديما، ضم هذا البيت أسرة لا تعرف من الأحزان أكثر من مسماها، يسمعون عنه في حكايات القدماء، المنذرة الكبيرة في ليالى القدر وعاشوراء ووقفتي العيدين، وليمة موسم القطن في ساحة المنزل الكبير، حيث اجتماع أهل العش احتفالاً بالمحصول المولود للتو للوجود، القلل الفخارية اللامعة ببللها على شرفة الحاجة الكبيرة الله يرحمها، زروع الريحان في الشرفة المجاورة لـ(الست الصغيرة)، صوت المنشاوي يصدح خلف ثالث النوافذ للشباب الراحل... ثمّة أسرة سعيدة كانت هنا يوما ما!

مجددا عاد الرحالة الصعيدي لترحاله، سفر آخر يضاف لقائمة الأسفار، ثلاث سنوات رابضة تنتظره هناك خلف أسوار القلعة العسكرية شاهقة الأسوار. غادر وفي رأسه تتوالى ومضات المشهد الأخير بكل تفاصيله، أصوات الصراخ الأول لازالت تئن داخل أذنيه، صورة الجسد المرتدي كفته في صندوق خشبي مفتوح السقف في رحاب المسجد يتلقى الوداع الأخير من أهل القرية في صلاة جنازته، شواهد القبور العامرة بقدر كبير من الرهبة لم يشته عن البقاء بعد مراسم الدفن لقراءة الفاتحة المُتلاة من لسان أو شك على البكم حزنا، وعينين قاربتا على العمى من فرط الأسى.. بقايا الحلوى التي تركها على قبره قبل المغادرة. رحل بدر... ومازالت صور ذكرياته هنا تعبث بذاكرة المجند الصغير.

أربع ساعات كانت كافية للوصول لآخر المحطات. أمام محطة مترو المنيب كان الوقوف الأخير للسيارة (الميكرو باص)، تتابع نزول راكبيها عقب الجملة المعتادة للسائق يختم بها كل رحلاته، بعد تهدئة صوت المطرب المتأمر على آذان الركاب طوال الرحلة بـ(مهرجان الست أم أحمد):

- يلا آخر يا حضرات.

الزحام الشديد للسيارات والمارة على جانبي المحطة كان السمة الأكثر تميزاً، محل الكشري المواجه للمحطة على الجانب الآخر ورائحة (الثقلية) المنبعثة منه تبعث على الغثيان، (كبدة اجنيه، سجق ١, ٥ جنيه) مكتوبة بلون أصفر باهت على زجاج عربة زجاجية ذات آوان ثلاثة متراسة داخلها يتصاعد منها بخار ذو رائحة لا تبدو مميزة لطعام آدمي، وقد انشغل أحدهم بملء بعض أرغفة (الفينو) بمحتوى الأواني الثلاثة. نزلة الكوبري التي تراصت في نهايتها السيارات مرسخة الحقيقة الأكثر وضوحاً في روتين المصريين اليومي (الطواير)، نصبة الشاي، لصاحبها عم جمعة إلى جوار السلم الخارجي للمترو، نزاع سائقي عربات الصعيد على باب المترو على أحد الزبائن الخارجين من المحطة العجوز بهموم روادها، حرب النداءات (بني سويف بيبا والفشن) (منيا سمالوط منيا) (بني سويف واحد يا استاذ) (نفرين

سوهاج يا بيه) (عشرة جنيه بني سويف شرق بني سويف)، هروب الزبون إلى زحام الشارع الكبير بحثا عن سفر هادئ (بعض الشيء) بعيدا عن حرب السائقين، (الحلوة من دمنهور بس احنا اللي عدينا السور) منقوشة على الزجاج الخلفي لإحدى السيارات المستعدة للرحيل، متخّم سقفها بحاجيات المتكومين داخلها، (الأمير عبد الله والدلوعة شهد) منقوشة على زجاج آخر لسيارة أخرى، تنازع الأولى في اقتناص راكب ينقص كليهما.. إحداهن من ذوات الثامنة تسمع لسعة (شبشبها) المتهالك للأرض في خطواتها السريعة، تحمل عبوات المناديل يمينها، في حين انشغلت يسراها بالهرش في شعرها البني الأشعث، تزحف تحت ماكينة العبور متخفية من رجال المترو، وقد أعدت حنجرتها وقائمة أدعيثها وتوسلاتها لرحلة يومية، ربما تجني في نهايتها بعض جنيهات قد تصلح لعشاء يبقّيها حية حتى رحلة مشابهة تخوض غمارها في صبيحة اليوم التالي، الزحام على شباك التذاكر وجملة (مافيش فكة) تتكرر خلف الزجاج بنبرة راغبة في تحطيم الزجاج، متبوعا برأس الواقفين خلفه...

- بجولك ايه يا أخينا، أروح الحلمية كيف؟

- انزل رمسيس وغَيّر يا بلدينا.

- أغَيّر كيف يعني؟... واروحها كيف رمسيس ديّ من أساسه؟

- يا عم ماتقرفناش بقى عالصبح مش ناقصين غباوة.
قالها وغادر متجهما غير عابئ بنظرات سائله المصدومة من ردة فعل لا يعلم سببها.
- اركب من عالرصيف ده يا باشا وانزل محطة الشهداء، ومن على نفس الرصيف هتلاقي يافطة مكتوب عليها اتجاه المرج اركب الخط ده وانزل الحلمية.
- قالها أحدهم المتابع للموقف عن قرب، فهمّ طلال بشكره، قبل أن يفاجئ كلاهما صوت عجوز قادم من يمينهما:
- اسمها محطة مبارك... محطة السيد الرئيس محمد حسني مبارك... منكم لله خربتو البلد.
- (إصرار بعض القطع في جيش الشطرنج على العودة لمربعات الرقعة الخلفية يدفع بالجيش ككل لمصير الفناء... المخزي)
- ربنا يديك الصحة يا عم الحاج... ربنا يحشرك معا ان شاء الله.
- آمين يارب هو انا اطول ابقى مع بطل اكتوبر؟... صاحب الضربة الجوية يا ناكرين الجميل يا خونة؟
- يادي الضربة الجوية... يا عم ياريتة كان ضربنا احنا الضربة الجوية وحكم اسرائيل ٣٠ سنة، مكانش ده بقى حالنا.
- ترضى حد يتكلم على أبوك كده يا قليل الأدب.

- طيب ليه الغلط دلوقتي يا عم الحج؟، وبعدين أنا أبويا لا حرامي ولا قاتل ولا شيخ منصر... موظف على قد حاله الحمد لله بيكمل عشاء نوم!

لم يكن بطلال حاجة لاستكمال ذلك الشجار حول الهوية الحقيقية لل... للمحطة!

انصرف مسترجعا وصفة الشاب المنشغل بشجاره مع العجوز العنيف، وقف على رصيف المحطة بانتظار القطار القادم، غير ملتفت للشجار الذي ضم أطرافا أخرى تناصر الجانبين. انتظر انفتاح الباب، قبل أن يتلعه القطار معلنا بدء الرحلة القاهرية الأولى!

رغم كونه راكب من أولى محطات القطار، إلا أنه لم يفلح في إيجاد مكان للجلوس. للحاق بتلك المقاعد خبرة خاصة لا يتقنها الكثيرون. وجد نفسه رغما عنه لاجئا إلى الباب الآخر المغلق للعربة، يستند بظهره عليه واضعا بقعته بين قدميه، وقد تعلق عيناه بتلك اللافتة البيضاء المستطيلة أعلى الباب المقابل، حاملة أسماء المحطات. طال بحثه عن الاسم موضع النزاع دون جدوى حقيقية، ثمة اسم في المنتصف تكاثرت حوله معارك الكلمات بشكل أنبأه أنه الاسم المراد.. أحدهم كشط الاسم الأول كاتباً إلى جواره (الشهداء)، ثانٍ بادلته كسطه بمثله معيدا أول الأسماء (مبارك) للظهور، ثالث

الغاية؟)، (عديني يا أستاذ لو سمحت عشان نازل)، (وهو انا عارف
اتحرك عشان اعديك دانا واقف في شبر)

زحام العبارات لم يكن بجديد على تلك العربة ومثيلاتها من
عربات القطار القديم، نداءات الباعة وتوسلات السائلين ونقاشات
المسافرين معا، كل شيء في مصر بات مرتبطا بالزحام، يبدو أن
وحشتها قد دفعت القاطنين فيها للاستئناس بأي شيء، حتى لو كان
استئناسا بالمتاعب!

في تمام الساعة، كان وصولهما بصحبة الأخ الأكبر لشافعي في
سيارته الـ (أوبترا). بسرعة غادرا السيارة مودعين إياه بسلام روتيني،
حاملين حقيبتيهما. دلفا من البوابة الحديدية الكبيرة السابقة لمساحة
رملية كبيرة فصلت البوابة عن المعسكر، تجاوزاها في ربع الساعة، ثم
كان التحاقهما بأمثالهما من جديدي المجندين الجالسين في مدرجات
أسمنتية، جلسا في آخرها منتظرين جديدا لا يعرفانه، وسط ضوضاء
طبيعية اعتاد عليها المصريون في غياب قائد يمنعها قصرا.

- ألاقي معاك ولاعة يا أخ؟

سمعها الثنائي قادمة من خلفهما، فانتبها لها. يتولى شافعي الرد:

- لا والله يا باشا مابندخنش!

- ليه؟

- ليه إيه يا معلم؟

- مابتدخنوش ليه؟

تبادل بعدها الصديقان نظرات الاستغراب الضاحك، قبل أن يعود

شافعي للرد:

- طيش شباب بقى بعيد عنك، ادعيلنا ربنا يهدينا وندخن قريب

ان شاء الله.

- ان شاء الله، الرجالة منين؟

- من القاهرة ان شاء الله.

- أنعم وأكرم، محسوبك عدلي من المنوفية.

- أهلا وسهلا.

- بالك انت يا برنس، انا كنت داخل الجيش ظابط، ابويا دفع

فلوس لعضو مجلس الشعب عندنا في البلد عشان ادخل حربية بس

ماعرفش يدخلني ابن الفقرية، بس اهو الحمد لله ربنا بردك عوضني

وهالبس الميري.

- انت بتحب الجيش قوي كده؟

- ان فاتك الميري اتمرغ في ترابه يا عمنا.

- آه تمام وماله، ربنا يوفقك يا معلم.

- الجيش ده أجمد حاجة في مصر هو الحاجة الوحيدة اللي لسه واقفة على رجلها، كانوا عايزين يوقعوه ولاد الكلب بس على مين الجيش روقهم.

- هم مين دول يا معلم اللي عايزين يوقعوه؟
- بتوع المنظمات الخارجية اللي بياخدوا فلوس من بره.
- أيوه اللي هم مين يعني؟
- يا عم انت مبتتفرجش عالتليفزيون ولا ايه؟
- لا والله انا اصلي مش إريال... قصدي ما عنديش إريال عشان اتفرج.
- بتوع محمد محمود والتحرير... العيال الشمال دي.
- كويس ان ناصر مش هنا كان فركك.
- ايه؟

- لا ولا حاجة... يلا ربنا ينتقم منهم هم هيروحوا من ربنا فين؟
- آمين.

- بقولك ايه صحيح، انت بتعرف تلف دراعك على ضهرك؟
- اعمل ايه؟... الف دراعي على ضهري ازاي؟
- تلف دراعك على ضهرك يا عم، اصل شايف العقيد اللي واقف

هناك ده؟

- أيوه شايفه... ماله؟

- من شوية كان بيقول اللي هيعمل الحركة دي هياخدوه ظابط
عشان دي حركة قوات خاصة.

- والله العظيم بتتكلم جد؟

- آه وحياة ولادي زي مابقولك كده، روحله قل له هيدخلك نقيب وقتي.
سمعتها ذلك المنوفي من شافعي، فتهلل لها وجهه منطلقا إلى
ذلك العقيد الواقف عند منصة يراجع الكثير من الأوراق بصحبة رتبة
أقل منه، وسط ضحكات إبراهيم الخفية التي كادت ترديه قتيلا. دقائق
من المتابعة للمحادثة التي لا يسمعان من كلماتها شيئا، لكنهما بدءا
في توقع نتيجتها من ملاحظتهما لحاجبي العقيد الآخذين في التقارب
في غضب، ونظراته الآخذة في تصويب نيرانها ناحية السائل، قبل أن
ينفجر فيه قائلا:

- غور يابن الجزمة ارجع مكانك هو أنا ناقص عاهات؟!

لو كان لأحد أن يقتله ضحكه لكانا أول الضحايا. انفجرا في
ضحكهما، يشاركهما فيه ثالث عن يمينهما للدقائق، قبل أن يتبدأ
محادثتهما قائلا:

- عاش يا رجاله والله.

- حبيبي، انت متابعنا ولا ايه؟

- من أول الحوار، عاش رجاله محمد محمود اللي بتاخذ حقها

أول باول.

- واضح ان الأخ من الرجالة.

- الحمد لله.

- يا ااا فرج الله دانا كنت خلاص قربت احس اني كنت لوحدي

هناك واللي حواليا ده كله كان جرافيك.

- هاهاها ليه بس يا عم عمر الشقي بقي الفكرة مابتموتش.

- على رأيك... اسم الكريم ايه بقى؟

- أخوك أسر... اسر عماد صديق، صيدلة اسكندرية

- زميل يعني، أهلا يا عم أسر اخواتك شافعي وابراهيم صيدلة القاهرة.

- بصرة، منورين يا رجالة.

- بنورك يا وحش.

استمر الحديث بين الثلاثة حينما قارب الساعتين، استثمروها في شغل

الوقت الذي تغنن المكان ومن فيه بتضييعه بكفاءة يُحسدون عليها. الملل

كان السمة الغالبة على الجميع، البعض افترش تلك المقاعد راقدا يطمع

في بعض دقائق النوم الذي استورده من ملله، بعض آخر اختار إضاعة

الوقت في رحاب (الكاتنين) يحتسون الشاي في أكواب بلاستيكية يرقد

السكر في قعرها ويفتقده أعلاها، يقلبونه بعصا صغيرة تحتوي من التراب

قدرا لا بأس به، يضيف للشاي نكهة خاصة يعرفها جنود الجيش.. بعض

ثالث اختفى من الساحة، متبرعا بالدم لبنك دم القوات المسلحة يجني من تبرعه، إضافة لثوابه الرباني، كيسا بلاستيكيًا يحوي علبتي عصير وخمسة جنيهاً. بعض آخر انشغل مع هواتفه متواصلاً مع أهله الذين غادرهم في الصباح لفترة لا يعلم تعدادها. بعضٌ غيره كان انشغاله بالهواتف لغرض آخر انحسر في التسلية بأغانٍ تبعث على القئ. وبعض آخر اختار قضاء وقته بصحبة كتاب قارب على إنجائه، بعدما سمح له وقت الانتظار بذلك. حتى أنعم عليهم أحدهم أخيراً بالنداء على تخصصاتهم، يصنفهم للرحيل! (البدايات دائماً تحمل مفتاح النجاح أو مزلاج الفشل. تعلق المرء بشخص أو بمؤسسة أو بمكان أو حتى بفكرة يعتمد بشكل كبير على انطباعه الأول عن كل هؤلاء. إذا أردت كسب انتماء أحدهم، فاجعل انطباعه الأول عنك... جيداً بشكل ما!)

أسبوعان... ربما كانت مدة كافية إلى حد كبير لتغيير بعض المفاهيم لديّ، الشعور بقيمة الكثير من الأشياء، التي ظننتها اعتيادية لا قيمة لها قبل الآن، باتت تقف على مسافة بعيدة خارج أسوار ذلك المعسكر اللعين، تخرج لسانها في سخافة شامتة بكل ما ألمَّ بي من معاناة جراء فقدائها. أساسيات الحياة هنا تختلف أولوياتها بعض الشيء، العنبر المستطيل في تكوينه الهندسي يتسع لأربعة وخمسين ساكنًا،

يَشْرَكُون جَمِيعًا فِي (فِيشَة) وَاحِدَة بِجَوَار الْبَاب الْخَشْبِي الْأَزْرَق ذِي
الضِّلْفَتَيْن، السَّرَائِر الْحَدِيدِيَّة ذَات الدُّورَيْن، وَالدُّوَالِيب الْحَدِيدِيَّة بِنَفْسِ
التَّكْوِينِ الضَّيِّقِ الَّذِي انْحَشَرَتْ بِدَاخِلِهِ كُلُّ مَمْتَلَكَاتِنَا بِشَكْلِ بَهْلَوَانِي
لَا أَعْلَمُ حَتَّى الْآنَ كَيْفَ تَمَّ، دُورَاتِ الْمِيَاهِ الَّتِي لَمْ يَمِرْ يَوْمًا فِي مَخِيلَةٍ
أَحَدُنَا أَنَّهُ سَيَمُرُ فِي حَيَاتِهِ عَلَى شَيْءٍ بِهَذَا الشَّكْلِ الْبَاعِثِ عَلَى الْقَيْءِ،
مَعَارِكِ الْكَافِتِيرَا كُلِّ صَبَاحٍ لِلْحَاقِّ بِأَحَدِ سِنْدُوتَشَاتِ الْفُولِ أَوْ الطَّعْمِيَّةِ
أَوْ (قِرْصَةِ بَعْجُوتَةٍ) تَمَثَّلُ وَجْبَةً الْإِفْطَارِ، فَشَلِي أَنَا وَشَافِعِي وَآسِرُ فِي
اِقْتِنَاصِ إِحْدَى الْفَرَائِسِ الثَّلَاثِ فِي الْأُسْبُوعِ الْأَوَّلِ، ثُمَّ احْتِرَافِنَا لِلْعَبَةِ
فِي تَوَالِي الْأَيَّامِ.. زِيَارَةِ الْجُمُعَةِ وَوُصُولِ الدَّعْمِ الْعَائِلِيِّ مِنْ غِيَارَاتِ
وَوُجِبَاتِ سَاخِنَةٍ وَنَقُودٍ.. طُمَأْنَنَةٍ (الْوَاسِطَةِ) لَنَا عَلَى مَكَانٍ تَوْزِيعٍ جَيِّدٍ
دَاخِلِ الْقَاهِرَةِ.. اسْتِيقَاضِنَا فِي تَمَامِ الْخَامِسَةِ وَطَوَابِيرِنَا أَمَامَ دُورَاتِ
الْمِيَاهِ لَوْضُوءِ صَلَاةِ الْفَجْرِ.. الْحَقْنَةُ اللَّعِينَةُ الَّتِي أَوْدَتْ بِقُدْرَةِ جَمِيعِنَا
عَلَى الصَّمُودِ، فَكَانَ مَصِيرُنَا أَسْرَةَ الْعَنْبَرِ أُسْرَى لِلْكَمَادَاتِ.. طَوَابِيرِ
الْعَسَاكِرِ (الْعَادَةِ) عَلَى كَابِينَةِ (مِينَاتِل) وَ (الْمَصْرِيَّةِ لِلاتِّصَالَاتِ) لِلظَّفَرِ
بِدَقِيقَةٍ يَطْمَئِنُّونَ بِهَا ذَوِيهِمْ غَيْرِ الْقَادِرِينَ عَلَى زِيَارَاتِ الْجُمُعَةِ. كُلُّ شَيْءٍ
فِي هَذَا الْمَكَانِ كَانَ رَمْزًا لِقِيَمَةٍ مَا.. الْمَكَانِ الْأَوَّلِ الَّذِي شَعَرْتُ فِيهِ
أَنَّنَا نَحْيَا إِلَى جَوَارِ فِئَةٍ مَنَسِيَّةٍ فِي هَذَا الْوَطَنِ، لَمْ نَشْعُرْ بِوُجُودِهَا قَطُّ..
الْمَكَانِ الْأَوَّلِ الَّذِي شَعَرْتُ فِيهِ أَنَّنَا نَحْيَا فِي وَطَنٍ ذِي... شَعْبَيْنِ!

اللون الرملي كان صاحب الكلمة العليا في كل شيء، الأبنية الملقاة داخل المعسكر اكتست لونا مشابها، الجمال والأغنام الخاصة بالبدو المحيطين بالمعسكر على مسافات متفاوتة، سيارات الإسعاف (هكذا يسمونها دون وجود أدنى علاقة بينها وبين اسمها سوى هلال أحمر رسمه أحدهم قبل ألفي عام على الأقل)، السيارات الخاصة بالـ (رُتب) بلون أغمق درجتين، الزي المموه الخاص بأفراد المعسكر والمعسكرات المجاورة.. كل شيء استعار لون الرمال الضامة لكل تلك التفاصيل على صفحتها الممتدة لأميال، يقطعها خط الحدود اللعين الذي رسمته إحدى الأيدي الآثمة ذات يوم، بين دولتين كانتا لتندمجان تحت علم واحد!

كعادة سادسة كل صباح، تكفلت (نوبة الصحيان) بإيقاظ الجميع:

- يلا يا حبيبي، يلا يا اخويا، الساعة ستة هي النوبة دي لأمي؟

- يا عم حسيني الساعة لسه خمسة وربع!

جاءت ناعسة غاضبة من أحد الأسرة البعيدة، فكان الرد السريع

المحضر مسبقا:

- ساعتى أنا ستة يا روح أمك، وكلمة تاني هالبسك العفريته الزرقا

وأبيتك يومين واقف من غير نوم!

حوار مقتضب أنهاء الحسيني بتهديده ذي النبرة الأقرب لنبرات

الشجار (غير المتكافئ) مستطردا:

- ربع ساعة من دلوقتي، يعني ستة وربع على ساعتى وخمسة ونص على ساعة المقطف اللي مش عاجبه، وألاقي الناس كلها لابسة ومقفزة وحالقين دقونهم وجامعين قدام العنبر، ونفسي... نفسي ومنى عيني بيادة منكم يتأخر دقيقة عشان أخليه عبرة.

ألقاها في آذانهم الناعسة وانصرف، تاركا إياهم في سخطهم الصامت يسارعون لارتداء الزي المُمَوَّه وفرش (النمر)، ثم حلاقة ذقونهم (على الناشف)، وما يترتب عليه من إزالة آثار الدماء بعد الحلاقة بكم (السُترة). الخمس عشرة دقيقة كانت وقتا كافيا على كل حال للانتقال من حالة النوم الكامل لحالة الإفاقة الكاملة.. ربما كلمة السر كانت كامنة في الخوف كما هي العادة الإنسانية الوضيعة الدافعة للإنجاز استنادا للهروب من عقاب لا الطمع في ثواب. بخفة اعتادوها تراصوا في صفوف حفظوا تكوينها، في انتظار الصول حسيني الغائب لتناول إفطاره، الذي جلبه له أحد الجنود من (الميز) داعيا عليه في سره بـ(طفحه سم هاري)، الخمس عشرة دقيقة امتدت لدقائق خمسين، كان لابد منها ليتم الحسيني وجبته بكوب شاي وسيجارة، غير عابئ بهذه القطع البشرية المتكومة بالخارج تنتظره كتماثيل متحف فرعوني مندثر، حتى قرر أخيرا الخروج إليهم.

أطل عليهم بهيئته الكريهة، ثم... بدأت أول مشاهد حلقة اليوم من مسلسل معاناتهم الطويل!

- سرية صفاء... سرية انتبااااه... على اليمين حِزا!

- نفذوا الأوامر الثلاث كُلُّ حسب ترتيبه كما هي العادة.

- كما كنت... لليمين حِزا... للأمام انظر.

- خد تمام يا منعم!

- أوامر يا فندم.

لحظات قضاها العريف المجند في أخذ تمام الحضور، قبل أن يعود للحسيني قائلا:

- تمام يا فندم تخلف واحد بس!

- مين؟... هاتلي اسمه عشان أخرب بيت أمه.

- عماد!

- لا عماد واخذ إذن، معاه راحة من الطوابير والخدمات، مين غيره؟

- ما فيش يا عم حسيني كله تمام!

- طب دَوِّرهم النص ينضفوا السرية مش عايز عقب سيجارة في الأرض والنص ينزحوا الطرنشات.

تلقاها منه الجميع، فعَلت أصوات مهماتهم المعترضة في استياء، لتكدير معتاد لا يعرفون له سببا.

- ثاااابت... ثابت يا بيادة منك له، ايه مش عاجبك منك ليه ولا ايه؟... طب ايه رأيك انت وهو ان بعد ماتخلصوا الكلام ده فيه طابور ثبات ساعة ونص؟... ها فيه اعتراض ولا حاجة ان شاء الله؟... اللي مش عاجبه يوريني نفسه كده.

صمت الجميع كأن على رؤوسهم الطير، دون أن يجرؤ أحدهم على التفوه ولو بهمهمة كتلك الصادرة منذ ثوانٍ.
- دَوَّر!

- ثاااابت!
سمعها الجميع آتية من عتبة باب (مبيت الضباط)، فوقفوا لها جميعا:
- كما كنت.

مؤمن كان القائل.
- فيه ايه يا صول حسيني صوتك عالي ليه؟
- مفيش يا باشا كله تمام يا فندم.
- دي مش إجابة.

- أبدا يا فندم العساكر كانوا متمردين سيادتك وتم السيطرة عليهم.
- متمردين وتم السيطرة عليهم؟... هو إحنا هنعارب خلاص؟
ضحك لها الجميع، بينما احتال وجه الحسيني للون أحمر مزج الإحراج بالغيظ.

- ثاابت!

تدارك بها مؤمن الأمر، فعاد الجميع لثباتهم يستمعون بقية الحديث:

- ايه الأوامر اللي اتمردوا عليها يا صول حسيني؟

- مش عاجبهم انهم ينصفوا السرية يا فندم.

- أيوه ايه اللي عملوه؟

-

- أنا شايف الموقف كله من ورا الباب على فكرة... أولا هاتلي

العسكري المتخلف بأورنيك العيادة المضروب من العنبر عشان

هيات الليلا دي في السجن هو واللى ضربله الأورنيك، حد يروح

يجيبه احنا ماعندناش خيار وفاقوس.

قالها وأشار إلى أحد المجندين، الذي رفع يده بالتحية العسكرية

منصرفا إلى العنبر لتلبية الأمر، قبل أن يستطرد مؤمن:

- ثانيا الرحمة حلوة يا عم حسيني، الرجالة دي شاربة المر من

كيعانها انت عارف وانا عارف كويس قوي انهم شالين المعسكر على

اكتافهم، كفاية انهم متغربين عن أهاليهم في آخر الدنيا، مش ناقصين

يعني من الاخر. ومش معنى اني باقول كده قدامهم انهم يكسلوا ولا

يتخاذلوا، هما أصلا مش هيعملوا كده عشان هم رجالة مش عشان انت

بتشخط وتنظر فيهم، ولا ايه يا رجالة؟

حاجة عند أي جيش في الدنيا عامل الوقت واستغلاله الصبح، واحنا هنا في مركز التدريب اللي المفروض بتتعلم فيه أسس جيشنا وحياتنا العسكرية كلها بيعلمونا نضيع وقت ازاي، طابور الساعة ٦ الصبح وطابور الساعة ١٢ الظهر وطابور الساعة ٦ بالليل، وكل سنة وانت طيب. والغريب ان الطوابير كلها طوابير تمام تواجد، هو المهم عندهم اني ابقى موجود بس يعني؟.. طب مايستفيدوا بوجودي ده!

- يا عم ارحمنا بقى هتعملي فيها الخط.

- يابني عد كده معايا، احنا مثلا ألف عسكري لو حسبنا بس ١٠ ساعات شغل كل يوم هيبقى عندك يوميا ١٠٠٠٠ ساعة عمل كل يوم، اضربها في شهر مثلا بنقصيه هنا ادي ٣٠٠٠٠٠ ساعة عمل بيضيعوا على البلد في معسكر تدريب واحد بس.

- يعني هو الجيش لوحده؟... ماهي البلد كلها كده، يابني احنا تضيع الوقت بالنسبة لنا جين بنورته.

- على رأيك، يلا يا عم نلحق التمام الصول صلاح زمانه مجهز لنا دبابتين في أرض الطابور.

- نظافة العنابر والحمامات والنظافة الشخصية شعر ودقن وضوافر يا حضرات، النظافة من الإيمان، بقالنا أسبوعين بنعيد ونزيد في نفس الكلام انتو مش صغيرين، انتو ناس مؤهلات عليا وفاهمين

انا مابكلمش عساكر عادة، لو عايز اكدرك هاكدرك، وكله بالميري والعسكرية، أنا اتحدى أي حد في العسكرية، اسألوا زمايلكم اللي قبل كده عن الصول صلاح.

- المية مقطوعة بقالها يومين يا فندم!
- اللي يتكلم يرفع ايده يستأذن احنا مش في سوق احنا في جيش.
- رفع المتحدث يده، فسمح له الصول صلاح بإعادة ما قال.
- المية مقطوعة بقالها يومين يا فندم.
- ان شاء الله تتحل بكره هي ومشكلة الكهرباء اللي بتقطع في عنبر خمسة، وبمناسبة الكهرباء ياريت الناس اللي مهرة تليفونات محمولة واحنا سايبينهم بمزاجنا مايشحنوش التليفونات دي في وقت واحد عشان مايحملوش على الفيشة الوحيدة اللي في العنبر بدل ما نلم كل التليفونات دي ونكسرها قدام اصحابها وكله بالعسكرية والميري.
- لو سمحت يا فندم.

- اتفضل

- بمناسبة المية والكهربا اللي قاطعين يعني، يا ترى بردو قاطعين في مبيت وحمامات الطباط وصف الطباط وقائد المركز ولا عساكر بس...؟ اصل المفروض اننا في نفس المكان يعني!
- انتو عددكم كبير واستهلاككم للحاجات دي بيبقى بطريقة مش

- محترمة ومش آدمية يعني لازم تبوظ وتقطع.
- استهلاكي للمية مش محترم ازاي يا فندم هو أنا باخدها حُقن؟..
- دى مية يعني للشرب والوضوء، ولو هتقطع تقطع في المكان كله ولا هي المية بتختار ماسورة اللي بيحترمها وتمشي فيها؟!
- امع كلام يا جندي انت هتهزر؟... اقعد مكانك بدل ما بعتك عالسجن!
- لو سمحت يا فندم!
- نعم انت كمان؟!
- هو ايه الميري ده؟... فيه كتاب طيب عشان نقراه ونعرف بالظبط ايه اللي لينا وايه اللي علينا ولا أي مصدر اعرف بيه حقوقي وواجباتي؟..
- إياااا... اللي ليك معروف واللي عليك معروف، اللي ليك فلوسك مهماتك شرفك ماحدش يقدر يقرب من الثلاثة دول أيا كان هو مين، يعني مثلاً اللي ليك انك تاخذ جزمة ثلاثة خرم لو جزمتك اتقطعت.
- جزمة ثلاثة خرم؟ (قالها في سره)... شكرا يا فندم (جهر بها معلنا نهاية المناقشة... مثمرة)
- العفو... حد ليه أي سؤال تاني؟
-
- دَوَّر حكمدارية الفصايل!

- باقولكم ايه يا جدعان ماتيجوا نروح نتفرج على ماتش الزمالك
في الكافيتريا نضيع شوية وقت، ماليش مزاج أروح العنبر دلوقتي لسه
فاضل اربع ساعات على ميعاد النوم.

قالها إبراهيم للجميع!

- طيب ناكل الأول وبعدين نروح، الديليفري زمانه عالباب.

آسر كان المتحدث!

- انتو طلبتو ايه النهارده؟

- انت ما طلبتش ولا ايه؟ الواد سعد كان بيلف علينا واحد واحد

سابك ولا ايه؟

- الا لا جالي سألني بس قتلته مش عايز، بطني تعباني من الفراخ

بتاع امبارح قلت اقضيها حاجة خفيفة النهارده.

- احنا جايين بيتزا النهارده، خمّس معانا بقى.

- لا لا ما قدرش انا ها قضيتها رز بلبن ولا فطيرة ولا حاجة خفيفة

كده من الكافيتريا، خلصوا وحصلوني.

- خلاص تمام.

- يلا يا رجاله نلحجوا الميز هيجولوا فيه عدس الليلا دي.

- إيوه صُح الواد فهمي بتاع الميز جاللي اكده النهارده الضهر

وجاللي فيه حلاوة كمان.

قالها وانطلق بصحبة الجميع عدا أحدهم

- جرى ايه يا واد يا طلال مش هاتاجي ولا ايه؟

- لا ماليش نفس أني هاروح الكافاتريا اتفرج عالتلافيون ساعة

ولا حاجة وآجي انام اتكلوا انتو على الله بالهنا والشفاء.

الزحام في الكافيتريا كان السمة الأبرز الساعات الأربعة الفاصلة

بين تمام السادسة وميعاد النوم في تمام العاشرة، المقاعد البلاستيكية

وُضعت بعشوائية بعثت على المكان طابعا من المصرية الخالصة،

التلفاز المحاط ببرواز خشبس يظن واضعه أنه سيحميه من.... ربما

هو نفسه لا يعلم من ماذا..

اتخذ مقعدا في آخر المقاعد بعيدا بعض الشيء عن ذروة الزحام،

ييمينه كوب بلاستيكي شفاف يحوي مشروباً يشبه الشاي ويسمونه

هناك كذلك، ويساره أمسك زجاجة ماء معدنية اشتراها للتو. انتبه

لذلك الواقف عن يمينه يحدق فيه بنوع من الغرابة دفعته للسؤال:

- فيه حاجة يا أخينا؟

- ها... لا... لا مافيش حاجة!

قالها طلال لإبراهيم، قبل أن ينتقل لمقعد مجاور يتابع التلفاز

بعينه فقط دون تركيزه، تراقبه عينا إبراهيم للحظات، قبل أن يعود من

جديد للمباراة. أنهى الأخير شربته من زجاجة المياه المعدنية وألقاها

جانبا إلى جوار السور الصغير، البعيد عنه بمقدار أمتار ثلاثة، عائدا بنظره إلى التلفاز. ما كادت الزجاجاة تلامس الأرض حتى انطلق إليها طلال ملتقطا إياها مفرغا ما بداخلها في جوفه المشتعل عطشا. استفز المشهد اندهاش إبراهيم، الذي ظن طلال أنه لم يلتفت إليه، فعاد يراقبه حتى انتهى من شربته.

- بقولك ايه يا دفعة.

قالها، ففوجئ بها طلال الذي هزّه النداء فهرول لصاحبه:
- أني... اني والله العظيم فكّرتك خلصت شرب ومعايزش الجزازة تاني!

ابتسم له إبراهيم قائلا:

- أنا على فكرة مش بناديك عشان الإزاة.
- أصل... اصل المية جاطعة بجالها يومين ومعارفينش نشربو، يدوبك هي الجزايز اللي الدكاترة هيسيبوها دي هي اللي معيشانا من أول امبارح.

اتسعت ابتسامة إبراهيم أكثر قائلا:

- ليه مجتش من الأول قتلتي أنا عايز اشرب؟
لم يرد طلال مكتفيا بنظرة خجلى لكل شيء عدا وجه محادثه، الذي عاد إليه بسؤاله ومازالت بسمته تكسو وجهه:

- اسمك ايه؟
- طلال... أخوك طلال عزوز يا باشا، تجدر تجوللي أبو العز، بينادوني كده حدانا في البلد، أنا أصلي زي مانتا شاي ف كده باين عليا ابن ذوات جوي!
- قالها مشيرا إلى زجاجة المياه المعدنية ضاحكا، فبادل إيه إيه
ضحكته قائلا:
- اقعد يا طلال.
- استجاب طلال للدعوة، فجلس.
- سرية واحد؟
- إيوه يا باشا!
- ايه رأيك بلاش باشا دي؟، احنا عساكر زي بعض يا عم.
- العفو يا دكتور ايش جاب لجاب؟
- يا عم العفو انت ماتقولش كده كلنا ولاد تسعة... انت منين يا طلال؟
- من العش.
- قطب إبراهيم حاجبيه سائلا:
- فين العش دي؟... اعذرني أنا اصلي مش لاف ف كثير.
- صعيد، أنا أصلا صعيد.
- مانا برده قلت الراجل الجميل ده لازم يبقى صعيد.

قابلها طلال بابتسامته رابتا على صدره بكفه المفرودة قائلاً:

- تُشكر يا زوج!

- بقولك ايه انت اتعشيت ولا لسه؟

- لا ماليش نفس العيال راحوا الميز جلتلهم مارايحش النهارده.

- الميز؟.. انت بتاكل في الميز؟

- إيوه ليه؟

- لا أبدا أنا اصلي يادوب دخلته مرة واحدة بس و... يعني...

بتاكل الـ ٣ وجبات هناك؟

- يا دكتور نجول الحمد لله ده أكل أنضف من بيتنا، والحمامات

اهنه انضف من اللي حدانا، والفرشة اللي هنناموا عليها انضف من اللي

هننام عليها حدانا في الدار، الجيش كتر خيريه بصراحة الميري عز بردك.

- مممم... واضح اني هاقعد معاك كتير يا طلال، ارتحتلك مش

عارف ليه.

- الله يكرمك يا زوج انت اللي راجل زين.

- حبيبي... بقولك ايه، بتشرب حاجة ساقعة إيه؟

- ليه؟

- هيكون ليه يعني يا عم طلال؟، هاعزمك على حاجة ساقعة،

بتشربها ايه بقى؟

ثوانٍ أخرى من الصمت أقامت حاجزها بين لسانيهما، أنهاها
إبراهيم قائلاً:

- ايه يا عم مالك انت مكسوف ولا ايه؟، طيب أنا هاجيبلك كولا
زبي... ماشي؟

ابتسم طلال دون رد، متابعا ذلك غريب الأطوار الذي ذهب لشراء
(الحاجة الساقعة)... شيء ما داخله ارتاح له، شيء ما حدثه أن ذلك
الغريب ستجمعه به علاقة افتقدها في الكثيرين من محيطيه، شيء ما
داخله ربط صورته بصورة طيف لصديق قديم رحل جثمانه قبل أسابيع
ثلاثة إلى مقابر العش!



لا أعلم حتى الآن لماذا صادفته بهذه السرعة. شيء ما يمتلكه
لم أجده لدى الآخرين، فطرته التي لم تُلوّث بعد ذكرتي بمصر التي
عرفتها قديما في كتب المدارس، وافتقدتها في تالي سنوتي خارج
أسوار مدرستي الجميلة النظيفة المتطورة، لهجته الأشبه بطرق الصعيد
الترابية المتعرجة لا شوارع القاهرة السريعة الباعثة على الاكتئاب،
التي أراها في لهجات وتصرفات الآخرين.. بعض الأسرار التي لم
يفصح عنها بعد استترت خلف بعض كلماته، التي نطقها بعفوية مثل
وردة وعليّ وبدر. الكثير من الأمور بات عليّ اكتشافها الآن، تختبئ في

أغواره، تنتظرني لاستخراجها. رغم كل شيء، ثمة راحة تملكني منذ ذلك اللقاء الأول. أصبحت أنتظر لقاءه كل يوم بعد تمام السادسة مساءً، في نفس المكان بانتظار (كعب الشاي) كما يسميه. أبتسم لتلقائيه، أضحك لتسميته الأشياء بأسماء لم أسمع بها من قبل، اهتمامي لكل تعبير يرسمه وجهه، انتظاري لأسرار لم يحن أوان البوح بها بعد.. كل الأشياء في طلال أحبتها، كل الأشياء في طلال أشعرتني أنني عدت من جديد لكوكب الأرض، بعد غربة طويلة في كوكب لا إنساني بعيد.. الآن فقط أصبحت أملك صديقاً من... بني الإنسان!



كانت الليلة الأولى المارة دون طاولة بيننا تعلوها الرقعة ذات اللونين وكوبي مشروب ساخن. طور آخر من أطوار غرابته، التي لا حق لي في السؤال عن أسبابها.. سؤالي لن يضيف أكثر من ارتفاع في مستوى الغموض الذي لا حاجة لي بالمزيد منه على كل حال، كما هي عادة جلساتنا طوال ما مضى من شهور. رغم كل ذلك، مازلت حريصاً على الاستمرار.. شيء ما يدفعني لمواصلة الرحلة على قارب غموضه، لا أعرف هويته. لم يعد بي طمع في أكثر من سرده الروتيني لأحداث سنوات المعاناة؛ يكفيني منه هذا، رغم كل ما يحيط بذلك السرد من... غرابة الأطوار.

كم كانت غريبة تلك الليلة! بدا حينها كأننا من كوكب آخر، في زيارة لكوكبنا اللعين. كان مزيجا من التردد والتأمل واللامبالاة وال...خوف!

كعاداته، ناظر إلى شيء لا أراه، وربما لا يراه غيره في هذا العالم، شيء رابض هناك خلف سماننا العابثة بأكوام سحبها، ربما كان أحد تلك الأشياء التي تذكره على الدوام بأحداث سنواته التي جئت لتسطيرها بين يديه.

- تعرف؟!

قالها فجأة، فانتبهت لها، وقد داخلني شيء من الرجفة الناتجة عن ضوضاء بعد صمت طويل. نظرت إليه ومازال نظره مطلا من نافذته الضيقة إلى ذلك الشيء اللامرئي هناك:

- بلدنا دي بتفكرني بسور المدرسة.

.....

- اللي يعدى عليه من بره يلاقي مدرستي نظيفة جميلة متطورة، ولوبس عدى الباب يلاقي فصل فيه ٧٠ طالب، يلاقي كل مدرس لأمم حوالية الطلبة اللي بيديهم درس عشان يديهم حصّة الدرس في وقت المدرسة ويوفر وقت بعد المدرسة لغيرهم، يلاقي نص المدرسين ماضيين حضور للنص الثاني اللي ماجاش عشان بيدي حصّة درس،

يلاقي الطلبة واقفين في الحتة اللي ورا جامع المدرسة بيشربو سجاير، يلاقي ناظر المدرسة لابس البدلة وقاعد على مكتبه بيقرأ الجورنال وقدامه القهوة مستني الساعة ١ تيجى عشان يروح وهو (مرتاح الضمير).

ده التعليم بتاع مدرستي نظيفة جميلة متطورة.. امشي شوية هتلاقي سور ثاني مكتوب عليه (الشرطة في خدمة الشعب) وسور ثالث لمحكمة بيقول (العدل أساس الملك)، وسور رابع لمستشفى بيقول (صحتك أمانة في ايدينا)، وسور خامس وسادس وسابع.. البلد بقيت مجموعة من الأسوار العالية يشوفها اللي براها يحس انها أعظم بلد في العالم، مايعرفش ان الأسوار دي مبنية على مقابر جماعية، راقدين المطحونين جواها. طول عمرنا شاطرين قوي في الكلام، عندنا مئات الأدباء والفلاسفة والكُتّاب.. ورق وكتب موجودين في كل حتة لو طبقنا من كل كتاب سطر واحد بس ماكنش ده بقى حالنا. بس ماكانش ينفع، عارف ليه؟...عشان المقاول اللي بنى السور مش هيسمح بكده!

صمت بعدها، كأنه لم يكن ذلك المتحدث قبل ثوان!
رغم رغبتى الملحة في الاستفسار عن سبب ما قيل، أو حتى سبب الصمت الرهيب السابق لما قيل والتالي له، إلا أنني أبدا لم أجرؤ على

الاستفسار. شيء ما زاده هيبه ليلتها.. صوره ملكا لا يسمح لأحد بدخول ديوانه.. بدا كأنه المتحدث إلى ثالث ليس بيننا، وأنه بيننا ولا يراه غيره. مازال رغم كل ما مضى من سنوات على لقائنا ذاك متواجدا في ذاكرتي بكامل حلتة من الهيبة والغربة والحكمة. لم يكن ليلتها منتميا للأحياء بأي شكل كان.. كان أقرب للجملادات منه إلى أي شيء آخر، تأتيه الحياة للحظات يحدث فيها لا أحد، ثم يعود من جديد لجموده. انتهت من جديد لقوله الذي أعاده للحياة:

- سَـزِـيَاز هو أهم طوبية في كل الأسوار دي، المقاول اللي بناها عمره ما كان يقدر يبنيها من غيره. سَـزِـيَاز مريض يعلي طوبية، سَـزِـيَاز جاهل يعلي طوبية، سَـزِـيَاز خايف يعلي طوبية، وطوبية ورا طوبية بيعلا السور على مقابر الأمل والأحلام. أكبر ثورة مصر بقيت بتملكها ثورة المقابر والأسوار. وفي الثورتين سَـزِـيَاز هو كلمة سر، أغلى حد اتدفن في مقابرها، وأجمل طوبية اتحطت في أسوارها كان هو، واحنا اكتفيننا بقراءة الفاتحة يوم دفتته، وتعليق يافطة عليها شريطة سودة على السور يوم ما اتحنط جواه. تفتكر بعد كل ده هيسامحنا؟!

لا أعلم لماذا أردت البكاء حينها، رغم عدم إدراكي الكامل لما أراد قوله. هل كانت نبرته البادية نبرة أحد ساكني الكهوف يخرج للحياة بعد انعزال ألفي عام؟ أم كانتا هاتين الدمعتين المنحدرتين على

خديه، غير عابئتين بحرصه الدائم على الكتمان؟، أم أنه ذلك الاسم الذي طالما سألت عن كينونته، دون أن يُنعم عليّ بإجابة، واكتشفت الآن أنه صاحب تاريخ طويل من المعاناة؟... أشياء كثيرة كانت سببا مقنعا لاستدعاء عبراتي من عيني المتابعتين لنظراته الدامعة للفضاء البعيد، أسباب كثيرة دفعتني مجددا للاستمرار، أسباب كثيرة جعلت تلك الليلة تحظى بصفحة بارزة في كتاب ذكرياتي الكبير، تلك الليلة التي مهدت معرفتي الحقيقية بذلك الـ.. سرياز!

- ماكانش ينفع على فكرة اللي انت عملته في الحسيني قدام العساكر ده يا مؤمن!
- لِحِقِ اشتكى لك؟
- حاجة تضايقك اني اعرف؟
- لا وهتضايق ليه يا باشا؟.. بس الفكرة انك تعرف ايه وتعرفه ازاي!
- بمعنى؟
- بمعنى إني عارف ان الحسيني وصلك الكلام على مزاجه.
- قاللي انك زعقتله قدام العساكر.
- ماكذبش عليك.
- مش ملاحظ انك بتكلمني بحدّة شوية؟!

- يا باشا العفو بس انا ماتوقعتش انك تدي ودنك لواحد زي الحسيني انت عارفه وعارف أخلاقه كويس.

- ومين قالك اني اديته ودني؟... انت متخيل اني ممكن افصل شخصية زي الحسيني عليك أو اصدقه واكذبك انت؟، يا مؤمن انا مش محتاج أقولك انك أخويا الصغير وانك أنقى واحد شفته في حياتي. اللي زي الحسينيده أنا لو أطول اضربه بالنار بنفسي هاضربه بالنار!

- وإيه اللي يمنعك يا سيادة الرائد؟

- اللي يمنعني؟... اللي يمنعني ان هو اللي ممشي المعسكر، من غيره الدنيا هتقع. انت فاكرا أنا ولا انت هيبقى لنا طاقة ولا خلق نجمع عساكر ولا نتمم عليهم ولا نشغلهم؟... احنا ظباط يا مؤمن عارف يعنى ايه ظباط؟... يعني ندّي أوامر ونمضي ورق وندّي جزاءات بس كده... فهمت؟!

اكتفى مؤمن بابتسامة باهتة تعكس سخريته مما يسمع، فاستطرد وائل:

- بتضحك ليه؟

- ممكن أسألك سؤال يا باشا؟

- اسأل.

- ليه العسكري في الجيش لما بينهي خدمته بتبقى الدنيا مش

سايغاه من الفرحة كأنه خرج من الجحيم ودخل الجنة؟

ثوان من التفكير أخذ خلالها ذلك الرائد جولة في دروب أفكاره،
دون اصطیاد إجابة ذات جدوى..

..... -

- الموضوع بسيط، عشان هو فعلا خرج من الجحيم. المشكلة
يا باشا مش ان العسكري من دول بينصف بلاعات بايده ولا انه بيحلق
دقنه عالناشف لغاية ما وشه يجيب دم ولا انه بيصحأ من الفجر يشتغل
زي تور في ساقية طول النهار ولا انه بيقف بالساعات بالسلاح في عز
التلج بالليل في الكُحل مستني رصاصة تجيله من أي حطة تخلص عليه
واحنا الطباط نايمين جوه في اوضنا... المشكلة عند العسكري انه بعد
ما بيعمل كل ده بيتشتم ويتهزأ ويتسجن لو بس نسي يوم يحلق دقنه ولا
نسي في طابور يلعب بيادته. قضية العسكري مش في الشغل يا باشا
قضيته في الإحساس بالقهر والظلم والإهانة. الرسول عليه الصلاة
والسلام يقول في حديث شريف ليس المؤمن بطعان ولا لعان ولا
فاحش ولا بذيء، واحنا عملناهم حاجة اسمها الشتيمة الميري..
الشتيمة والإهانة قانون يا باشا، قل لي كده هيجب الجيش ازاي ولا
هيقى قلبه عليه ازاي؟... انت فاكر ان العساكر دلوقتي بتشتغل وتقف
خدمات عشان خايفة عالبلد ولا الجيش؟، العساكر بتشتغل وتقف
خدمات عشان خايفة من عقاب الطباط وجزاءاتهم، بيقف خدمة ومركز

مع الظابط ولا صف الظابط اللي هيعدي عليه يعلّقه ويرميه في السجن ولا يلغيله أجازته مش مع العدو اللي هيجي من بره يقتله. وغير كده وكده شايف الظابط ده أكله أحسن من أكل عساكره مليون مرة وحمامه انضف من حمامتهم مليون مرة ولبسه انضف من لبسهم مليون مرة، حتى الأجازة اللي هي ترفيه ليه الظابط بينزلها في طيارة ولا اتوبيس بولمان مكيف وهم بيتمرطوا في القطر الحربي زي البهايم.. هو عايش في وادي وهم في وادي، طبعي يا باشا العساكر تفرح لما تمشي من هنا.. احنا بايدينا حولنا قضيتهم من قضية وطن لقضية أشخاص، خليناهم يخافوا من الوطن مش عليه!

- مش هانا قشك في حاجة انت مقتنع بيها كده. لسه مش قادر تستوعب ان العساكر لو مادوسناش عليهم بالجزم مش هيشغلوا ولا يعملوا حاجة، دي طبيعة شعب كامل يا مؤمن يا حبيبي، تدوس عليه ينتج، تططب عليه ياكلك، شوف كده كل الإنجازات اللي الشعب ده عملها من أول مينا لغاية دلوقتي.. من أول الأهرامات لغاية قناة السويس هتلاقيها كلها اتبنت بالسخرة والكرجاج، راجع نفسك يا مؤمن عشان تعرف تكمل طريقك في الجيش وفي الحياة عموما.

من جديد ابتسم مؤمن قائلا:

- للدرجة دي الشعب المصري شايفه عبيد؟... يا سيادة الرائد

الشعب المصري طول عمره يبتجج بالسخرة والكرباج لأنه أصلا
ماشافش غيرهم، الشعب المصري من أيام مينا لغاية دلوقتي وهو واكل
مع الكراييج عيش وملح، احنا اصلا ماجربناش معاه طريقة تانية عشان
نحكم بفشلها، عارف ليه يا باشا... عشان خافين منه!

- خافين!... قصدك ايه؟

قالها وائل قاطبا حاجبيه في استغراب، وبدايات غضب، قبل أن
يعود مؤمن من جديد لبسماته قائلا:

- مش مهم يا باشا... ماتاخدش في بالك... كل اللي اقدر
اقولهولك عيد النظر في التفكير في التعامل مع العساكر، وصل العساكر
انهم يدعولك يا باشا لو سبتهم ومشيت مش يدعوا عليك، اكسبهم
هيدوك أكثر صدقني، العيال دول غلابة ورجالة وبتوع شغل وطلباتهم
مش كثير، كل اللي طالبينه مايظلموش... طلبهم مش صعب.

- مانبقاش في جيش يا سيادة النقيب!

قالها في صرامة، والتقط معطفه و... غادر!

كعادة الأسبوعين الماضيين على اللقاء الأول بينهما، جمعتهما
تلك الجلسة بعد تمام السادسة، على مقاعد الكافيتيريا. ثمة تقدم
مذهل في علاقتهما شهدته جلسات سمر الليالي الأربعة عشر. الكثير

من الأسرار أفضى بها طلال، ضاحكُ تارة ودامعُ أخرى، مسترسل تارة ومُقلُّ أخرى، شاردُ تارة ومنتبهُ أخرى.. وبين التارات جميعها قد هياً لإبراهيم في فؤاده مجلسا ربما لم يجاوره فيه أحد قبل الآن، باستثناء أحد الراحلين المتربعين في قلبه على عرش كل المجالس. المقعدان البلاستيكيان بلون البياض، بينهما طاولة بنفس المادة واللون، تعلوها الكثير من بقع خلفتها بقايا الأطعمة والأشربة للجلوس قبلهما على مدار اليوم، الضوء الخافت لمصباح قديم يعلو التلفاز الأقدم، العلبتان البلاستيكيتان أمامهما كانتا تحويان (رز بلبن)، وكوبان من الشاي (الكشري) اللذان أعدهما طلال بنفسه، بعد ضبط محتواه من السكر كما يحب هو ويحب صديقه:

- أخيرا هنتزل اجازة بكره الواحد عفن هنا.

- على رأيك يا دكتور، امي واخواتي اتوحشوني جوي مامصدجش

اني خلاص هاشوفهم بكره ان شاء الله.

ثوانٍ من الصمت أنهاها إبراهيم بقوله:

- ايه رأيك في الثورة يا طلال؟

تلقى طلال السؤال بشيء من الاستغراب، كطالب جامعي في

لجنة شفوي فاجأه ممتحنه بسؤال من مقرر آخر:

- الثورة!

- ايه مالك اتخضيت كده؟
- قالها إبراهيم مبتسما، يأتية ردطلال من جديد:
- هو... يعني... أصل... بصراحة ماعارفش!
- ماتعرفش رأيك؟!
- انا اصلي سمعت كتير عن الموضوع ده في التلافزيون بتاع الجهوة بس مخولوني ماعدتش فاهم حاجة من كلامهم.
- هم مين دول؟
- العالم اللي هيصدعونا كل شوية مافاهمينش منهم حاجة، إشي خبير ماعارفش ايه
- استراتيجي.
- ايوه هي دي، وناشط معارفشي مين.
- حقوقي!
- إيوه اسم الله على دماغك، والتالته دي بردك اسمها ايه؟
- خبير سياسي؟
- إيوه هي دي، بس يا دكتور ومن ده لده لده واحنا تايهين مافاهمينش حاجة، فجلنا ناخذها من جصيرها ونريحوا نافوخنا ونخلينا في أكل عيشنا احسن، يمكن ربنا يهديهم ومايتعاركوش تاني... إلا هم هيتعاركوا ليه يا دكتور، ما البلد سايعانا كلاتنا؟

تلقاها إبراهيم بابتسامة قائلا:

- عشان كل واحد فيهم عايز يتجوز الأرملة الغنية ويدوس على عيالها بالجزمة، عشان مايورثوش معاه فيها.
- ها!

من جديد ابتسم إبراهيم قائلا:

- انت ايه أحلامك في الدنيا يا طلال؟
- أحلامي؟ ... إياي... ماعارفش بصراحة!
- ماتعرفش أحلامك ايه؟

- يا دكتور احنا ناس عايشين يوم بيومه، بيناموا بالليل زي الجتيل بعد شغل من أول النهار لآخره، مش فاضيين أساسا يحلموا، بيخافوا يحلموا لا يضيعوا وجت الراحة في حاجات مالهاش عازة!
- بيخافوا! ... بيخافوا يحلموا؟

- يا بيه لو جلوا عَجِّلْهُمْ وفكروا يحلموا، تلاجي الصغير بيحلم بامنا الغولة اللي بيخوفه بيها لو مارحش الغيط يشتغل ويا ابوه، والكبير لو حلم بيحلم بالبوكس الازرج اللي هاياجي ياخده من وسط عياله لو ماسدش الدين اللي عليه، يبجي ليهم حَجَّ يخافوا من الحلم ولا لا؟!
- ممكن أسألك سؤال يا طلال؟
- طبعا يا دكتور، اسأل!

- ايه أكثر حاجة ممكن تفرحك في حياتك؟
- أحجج أمي وأتجوز البت وردة!
- بس كده؟!
- لو طلبت من ربنا حاجة تاني ابجى طماع الحَج يتجال!
- قابل إبراهيم كلماته بابتسامة قائلا:
- تعرف انك احسن مني!
- العفو يا دكتور، ماتجولش اكده دانتا دكتور!
- أنا مش باجاملك، انت فعلا أحسن مني، وبعدين مش احنا اتفقنا
- اننا اصحاب مافيش بينا حكاية دكتور دي؟... مش قلنا إبراهيم بس؟
- ماشي يا عمنا، خد مني بقى كعب الشاي دي وهدعيلي.
- ناوله الكوب، ثم استطرذ قائلا:
- ممكن آني اسألك سؤال بقى يا دكتور؟... جصدي يا ابراهيم؟
- أسأل يا سيدي
- ليه على طول بابجي حاسس انك زعلان من حاجة أو جلعان
- من حاجة؟... ضحكتك دايمًا مش صافية اكده.
- (عسكري الشطرنج وحده يكون مهتمًا بأقرانه، بخلاف بقية القطع!)
- قابلها إبراهيم بابتسامة بات طلال يحفظها منه قبل أن يجيب:
- عشان مش عارف اتمنى الأمنيتين بتوعك دول.

- كيف يعني مافاهمش حاجة.
- يعني امي حجت خلاص وما عنديش وردة زيک.
- بردک مافاهمش!
- تقدر تقول کده مابنساش!
- كيف يعني؟
- عشان مقتنع ان الدنيا احقر من انها تجبرنا على شعور زي
النسيان يا طلال!
-
- عارف انت يا طلال الحتة الصغيرة المصدية اللي في القلب دي
اللي صدت زمان ومن ساعتها مافيش فرحة عارفة ترجعها للمعانها
تاني؟... اهي دي أكثر حاجة ممكن تعذبك في حياتك. بتخليك تفضل
تجاهد طول عمرک عشان الصدا مايمتدش للقلب كله فتلاقي نفسك
مُت وانت لسه محسوب على الأحياء.
- عليا الطلاج آني ما فاهم ولا كلمة!
- هاهاهاها هو عشان کده بقولک انت أحسن مني.
- صمت حينا قبل أن يعود لجديته المكسوة لمحة حزن قائلاً:
- ادعيلي يا طلال!
- ادعيلک؟... من عينيا يا باشا بس ادعيلک بایه؟!

- ادعيلي ابقى زيكي!

- ها!

ابتسم إبراهيم قائلا:

- ادعي بكده بس ومالكش دعوة.

- ان كان عالدعوة ندعوك مجدور عليها دي، ولو اني مافاهمش

زبي كيف بس ماشي.

دقيقة من الصمت أحاطتهما، قبل أن يتبته إبراهيم لأصدقائه

جالسين على مقربة منهما، موشكين على البدء في أمر ما، فالتفت

لطلال قائلا:

- باقولك ايه، تلعب؟

- العب؟... العب ايه؟

- نوستالجيا؟

- ايه؟... دي اللي هو كيف يعني؟

- هاهاها... تعالى بس وانت تعرف.

اصطحبه إبراهيم إلى الطاولة الأخرى القريبة منهما، ملقيا السلام

على الجميع:

- سلام عليكم يا رجاله.

- هيمما وعليكم السلام مساء الجمال!

- اعر فكم بقى... طلال، شافعي، شريف، أسر!

- اهلا يا طلال ازيك.

شريف كان القائل، يتبعه الآخرون بكلمات الترحيب التي قابلها

طلال بقوله:

- يا مرحب بالرجالة.

- نوستالجيا؟

قالها إبراهيم للجميع، فأجابوه بهزات رؤوسهم وغمزات عيونهم

أن نعم.

- طب استنوا بقى هنلعب معاكم.

- فل، يلا اسحبولكم كرسيين.

قالها شريف الذي استطرد محدثا طلال:

- بص بقى يا عم طلال... نوستالجيا دي يعني الحاجات أو

الذكريات القديمة في حياتنا، اللعبة ببساطة ان واحد فينا بيبقى (جدو)

بيقول كلمة وبعدها كل اللي قاعدين يقولوا كلمة متعلقة بالحاجة دي،

يعني مثلا انا اللي هابقى (جدو) هاقول تليفزيون.. انتو بقى تقولوا أي

كلمة بتدل على حاجة قديمة في التليفزيون أو ذكرى حلوة، وصلت كده؟

- وصلت يا زوج بس الخسران بنعرفه كيف؟

- الخسران صاحب أبطأ اجابة لأن الذكرى لو مش موجودة

وحاضرة في ذهنك باستمرار تبقى مش مؤثرة فيك بشكل كافي وده
أصلاً هدف اللعبة، اننا نعيد التواصل بيننا وبين الذكريات القديمة.

- فهمت.

- حلو قوي يلا بينا نبدأ، انا جدو... نقول أول حاجة تليفزيون!

- كابتن ماجد!

آسر كان القائل.

- ونيس!

شافعي قالها.

- الجوهري ٩٨

ابراهيم كان القائل

-

كان هذا طلال!

- ايه يا طلال لسه مش فاهمها قوي؟

- لا بس أصل... اصل يعني... اصل احنا ماكانش عندنا تليفزيون!

- طب يا عم ومالك متردد ليه كده؟... يلا ولا يهملك ندخل في

اللي بعده... رمضان!

- بكار!

- النقشبندي!

- صيام لحد الضهر!
- فانوس جريد!
- طلال كان الأخير.
- جميل ... مدرسة!
- جلاد أزرق وتيكيت!
- حصّة فاضية!
- رحلة القلعة والفسطاط!
- ماكملتش!
- ماكملتش ايه يا طلال؟!
- ماكملتش علام.
- قابلوها من جديد بابتسامة إعجاب ببراءته، قبل أن يستطرد شريف:
- قدوة!
- أدهم صبري!
- شنب أحمد عبد العزيز!
- أستاذ حفناوي!
- الشيخ....
- لم يستطع لها إكمالا... شيء ما أعاق ذكر الحروف الثلاثة، فهَمّت
- عيناه بنطقها دموعا... اكتفى بابتسامة باهتة، لم يفهمها سوى إبراهيم،

- والله... والله يا فندم...
- ماتحلفش بدل ماديك باللى في رجلي... وريني شرابك!
- رفع الجندى طرف بنطاله من داخل عنق البيادة في تردد:
- شراب ملكي... الله الله... انتباه!
- امثل الفتى للأمر!
- ارقد!
- رقد على بطنه شابكا يديه خلف ظهره!
- ازحف... وعلى الله اشوفك واقف... صول حسينااي!
- أوامر يا فندم!
- بعد الجمع يتدور ١٥ يوم سجن.
- تمام يا فندم.
- المية معادها تتملي امتي؟
- بكره ان شاء الله يا فندم.
- المية تتملي النهارده.
- تمام يا فندم.
- دورهم على مخزن السلاح عشان الصيانة انا مش هاخلهم
- يناموا النهارده!
- بس النهارده مش يوم الصيانة يا فندم.

عاد له وائل بنظره، خالعا نظارته، قاتلا اياه بنظرة شيطانية، فتدارك
الحسيني الأمر قائلا:
- أوامر سيادتك!

ثمة شيء غريب ينتظره، شيء خلف هذا الباب الخشبي العتيق
ينتظر مجيئه ليبوح له. التغيير يكسو كل معالم الدار (القبر)، تغيير لم
تعتد عليه منذ بناها أحد مرضى الكبد الراحلين قديما، من طوب لبِن
وعروش نخيل، تغيير عنوانه... الفرع!

كل شيء في المكان اجتهد ليوكب ذلك التغيير، القلل على
الشرفة الأمامية تلمع بُنيُّها الفخارية بماءٍ فاضٍ من داخلها إلى خارجها،
ليشارك الجميع فرحته، الماء المرشوش على المصطبة الأسمتية
(قديمًا كان الطين مكونها الوحيد)، الرمال المنداة ببعض الماء منشورة
أمام الدار وعلى جانبيها، تبرع بها الحاج سليم المقاول لمجاملة أسرة
صديقه الراحل، خيوط الزينة الورقية العجوز بعمر الرضامين، التي
استعارتها صابرة من صديقتها عفاف بنت أم عفاف، تُسربل الجدران
الأربعة وواجهة الباب الأشعث رافض الزينات. ربما لم يسعفها قَدَمُها
ولا تكوينها الهش ذو الأوراق المستعارة بدورها من (عم احمد بتاع
الطعمية) والملصقة إلى حبل غسيل بخليط من دقيق وماء، صوت

زغردة قادمة من الغرفة الجانبية للمندرة (بهذا الاسم يحاولون إنقاذ الحجرة الوضيعة ذات الكنبه البلدية والكرسيين المتهالكين) تغازل فرحة تتزين في خدرها في الأفق البعيد. بطرقاته الثلاث المعروفات طرق الباب الخجول من زينته، ظنا منه أنها تسلبه وقاره الحزين:

- طلال... طلال إجي يأمّا... طلال إجي!

قالتها صابرة المهرولة من أمام الفرن المشتعل يحوي بعض أرغفة تنتظر الخروج للحياة من رحمه النير، تتبعها أمها المجتهدة في إزالة آثار (هباب الفرن) من على جبينها ووجهها المتعرقين، وتجفيف يديها من آثار العجين في رداها الأسود متشح البياض في أكثر من موضع منه، اكتسبه من طول مرافقته لعجين الخبز ودقيقه، منذ أعلن الفجر بدء النهار:

- طلال.. يا حبيبي يا ضنايا كنت خابرة انك ماهتفوتناش نفرحو الحالنا.

فتحت الباب بلهفة تنتظر إطلالته التي غابت عن البيت، قبل أن تضمه أحضانها المتعطشة له لدقائق غابت فيها كل الكلمات، قضتها صابرة محتضنة جانبه، مكتفية به مؤقتا:

- حمد لله على سلامتك يا ضنايا، اتوحشناك جوي، العش كلاتها ماكانش ليها طعم من غيرك.

- تسلمي يا ست الكل، اتوحشتوني جوي والله كلكم.

- حمد لله عالسلامة ياخوي.

- الله يسلمك يا ست صابرة عاملة ايه؟
- الحمد لله نحمده، الأمانة في الحفظ والصون (خففت صوتها قليلا تغمز له بعينيهما، فانتزعت ضحكاته رغما عنه)
- هاهاها ماشي يا لمضة.
- صمت حيناً قبل أن يعود لأمه قائلاً:
- بس ماجولتوليش صحيح، ايه اللي اني شايفه ده جلبي هيجوللي ان فيه حاجة زينة بتُحْصَل.
- جلبك طول عمره ابيض وصادج يا واد يا نصاب.
- هاهاها طب يلا بجي فرحوني وبياكم.
- علي هيخطب، عقبالك يا ولد ابوي.
- قالتها صابرة فانفرجت شفتا طلال عن ابتسامة صادقة بهجة لأخيه قائلاً:
- يااااه عالآخبار الزينة.. فرحتيني والله يا بت يا صابرة... طب هو فين العريس اباركله واحشني جوي هو كمان.
- العريس يا سيدي عالجهوة بيعزم باجي الناس، هيفرح جوي لما يلاجيك وصلت وحتحضر خطوبته الليلة.
- طب زين عقبال ماغيّر هدومي وارحلي ساعتين يكون وصل.
- ماشي يا ضنايا روح انت غيّر هدومك وريحلك ساعة عقبال مااحضرلك لجمة تاكلها.

هَمَّ طلال بالانصراف مقبلا يد أمه، قبل أن يقفز إلى ذهنه أحد
الأسئلة أفاض به لأمه:

- ألا صحيح يا ام علي هتخطبوله مين؟
- البت وردة بنت محروس الخيال، بت زينة وبنت حلال وأهلها
ناس غلابة.

لعلها أولى المرات التي يشعر فيها بمثل هذا الدوار.. شيء ما علق
في قصبته الهوائية، هددته باستدعاء سريع لملك الموت.. رغما عنه
سقطت حقيقته ممهدة لسقوطه، الذي تداركه بامساك الزير الفخاري..
- طلال... مالك يا ضنايا؟

- لا... لا مافيش حاجة يأمّا، شوية... شوية تعب من السفر بس
وهيروحو الحالهم... اني... رايح انام.
- طيب يا ضنايا نوم العوافي.

النوم!... ربما لم يعد لتلك الكلمة مكانا مناسباً الآن. أي نوم
سيأتي، وأي الأحلام سيضم؟.. يبدو أن الأحلام قد سحبت سفيرها
من أرضه إلى غير عودة.. حلم يغادر، يتبعه آخر بحقيقية سفره، وثانٍ
يموت يتبعه آخر بكفنه، وثالث يُسَجَن يتبعه آخر بقيده.. الأحلام كلها
لم تعد تشعر إلى جواره بالأمان، فغادرت الأرض وضحت بانتمائها
لوطن آماله أسير الاستعمار. ساعة قضاها على سريرهِ منفردا بدموع لم

يستدعها، واستدعتها صورة الورد الذابلة في ذاكرته، المتشبثة بالباقي من أشواكها التي لم يرها قبل الآن. دون أن يتعمد، وجد قدماه تصعدان الدرج الطيني إلى سطح البيت القديم.. إلى الفتحة الصغيرة التي تضم صديقه الأليف كانت وجهته. صفيّر معتاد يعرفه منه ريشة، الذي انطلق مرحبا بالضيف العائد من جديد. استقبله كعادته على فخذه الأيمن، بعدما جلس متربعا ينتظره، يمناه جعلت له مرقدا، في حين تولت يسراه مهمة السير بأناملها على ظهره الأملس الشائب بياضه ببعض التراب.

- اتوحشتني جوي يا واد يا ريشة، ايه ديّ؟...ضهرك ماله ايه التراب دي، البت صابرة مكانتش هتحمّيك ولا ايه؟

بصوته الضعيف الأشبه بأنين عصفور جاوبه صديقه، فاستطرد:
- حجك عليا اني يا صاحبي، الله يكون في عونها بردك تلاجيها شجيانة طول النهار مع امي، اني هاحمّيك النهارده، اني... اني اصلى بصراحة مش عايز احضر الخطوبة ديّ، بس هاجولهم ايه؟، كنت باحمّي ريشة؟... ماتفكر معايا يا واد بدل مانتا زي جلتك اكده.. استنى استنى تاهت ولجيناها، هاجولهم اني تعبان من السفر. بس لا بردك دي ماهتخيلش عليهم، وبعدين امي هتاخذ على خاطرها مني بردك.. دي بالذات ماينفعش ازعلها.. اجولك، اني هاحضر وخلاص بجي، هيُحصّل ايه يعني؟!

فجأة، توقفت الكلمات في فيه الشاكي.. شيء ما اصطاده من حديثه مع صديقه المستقر في كفه سامعا شكواه التي لا يفهم من كلماتها شيئا.. يعرف فقط أن قرينه البشري يعاني مشكلة ما. أوقفه الصوت عن حكيه، يعرف هذا الصوت الصيَّاد أكثر من أي شيء آخر، هذا الصوت المعزوف على كمان المعاناة، هذا الصوت الناطق دوما بالدائر في قلبه هو من الكلمات، كأنهما المخلوقين بأحبال صوتية واحدة.

كانت هي... السطح المقابل كان مسرح إنشادها هذه المرة، بخلاف سابق المرات التي ضم فيها غناؤها براح الحقول. خلف أحبال الغسيل الصفراء حاملة بقايا الملابس المتساقطة من أطرافها قطرات الماء بني اللون، خيالها خلف إحدى قطع الملابس البيضاء، قديما كانت جلبابا لأحدهم. كان غريبا بعض الشيء، انكسار لم يره فيها قبل الآن، جلست تضم ركبتيها إلى صدرها محوطة إياهما بذراعيها الدقيقين، وقد اتجهت برأسها، الذي علاه إشارب وردي بعمر والدتها، إلى الفضاء البعيد تهمس في أذنه بشيء ما!

أميرة الأمرا بفستانها مليح اللون

وضحكة مكبوتة معاوzaشي تساع الكون

ضحكاية بهتانة جوه مراية كدابة

لغزالة رميوها من الواحة على الغابة

فَيْتُهُ أَمِيرِ الْوَاحَةِ كَيْفَ سَابَهَا لَصِيَادَهَا؟
وَعِيُونُهُ مَرْتَاةٌ لَمَّا شَافَهُ مَصْطَادَهَا
يَا غَزَالَةَ سَالِ مِسْكٍ وَسَطِ الْغَابَةِ وَالْأَحْرَاشِ
وَالدَّمَ تَاهَ تَاهَ وَسَطِ الْغَوْغَا وَالْأَوْبَاشِ
يَا حِلْمَ تَمَنَّهُ رَخِيصَ بَاعِهِ الْخَسِيسِ بِيَلَّاشِ
مَا عَادَ فِي وَسَطِ الْوَاحَةِ حَدَّ بَيْدِهِ سَيْفُ الْعَوْنِ

لا يعلم لماذا هزته الكلمات هذه المرة بهذا الشكل. لوهلة، أحس أنه شريك في حروفها المغزولة بنسيج الآلام.. أمير الواحة كان أم الصياد القاتل؟.. المرأة الكاذبة كان أم الضحكة الباهتة؟.. الخسيس بائع الحلم كان أم مالك سيف العون؟.. أي مساهمة ساهمها في قصة الغزالة على عرش الأميرات، أم أنه كعادته اكتفى بدور طفل الحارة المستمع لإنشاد الربابة العجوز بحكاياتها وحسب؟!

من شروده أفاق، ليفاجأ باختفاء خيالها من لوحة حبل الغسيل، كأنها قد أرادت فقط البوح بما يضيق براح صدرها إلى الفضاء الفسيح، كأنها تخيلاته من رسمتها له رحمة به. لا تعلم أنها بلوحتها تلك قد أججت شجوننا لم يعد بذلك الصعيدي الصغير طاقة لاحتماله بعد الآن.. دق النظر من جديد، فتيقن من خلو السطح المقابل من ساكنته. أعاد ريشة إلى مخبئه، مع وعد بلقاء قريب، ثم انصرف إلى الحفل

الريفي المنتظر من الجميع إلّا... إحداهن!

توافد سكان العش على ساحة الدار للمجاملة. على عتبة الدار كان وقوف طلال لاستقبال المجاملين، مرتديا جلبابه الأبيض الذي ظهر من فتحة صدره الصديري سمّني اللون، إضافة للـ (بُلغة) بنفس اللون. رُمقه من بعيد ينظر إليه، وعلى وجهه نظرة شماتة لم تؤلمه قبل الآن بمثل هذا الشكل، رغم اعتياده عليها منه قبل الآن لسنوات. بات على يقين الآن أن هذه الخطبة لم تكن إلا حلقة جديدة في مسلسل حقد أخيه عليه وكرهه له. الآن فقط تأكد أنه كان على علم بكل شيء، وقرر أخيرا توجيه ضربته، الآن فقط... شعر أنه وحيد أبويه!

حاد عنه بنظره إلى تلك الحجرة الخاصة بالـ (حريم)، بينهن كانت تجلس في كامل حلتها، بابتسامة باهتة تشبه ابتسامته، ضحكة ناقصة تشبه ضحكة أمه، صوت مبحوح يشبه صوت ريشة، ونظرة خاوية تشبه تلك التي رآها على وجه إحداهن في البيت الكبير، يوم ودّع البدر الراحل.

عاد بنظره مجددا إلى القادمين منشغلا بهم، ساعتان قضاهما بين الجمع على مضض، قبل أن تهزمه إنسانيته، فقرر الانسحاب دون أن يلحظه أحد من الحضور. على غير هدى، هام على وجهه في شوارع العش، مسترشدا بضوء قمري خجول يستتر ببيوت القرية الشعثاء من شوارعها.

في هذه البقعة النائية على أطراف القرية، كانت نهاية رحلته، بقعة

تجلّى فيها ضوء القمر كاملا دون نقصان.. يشعر فيها بأمان يفتقده في غيره من طرقات القرية الصماء وبيوتها البكماء وحقولها أسيرة ضبايات هموم مزارعيها.. ينظر إليها القمر من عليائه على عرش المملكة السماوية الظلماء إلا من بقعة يتوسطها نوره البرّاق. هيبة المكان النابعة من سكونه وسكون ساكنيه ربما كانت السبب الأول في إرسال القمر رسل أضوائه في كامل حلتهم، ملك في السماء يرسل نظيره في الأرض بما هو أهل له، بين شواهد القبور سار طلال غير عابئ بالرهبة العظيمة التي أحاطت المكان. كان يعرف طريقه جيدا رغم الظلام، أصبحت المقابر ملاذه الأول بعد كل ما كان، بها يشعر بأمان لم يجده في مساكن الأحياء، بها يلاقس راحة لم تهبها له الحياة، بها... يرقد أحدهم افتقده بشدة.

أمام قبره وقف حيناً يقرأ الفاتحة، تلك التي تعلمها أقرانه في فصول المدارس، وتعلمها هو في مآتم الأحباب.. كان هذا اختلافا كافيا على كل حال ليعيش حياة كذلك!

أنهى القراءة، قبل أن يضع إحدى قطع الحلوى فوق القبر:

- إزيك يا سيدنا؟... اتوحشتني جوي من ساعة ما فارجتنا ومشيت، كده بردك تهون عليك العشرة وتسييني لحالي وسطهم اكده؟، انى... انى عمرى ماكرهت على، عمرى ما كان نفسى أأذيه،

معارفش هو هيعمل معايا اكده ليه؟، صحيح نسيت اجولك.. مش انى
 بجيت مصاحب داکتور... اى واللہ زى مابجولك اكده داکتور جدع
 جوى من مصر كل يوم هيعزمنى على رز بلبن وشاى من الكافتريا
 الملكى اللي حدانا في الجيش... ايه؟... اسلملك عليه؟... حاضر
 يا سيدنا يوصل، فكرنى بيك جوى، بس لساته بردك مجادرش يملئ
 مكانك ويبجى الشيخ بدر، تعرف؟... الواد ريشة هو الوحيد بيناتهم
 اللي هيبكى لحالى، امى معارفاش حاجة هي وصابرة، هما مناجصينش
 هموم يشيلوها بردك كفاية اللي هما فيه، محدش جادر يبجى الشيخ بدر
 تانى يا صاحبي، محدش فيهم بجى يصحبنى للفجر ولا يجيلى ارواح
 ولا يجوللى يا (واد يا طلال)... انى خلاص مبعجش جادر اكمل،
 تعبت... تعبت جوى ياخوى، تعرف انى نفسى في ايه دلوك؟... نفسى
 أجيلك، نفسى أجيلك جوى يا شيخ بدر!

- يا سايرين في الشوارع كيف غبار أمشير
 ومهرية كعوب أحلامكم الخضرا من المشاوير
 يا حافظين المناهج صم
 ودافعين للنجاح تمنه كلبش ودم
 يا عايشين الفرج أزومات

وعايشين الفرح تعاسات
وعايشين في الحياة أموات
كما الصراصير

- الله الله، والله زمان يا عم حسام.
- زمان!... جرى ايه يا عسكري؟ دول يدوب اسبوعين ثلاثة!
- يا راجل اسكت دول عدّوا كأنهم سنتين ثلاثة!
- هاهاها بقى هم دول عساكر الجيش اللي هيحاربوا؟، جابوا
آخرهم في اسبوعين؟... اهو انا كده اتطمنت على مصر.
- يا عم ماتقطمناش بقى.
- يا جدعان ما تسيبونا بقى من السيرة دي هو احنا واخدين اجازة
من الجيش عشان نتكلم عن الجيش؟
- إبراهيم كان المتحدث!
- طب كلمنا عن المدنية انت يا عم المستجد.
- تولى شافعي الرد.
- هو الواد كيمو فين يغنيلنا حاجة طيب؟
- كيمو زمانه جايي كلمته قاللي في الطريق.
- للكبار فقط!
- قالها ناصر المنشغل بتصفح مواقع الأخبار الالكترونية، فانتبه لها

الجميع، حيث قال شافعي:

- انت عبيط يا ابني ولا ايه؟ ... هو ايه ده اللي للكبار فقط؟ ... ده

عمل فني جديد للمخرج المبجل إياه ولا ايه؟

- الإعلام... الإعلام كله بقى للكبار فقط، ماهو أصل كمية

الكذب والتضليل والافتراء والضحك والدقون دي ماينفعش يبقى ليها

اسم تاني!

- يا سيدي... يعني هي جت عالإعلام؟ جمهورية مصر العربية

كلها بقت للكبار فقط!

- طب حاسب بس بدل الكبار دول ما يسمعونك.

قالها إبراهيم!

- واحنا من امتي بنخاف؟ اللي يسمع يسمع... على رأي الوايت

نايتس جيلنا من الموت مابقاش بيخاف خلاص!

- بس الموضوع بقى كئيب قوي يا جدعان. حالة الانقسام اللي

موجودة في الشارع الثوري دي هتودينا لكارثة.

- يا ابني الكارثة دي انا توقعتها من مشهد واحد بس، مش بس

توقعتها ده انا متأكد منها كمان.

حسام كان القائل، يأتيه رد ناصر:

- مشهد ايه يا عم الشاعر؟

- أول ما فتحت التلفزيون ولقيت مذيعين الفلول جايين مناظرة
زي ماهم بيجملوها أو خناقة زي ما الواقع يقول بين شباب الثورة
المستقل من ناحية وشباب الإخوان والتيار الإسلامي السياسي من
ناحية تانية.. سينا العدو الحقيقي ومسكننا في بعض، ويا ريتنا حتى
سيناه ده احنا عملناه حكم بيننا.

- للأسف عندك حق!

- نظام مبارك لعب لعبته في منتهى الذكاء.

- لعبة ايه؟

- السلطة في مصر بالذات قائمة على محورين رئيسيين، محور
موجود في كل دول العالم اللي هو عبارة عن مؤسسات الدولة
ومجالسها النيابية والمحلية، والمحور الثاني اللي تملكه مصر بالذات
أو بمعنى أصح كل دول العالم التالت اللي هو الإعلام، لأن الدول دي
الغالبية العظمى من شعبها جاهل فالتأثير فيه سهل.

- أيوه بردو مافهمتش!

- استنى يا بنى آدم لما أكمل!

- لامؤاخذه افتكرتك خلصت.

- المجلس العسكري بص على المشهد من فوق، لقي ان المحور
الأول اللي يقدر حاليا يسيطر عليه ويأخذه هو التيار الإسلامي عموما

والإخوان خصوصا، لأنهم أكبر تيار موجود في الشارع ومحتك بالناس من زمان خصوصا ان إمكانية التزوير دلوقتى بعد الثورة مباشرة كده مستحيلة فماكانش فيه مفر من الصندوق. وده اللي حصل فعلا، وسيطر الإخوان على المجالس النيابية واتحادات الطلبة والنقابات وكل ما له علاقة بصندوق انتخابات. أما بقى المحور الثاني اللي هو الإعلام، فالمجلس اداه للشريك الثاني في الثورة اللي هو الشباب الثوري المستقل ظاهريا بس. يعنى اللي باين للناس إن الشباب هو اللي بيتكلم وبينتقد نظام الإخوان، لكن الحقيقة إن المالك الحقيقي للإعلام كان نظام مبارك اللي استغل الشباب كواجهة يستخى وراها، مابقاش ليهم شغلانة غير شتيمة التيارات الإسلامية عمال على بطل، قال يعني هو كده مذيع ولا مذيعة ثورين وبينتقدوا النظام، لكن الحقيقة إنه عايز يهدم أي نظام عشان يثبت ان نظام مبارك كان هو الناجح والشعب ظلمه، لدرجة ان الفجر وصل بيهم انهم يروجوا إن الاخوان هيبيعوا قناة السويس والأهرامات والسلفيين هيحطوا مادة في الدستور تزويج البنت من سن تسع سنين. من الآخر كده الشباب الثوري اتضحك عليه وأوهموه انه يملك حرية الرأي والإعلام، زي ما الإخوان اتضحك عليهم وأوهموهم انهم يملكون السلطة اللي ما زالت في إيد نظام مبارك في كل المؤسسات... يعنى من الآخر الطرفين امتلكوا الوهم...

والحقيقة ان مبارك ونظامه كانوا المُلَّاك الحقيقيين لكل حاجة ومازالوا لغاية دلوقتي!

- احنا المسؤولين!

شافعي كان القائل.

- إحنا مين؟

سأل ناصر.

- الطرفين... إخوان وشباب.

- لأ حاسب... انت بتقارن مين بمين؟ بتقارن شاب طلع يقول

كلمتين في برنامج زي واحد معاه سلطات وزارة ومجالس نيابية وغيره؟

- ما هو حسام قالك اللي فيها، ماامتلكوش أساسا، وبعدين دول

مش مجرد كلمتين في برنامج، الكلمتين دول في دولة زي مصر بالذات

وشعب زي شعبها ممكن يعملوا حاجات كتير قوي، وان كنت باحمل

الإخوان الجزء الأكبر من المسؤولية.

- اشمعنى؟

- بداية انهيار الثورة كان في محمد محمود!.. نظام مبارك كان

المستفيد الأول والأوحد من محمد محمود!.. او عوا تتخيلوا اننا هزمننا

مبارك ونظامه ومجلسه في محمد محمود، بالعكس دول عملوا كل

اللي هم عايزينه وبامتياز كمان. المجلس العسكري ماكانش عايز يقعد

في السلطة كمان كام شهر زيادة، مش دول اللي هيفرقوا معاه، المجلس عمل كده عشان يفعل خطة الانقسام دي، أغرى الإخوان بكراسي البرلمان واستفز الشباب بعدم تسليم السلطة بسرعة، وهنا الإخوان بلعوا الطعم وحصلت الكارثة اللي لغاية دلوقتي بنعاني منها، رغم ان الاخوان اعتذروا بعد كده عن الخطأ ده، لكن الوقت كان فات خلاص وماعادش ينفع لأنه خطأ متعلق بدم!

طق... طق... طق!

- قوم شوف مين عالباب يا شافعي.
- شغال عند اللي خلفوكو أنا بقى ولا ايه؟
- اللي يشوفك من ثانية وانت بتحلل سياسة مايشوفكش دلوقتي...
- قوم يلا انت اقرب واحد للباب ماتبقاش تقيل.
- مش قايم قوم انت هو انت اتشليت؟
- يوووه... اخلص يلا اللي عالباب خلل من الانتظار.
- أمري لله.
- قام شافعي للباب يفتحه قائلًا:
- هو انت؟ ... ادخل بشعرك ده.
- مين؟
- ده الموسيقار المغفل!

كعادة أيام الإجازات، انتهت بسرعة لم يتخيلها الجميع. عادوا من جديد لأسوار المعسكر الكبير بانتظار الترحيل بعد سماع (التوزيعة)، اللقاء الأول بينهما كان منتظرا من كليهما بطبيعة الحال، المكان كذلك كان بانتظار جلستهما التي لم يفلح غيرهما في إقامة طقوسهما على نحو يرضي المكان ويعيد إليه ذكريات أيام سابقة.

- شكلك مش عاجبي يا دفعة، من ساعة ما قعدنا وانت سرحان، حتى كوباية الشاي اللي كنت بتشربها مولعة تلجت من الركنة وانت لسه ماقربتش عليها.

- ها؟... أبدا والله يا دكتور... كل حاجة زين الحمد لله... تعب السفر بس.

- على إبراهيم بردو؟ هو أنا يعني مش عارفك؟
لم يرد طلال، اكتفى بنظرة خاوية تحت قدميه، أتبعها بكفيه تعبثان بعينه اللامعتين.

- ايه ده... انت بتعيط يا طلال؟
قالها إبراهيم وقام من مقعده إلى صديقه، رابتا على كتفه، ضامًا إياه مستطرذا:

- صلي عالنبي طيب وقل لي بس ايه اللي حصل لكل ده؟
- أني تعبت... تعبت وخلاص ماعدتش جادر اكمل!

- واضح ان فيه حاجة حصلت في الإجازة... حصل ايه قل لي
طيب عشان اقدر اساعدك.

- وردة اتخطبت!

قابلها إبراهيم بصمته، وقد لمعت في رأسه صورة إحداهن مرسومة
بأسود الألوان، لم تلبث أن محتها دموع طلال معيدة اللوحة لبياضها
من جديد. ما أشبه هذا الصعيدي المسكين به، فقد أحباب وفقدهم،
تاهت منه إحداهن كما تاهت منه، شيهان في طرقات الحياة جمعتهم
أخيرا على مقاعد طاولة واحدة، يستكشفان في بعضهما تلك الجوانب
من المتشابهاات، كأنى بها تتحداهما أو... منهما تسخر!

- اتخطبت لمين؟

- علي!

- أخوك؟

- ايوه.

من جديد سيطر الصمت على إبراهيم، مكتفيا بضم طلال إليه
حيناً، قبل أن يعود للحديث مجددا بقوله:

- اهدا طيب... اهدا، استنى هاجيلك شوية مية تشر بهم.

قالها إبراهيم وانصرف إلى الكانتين، لجلب زجاجة مياه وضعها
أمام صديقه مستطردا:

- هاسألك سؤال يا طلال.

.... -

- عمرك سألت نفسك انا ليه باشرب الشاي بارد رغم ان طعمه

بيبقى أسوأ مليون مرة؟

- ليه؟

- عشان ماتلسعش!

- ها؟

- يعني انا دايمًا باحب الانتظار على الحاجة لغاية ما تاخذ وقتها،

مش هافرح بحلاوتها دلوقتي لما تضرنني بعدين، لكن ممكن اقتنع

بنص الحلاوة دي لو من غير ضرر... فهمتني؟

- لأ!

ابتسم إبراهيم مستطردًا:

- ماحدش عارف الخير فين يا طلال، دي مش نهاية العالم، خليك

واثق ان مادام علي خطب وردة عشان بس يزعلك أو يضايقك، فعمر

ربنا ما هيسمح بمهزلة زي دي تحصل على أرضه مادامت النية مش

صالحة، الدين بتاعنا بيحب المرأة قوي يا طلال لا يمكن هيسمح ان

حد يهينها بالطريقة دي... استنى إرادة ربنا وساعتها بس هتعرف قيمتك

عنده، ساعتها بس عينيك دي مش هتبطل دموع من الفرحة!

- كلامك طممني والله يا دكتور!
- ثاني دكتور؟... ماتصحا بقى يا دفعة مش اتفقنا مافيش دكتور دي...؟ دول حتى بيقولوا الصعايدة بي فهموها وهي طايرة.
- ابتسم لها طلال قائلا:
- الله يسعدك والله شلت عني كتير بالكلمتين دول.
- انا ان شاء الله هاترحل بكره الصبح على المستشفى العسكري اللي في القاهرة خلاص مش عايز بقى امشي وانا قلقان عليك فرفش كده واضحك الدنيا مش مستاهلة.
- ان شاء الله، المعسكر ماهييجاش له طعم من غيرك والله.
- ربنا يخليك يا طلال، انت هتترحل امتى صحيح؟...
- لسه هييجولوا المندوب بتاعنا هياجي على آخر الاسبوع اكده.
- خلي بالك من نفسك ربنا معاك.
- آمين يارب.
- يلا انا هاقوم بقى انام يادوب كده عشان الحق اظبط حاجتي
- كمان الصبح الوقت بيبقى ضيق.
- ربنا معاك يا دكتور.
- قالها وقام إليه يحتضنه مستطردا:
- اشوفك على خير ان شاء الله يا دكتور، ربنا معاك يا صاحبي،

شد حيلك اكده عشان تبجى مجند زين ويتحاكوا بليك، بس أمانة عليك يا شيخ ما تنسى طلال.

- يا خبر أبيض؟.. أنساك ازاي يا طلال؟، وبعدين احنا اكيد هنتقابل ان شاء الله تاني، مش كده ولا ايه؟

- طبعاً، انت بس تعالى شرفنا في العش واني اخلي الحاجة تدوجك طيخها الزين.

- لا انا عايز ادوق طبق الفول بتاعها كفاية قوي.

- هاهاهاها...بس اكده؟

- بس اكده

- هاهاهاهاها...توصل بالسلامة ان شاء الله يا ابراهيم.

- الله يسلمك يا طلال، خد صحيح... امسك الموبايل ده.

- ايه ده؟

- ده هدية!

- هدية؟

- ايوه يا عم مالك استغربت كده ليه؟... مانا بصراحة عايز

اكلمك وانت كنت قايل لي ان انت مش معاك موبايل، وبعدين ده هدية هتكسفي ولا ايه؟

تبسم طلال وتناول منه الهاتف قائلاً:

- ماشي كلامك، هدية مقبولة.
- انا سجلتلك رقمي وهاكلمك ان شاء الله بكرة اول ما اوصل المستشفى.
- ان شاء الله توصل بالسلامة.
- يلا تصبح على خير يا دفعة.
- وانت من أهله يا صاحبي.

أسبوع مضى على المغادرة... ما زلت ذاكرة، لا أعلم حقيقة ذلك الشعور الذي غمرني حينها، مزيج من فرحة الخروج من الأسوار وحزن لوداع القابعين خلفها.. الصول رضا، الشاويش علاء، أصدقاء الفصيلة ١٥، محمود فتى الكانتين و... طلال! هذا الصعيدي الغريب، كم سأفتقد نداءه لي مع كل آذان ليجمعنا صف صلاة واحد في مسجد المعسكر، كم سأفتقد حلواه التي طالما أعطانيها بعد كل صلاة، كم سأفتقد جهله البرئ بكل حديث، كم سأفتقد حكاياته عن بدر ووردة وعلي وصابرة وريشة وعم علام، كم سأفتقد كل شيء حواه هذا الشاب بعقل العواجيز وقلب الرُّضّع.

أبدا لن أنساه... أبدا لن أنسى طلال ما حييت!

- يا رجاله المندوب بتاعكم وصل!
سمعتها منه الجميع، فهموا كلُّ إلى دولابه الحديدي، يلتقط من
مخلته الزي الزيتي استعدادا للانطلاق. ضوضاء من نوع بهيج، يقودها
عثمان بصوته الكرواني على أنغام طلال المتقمص دور الـ (طبال)
على دولابه الحديدي وأيادي البقية يشاركونهم بتصفيقهم:

واه يا عبد الودود

يا رابض عالحدود

ومحافظ عالنظام

كيفك يا واد يا صحيح

عسى الله تكون مليح

وراقب للأمام

أملك عتدعي ليك

واعتسلم عليك

وتجول بعد السلام

خليك ددع لابوك

ليجولوا منين دابوك

ويمسّخوا الكلام

واه يا عبد الودود

عجول لك وانت خابر

كل الجضية عاد

ولسه دم خيِّك

ماشرباش التراب

حسك عينك تزحزح

يدِّك عن الزناد

خليك يا عبده راصد

لساعة الحساب

ان كنت واد ابوك

تجيلي تار أخوك

والاهل يبلغوك

دميعا السلام

- الله عليك يا واد يا عتمان يسلِّم فمَّك يا واد حسَّك ولا وهدان النمس؟

- مين وهدان النمس ده؟

- واه؟... ماhtعرفشي وهدان النمس أجدع صاحب ربابة في جبلي؟

- ولا عمري سمعت عنه حاجة.

- استنى هاسمعك موال البُرتجان جال لليوستفاندي حجك عليا

اني اسف موت عالتلافون.

- كل ده اسم موال؟
- اصله هيغنيه بضمير شوي... اسمع اسمع.
- لا ياعم الله لا يسيئك عايزين نلحجوا نلموا حاجاتنا خليه نسمعه واحنا مسافرين.
- ماشي كلامك.

ساعة واحدة كانت كافية للجميع لإنهاء كل شيء على النحو المطلوب، البطاطين الثلاث ملفوفة كحيّات تحاول لدغ ذيولها في قاع المخلة، تعلوها باقي (المهمات) من أزيائهم وملاءاتهم وأحذيتهم الميري، ثم قفل (كمبيوتر) لغلق المخلة الموشكة على الانفجار. غادروا جميعا إلى أرض الطابور، لتسليم أنفسهم إلى المندوب المنتظر. سطر آخر من سطور الوداع تلوذ كلماته بصفحته، خبرته بوداع الأماكن بات أكثر ما يميزه.. لكل تفصيلة في كل مكان مر به بصمة في لوحته، حقول العش ومسجده وأعشاشه المسماة مجازا بالبيوت، عنابر المعسكر وأرض الطابور والكاتنين، حتى رحلة الجنوب لم تنس إضافة بصمتها بلون البياض والسواد في لوحة ذكرياته، التي باتت لا تعرف غير هذين اللونين. نظرة أخيرة من منصة أرض الطابور، في صورة كبيرة التقطها هاتف عزت (أبو كاميرا) الذي اهداه له عمه القادم من الإمارات في الإجازة الأخيرة. بسمه، ربما لم تعبر بشكل كامل عن أحداث الخمسة

وأربعين يوماً، كعادتها ذاكرة المرء تتفنن في رسم مشهد الوداع ليمحو
ببديعته رماديات سابق اللوحات. اللوحة الأخيرة، بعلامة نصر رفعها
الجميع، انتبهوا بعدها لصوت الشاويش علاء:

- بلا بارحاً!!!!!!!!!!!!!!الة!

تفرق الجمع سريعا، وتوجهوا إلى حيث تقف الأتوبيسات المكلفة بنقلهم إلى محطة مصر. سريعا تم النداء على أسمائهم، امتخذوا أماكنهم، قبل أن تنطلق بهم تلك الأتوبيسات إلى حيث يستقبلهم القطار الحربي، ناقلا إياهم إلى أماكن توزيعهم.

ساعات خمس قضوها على رصيف المحطة، كقطع غيار بشرية انتهت صلاحيتها ولم تعد صالحة للاستخدام الا ك... عساكر. جاء القطار أخيرا في تمام التاسعة مساء، كان أشبه بقبر متحرك، وُضعت بداخله بعض المقاعد التي كساها التراب تماما، لينعم الثعبان الأقرع ببعض الراحة في تعذيب ساكنيه. الظلام الدامس كان اللغة الرسمية للقطار القبر، النوافذ دون زجاج، مما يسمح بعبور تيارات الهواء المثلجة بأريحية إلى الداخل، أماكن الجلوس بالطبع لم تكن كافية للجميع.. البعض اتخذ مجلسه إلى جوار حمام القطار، مثبتين قوة تحمل، أو غياب وعي غير طبيعي. بعض آخر صعد إلى أماكن وضع الحقائق، منكمشا بقدر يسمح له بالبقاء حيا في ضيق المكان.

إذا شعرت برغبة في دخول الحمام، فلا ينصحك العقلاء بذلك، لأن دقائق الذهاب والعودة أكثر من كافية ليحتل أحدهم مكان جلوسك ويغبط في نوم عميق. إذا شعرت بالصقيع يلفحك والغبار يفترسك عند عبور القطار مساحات الصحراء محيلاً إياك ومن إلى جوارك إلى لون الرمال، وأردت التحرك من جوار النافذة مصدر العذاب، فسينصحك نفس العقلاء بالثبات، لأن الصبر على النافذة أهون من الصبر على مجاورة حمام القطار وطرقاته الأشبه بزنازين الرومان في العصور الوسطى، تمهيداً لافتراس الأسود لمسجونها. إنه القطار الحربي بكل حال.

سبعة عشر ساعة من السفر المتواصل في عربات القطار الحربي، وأتوبيسات النقل الخاصة بالقوات المسلحة، أو كما يسمونها (جهاز) بصحبة مخلة بحجم بشري بالغ، ربما تكون كافية ليستعمرهم الإرهاق تمام الاستعمار بهذا الشكل المهين. وصلوا أخيراً لبوابة المعسكر المنتظر إياهم منذ حين، يحملون مِخْلَهُمْ على ظهورهم، يستقبلهم عساكر الأمن بوجوه رسم الغضب لوحته على صفحتها بمنتهى الاقتدار. (ملحوظة: عساكر الأمن في الجيش المصري هم الفئة البشرية الوحيدة التي من الممكن أن تحمل لك كراهية دون معرفة مسبقة بك!)

- اللي يتفتش ييجي على يمين البوابة!

قالها ذو العلامة الحمراء على كتفه، مكتوب عليها (أمن الوحدة)،

يشير بيده إلى ركن قدر لم تطله يد النظافة من أعوام تسعين. أنهى
وزملاؤه تفتيشهم للمستجدين، الذين توفدوا اتباعا على يمين البوابة، قبل
أن ينتهبوا من جديد لقوله - وما زالت (لبانة) تعبت بلسانه ويعبث بها:
- الناس كلها انتباه... انتباه!!!!!!

في ذعر الغريب عن المكان نفذوا الأمر، منتظرين القادم من
الأوامر، يصارعون ناعسا لم يعد يجد أي مقاومة في عيونهم، إلا بقايا
قليلة نشاطها صرخات عسكري الأمن في آذانهم:
- كله يفضي مخلته!

تلقوها ناظرين لبعضهم بشيء من الاستغراب، قبل أن يعيدهم
للانتباه قوله من جديد:

- جرى ايه يا عسكري منك له هتتحايل عليكم ولا ايه؟
- يا دفعة احنا مسافرين بجالنا يوم بحاله شفنا ليلة ما يعلم بيها الاربنا.
- بتقول ايه؟... دفعة؟، هو انت أساسا دفعتي عشان تقوللي يا دفعة؟
- يا عم حجبك عليا، بس يعني مامستهلاش ماحنا اتفتشنا خمسين
مرة واحنا جايين من الشرطة العسكرية لزومه ايه نجلب المخلة بكل
اللي فيها ده على التراب ونرجعوا نخطوه تاني؟
- هتتكلم كثير مش هيبقى في مصلحتك، نفذ الأمر بالذوق احسن
ما تنفذه بالعافية.

لم يعد أمام الجميع إلا الانصياع للأوامر.. الخطوة الأولى كانت إخراج إحدى البطاطين وفرشها على الأرض، ثم تفريغ المخلة من محتوياتها شيئاً فشيئاً، منتظرين عساكر الأمن لتفتيش المحتويات، الذي استغرق، دقائق فقط وكأنما التفتيش لم يكن المراد بقدر ما كان الرغبة في ممارسة سلطة ما على هؤلاء.

- اللي معاه موبايل يطلعه كده بالراحة، اللي هيدينا الموبايل هياخده وهو نازل أجازة انما بقى اللي هنطلعه احنا منه هنكسره قدام عينيه، وكله بالميري الموبايلات ممنوعة

قالها، وفي جيبه هاتفه الخاص بارزا، وكالعادة انصاع الجميع للأوامر مخرجين هواتفهم النقالة، مسلمين إياها إلى عسكري أمن آخر، قام بتسجيل كل هاتف باسم صاحبه، قبل أن يتبّه الجميع لذلك القادم من بعيد كغراب في زي طاووس، ينظر اليهم نظرة المستعد لإعدام أحدهم قائلاً:

- انتباه... مش باقول انتباه يا بيادات يا رمم؟.. انتباه!!!!!!

من جديد عاد الذعر للسيطرة على المكان.. ثوانٍ فقط كانت كافية لتنفيذ أمر الحسيني الذي استطرد قائلاً:

- مجموعة صفا.... انتباه!!

نفذوا الأمر، فعاد من جديد يقول:

في المؤسسة للمؤسسة، فيعطوا دون انتظار المقابل، ويروا النجاح في تحمل مسؤولية الكيان لا الهروب منها، ويدعوا في صلواتهم للكيان لا عليه)

- معسكاااار صفا... معسكاااار انتبااااه... جنباااا سلاح... معسكاااار صفا... معنوي!

مجموعة من الأوامر افتتح بها العقيد خالد طابور الصباح، خاتما إياها بهذا الأمر (معنوي) آذنا لمجند بتولي دفعة الحديث قائلا:

- بسم الله الرحمن الرحيم... إن الملوك إذا دخلوا قرية أفسدوها وجعلوا أعزة أهلها أذلة وكذلك يفعلون... صدق الله العظيم... ومن أقوال الرسول صلى الله عليه وسلم... إنكم ستحرصون على الإمارة وستكون ندامة يوم القيامة، فنعم المرضعة وبئست الفاطمة... صدق رسول الله صلى الله عليه وسلم... ومن أخبار جريدة القوات المسلحة لللسنة الثانية والعشرين... القائد العام يؤكد أن القوات المسلحة مستمرة في دورها الريادي لحماية البلاد يد تبني ويد تمسك السلاح!

- معسكاااار انتباه... أي حد عنده مشكلة ارفع ايدك فوق!
- معسكاااار صفا... انتبااااه... أي حد عنده مشكلة ارفع ايدك فوق... اجمع بره... حد تاني عنده مشاكل؟... طيب، بأمر السيد قائد

المستشفى، صدرت أوامر بتوقيع عقوبة الحبس على أي حد يمشي على المسطحات الخضراء (في هذا الوقت كان هناك خبر عن عسكري فاته القطار الحربي ولم يجد بديلا، فمات في الصحراء حتى تم العثور على جثته متعفنة!)

- سيادة المقدم بكر اتفضل دوّر طابور تعليم أولي يافندم!
- أوامر يافندم، اصحى معايا الناس، تشكيل مفتوح، ساعدونا يا جماعة، السادة صف الطباط هنشتغل تعمير وتفرغ البندقية لكل المجموعات.
- بقالنا شهر ونص هنا بنشتغل تعمير وتفرغ لغاية ما حفظنا الكلام صم مافيش أي تجديد ولا ايه؟

قالها أسر بصوت خفيض لعبد العاطي، الذي رد قائلا:
- يا عم احنا هنعرف أحسن مالحكومة؟ ادينا بنضيع وقت بدل مانطلع الصيدليات من دلوقتي مش ناقصة صداع.
- على رأيك!

- بيقولك العقيد خالد عدّى امبارح عالخدمات وكانت مذبحة.
- ليه؟

- العسكري أحمد محمد عبد الرحيم بتاع التعيينات اتلسع سبع ايام حبس شعر ودقن، والواد مينا مدحت عشر أيام حبس كان واخذ معاه مخدة ولحاف في الخدمة.

- طب وايه المشكلة في اللحاف والمخدة؟
- يقولك انك كده هتنام وتاخذ راحتك قوي في النوم وده ماينفعش لازم تفضل دايمًا مصحّح عشان لو حصلت أي مشكلة تبقى جاهز.

- اه تمام وايه ثاني؟
- الواد العريف أحمد عبد الرحمن بتاع الاشغال خد خمس أيام حجز بالوحدة كان معاه ام بي ثرى وسماعات في الخدمة.
- الحمد لله اننا مش في النبطشية بتاعته مش ناقصين.
- الصوت عالي ليه؟

كانت الكلمة كافية ليصمت الحديث بين الصديقين، استماعاً للوصول إبراهيم الحصافي، الذي استفاض في تكرار شرح المطلوب منه، والذي يحفظه المجندون عن ظهر قلب، منتظراً إشارة النهاية لينصرف ومعه الجميع، كلٌّ إلى حيث يبدأ يوم العمل... الفعلي!

- ولا يا شريف قوم هاتلنا فطار بقى انت عليك الدور النهارده!

- أنا لسه جايب اول امبارح شافعي النهارده!

- شافعي مين.. اللي هيجيب سيرة شافعي في الفطار هادّمه.

- خلاص يا جدعان انا هاجيب النهارده.

قالها إبراهيم، قائماً إلى ورقة بيضاء وقلم، مدوناً إفطار الجميع

- شافعي هتاخذ ايه؟
- ۲ فول على طعمية على بيض على بابا غنوج!
- طيب ادي أول واحد مش هيطلب حاجة... شريف هتاكل ايه؟
- ۲ فول يا صاحبي!
- عبد العاطي؟
- ۳ طعمية!
- آسر؟
- ۱ بطاطس.
- ايه الرقة المبالغ فيها دي؟
- يا عم انا مش جعان اصلا دي حاجة كده بس اشارككم.
- طيب دكتورة فاطمة نجيبك معانا فطار؟
- شكرا يا إبراهيم هتعبكم بس.
- لا يا فندم متقوليش كده تاكلي ايه؟
- سندوتش مسقعة بس.
- تمام.
- (عسكري الشطرنج يستطيع التأقلم مع كافة ظروف المباراة وكافة مربعات الرقعة، لعلها الميزة الوحيدة التي يملكها، أو أنها بمعنى أكثر دقة... فرضت عليه فاستغلها!)

- نفسي اعرف حاجة واحدة بس!

قالها عبد العاطي محدثا الجميع:

- حاجة ايه يا بُرم؟

شريف كان السائل

- دلوقتي في آخر مؤتمر عمله معنا اللوا قائد المستشفى قال

ان الأدوية الميري احسن من الملكي بكتير لأن المادة الفعالة بتيجي

من النمسا ومش عارف فين وبمواصفات مش عارف عاملة ازاي...

ليه بقى الدوا بتاعه وبتاع الناس اللي بتروحله مكتبه اللي بياخذه من

الصيدلية كله تقريبا ملكي؟

- يابني مش هو بيدفع تمن الدوا ده زيه زي أي حد؟

- تمن الدوا ده اللي هو ستة جنيه للصنف حتى لو كان تمن الصنف

٢٠٠ ولا ٣٠٠ جنيه.

- دي خدمة بيقدمها الجيش لولاده زيه زي أي مؤسسة تانية ودي

خدمة عامة للكل مش مخصوصة للقائد بس.

قالتها النقيب فاطمة، يأتيها رد شافعي:

- يا دكتورة مش ده المقصود، المقصود انه مادام بيقول لنا نقنع

المرضى ان الدوا الميري احسن من الملكي عشان ياخدوه، الأولى ان

هو القائد يقنع نفسه ويقنع اللي حواله بكده.

- على فكره بقى قائد المجمع مكتبه مفتوح لأي حد، يعني لو أي حد طلع له طلب منه حاجة دوا او غيره مش هيتأخر عليه.
- يعني يا دكتورة كل واحد هيتظلم ولا مش هياخذ حقه هيطلعه؟
- دي بقى مشكلة اللي بيتظلم ويسكت.
- ماهو أكيد عارف ان فيه أساسا مبدأ ظلم في المكان اللي بيديره مطلوب منه يحله مايستناش لما تجيله شكوى.
- مين قالك انه عارف؟
- لو مش عارف تبقى المصيبة أكبر.
- اطلع قل له بقى الكلام ده خليه يسجنك لآخر جيشك.
- قالتها ضاحكة، تأتيتها ضحكات الجميع قبل أن يقول أسر:
- والله يا دكتورة فاطمة اللي مصبر الواحد عالجيش ان فيه ظباط زي حضرتك كده بيعاملونا زملاء مهنة مش ظابط وعسكري، انا اصحابي في وحدات تانية بيتهانوا.
- زملاء ايه يا عم ده استنى بس لما نفطر وهتلاقى بتقولك نضفوا الاستاندات واجردوا الصيدلية ومش بعيد تقولك امسحوا الصيدلية بلسانكم.
- قالها شافعي مازحا، يأتيه رد الدكتورة فاطمة:
- طب ايه رأيك بقى يا شافعي ان انت بالذات هاتعمل كل اللي قلت عليه ده.

- هاهاهاهاهاهاها
- شافعااااي!
- عايز ايه يا عبد العاطي؟
- كَلِّم فيه حد عايزك عالشباك؟
- مين؟
- يا عم تعالى شوف انت.
- ماتقول مين يا عم وخلصنا.
- عم إبراهيم بتاع الشرطة العسكرية.
- سمعها شافعي، فقام إلى حيث يقف عبد العاطي قائلاً:
- ماتروح تقولها في ودن الدكتورة فاطمة احسن!
- اعملك ايه ما انا عمّال اقولك تعالى شوف عامللي فيها سفير الدانمارك ومش عايز تتحرك.
- عم إبراهيم صباح الفل.
- قالها شافعي لذلك الواقف على الشباك، يأتيه رده:
- صباح الجمال يا شافعي، باقولك ايه عايز علبتين نوسك و خمسة انسولين وعلبة اوجمنتين!
- إيـــــــــه يا عم إبراهيم هو انت جاي كارفور؟
- ناس طالبينهم مني والختمة الشريفة.

- طب ما يولعوا يا عم إبراهيم هي صيدلتي... بقولك ايه هاجيبلك النوسك دلوقتي وبعد كده يحلها ربنا استناني.
- ماشي كلامك.
- باقولك ايه صحيح؟
- ايه؟
- البيادة اللي جبتها لى طلعت ٤٣ انا كنت عايزها ٤٢.
- عينا.
- وعايز بقى بالمرة طقم زيتي عشان ده خلاص كده بيودّع.
- هاجيبهم لك المرة الجاية ان شاء الله.
- وشراب عشان ده اتقطع من عند صباغي الصغير.
- ماشي... مش عايز دبابه بالمرة تروح بيها؟
- لا كده فل قوي باروح بتاكسي، استنى اجي بك النوسك.
- ماشي.
- يا جدعان عرفتوا اللي حصل؟
- قالها إبراهيم الداخلى لتوه وبيده الإفطار مخاطبا الجميع:
- خير؟
- العقيد خالد زودّ خدمات السلاح على الصيادلة بقت ١٠ خدمات في اليوم.

- يا خبر اسود!
- عرفت منين يا ابراهيم؟
- لسه الواد مجدي بتاع الأفراد مقابلني وانا باجيب فطار وقاللي.
- احنا كده معناها اننا هننزل ٣ خدمات سلاح في الأسبوع أقل واجب.
- ده في حالة لو فضلنا نفتري على بعض!
- تقصد ايه؟
- يعني احنا حوالي سبعين صيدلي، لو الخدمات اتوزعت علينا صح يبقى الواحد هيشيل خدمة واحدة في الأسبوع، انما احنا هناكل في بعض هتلاقي اللي بيقولك انا مابنزلش خدمات عشان ماسك عهدة واللي بيقولك انا بانزل نبطشية صيدلية طوارئ بس ورئيس القسم هو اللي محددلنا، واللي راح يعمل اورنيك عيادة ويقولك انا معايا راحة من الخدمات، وهكذا... لو احنا مش مقدرين بعض يبقى مانطالبش حد يقدرنا.. العقيد خالد عنده حق، ما احنا فعلا قوتنا كبيرة على الورق اللي هو شايفه!
- عند حق بصراحة!
- (عسكري الشطرنج قد يصبح في بعض الأحيان العدو الأول لـ...
عسكري الشطرنج!)

- المستجدين اجمع بره، النقيب مؤمن رجع من الأجازة وعازي
يشوفكم!

سمعها الجميع من الحسيني، فقاموا لتنفيذ الأمر في دقائق. مدة
ليست بالطويلة قضوها سيرا على الأقدام حتى مكتب النقيب مؤمن،
الذي خرج من مكتبه عند سماع صوت الحسيني الأمر إياهم بالتوقف.
- ثااابت!

قالها الحسيني عند رؤية مؤمن خارجا، فثبت لها الجنود حتى
أتاهم رد مؤمن:

- سينا انت دلوقتي يا صول حسيني عازي اقعد مع الرجالة شوية.
- أوامر سيادتك يا باشا.
- محلك اقعد.

قالها مؤمن، فجلس الجنود أمامه الجلسة العسكرية، وجلس في
مواجهتهم على كرسي بلاستيكي قائلا:

- منورين يا رجالة حمد لله عالسلامة.
- الله يسلمك يا فندم.

- أنا النقيب مؤمن نائب القائد هنا بعد الرائد وائل، احب اتعرف
عليكم بقى كده واحد واحد، نبدأ من اليمين.. اسمك ايه ومنين؟
- عبد الله من البحيرة

- سيد من دمنهور
- محسن من الجيزة
- طلال من سوهاج
- عثمان.
- منين يا عثمان؟
- من كوم الفوايح يا باشا!
- ليه كده بس ده انت حتى شكلك راجل طيب وابن حلال... امنع الضحك.
- استقبلها عثمان كما استقبل ضحكات زملائه بابتسامة باهتة، حجبت الكثير من أمارات المعاناة. بدا معتادا على تهكم الجميع وسخريتهم عند كل ذكرٍ لوطنه الصغير داخل خارطة الوطن الكبير!
- دي فين المنطقة دي يا عثمان؟
- مش مهم فين يا باشا، المهم انها موجودة.
- اصلي بصراحة اول مرة اسمع عنها.
- وآخر مرة يا باشا، احنا اصلنا صوتنا واطي مايبوصلش للى فوق.
- ممم... بس الاسم غريب بصراحة.
- شرح عثمان في نبرة تهكم..
- جيراننا من الأموات، بنحسد اصحاب البيت اللي جنب باب

القبر عشان شايف ضي من وش الدنيا.. النور الوحيد اللي داخل بيوتنا نور عمودين نور على باب المقابر.. الأب بيرمي بناته اللي مكملوش ١٥ سنة لسمسار جواز لعواجز العرب بالفلوس، العيل اللي ماکملش ٩ سنين بيشتغل زي التور ليل ونهار يمسخ عربيات ويورنش جزم عشان يصرف على أمه واخواته وفي الآخر يلاقيها مش جايبة همها فيبيع مخدرات وبرشام. نبش القبور وتجارة الجثث للطلبة.. لما كل ٤-٥ بيوت ليهم حمام مشترك برميل يفضوه كل اسبوع لما يتملي في مقلب الزباله اللي جنب القرافة، لما تلاقي كل ده يا باشا يبقى طبعي يبقى اسمها كوم الفواحش، الفواحش اللي في علامكم ودماغكم غير الفواحش بتاعتنا.

لعلها أولى المرات التي يلجم فيها لسان مؤمن بهذا الشكل. اكنفى بنظرة طويلة إلى عثمان، متأملا كل تفصيلة في وجهه الأسمر، كل خلية في وجهه كانت تحمل الألم بشكل ما، وجه لم يصل عمره للعشرين بعد بدا تمثالا في متحف بعمر القرون.. كوم الفواحش كانت حاضرة بخريطتها الكاملة على صفحة وجهه بصورة... اعتادها واعتادته!

- تعالى يا عثمان!

قالها مؤمن، فقام اليه الفتى مسرعا.. قام له مؤمن، ضمه إلى صدره مبتسما يقول:

- أنا على فكره كنت باهزر معاك لما باسألك مش قصدي حاجة
او عى نزعل.

ثم مخاطبا الجميع:

- تقدروا يا رجاله تعتبروني هنا زي أخوكم الكبير بالظبط، والأخ
الكبير زي ما بيحل المشاكل ويبحافظ على اخواته لازم بردو لما
يغلطوا يحاسبهم، يعني لو الواد عثمان ده غلط هابهذه!

قالها ضاحكا، فضحك لها الجميع فاستطرد:

- أي حد تقابله مشكلة يجيلي على طول أنا مكتبي مفتوح ٢٤
ساعة، يلا تقدروا تفضلوا.

- لو سمحت يا باشا!

قالها طلال رافعا يده فأتاه رد مؤمن:

- ايوه يا.... اسمك ايه معلش؟

- طلال يا باشا.

- عايز ايه يا طلال؟

- عايز سعادتك في حاجة بيني وبينك.

- ماشي تعالى انت والباقي اتفضلوا.

قام إليه طلال، فوضع مؤمن يده على كتفه قائلا:

- خير يا عم طلال عايز ايه؟

- عايز....عايز!!!!
- ايه مالك مكسوف ولا ايه؟ ده حتى الصعايدة ولاد بلد ومايخافوش.
- لا مش كسوف ولا حاجة هو بس يعني...
- لا يا طلال انا العساكر بتوعي رجاله، لو هتقلق وتخاف كده من أولها انقلك من هنا خالص.
- والله يا باشا اني ارتحتلك جوي من أول ماشفتك
- الله يخليك تسلم.
- بصراحة يا باشا يعني... اني عاوز اشتكيلك.
- من ايه؟
- من.....
- طلال، انت بتكلم ظابط، يعني لو ليك حق هتاخده!
- من الصول الحسيني.
- ليه عملك ايه؟
- ض...ضربني بالجلم على وشي!
- ايه...ضربك؟!
- ايوه يا باشا وكتاب الله مابكدب عليك.
- قالها طلال قبل أن تهزمه دموعه فتمنعه الكلام؟. قام إليه مؤمن

وقد تملكه الغضب تماما قائلا:

- ما تثبت كده يا واد يا طلال، مافيش راجل بيعيط. ايه اللي حصل
بالظبط عشان اعرف اجيبك حقك!

- والله يا باشا اني ما عملت حاجة، كل اللي حُصِّل انه جاللي
اجيله وكل من الميز، رحت لجيت الصول بتاع الميز بيجوللي بلغ
الحسيني ان مفيش وكل الا لما يجيب الأمانة اللي جايل له عليها،
رحت ابلغه جام شاتمني وباعتني ليه تاني، وفضلت رايح جاي بيناتهم
ياجي خمس مرات وفي الآخر جام ضاربني بالجلم وجاللي اني باعت
عسكري عفش ماهيفهمش حاجة، والله يا باشا ده اللي حُصِّل.

- ماشي.... حسينااااااي!

قالها مؤمن مناديا الحسيني، الذي جاء مهرولا وقد أيقن من نبرة
النداء أن كارثة ما هناك:

- أوامر يا فندم!

قالها ورمق طلال بنظرة انتفض لها الفتى الصعيدي، قبل أن ينقذه
مؤمن بقوله:

- بتمد ايدك على عسكري ليه يا صول حسيني؟

- ماحصلش يا باشا ده عسكري كداب.

- ماتشتموش بدل ما أهينك قدامه.

- اكتفى الحسيني بطأطأة رأسه دون رد، ليقول مؤمن من جديد:
- كام مرة قتللك ماتمدش ايدك على العساكر؟... دول مش عبيد عند جنابك، فيه هنا قانون ميري يحميهم مني ومنك ومن أي حد!
- يا باشا العسكري كسّر الأوامر.
- الأوامر اللي هي تشغله مرسال تلعب بيه انت واصحابك؟ على أساس انه لعبة اشترها لك الجيش تسلى بيها؟... ولو كسّر الأوامر فيه ميري يتحاسب بيه الحكاية مش سبهللة، دَوّر نفسك مكتب!
- أوامر يا فندم.
- اتفضل من قدامي دلوقتي.
- تمام يا فندم.
- قالها الحسيني، ثم رمق طلال بنظرة كادت ترديه قتيل خوفه، هرب منها الفتى إلى مؤمن، الذي علا صوته من جديد قائلاً:
- مش قلت اتفضل؟!
- (ملحوظة:: الحصان في جيش الشطرنج هو القطعة الوحيدة التي لا تنتظر تحريك العساكر من أمامها لتبدأ المعركة، وحده بين باقي القطع قادر على بدء الصراع دون جرعة الاستمتاع بدماء العساكر تغطي الرقعة ذات اللونين!)

لا شيء ينازع ليل الشتاء هيبه.. غزارة أمطاره الأشبه بدموع قائمي الليل، شدة برودته الأشبه ببرودة قلوب مفارقي الأحباب، طول عمره الأشبه بذاكرة الأوفياء، كل شيء في ليل الشتاء قادر على احتوائك بشكل ما، احتواء لا هو احتواء قلوب الأمهات، ولا هو احتواء جدران الزنازين.. حالة البين بين تبقى المفضلة لدى هذا العنيد، بها يضم وبها يلفظ، بها يُطمئن وبها يُرهب، بها يُذكر وبها يُنسى.. وبين الضم واللفظ والاطمئنان والرغبة والذكرى والنسيان، يبقى ذا كاريزما خاصة، فرضتها عباءته السوداء بطول نصف الكون، وقبعته السوداء بعمر قلوب أفناها طوله المبني على أنقاض أحلام مازالت تنتظر قدوم فجر لم يسمح له أبدا ليل الشتاء بالمجيء!

الساعة الواحدة بعد منتصف الليل، في مناخ كهذا ووقفة كهذه، ليس بالأمر الذي اعتاده؛ لم يعد مفكرا في مثل تلك الأمور على كل حال. النوم على رصيف بجانب البوابة الحديدية التي يحرسها ومجندين آخرين بالتناوب، بصحبة بطانية ميري لا علاقة لها بعالم الأغطية من قريب أو بعيد، في الزي العسكري كان وقوفه مرتديا خوذة حديدية على رأسه وسلاحا على كتفه، إضافة لكوب من الشاي مصدره الكافيتريا الملكي، إضافة لورقة صغيرة وقلم يحتضر جبرا،

ينتظر عقرب الساعة الصغير ليقفز للرقم اثنين، ليسلم الخدمة للمجند الذي يليه:

- تشرب شاي يا دكتور؟

سمعتها قادمة من المجند الآخر المجاور له في الخدمة، فانتبه من كتابته قائلا:

- حبيبي شكرا بالهنا.

- يا عم والله عالنار أهو.

- هاهاهاها الله يخليك سبقتك.

- انت بتعمل ايه صحيح؟ شايفك من أول الخدمة ماسك ورقة

وقلم، بتذاكر ولا ايه؟... حكم المؤهلات العليا هنا محسسيني اننا في جامعة المستقبل.

- هاهاهاها اشمعنى المستقبل يعني؟

- ماعرفش بقى هي جت كده، الباشا اسمه ايه؟

- اخوك ابراهيم.

- اخوك صدام.

- أهلا يا عم صدام منين؟

- من عين شمس ان شاء الله.

- أحسن ناس، بتشتغل في ايه هنا؟
- عسكري حملة، سواق يعني، انا أصلا شغال بره في ورشة كسيب يعني.
- أنعم وأكرم ربنا يعينك، عندك كام سنة؟
- ٢٠ بعون الله.
- ما شاء الله ده انت شغال من بدري بقي.
- من سن ٨ سنين وحياتك يا دكتور، هنعمل ايه طيب اكل العيش بقي ربنا يكفيك شر كوم اللحم لما يقول جعان.
- انت والدك موجود؟
- ميت بعيد عنك من وانا في اللفة، سابلي أمي وأختين بنات.
- سابهم ملك؟
- طبعا يا باشا.. لا مؤاخذه عندكم في التلفزيونات بيقلوا الرجل ساب لمراته كذا عيل... عندنا احنا بقي الرجل بيستلم من راجل، النسوان مالهاش بهدلة في الشرع بتاعنا، احنا غلابة ايوه بس ولاد بلد.
- قابلهما إبراهيم بابتسامة قبل أن يقول:
- ربنا يعينك يا طلال، باين عليك ابن حلال.
- طلال مين يا باشا عدم اللامؤاخذه؟

- طلال!... أنا قلت طلال؟
- آه وكتاب الله قلت طلال.
- من جديد ابتسم إبراهيم قائلاً:
- أنا آسف معلى، ممكن أسألك سؤال؟
- أسأل يا دكترة.
- انت أحلامك في الدنيا ايه؟
- أحلامي في الدنيا أحلامي في الدنيا أحلامي في الدنيا... ايوه لقيتها.
- ها؟
- أول حاجة احجج أمي.
- جميل
- ثاني حاجة اجوز اخواتي البنات.
- تمام.
- ثالث حاجة اشترى ماكينة صيني.
- ماكينة صيني دي اللي هي ايه؟
- موتوسيكل عدم اللامؤاخذه.
- هي دي بس أحلامك في الدنيا، ده اللي انت عايش عشانه؟
- لو طلبنا حاجة ثانية يبقى افترا يا باشا كده فضل ونعمة قوي بس

دول يتحققوا.

- كان عندي حق لما قتلتك طلال.

- ايه؟

- لا ولا حاجة ماتاخدش في بالك.

- طب انا هاروح اقف هناك في الخدمة عشان لو حد عدّى بقى

مايعلقناش، وبالمرة اصحي اللي بعدى يدوب كده باقي تلت ساعة.

- ماشي يا وحش اتفضل.

(أفضل ما يمكن أن تقدمه الخدمة العسكرية للمرفهين هو تعليمهم

الإحساس بجملته الحمد لله، لا مجرد نطقها في الأدعية والصلوات!)

- ما تغنيلنا حاجة يا واد يا عتمان.

قالها طلال مخاطبا صديقه، الذي اعتدل في جلسته فوق السرير

الحديدي قائلا:

- ماشي اسمعوا دي بس تغنوا معايا.

- ماشي يلا بينا.

- نجول طفي النور يا بهية؟

- جووووول الله ينور عليك.

يا نهار مش فايت، الحق يا ض يا مغازي ده هيقطعلي ايدي.

قابلها مغازي بضحكة، انتهت بقول عثمان:

- جرى ايه يا جدع منك ليه؟، عمالين تمطوحوا في الجدع شمال

ويمين هو ماحدث مالي عينكم ولا ايه؟

التفت له عماد بنظرة سخرية كعاداته حين يبدأ مواجهة خصومه:

- الله الله داحنا طلع معانا وجوه جديدة ليها في الأكشبات أهو،

النجم مين عشان عندي ليه دور جديد مع الاستاذ احمد السقا.

- حمد السقا مين يا عم شوفله محمد هندي انت مش شايفه

عامل ازاي؟

قالها مغازي مذيلا اياها بضحكته المعتادة، التي شاركه فيها عماد،

قبل أن ينتبها من جديد لقول طلال:

- انتو عايزين ايه؟

- بصراحة كده عايز افترى عليك، ماافترتش على حد من زمان؟

- الحفلة بدأت!

قالها أحد المشاهدين للحادثة من بعيد بصوت خفيض، يحدث

بها صديقه:

- الحسيني لعبها صح ابن الشيطان.

- عاملينلي بلطجية؟، ايه مافيش كبير هنا ولا ايه؟، وانت يا انا اخ
طلال، بقيت دكر وبتعرف تتخانق دلوقتي؟، ما كنت بتعيط زي النسوان
من يومين.

- والله يا عم حسيني....

- اخرس يا جندي بيادة يا ابن البيادة ما اسمعش انت بالذات
نفسك الا لما تاخذ أمر

- بعد اذنك يا عم حسيني ماتشتمنيش بأهلي.

- انت بترد عليا؟... طب يا بيادة يا ابن البيادة يا ابن ابن البيادة
ما اسمعش نفسك، وكلمة تاني هاديك باللي في رجلي على دماغك
ودماغ اهلك اللي انت فرحان بيهم دول. وايه رأيك بقى ان انت بالذات
تغور عالسجن انت والبيه الثاني بتاع كوم الفواش ده، صحيح اسم
على مسمى مش عارفين بيدخلوكم جيش يعملوا بيكم ايه جايبينكم
تقرفونا وخلاص. وأجازتكم النوبادي مش نازلينها. عماد و مغازي
أجازتكم متأخرة ٤ ايام عشان هم اللي مضروبين مع اني المفروض
احبسكم معاهم بس مش هيبقى موت و خراب ديار، اتفضل غور منك
له عالغبر وما اسمعش نفسك.

- يا عم حسيني والله.....

- قلت ما اسمعش صوت اتفضل عالعبير.

فوق جدران الزنزانة السوداء، تراقصت أمامه الكثير من الصور..
شريط سينمائي كامل، لحياة قُدر لها أن تضم الكثير رغم قصرها..
صورة رجل أربيعيني يجتمع بأسرته على مائدة إفطار لا تضم أكثر
من (طبع فول) وعدة أرغفة وبعض عيدان الجرجير، صورة خطيب
ثلاثيني يعتلي منبر أحد المساجد القروية، صورة إحدى الفتيات
تتغنى بأناشيد جدتها في حقل القطن، صورة أم تضم ابنتيها الناعستين
على فرشاة الذرة المشوي، صورة فأر أبيض صغير يسكن سطح أحد
بيوت الريف، صورة أحد الصيادلة يهدي أحدهم هاتفًا صغيرًا، صورة
وصورة وصورة، تتابع فوق الحائط الخرساني الكثيب، وصاحب
الصور يتابعها بعين ملت المشاهد وملتها الدموع.

- ايه يا عم طلال مالك ساكت ليه كده؟، هوّن عليك يا عم
ماحصلش حاجة السجن للجدةعان، ولو عالواد عماد ده انا بعون الله
هاطحنلك أمه بس نطلع من هنا.

انتبه لها تأتيه من صديقه، فردّ قائلاً:

- والله يا عتمان أني ماهيهمنيش حاجة غير ان أبويا اللي راجد في

جبره دلوك يتشتم من واحد زي الحسيني.

- يا سيدي يعنى هو أبوك مستني الحسيني عشان يقول رأييه فيه،
ماتشيلش هم حاجة يا صاحبي، ليهم في ذمتنا سنتين تلاتة ياخدوهم
ونتكل على الله.

لم يجب طلال، اكتفى بالتصديق على كلام صديقه مطأطأ رأسه،
يأتيه رد عثمان من جديد:

- استنى هاغنيلك حاجة حلوة تفرفشك كده، تسمع البرتجان
جال لليونستفاندي حجك عليا أني اسف موت؟

قالها، فضحك لها طلال على استحياء يشاركه عثمان ضحكاته قائلاً:

- أيوه كده يا عم اضحك ملعون أبو الدنيا.

- بالك يا واد يا عثمان أنى نفسى فى ايه؟

- فى ايه يا عمهم؟

- نفسى ابجى بياع.

- بياع؟.. اشمعنى بياع؟ وهتبيع ايه؟

- نفسى ابيع حاجات كتير جوى، نفسى ابيع درة مشوى زى اللى

أمى بطلت تبيعها، نفسى ابيع جُطن زى اللى غيط الحاج مهنى بطلت

تطرحه، نفسى ابيع... نفسى ابيع حلاوة أرواح.

قال تلك الأخيرة قبل أن تبدأ عيناه فى اللمعان فأنقذه عثمان
منها مجددا بقوله:

- جرى إيـــــــــه يا عم كارفوووور.

صمت ثانيتين قبل أن يستطرد قائلا:

- رُوق كده يا عم طلال، مفيش حاجة بتفضل على حالها يا
صاحبى، الدنيا مش مستاهلة كل ده، رُوق كده وصللى عالنبى.
- عليه الصلاة والسلام.

- يلا صحصح بقى معايا واسمع الموال..احم احم..البرتقااااااااااا!

- يا باشا العيلين دول أنا عارفهم كويس، دول أغلب من الغلب
الحسيني بيفتري عليهم عشان واحد منهم جالي اشتكالي منه بعد ما
رجعت من الأجازة اللي فاتت.

قالها مؤمن لوائل الراد في لامبالاة:

- الحسيني قاللي ان العيال ضربوا زمايلهم وكان لازم يتسجنوا
عشان يبقوا عبرة وانا خلاص صدقت على حبسهم.

- ضربوهم ازاي وهم كله شوارع واللي المفروض

مضرويين ما فيش في وشوهم الهوا؟

- مؤمن بقولك ايه أنا ما عنديش دماغ لكل العك بتاع العساكر ده،
شوف انت عايز تعمل ايه واعمله وريحني.

- بعد اذنك يا باشا هاطلع العيال من السجن وينزلوا أجازتهم مع
زمايلهم، دول مرميين هنا بقالهم اربعين يوم.
- ماشي.

قالها وائل وعاد من جديد إلى فنجان قهوته، الذي أعدّه له عسكري
المتابعة الخاص به، باصقا أول رشفة منه بمجرد تناولها قائلاً:

- انت يا زفت، القهوة باردة ليه؟، غيرها بسرعة بدل ما اخلي
عيشتك زي لونها.
- أوامر يا فندم، أوامر.

لم تكن غيبته بهذا الطول الزمني الذي يسمح بكل ما رآه من تغيير..
الرمال أمام البيت استحالت تراباً أقرب لتراب القبور، القلل المُنْدَاة
بمائها توارت خلف ضلفة الشباك الموصدة كأنها باب مقبرة أُغْلِقَتْ
للأبد على ساكن لن يغادر، الزينات على جدران الدار الأربعة اختفت
كأنها لم تكن إلا سرايا صوّرتَه فرحة أمه وأختيه يومها، الباب العتيق بدا

أشبهه بعجوز غبرّه تراب الشيخوخة، مستعدا ليحكّي لأحفاده أسطورة رحيل. نافذة المندرة الخلفية التي أحالت زغاريد الإجازة الماضية صمتا جنائزيا أشبه بصمت مومياوات المتاحف. كل العلامات التي حملتها، أو تخلت عنها، دار عزوز المنشاوي كانت تنبئ بشيء ما غير مفهوم. حديث قلبه إليه لم يكن مطمئنا، ثمة شيء في عباءة الحداد ينتظره خلف الباب الشيخ.. الطرقات الثلاث المعتادة لم تجد سريع الإجابات كما هي العادة.. كررها مرات مصاحبا إياها بنداءاته على صابرة وهنية وعلي، غير أن نفس الصمت كان الرد الوحيد.

- البقاء لله يا طلال يا ابني.

فوجئ بها تأتية من أحد الفلاحين المارين بالدار، وقد ترجّل عن حماره يصفحه مواسيا يستطرد:

- ان شاء الله تكون آخر الأحزان!

صُدِم لها طلال، ناظرا للرجل نظرة القادمين من كوكب آخر، وقد خلقت عيونهم بحجم نصف الوجه غير مغلفة بأجفان تسمح لهم ولو ببعض الإغلاق كل حين يسير.

- معلّش أني عارف ان الموضوع صعب شويّ عليك، بس انت راجل من زهر راجل وجدها وجدود ان شاء الله. أني هاستأذنك دلوك

لَحَسَنَ مَهْمَل الغيط لحالها، هاعدي اشرب وياك الشاي بعد العشا ان شاء الله... سلام عليكم.

قالها وانصرف دون انتظار الرد حتى بقبول الدعوة.. عاد طلال للطرق على الباب بصورة أكثر جنونا، حتى انفتح أخيرا في نهاية الأمر ببطء، كأنه المفتوح بيد عجوز في التسعين. الظلام بالداخل كان أشد من أن تستوعبه دار بهذه المساحة، الدموع المتحجرة في عيني صابرة، والخطان الباهتان على خديها كنهرين جافين، أكدا له شكوكا ما زالت تثبت بأمل يتهاوى:

- صابرة، فيه إيه؟، إيه اللي حُصِّل؟

قابلتها الفتاة بالبكاء دون رد مهرولة للداخل، يراقبها بقلبه قبل عينيه:

- إيه اللي حُصِّل؟، حد يفهمني فيه إيه؟ الرجل ده هيجوللي البقاء

لله ليه؟!

مجددا غاب الرد، كان عليه اكتشاف الأمر بنفسه إذن.. صال في أرجاء البيت كمجنون، أمه أمام النافذة غير مدركة لكل ما يحدث، صابرة في المنذرة وفي حضنها هنية تبكيان في صمت.. ثمة غائب وحيد إذن. رغم غيبته الدائمة التي اعتادها في سابق المرات، إلا أن شعورا قويا بحضوره بات يلفه الآن رغم... الغياب!

كان حاضرا في وجوه الجميع، دموع الأختين، صمت الأم، ظلام الدار، جفاف القلل، خفوت الفرن، كل شيء كان ينعي علي بطريقة ما!
- أمّا!

قالها مقتربا منها، فلم يأتيه رد...

- أمّا... ايه اللي حُصِّل، وفين... فين علي؟

فوجئ بها تلتفت إليه، تمسك بملابسه، تجلسه إلى جوارها، تضمه إلى صدرها، و... تبكي!

كان بكاء من نوع غريب، بكاء كأنه المتكلم لا المنتحب، كلمات ربما لن يفهمها إلا باكيته وربها... لبكاء الأمهات كاريزما خاصة على كل حال!

لا يعلم كم مر عليه من الوقت في أحضانها، ثمة شيء قيده في حضنها لم يفلته، مزيج من هيبة وحب و... خوف!

اليومان التاليان لم يمرا عليه كما يرام بكل تأكيد. اطمأن لخلود الجميع للنوم، بعدما افترسهم حزنهم لأيام غاب عنهم فيها. جلسته المفضلة إلى جوار النافذة متابعا سماء العش كانت ملجأه الوحيد. ها هو راحل آخر يُضاف إلى قائمة الراحلين، راحل ربما اختلف عن سابقه في كل شيء، غير أنه بكل تأكيد قادر على تدشين صورته

للمعرض الكبير في ذاكرة أخيه المسكين!

- ليه ماجولتليش يا طلال؟!

انتبه لها تأتية من خلفه، فالتفت قائلاً:

- أمّا؟، ايه اللي صحاكي الساعادي؟

- ليه ماجولتليش مالاول انك رايد وردة؟!

فوجئ بكلماتها الصادمة، فتلعثم غير قادر على الرد، فاستطردت:

- ماتستغربش عرفت كيف، علي جبل ماي موت جاللي على كل حاجة.

- كل حاجة؟... كل حاجة كيف يعني؟

- جاللي انه خطبها لجبل ينغص عليك عيشتك.

- علي؟... علي جالك اكده؟!

- أخوك كان حاسس انه رايع يا طلال، آخر ليلة وُسطينا بعد ما

رجع من الجهوة واتعاطى السم اللي جاب أجله ده اللي اسمه ايه، جعد

معاي ايه كيف مانتا جاعد دلوك اكده.

-

- كان حاسس بالذنب نواحيك يا طلال، جاللي انه ظلمك وظلمنا

كثير، كان مستنيك تنزل اجازتك لجبل يخطبك وردة بنفسه. ماخبراش

ايه اللي خلاه يعجول كل ده، شكله كان حاسس خلاص انه مفارجنا.

قالتها وشرعت في البكاء، فضمها طلال إلى صدره غير مصدق
لما يقال، قبل أن تحرر نفسها منه من جديد قائلة:

- المهم دِلوك اني كلمت أم وردة وخطبتها لك، وجوازك عليها
الجمعة الجاية ان شاء الله جبل ماترجع الجيش!
- إيه؟... ايه اللي هتجوليه ده يامًا؟، دي الناس تاكل وشنا، طب
حتى نستنو الاجازة الجاية.

- يولعوا الناس دي وصية أخوك واني ماهكسر هاش، جهّز
نفسك للجواز!

قالتها... غادرت!

لم يعد الآن لتفضل خطواته ذلك الطريق، وقد حفظته طوال
سنوات. الطريق بين المقابر ليس بالجديد الذي يحمل له رهبة يحملها
للآخرين، بات الآن يضم ضيفا جديدا جاء لزيارته. أمام القبر وقف
قارئا الفاتحة، واضعا إحدى قطع الحلوى التي اعتاد وضعها على قبر
آخر قائلا:

- كيفك يا علي، اتوحشتك جوي ياخوي، كان... كان نفسي ومنى
عيني تحضر فرحي عالبت وردة وانت في يدك عروستك. أمك جلعانة
عليك جوي يا علي، بتجعد طول الليل تصلي وتدعي ربنا يغفرلك.

إيه؟... بتجول إيه؟، حاضر ياخوي هابوسلك يدّها، الله يبارك فيك ياخوي، سلملي على أبوي والشيخ بدر والحاج مهني كُتير يا علي. جوللهم ان العش ماعادلهاش طعم من غيرهم، بجيت كيف بيوت مصر مالهاش طعم، لا عاد فيها لون الجطن ولا طعم الفول ولا ريحة الدرة المشوي. تعرف؟... كان نفسي أجعد وياك الجعدة دي وانت وسطينا في الدار كنت هاعرّفك عالواد ريشة، واد طيب وابن حلال، أو.. أو كنا نجعدوا تحت الجميزة ويا عم حسني، اجولك على سر كمان؟، اتعرفت على واحد في الجيش اسمه عثمان صوته حلو جوي، هابجي اخليه يجرك قرآن في جامع الوحدة لما ارجع ان شاء الله. عرفت كمان واحد دكتور زين جوي جاللي ان ربنا هيسعدني بوردة، ماصدجتوش بصراحة يومها بس طلع عنديه حج. اني هامشي بجي يا علي عشان مهمّل أملك واخواتك لحالهم والوجت أتأخر، تصبح على خير يا ولد ابوي!

الجلسة المعتادة للصيدالة على الكافيتيريا الملكي بعد انتهاء اليوم بغلق الصيدليات في تمام الثانية والنصف كانت أهم ما يميزهم، البعض يغادر للعنبر للنوم ساعة أو ساعتين قبل استخراج التصاريح، البعض يستغل الوقت في تناول وجبة سريعة من (عبد اللطيف) والتي

غالبا ما تكون (مكرونة فى الفرن)، فى حقيقة الأمر كل الطعام لدى عبد اللطيف كان ذا طعم واحد:

- ناولنى ساندوتش البانيه ده يلا يا عبد العاطى.

قالها شافعى يأتیه رد صديقه:

- بانيه ايه يا بنى آدم ما انت لسه واكله اهو.

- واكل ايه ده كان كبدة.

- بانيه ورب الكعبة.

- يا خزنى، السندوتشات كلها طعم واحد ولا ايه؟، الله يجحملك يا عبد اللطيف.

- يا جدعان التصاريح لسه بدرى عليها الساعة لسه ٣ انا هاروح اناملى ساعة فى العنبر.

قالها أسر قبل أن يقول شريف:

- اهى التصاريح دى حاجة تقرف هى كمان، يعنى احنا مخلصين

شغلنا الساعة ٥, ٢ نمشى الساعة ٤ ولا ٥ ليه؟

- انا بافكر اخرج من غير تصريح.

- هو مين عالبوابة من عساكر الأمن؟

- سعد الله.

- لا الوداده کئیب جالی امبارح کان عایز دوا جی ومرضتش اَدیله حاجه.

- اهو کلمه جی دی بتضحکنی اوی.

- اشمعنی؟

- المصریین عندهم قدرة غریبة یغیروا اسماء الحاجات اللی

بتضایقهم أو بمعنی أصبح بتضایق ضمیرهم، الرشوة سموها شای

وحی، والعری سموه فن، وقلة الأدب سموها حرية، وقیس علی کده

بقی، والغریب یا اخی ان الضمیر ده یعمل عبیط ویصدق.

- یا عم هی جت عالساکر؟، أنا لما عسکری بیجیلی من ای

حتة بادیلہ اللی هو عایزه، اصله هیودیہ فین یعنی العلاج الا اذا کان

هیتعالج بیه او هیدیہ لحد یتعالج بیه؟، وفی الحالین احسن مالدوا

تاریخ الصلاحية بتاعه یعدی.

- بس دی أمانة انت مؤتمن علیها ملکش حق التصرف فیها الا

بموافقة صاحبها.

- وصاحبها ده نفسه بیطلع الدوا ده بردو لحبابیه اللی اصلا ممکن

یشترؤ احسن منه من بره بس بیستخسروا عشان یعمل مصالح، یقی

اعمل مصلحة بقی انا کمان علی الأقل مصلحتی انا هتبقی انی اروح

بدری ساعة من غیر تصریح اشوف اهلی ولا اتقی شر صول غت

كل شيء، لن أنسى حين اصطحبني طلال في جولة ليريني كل ما حكاه
لى هناك خلف جدران المعسكر الكبير، حقول الحاج مهني، فرشاة عم
حسني، الجميزة، ريشة، قبر أبيه وأخيه والشيخ بدر، مسجد العش،
البيت الكبير، العرس الذي ضمته دار عزوز المنشاوي على عجل
تقديرًا للظروف، كل شيء في العش سيظل محفورًا في ذاكرتي ما
حييت، هاتف ما حادثني أننى... عائد إليها ذات يوم!

- كده بردو يا طلال تتجوز من غير ما تعزمنّا؟
- والله يا باشا الدنيا جت بسرعة جوي، بس أنى كنت عاوزك في
طلب اكده!
- خير يا سيدي؟... اجازة جواز؟، ماشى من غير ماتقول انا
هاعملك أجازة ١٥ يوم.
- لا لا حاجة تانية.
- خير؟
- اني اخوي الوحيد تعيش انت!
- ايه؟... ازاي ده حصل؟، أخوك مات واتجوزت في اجازة
واحدة؟!

- اللي حُصِّل بجى يا مؤ من بيه الموضوع كبير اصله.
- انت ليك اخوات تانيين صبيان؟
- لا كان هو بس الله يرحمه.
- معنى كده انك بقيت وحيد؟
- ايوه وعشان اكده جيت لسيادتك.
- مميم معنى كده انك تخرج من الجيش. طيب اديني فرصة بس نخلص من يوم الرماية بتاع بكره ده وانا هاخلصك القصة دي، أي نعم هتوحشنا بس ما علينا.
- ربنا يباركلك يا باشا والله ماعارفشي اجولك ايه، من ساعة ماجيت اهنة وانت اكثر من اخونا، ربنا يحميك لشبابك ويكرمك زي مابتكرم الغلابة اكده.
- خلاص يا عم طلال انت واقف على باب جامع ولا ايه؟
قالها ضاحكا ثم استطرد:
- يلا روح نام دلوقتي عشان عندنا بكره يوم طويل.
- حاضر يا باشا.
- قالها وانصرف إلى العنبر، حيث يخلد للنوم استعدادا ليوم الغد.
غير انه تفاجأ بقول يأتيه من وسط الظلام:

- مبروك يا.....عروسة!
- مين؟
- مين؟...لسه ماحفظتش صوتي؟، اللي بيهزأك ويمسح بكرامة
أهلك الأرض!
- اقترب أكثر، فوجده الحسيني واقفا تحت المصباح الخافت المنير
باب الحمامات:
- انت عايز ايه مني؟
- عايز اقتلك!
- اني عملتلك ايه طيب لكل ده.
- أنا تشتكيني وتخلي واحد زي مؤمن يشتمني ويمسح بيا الأرض
ويقدم فيا بلاغ للأمانة بشهادتك انت وبتاع كوم الفواحش يوقف ترقيتي؟
- انت اللي بدأت ضربتني وسجنتني وشتمت اهلي وخليت
العساكر بتوعك يتلموا علينا ويضربونا.
- انت فاكر اني هاسيب حقى منك ولا هسيبك تمشي وتسب
الجيش كده بالساهل؟... وحياء أمك لخليك تقضيهم في السجن ال ٣
سنين اللي كنت هتقضيهم جيش دول.

قالها الحسيني وانصرف تاركا طلال لأفكاره السوداء.

على سطوح الدار العائدة (بعض الشيء) لهدوئها كانت جلستهما بجوار (عشة الطيور) بعدما وضعت إحداهن (صفيحة) من الماء وبعض البذور لسكان العشة الذين سكنت ضوضائهم بعض الشيء بعض وضع الوليمة، ريشة بين يدي صابرة تسير بأناملها بين خصلات ظهره الأبيض الذي عاد لتألقه بعد استحمامه على يد طلال في الليلة السابقة لزفافه، وردة الى جوارها (تخرط) عيدان الملوخية تظل الاثنين شمس ظهيرة الشتاء الدافئة:

- فكرة زينة جوى تخريط الملوخية في الشمس اكده يابت يا صابرة.
- طول عمرى باعمل اكده فى الشتاء، الضهرية نتدفى بالشمس وبالليل نتدفى بالوابور.

- هاهاها عفارم عليكى، بس حلو جوى ريشة، طلال جاللى انه صاحبه.
- طلال بيعشجه كانه اخوه، تعرفى ان امى لغاية دلوك مهترفش عنه حاجة؟

- واه واه واه، صُحْ؟
- إيوه صُح والله كيف مابجولك اكده، كان كل يوم وهى رايح

يصللي الفجر يطلع يظمن عليه الاول وبعد ما يرجع يفطره بنفسه.

- طلال هيجب صلاة الفجر جوى، ده مفوتهاش ليلة جوازه.

- انتى هتجوليلى؟، مرة جاللى يا بت صابرة انى لما حد ياجى

يخطبك هاسأله سؤال واحد لو عرفه هاجوزه ليكى طواللى، جلتله

سؤال ايه جاللى هاسأله صلاة الفجر الساعة كام!

- جاللى ان لما البت فايجة تاجى هيعلمها صلاة الفجر أول حاجة.

- البت فايجة مين؟

- بنتنا، اصل طلال جاللى انه نفسه يخلف بت يسميها فايجة.

قابلتها صابرة بابتسامة قائلة:

- أصيل الواد طلال ده، تعرفى؟... يوم ما رجع من السفرية اياها

دى لما عرف انهم هيشغلوا تبع اسرائيل مرضاش يجول لامى على

حاجة، جالها ان الشغل واعر ومكملوش، خاف ليجلج أمه ولا يزعلها،

حاكم امى بتخاف جوى.

- واه، اسرائيل؟

- إيوه، جال ايه كانوا هيروحوا يشتغلوا فى حاجات اكده هناك

ويهدوا جوامع.

- واه، يهدو جوامع؟... طلال كان هيعمل اكده؟

- لا ماهو هرب منهم.
- وائتى عرفتى كيف كل ده؟
- منيه ماهو بيحكىلى كل حاجة، بس مجلليش موضوع يهدوا جوامع ده انى عرفته كده بالفهلوة.
- بس مكانوش هيجدروا يعملوا حاجة للجوامع، تعرفى كانوا جايين مرة فى التلافزيون زلزال جامد جوى هد بلد بحالها ومجدرش يهوب ناحية الجامع.
- إيوه ومرة كمان شفت فى الجورنال اللى عم مدبولى حطلى فيه الطعمية صورة سمكة اصطادوها مكتوب على ظهرها الله.
- إيوه شفتها بردك دى هى وصورة السجرة اللى هتسجد.
- صابر اااااااا، ورد اااااااااااا.
- ده صوت أمى شكلها عايزة حاجة تعالى نشوف عايزة ايه.
- (نجاح الأنظمة الإعلامية فى تسطيح فكرة الإيمان لدى الطبقات الأكثر تدينا مستغلين جهل تلك الطبقات من ناحية وعشقهم للإيمان من ناحية أخرى أخطر على الدين من بندقية صهيونى!)

لم يغمض لطلال جفن حتى خيوط الفجر الأولى. في تمام

الخامسة، كان تجمع الجميع أمام المعسكر منتظرين إشارة البدء للتحرك لميدان الرماية، عيون طلال والحسيني لم تكف عن التلاقي.. نظرة قلق من الأول، ونظرة استمتاع بهذا القلق من الثاني.

- جاهز يا ض يا عماد؟

- جاهز يا عم حسيني ماتقلقش.

- طب خد الرصاصتين اللي هتحطهم في جيبه وانا لما اعمر

البندقية اللي يضرب بيها هنقصها رصاصتين.

- خلاص يا عم حسيني عرفنا هو انت بتكلم مستجد؟

- ربنا يستر!

- ربنا يستر؟... هو انت طالع عمره؟، هتلق للواد قضية وبتقول

ربنا يستر؟

- اخرس انت اعمل اللي بقولك عليه وبس وحقك هتاخده

مالكش دعوة بالباقي بقي.

- ماشي.

قارب اليوم على الانتهاء، وجاء دور طلال في الرماية، ليصبح الحسيني:

- كمل ضرب يا عسكري ناقصلك رصاصتين.

- البندقية معادش فيها رصاص ثاني.

- نعم يا خويا؟ وريني؟
- تناولها منه متفقدا إياها قائلا بصوت سمعه الجميع:
- عمااااا، تعالى فتش العسكري الحرامي ده.
- أني مش حرامي.
- سمعهما وائل ومؤمن من بعيد، فجاءا مهرولين يقول وائل:
- فيه إيه يا حسيني؟
- العسكري ده سرق رصاصتين يا فندم فتشناه طلعا في جيبه
بشهادة كل العساكر.
- انت كذاب وضلالي.
- قالها طلال بصوت عالٍ، فانفجر فيه الحسيني صافعا إياه بقوة
فأسقطه أرضا قائلا:
- اخرس يا كلب يابن الكلب.
- سمعها طلال، فامتطاه شيطانه متناولا إحدى البنادق معمرا إياها
مصوبا إياها ناحية الحسيني، همَّ باطلاق النار، فهرول مؤمن يقف أمام
الحسيني صارخا:
- اوعى يا طلالاااا.
- لم يكملها، اخترقت رأسه رصاصة طلال، فخرَّ غارقا في دمائه..

لم يكد طلال والجميع يفيقون من هول الصدمة، حتى اخترقت صدره
هو الآخر رصاصة الحسيني..

انتهى الأمر اذن بمقتل نقيب و... أحد العساكر!

- إبراهيم... إبراهيم!

قالها ذلك المهرول إلى عنبر (٤) الخاص بالسرية الطبية للمعسكر،
تكاد هرولته تقتلع قلبه - أسير نبضاته الآخذة في التلاحق - من عقاله
بين ضلوعه، وقد أبهمت أنفاسه المتلاحقة الملفوظ من نداءاته، يأتيه
رد ذلك الغارق في حديث نفسه وذكرياتها المفترش أحد أسرّة العنبر
في فزع، وقد حررته نداءات صديقه من رقاده، فطوى صفحات ذكرياته
وأخفى ما تحويه من سطور أحباب راحلين، ناظرا من وضع الجلوس
إلى مناديه الفزع قائلا:

- عبد العاطب؟... مالك يابنب في ايه؟

- ماعرفتش باللى حصل؟

- ايه اللي حصل؟... منظر ك بيقول ان فيه كارثة!

- هي فعلا كارثة، الجيش كله مقلوب!

- كارثة؟... كارثة إيه؟

- الكارثة مش في اللي حصل وبس، الكارثة في اللي عملها!

- اخلص يا عبد العاطي من جو الأفلام ده؟... تقصد مين؟

- صاحبك العسكري الصعيدي!

تلقاها إبراهيم من صديقه، فانكملت لها ملامحه، كأنها المرسومة
بفرشاة صغير يعبت ببعض أوراق رسمه وألوانها في غضب، بعدما
منعته أمه حلواه، فنفت غضبه في لوحاته. لمعت في ذهنه صورة ذلك
الصعيدي المذكور باسم في أول لقاء جمعهما، تردد في أسماعه
أصداء تلك النبذة لمعرِّف بنفسه، حين صافحه أولى المرات:

- طلال... أخوك طلال عزوز يا باشا، تجدر تجوللي أبو العز،
بينادوني كده حدانا في البلد، أنا أصلي زي مانتا شايف كده باين عليا
ابن ذوات جوي!

قبل أن تقفز لسطح ذكرياته تلك الصورة الأخرى ليوم جمع آخر اللقاءات:
- أشوفك على خير ان شاء الله يا دكتور، ربنا معاك يا صاحبي،
شد حيلك كده عشان تبجي عسكري زين، بس أمانة عليك يا شيخ ما
تنسى طلال!

قبل أن يختم قوله بعناق لم يشهد مثله ذلك الصيدلاني المودّع!
أفاق إبراهيم من ذكرى مشاهد مضت قبل شهور لم تتم دورة

العام الكامل بعد، لا يسعفه لسانه بنطق شيء، غير أنه جاهده سائلا
في صعوبة:

- طلال؟

- هو بعينه

- ايه اللي حصل بالضبط؟!

- يقولوا قتل ظابط وبعدين انتحر!

عودة المعسكر لهدوئه لم تكن بالشئ اليسير، الكثير من التحقيقات
التي تناولت أقوال الكل كانت مرهقة بشكل كبير ساهم في النيل من
قدرة الجميع وقوته، الجميع كان في حالة يُرثى لها، وائل المنعزل
عن الجميع غارق في أحزانه على صديقه الصدوق، تلك الصورة
التي جمعتهم في أحد أيام الرماية السابقة يمسك كل منهما سلاحه
مبتسما في وجه الكاميرا، تلك الأخرى في أحد أيام الإجازات على
أحد الشواطئ تغطي وجوهيهما نظارتان سوداوان، صورة ثالثة في فرح
صديقهما محمود في الصيف الماضي، صورة رابعة وأخرى خامسة
ومازال عداد الصور في هاتفه يمارس متعته في تعذيبه، مؤمن لم يكن
مجرد صديق حياة أو زميل عمل، كان صوت الضمير الذي دائما ما

صرخ فى أذنه

- ليه العسكرى فى الجيش لما بينهى خدمته بتبقى الدنيا مش
سايعاء من الفرحة كأنه خرج من الجحيم ودخل الجنة؟
قفزت الكلمة فجأة فى رأسه يعيدها عليه صديقه الراحل من عالم
آخر بعدما قالها له ذات مرة فى حوار ضمته هذه الحجرة.

- انت فاكِر ان العساكر دلوقتى بتشتغل وتقف خدمات عشان
خايفة غالبلد ولا الجيش؟، العساكر بتشتغل وتقف خدمات عشان
خايفة من عقاب الطباط وجزاءاتهم، بيقف خدمة ومركز مع الطباط
ولا صف الطباط اللى هيعدى عليه يعلِّقه ويرميه فى السجن ولا يلغيله
أجازته مش مع العدو اللى هيجى من بره يقتله!

- كل اللى اقدر اقوله لوك عيد النظر فى التفكير فى التعامل مع
العساكر، اكسبهم هيدوك أكثر صدقنى، العيال دول غلابة ورجالة وبتوع
شغل وطلباتهم مش كثير، كل اللى طالبينه ميتظلموش... للدرجة دى
طلبهم صعب؟!

- وَصِّل العساكر انهم يدعوك لو سبتهم يا باشا مش يدعوا عليك!
الأحاديث كلها هاجمته فى تلك الليلة، كل كلمة سمعها بالوضوح
الذى قيلت به فى أولى المرات، كل نصيحة تلقاها من صديقه الأصغر

باتت حاضرة بكامل حلتها الآن فى ذهنه، كل كلمة أحاطتها بسمته
وبسمة... احد العساكر الراحلين!

اللعة على بنى البشر، لماذا لا يفهمون قانون الأمر الا اذا كُتب
بدماء أحدهم؟، لماذا لا يعون حقيقة الأمر الا اذا خرجت مع روح
أحدهم؟، لماذا يتحتم على المكسب دائما ان يدفع ضريبة للخسارة
ليُتم نجاحه؟، لماذا... تأخذهم العزة على الدوام بالإثم؟!

- وائل باشا تؤمرنى بأى حاجة قبل مانام؟

انتبه لها من تخیلاته فنظر لقائلها على الباب قائلاً:

- لا.

- تصبح على خير يا باشا.

-

هم القائل بالانصراف قبل أن يستوقفه وائل من جديد قائلاً:

- حسينى!

- أومر يا باشا.

- انت أقدر شخصية شفتها فى حياتى!

- ل...ليه...ليه يا باشا لا سمح الله انا غلطت فى حاجة؟

- غور من وشى دلوقتى وحاول متورنیش وشك الفترة الجاية دى كلها.

لم يملك الحسينى ردا غير الانسحاب الصامت، دخل حجراته غير مهتم لما كان من أمر وائل، يعلم أنه لن يستطيع الاستغناء عنه أو خسرانه، وحده قادر على تدبير أمر المعسكر والسيطرة على عساكره، يعلم هذا جيدا هذا الضابط الذى لا عمل له إلا قضاء اليوم فى استراحته وانتظار المرتب الشهرى المذلل بال(لا عمل)، أضواء نور الحجرة خالعا سترته التى تعلو كتافها شريطه ذهبية يستعد لتبديل ملابسه قبل أن يفاجئ بأحدهم يظهر له من خلف دولاب ملابسه:

- ايه ده انت بتعمل ايه هنا؟

- جاى اقتلك!

- ايه؟

لم يرد، اكتفى بغرس مطواه فى رقبتة... وانصرف!

الشتاء لازال فى عجبته الكثير ليحملة لهذه المنازل التى لا طاقة لها بجبروته، السطوح وساكنوه كانوا أكثر المعانين، اعتادوا تلك المعاناة على كل حال، ينتظرون الشتاء على كل حال رغم كل شئ، يأملون أن تحمل أمطار سماءه بعض ما بخلت به أرض أوطانهم، يحلمون ببعض نور يحمله برقه بخلت به مصابيح حكوماتهم، ينتظرون بعض برودة

افتقدوها فى مقابر أسكنتهم بها أنظمتهم، الشتاء فى حارة الشوربجى
كان مثالا حيا لمبدأ التضحية بالكثير من الألم لجنى بعض...الالأم!
على باب الحجرة المتهالكة فوق سطح أحد المنازل فى الحارة
البائسة كان وقوفه، طرقته المميزة على باب الحجرة التى قابلها أحد
المعاقين بالداخل بتهليلة وجه أسكته آخر بقوله:

- بس ياض مش ناقصين دوشة عالمسا، لولا عماد كان زمانى
رميتك فى أى مصيبة جتك البلاوى.

قالها وترك شيشته قائما يفتح الباب قائلا:

- عمدة؟!

لم يرد!

- حمد لله عالسلامة يابو الصحاب، مطولشش المرادى يعنى،
ادخل...ادخل من المطرة دى.

- شوفلى أى حته استخبى فيها بسرعة واستخبى كثير.

- تستخبى؟...تستخبى من ايه؟

- قتلت صول!

كانت الليلة الأخيرة التي تحادثنا فيها بشأن ذلك ال(سرياز)،
أذكر يومها أنى لم أكن فى حالة تسمح بسماع المزيد عن أى شئ،
يكفينى ما سمعته من قصة هذا الصعيدى الأسمر الراحل للعالم
الأخر بعد كل تلك الأعوام من المعاناة، بات طلال جزءا من تكوينى
لا يختلف بأى حال عن تكوينات اللحم والدم، حاضر على الدوام على
مسرح أوراقى بزي البطل الوحيد المستحق دور البطولة بين الجميع
من المتواجدين على المسرح اللعين، لم تعد بى رغبة لمعرفة مصير
الباقين من أبطال الصفحات، شافعى، ابراهيم، عمدة، وائل، لم يعد
يهم، ليذهبوا جميعا الى الجحيم ما دام رحل طلال، لا أعلم لماذا
شعرت لوهملة حينها أنهم ليسوا سوى بعض السطور التى خطتها الأقدار
لإكمال قصة الصعيدى الراحل لا أكثر، كم ستفتقد العش هذا
المسكين، بل مسكينة هى لتضم قبره فى أحشائها ترثيه كل
شروق لشمس وكل اطلالة لقمر، كم سيفتقده (طبع الفول)
ومنبر المسجد وشجرة الجميز، كل شئ فى العش كان مختوما
بختم حضوره، فايقة، صابرة، وردة، هنية، أه لها من أسماء لم تعد
تملك فى الحياة أكثر من...ذكرى رجال، أه لها من معاناة تشكلت

فى حىاة الكثرىىن بمعناها الكامل؁ معاناة كافية بشكل ما
لتجسد معاناة...وطن!

أمام النافذة المغطاة برزاز الأمطار وقفت أنظر الى لاشئ؁ صورته
بادية فى كل قطرة من قطرات المطر الراحل من السماء للأرض؁
ضاحك فى احداها وبالك فى أخرى؁ حالم فى إحداها ويائس فى أخرى؁
حاضر فى احداها...وغائب فى أخرى!

انتبهت فجأة لصوت البيانو القديم؁ لأول مرة منذ قدومى أراه
يجالسـه؁ كان أمهر من أمهر عازف رأيتـه؁ اللعنة على هذا الراوى غريب
الأطوار؁ بارع هو فى كل شئ بشكل يثير الاستغراب؁ مقطوعته
كانت كافية لتذيب ثلوج الهيمالايا حزنا؁ كأنه به يرثى ذاك
الراحل على صفحاتى بلمساته على البيانو القديم؁ مازال هذا اللعين
بارعا فى كل شئ؁ مثيرا للتساؤل فى كل حركة؁ غريب أطوار
فى كل رد فعل؁ جدير هو بذلك الدور الغامض على الصفحات
التى حكاهـا على كل حال؁ أكاد أجزم أن البيانو ووالنافذة رقعة
الشطرنج والطاولة والكرسى ذى العجلات قد أصابهم الضجر من
طول معاشرته؁ هذا ان كان يعاملهم بنفس الغموض الذى يعامل

الأحياء به، هذا ان كان قد قابل أحد هؤلاء الأحياء سوى من الأساس منذ سنوات، لا يبدو بذلك الجفاء حين يعاملهم على كل حال، فنان مرهف الحس حين تعانق أنامله صفحة البيانو، قائد حكيم واسع الإدراك حين تحكم تلك الأنامل الرقعة ذات اللونين، شاعر ملهم خصب الخيال حين تغاظم عيناه الفراغ الفسيح خلف النافذة، مازال أمامي الكثير لأكتشف الحقيقة وراء هذا الرجل!

- زعلت عليه؟

خاطبني بها بعدما انتهى من عزفه ولم أنتهي من تأمل إياه فأجبت:

- عندك شك؟

- مم، يعني!

- انت ليه شايفني بالحيوانية دي؟، ايه اللي يجبرك تفضل معايا

كل الشهور دي وانت مش شايفني بنى آدم أساسا؟

قلتها بنبرة على صوتها بشدة فابتسم قائلا:

- مش محتاج تزق على فكرة أنا باسمع كويس.

-

- متزعلش!

- مش زعلان.
- كذاب.
- مُصَرَّتْخَانِق؟
- ليه زعلت على طلال؟
- قالها مباغتاً اياى بها كخصم انتظر الوقت المناسب لتوجيه
ضربة قاصمة لخصمه وقد نجح!
- لم أرد فابتسم من جديد قائلاً:
- انت زعلت عليه زعلك على أبطال الروايات والأفلام، زعل سيما يعنى.
- طيب.
- الحقيقة بتزعل!
- ماشى.
- هتفضل كده كتير؟
- كده ايه؟
- كده متضايق!
- عايز ايه؟
- أنا شفت اللي انت كتبتة على فكرة!

انتبهت لها متفاجئاً أقول:

- شفته فين؟، انا موريتوش لبني آدم!

- انا مش زي أي بني آدم أنا بطل الأحداث!

- ممكن تبطل أَلغاز؟!

- للدرجادی صعوبة على فهمك؟

- ايوه أنا غبي معلش.

- شفتها في عينيك، في ردود أفعالك، في...ماتشات الشطرنج

اللى لعبناها!

- ماتشات الشطرنج؟!

- بس مش بطل، احسن مما توقعت، مش ندمان انى حكيتلك.

- طيب شكرا، يعنى فيه أن شاء الله أمل تكمل باقى الحكايات؟

- ايه المانع؟ ياريت!

- بس قبل ما نسيب سرباز، مقولتليش مين هو؟

- مين هو مين؟

- سرباز!

ضحك بطريقة اعتبرتها مهينة قائلاً:

- افكرتكَ اذكى من كده.

- مانا قلتلك انى غبى!

- سرباز ده طلال وابراهيم وعماد وشافعى وكل اللى حكيتلك

عنهم دول.

- مش فاهم.

- عارف.

-

- سرباز دى كلمة فارسية معناها عسكرى الشطرنج.

- فارسية؟... طب واشمعنى اخترت الفارسية؟

- عشان الدولة الفارسية كانت مهد اللعبة، لما اخترعوها عملوا

الصف الأول من الجيش كله عساكر، كانوا مؤمنين بدور الجندى

البطل اللى بيعمى كل ممتلكات الدولة، اللعبة لما اتنقلت بعد

كده للدول العربية العرب ترجموا ده غلط، قالوا العساكر عددها

كبير فضحى بيها ملهاش قيمة، وده انعكس على فكر الأنظمة

والحكام، قالوا كل اللى عدده كبير ملوش لزمة ضحى بيه، فنت

المواطنين الغلبة يعنى مواطنين وعمال وفلاحين وعساكر وهكذا.

- انت عبقرى!

- شكرا!

- ممكن افصح عن شخصيتك الحقيقية لما الرواية تنزل السوق؟

- لا!

قالها فجأة بنبرة تختلف عن نبرة باقى الحديث، نبرة منزعجة
بشكل لم أره منه قبل الآن، نبرة...خائف!

- لا، قصدى ملوش لزمتة يعنى انت يهملك ايه انك تقول أنا مين؟

المهم الأحداث!

استطرد بها حديثه محاولا إخفاء ارتباكها يتحاشى النظر فى
وجهى، فهمت ما أرادها على كل حال، لم أشأ أن أنكأ له المزيد من
جروح (لا أعرفها)، أدت دفعة الحديث لشاطئ آخر قائلا:

- واضح ان لسه قدامى كتير عشان أعرفك!

ابتسم فى ثقة قائلا:

- حتى بعد الكثير ده مش هتعرفنى.

- ثقة دى ولا غرور؟

- سميتها زى ما تسميها مش مهم، ياما اتسمينا بغير أسامينا.

عقدت حاجبي استغرابا اتساءل:

- مش فاهم، مين اللى سماكم بغير أساميكم وليه؟

- الغريان!

- تانى؟

- وتالت.

- واضح ان مفيش فايده!

- قلتلك متستعجلش!

- طيب!

- لسه قدامنا سنين حكايات!

- سنين؟!

- مش انت عايز تسمع الحكاية لحد آخر فصل وتعرف كل

الأبطال لغاية آخر بطل؟

- ياريت!

- يبقى تسمع من سكات.

قابلتها بزفرة عميقة حملت استسلامي لإرادته التى فرضت

سيطرتها على حديثنا متسائلا أهرب من غموضه:

- الحكاية الجاية حكاية مين؟

- تختة!

- إيه؟

- تختة!

- أمرى لله شكلى هعانى تانى... احكى!

- نسيت حاجة مهمة!

- إيه تانى؟!

لم يرد، اكتفى بالنظر الى تلك الطاولة التى ضمت جلساتها لشهور

مضت تعلوها... رقعة شطرنج تضم جيشين يستعدان لمعركة ما!

إلى اللقاء فى

•

•

•

•

تختة!

